


AGLAIT
GENESIS EXODUSELO

RB 66276



PURCHASED FOR THE
UNIVERSITY OF TORONTO LIBRARY
FROM THE
CANADA COUNCIL SPECIAL GRANT
FOR
LINGUISTICS



Digitized by the Internet Archive
in 2022 with funding from
University of Toronto

AGLAIT IVSORNAITUT
GENESIS EXODUSELO

TAMADJA

SILLAKSUB PINGORTITAUNINGA
ISRAELEKULLO AULARTITAUNINGAT
EGIPIENEMIT

LONDON

BRITISH AND FOREIGN BIBLE SOCIETY

1925

GENESIS AND EXODUS IN ESKIMO
(LABRADOR DIALECT)

PRINTED IN GREAT BRITAIN

MOSESIB AGLANGITA SIVORLINGIT UBVALO

GENESIS,

TAMADJA PIGIARNEK.

KAP. I.

Sillaksûb pingortitauninganik.

1 **PIGIARNERME** Gûdib kilaglo nunalo pingortipak.

2 Nunalo illênarsimavok sunatakaranelo, itinerublo kollâ tâkrok, Gûdiblo anerningata imaksuit kollangiarpait.

3 Gûdelo okarpok: Kaumalerle. Kaumalerpok tagva.

4 Gûdelo takovok kaumajok nâ mangmat. Tagva Gûdib kaumajok avikpâ tâktomit.

5 Kaumajorlo Gûdib uvlormik taivâ, tâktorlo unnuarmik taivlugo. Tagva unnungorpok uvlângorlunelo, uvlok sivorlek.

6 **Gudelo** okarpok: Aulangitokarle imaksuit akorngane, aviktaujutiksaujomik imaksuit akorngane.

7 Tagva Gûdib aulangitok senavâ, imaksuillo aulangitub atânêtut avikpait imaksoarnit aulangitub kollânêtunit. Taimailerporlo.

8 Aulangitorlo Gûdib kilangmik taivâ. Tagva unnu-
ngorpok uvlângorlunelo, uvlub aipanga.

9 **Gudelo** okarpok: Imaksuit kilaub atânêtut atautsemut katersorlit, ipterilingajok takuksaurkovlugo. Taimailerporlo.

10 Ipterilingajorlo Gûdib nunamik taivâ, imaksuit atautsemut katersortut imarbiksoarmik taivlugit. Gûdelo takovok nâ mangmat.

11 Gûdelo okarpok: Nunamit nuilerlit iviksukkat, perortullo kingorliksatalît, napârtullo, paungalît, paungalivaktut ingmingne kingorliksatakartunik nuname, ilûnatik ingmikut pitjutilît. Taimaiporlo.

12 Nunamillo nuilerput iviksukkat perortullo kingorlik-satalît, ilûnatik ingmikut pitjutilît, napârtullo paungalivaktut ingmingne kingorliksatakartunik, ilûnatik ingmiknt pitjutilît. Gûdelo takovok nâ mangmat.

13 Tagva unnungorpok uvlângorlunelo, uvluk pingajuak.

14 **Gudelo** okarpok: Kilangme aulangitome kaumakute karle, uvlormiglo unnuarmiglo aviktitsijuksanik nellunernullo uvlunullo, jârinullo nellunaikutaksaujunik.

15 Kaumakutiksauvut kilangme aulangitome, nunamik kaumairkovlugit. Taimailerporlo.

16 Gûdiblo kaumakutsoâk magguk senavak, kaumakut anginersak attaniotijuksak uvlormut, kaumakullo mikkinersak attaniotijuksak unnuarmut, uvloritjallo (senavait).

17 Gûdiblo kilangmut aulangitomut illivait, kaumairkovlugit nunamik.

18 Attanioterkovlugillo uvlormut unnuarmullo, aviktiterkovlugillo kaumajomiglo tâktomiglo. Gûdelo takovok nâhangmat.

19 Tagva unnungorpok uvlângorlunelo, uvlut sittamangat.

20 **Gudelo** okarpok: Imak aulaviole ômajunut tarnelingnut aulajunut, tingmitjallo tingilit nuname kilaub aulangitub atâne.

21 Gûdiblo pingortipait imaksiutit angijut, ômajullo tarnilît tamaita aulajut, imab aulavigijingit, tamaita ingmikut pitjutilît, tingmitjallo esarolît tamaita, tamaita ingmikut pitjutilît. Gûdelo takovok nâhangmat.

22 Gûdiblo saimauserpait okarlunelo: Kinguvâktâkattarluse unuksivalliatitse, imarbiksûb imanga nâmavlugo, tingmitjallo unuksivallialit nuname.

23 **Tagva** unnungorpok uvlângorlunelo, uvlut tellimangat.

24 Gûdelo okarpok: Nunamit pingorlit ômajut tarnilît, ilûnatik ingmikut pitjutilît: nergjutit pâmgortullo ômajullo nunaksiutit, ilûnatik ingmikut pitjutilît. Taimailerporlo.

25 Gûdiblo pingortipait ômajut nunaksiutit, tamaita ingmikut pitjutilît, nergjutillo ingmikut pitjutilît, tamaitalo pâmgortut ivjome ingmikut pitjutilît. Gûdelo takovok nâhangmat.

26 Gûdelo okarpok: Inuliorta adsilivluta, uvaptitutituksanik, attaniojuksanik mingeritjanut imarbingmêtunut, tingmitjanullo kilaub attânêtunut, nergjutinullo, nunamullo ilûnânut, pâmgortunullo tamainut, aulajunut nuname.

27 Gûdiblo inuk pingortipâ, ingminik adsilivlune, Gûde adsilivlugo pingortipâ, angullo arnarlo pingortipak.

28 Gûdiblo saimauserpak okautivlugiglo: Kinguvâktâkattarlutik unuksivallialeritik, nuna nâmavlugo attaniotivigivlugolo: nâlegauleritiglo mingeritjanut imânêtunut, tingmit-

anullo kilaub atânêtunut, ômajunullo tamainut aulajunut
nuname.

29 **Gudelo** okarpok: Ahâk, illiptingnut tunivakka perortut
kingorliksatalît tamaita nunaksoarme ilûnâne, napârtullo
tamaita paungalivaktut kingorliksatakartunik, tamakkoa
nerkiksarinipatik.

30 Omajunullo nunaksiutunut tamainut, tingmitjanullo
tamainut kilaub atânêtunut, ômajunullo tamainut nuname
aulajunut tarnelingnut, perortut tungujoktat tunivakka,
nerkiksarijaurkovlugit taipkonunga. Taimailerporlo.

31 Gûdiblo pingortitane tamaita ullernaigigamigit, tako-
vok nâmadlarmatta. Tagva unningorpok uvlângorlunelo,
uvlut sixingat.

KAP. II.

*Sabbatemik, perorsêvingmiglo Edeneme, nuliârêngnerublo pingor-
titauninganik.*

1 **INNERPUT** tagva kilaglo nunalo kattigmajoksoakoti-
gillo tamaitaksuit.

2 Uvlullo seveningane Gûdib sorairpait sullinine pijane.
Uvlullo seveningane merngoerserpok sullinermunit tamainit
pijaminut.

3 Gûdiblo uvlut seveningat saimanartipâ ivsornaitilâlo,
amattomane merngoerserame sullinermunit tamainit pijaminut
pingortitsivlune.

4 **Tamadja** kilaublo nunablo pingortitauningak, pingorti-
aungmannik taipsomane, Gûdib Nâlekab nunalo kilaglo
enangmagik.

5 Naternablo ukpigangit sunatuinait nunamêlungilat
sulle, naternablo perortungit sunatuinait perorsimangilat
sulle. Gûde Nâlegak sillaluktitsingimat sulle nuname, inu-
kangimallo sulle perorsêvilerijuksamik.

6 Kissiane pujorak kangattarpok nunamit, kausertilugo
nunab kânga ilûnât.

7 Gûdelo Nâlegak ivjomit, nunab ilanganit, inuliorpok,
upporlugolo anernermik ômanartomik kingâkikkut. Tai-
naglo inuk tarnelingorpok ômajomik.

8 **Gudelo** Nâlegak perorsêviliorpok Edeneme kangilerme,
agvungalo illivâ inuk senajane.

9 Gûdiblo Nâlekab nuitipait nunamit napârtut sunatuinait
akorannertut nerkiksarsivigijominartut, amma napârtok

ômanartok perorsêviub kerkane, napârtorlo illisimanartok ajungitomik ajortomiglo.

10 Kôksoarlo kôkpok Edenemit, perorsêvik kausertilugo tagvangallo avigame, avalerkokarpok sittamanik.

11 Kôb sivorliub attinga Pison: tâмна Havilab nunangata ilûnane avatâgut kôkpok. Tagvane goldekarpok.

12 Nunablo tâpsoma goldinga pivianartôvok; amma kutso tippitsiariktok tagvane nagvartaugivok alligorlo tungujuangajok.

13 Kôb aipangata attinga Gihon; tâмна Kussib nunangata ilûnane avatâgut kôkpok.

14 Kôt pingajuata attinga Hidêkele; tâмна Assiriab kiglingagut kôkpok. Kôllo sittamangat tagva Farat.

15 Gûdiblo NâleKab inuk tiguvâ, perorsêvingmut Edenemêtomut illivlugo, senarkovlugo udjertorkovlugolo tâpsominga.

16 Gûdiblo NâleKab inuk perkovâ okautivlugo: Napârtunit perorsêvingmêtunit tamainit nerkiksarsiniarpotit,

17 Kissiane napârtomit ajungitomiglo ajortomiglo illisimanartomit nerkiksarsitailigit; uvlut nelliane ômangat nerri-guvit, tokodlarniarpotit.

18 **Gudelo** Nâlegak okarpok: Nâmangilak, inuk kissimetôngmat, ikajortiksalioromavara aipaksanganik.

19 Gûdib NâleKab ivjomit sakkertinamigit ômajut tamaita naternamêtut, tingmitjallo tamaita kilaub atânêtut, pitipait inungmut, nautsertoromavlune, kanok tainiarmangâgit; kanorlo inub ômajut tarnelît tamaita tainiarmagit, tagva attiksangit.

20 Inublo attekartipait nergjutit tamaita tingmitjallo tamaita kilaub attânêtut, ômajullo tamaita naternamêtut, kissiane inuk ikajortiksarsingilak aipaksaminik.

21 Tagva Gûdib NâleKab inuk sinidlar ipâ, siniktilugolo tullimângita ilângat tiguvâ, inninga illijivigiviugo uviningmik.

22 Gûdiblo NâleKab tullimâk inungmit tigujane arnaliorpâ, âlâlo tâpsomunga.

23 Tagva inuk okarpok: Atso illâ, saunek saunima illanga, uviniglo uviningma illanga. Angutib aipanganik taijak-sauvok una, angumit tigujaugame.

24 Tamanna pivlugo angutib atâtane anânanelo kema-ngniarpak, nuliane ungagivlugo, tâpkoalo magguk uvini-niarpuk atautsemik.

25 Tamarmiglo ussingavuk, Adamelo nuliangalo, kangu-sugatiglo.

KAP. III.

Nâk kattakpuk ajortomut, pidlartauvuk, angerviovuk Gûdemut.

1 **KUGLUGIARLE** pingitsertornersauvok ômajunit tainait naternamêtunit, Gûdib Nâlekab senajanginit, okarporlo arnamut: Gûde okamarigalloarkâ napârtut perorsêvingmêtut nellianit nerkiksarsiniangilatik?

2 Arnab tagva kuglugiak okautivâ: Napârtut perorsêvingmêtut paunganginik nerrivakpoguk,

3 Kissiane napârtub perorsêviub kerkanêtub paungangit pivlugit Gûde okarpok: Nerkiksarsivigijaksaringilatik aktoragolônêt, tokolerkonatik.

4 Tagva kuglugiak arnamut okarpok: Tokolerniangimariipotik illa:

5 Gûde nelungilak, uvlut nelliane nerriguptik ômangat, ijitik uititauniarmatta, Gûdetullo ilerniaraptik, ajungitomiglo ajortomiglo illisimavlutik.

6 Arnablo napârtok takonârpâ nerkiksarsivigijominartok takorannertorlo, napârtok pijominartok, illisimanarmat; tigusivorlo paungangita ilanganik nerrivlunelo, ilangallo uiminut tunivâ, tâmnalo nerrigivok.

7 Uititaulerput tagva tamarmik ijingit, mallugosulerpuglo ussingagamik; merksorlutiglo faigeliksab millukattanginik sailitaliorpuk.

8 **Gudiblo** Nâlekab nippinga tussarpâk perorsêvingme arvertarmat uvlok niglalertilugo. Tagva Adame nuliangalo Gûdib Nâlekab kênanganit ijeriartorpuk napârtut perorsêvingmêtut akorngannut.

9 Gûdiblo Nâlekab Adame kairkovâ okautivlugo: Nanêkêt?

10 Okarporlo: Nippît tussarapko perorsêvingme sivôravunga, ussingagamalo ijeriartorpunga.

11 Okarporlo: Kia okautivâtît ussingagavit? Napârtomit illingnut nerkiksarsiviorkongitamnit nerrivêt?

12 Adamelo okarpok: Arnab uvamnut aiparijaurkojavit tunidjivigingmanga napârtomit, nerrivunga.

13 Tagva Gûdib Nâlekab arnak okautivâ: Sôk taimai-liorokêt? Arnarle okarpok: Kuglugiab taimak uiveringmanga, nerrivunga.

14 Tagva Gûdib Nâlekab kuglugiak okautivâ: Taimai-lioravit, ôminarsilualerit nergjutinit tamainit ômajunillo •

naternamêtunit tamainit. Pâmgorit ivjotômavlutit uvluk satit tamaita nâvlugit.

15 Akkerartortigêktitsomavapse igvillo arnarlo, kinguvâksat kinguvângalo; tâpsoma niakut tullidlaromârpâ igvillo kingmingagut kêjomârpâ.

16 Arnamullo okarpok: Anernartomik ikpigititsomârpâgi singailerangavit, âniadlarlutillo ernisugomârpotit, uillo kajungerijomârpâ, tâmnale nâlegaujomârpok illingnut.

17 Adamemullo okarpok: Nuliavit nippinga nâlegangne, nerrivlutillo napârtomit perkojijutigijamnit, okarlunga: ômangat nerrijuksaungilatit; tagva nuna ôminarsile pivlutit, siorniorlutit inôgutiksarsiorvigijaksarivat uvluksatit nâvlugit.

18 Ukpiganik kakkilautilingnik perornerdluktuniglo kakkilautilingnik nuititsijomârpok illingnut, perortullo naternamêtut nerrijaksarivatit.

19 Kênait kitjijârtilugo nerkiksarnik nerrijomârpotit, nunamut utterviksat tikkidlugo, tagvangat tigujaunagavit; ivjôvotit ivjungortuksaungmivlutillo kingumut.

20 Adamiblo nuliane Evamik atserarpâ, inôjut ilûnamatsiatik anânagingmatsuk.

21 Gûdiblo NâleKab Adamelo nuliangalo annorâliorpak amivinernik atitilugiglo makkoninga.

22 Gûdelo Nâlegak okarpok: 'Takovase, Adame uvaptitunilertok, ajungitomiglo ajortomiglo illisimajok. Mânale issak-tailijaule, tigusiylune napârtomit ômanartomit nerrivlunelo inôlerlunelo soraijuitomik:

23 Tagva Gûdib NâleKab aulartipâ perorsêvingmit Edenemit, nuna senavigivlugo perkovlugo, tagvangat tigujaumangmat.

24 Annitipâlo inuk, perorsêviublo Edenib kangianut Kêrubit pitipait saviksoalijartut keblâlâjunik, aulajalerangata, udjertortuksat apkomik napârtomut ômanartomut.

KAP. IV.

Kainelo Abelelo. Kainib kinguvângit. Sête.

1 **ADAMIBLO** nuliane Eva uvinikatigingmago singailerpok, Kainelo erniarivâ, okarlune: Pivunga angumik NâleKab ikajorningagut.

2 Erningmivlunelo erniarivâ nukâ Abele. Abelelo mianersijôlerpok saukkanik, Kainele perorsêvilerijôlerpok.

3 Pijokarporlo kingorngagut, Kaine tunergutiksamîk tunitjingmat Nâlekamut, nunab perortungita ilanginik.

4 Ammatauk Abele tunitjivok saugakotime piarangita angijokpalluit ilanginik kuinijunik. Nâlekablo Abele tuner-gutâlo kuviagivak.

5 Kainele tunergutâlo kuviagingilak. Tagva Kaine ningarosulerpok angijomik, kênangalo kattalungavok.

6 Nâlegak tagva Kainemut okarpok: Sôk ningarosukkêt? Sôk kênat kattalungavâ?

7 Imaingilâk: Idluartok kajungerigungne maksoavotit; idluartorle kajungeringikungne idluituligiax utakkivok upkoarme kajungerlune illingnut? Igville tâpsomunga attanio-tilerit.

8 Kainible nukane Abele okakatigivâ; pijokarporlo nater-namêngmannik, Kainib nukane Abele opakpâ tokolugolo.

9 **Tagva** Nâlekab Kaine okarvigivâ: Nukat Abele naûk? Kaine okarpok: Nellovara, nukara pairijaksarivigô?

10 Okarporlo: Sumik piniarkêt? Nukavit aungata nip-pinga kaggorpok uvamnut nunamit.

11 Mâna ôminarsilerit nuname. Tâpsoma kanine aitarpâ, nukavit aunga aggangnit pigivlugo.

12 Perorsêvileriguvit, nunab pijungnartaminik tunitjivi-gijaksaringilâtit kingorngagut. Saksârtuksauvotit kemâjuk-sauvlutillo nuname.

13 Kainelo okarpok Nâlekamut: Idluitulinera angiluarpok issumagijaujungnairungnarane.

14 Takkuit, uvlome nunamit aulartiparma kênarnillo ijeriartortuksauvunga. Saksârtuksauvlunga kemâjuksauvu-nga nuname. Imailingalârpunga: uvamnik naipitsijub toko-lârpânga.

15 Nâlekable okautivâ: Aukak, Kainemigle tokotsijok akkiniartaulârpok sevenertortauvlune. Nâlekablo Kaine nel-lunaikuserpâ, tokôtaurkonago kimut naipitinganut.

16 Tagva Kaine Nâlekab kênanganit aularpok, nuname Nodeme nunakalerlune, Edenib kangiane.

17 **Kainiblo** nuliane uvinikatigingmago singailerpok, Hanokelo erniarivâ. Iglugasaliorporlo, ernime attingatut Hano-kemik atserarlugit.

18 Hanokible ernitârivâ Irad, Iradib ernertârivâ Mahujael, Mahujaelib ernertârivâ Metusael, Metusaelib ernertârivâ Lamek.

19 Lamekele maggungnik nulianikpok, aipâ attekarpok Adamik, aipâ Zillamik.

20 Adablo erniarivâ Jâbale; tâмна sivorlerivât tuppernik-iglokartut nergjutiniglo mianersijut.

21 Nukanga attekarpok Jûbalemik; tâмна sivorlerivât kelularalijartut nipjausijartullo ilûnatik.

22 Amma Zillatauk ernivok Tubalkainemik; tâмна kan-nujanik kikianiglo sunatuinarnik sabviorpok. Tubalkainiblo najanga Naema.

23 Lamekiblo nuliângne okautivak: Adalo Zillalo, okautsimnik tussaleritik; illiptik Lamekib nuliâgik, kamatsialeritik, sumik okarama. Angumik tokotsivunga, ikkilermanga; inôsuktomik tokotsivunga, killermanga.

24 Kainemik tokotsijok akkiniartaulârmат sevenertor-taumlune, tagva Lamekemik tokotsijok seventy sevenertor-taumlune akkiniartaulârpok.

25 **Adamib** nuliane amma uvinikatigingmago, ernermik ernivok Setemik attekartilugo (okarlune); Gûdib kinguvângmik assianik tunitjivigivânga, Abelib inangertiksanganik Kainib tokotangata.

26 Setelotauk ernertârpok attekartilugolo Enosemik. Taipsomane Nâlekab attinga tuksiarvigilerpât.

KAP. V.

Setekut kinguvârêt Adamemit Noa tikkidlugo.

1 **TAMADJA** aglait inuit kinguvârêngninginik. Taipso-mane Gûdib inuk pingortinamiuk, senavâ Gûde adsilivlugo.

2 Angullo arnarlo pingortipak sainauserlugiglo inungniglo atserarlugik, taipsomane pingortitaungmannik.

3 Adamelo jârekaramе 130nik, ernertârpok ingmitut-itomik, adsiminik; tâмна Setemik atserarpâ.

4 **Kingorngagullo** sulle jârinik 800nik inôvok, ernertârlune panniktârlarmelo.

5 Jâringita ilûnatik unurningit 930ovut; tokovorlo.

6 Sete jârekaramе 105nik, Enos ernertârivâ.

7 Kingorngagullo sulle jârinik 807nik inôvok, ernertârlune panniktârlarmelo.

8 Jâringita ilûnatik unurningit 912ovut; tokovorlo.

9 **Enos** jârekaramе 90nik, Kênan ernertârivâ.

10 Kingorngagullo sulle jârinik 815nik inôvok ernertârlune panniktârlarmelo.

11 Jâringita ilûnatik unurningit 905ovut; tokovorlo.

12 **Kenan** jârekaramе 70nik, Mahalalel ernertârivâ.

13 Kingorngagullo sulle jârinik 840nik inôvok, ernertâr-
ine panniktârlarmelo.

14 Jâringita ilûnatik unurningit 910ovut; tokovorlo.

15 **Mahalalel** jârekaramé 65nik, Jâred ernertârivâ.

16 Kingorngagullo sulle jârinik 830nik inôvok, ernertâr-
ine panniktârlarmelo.

17 Jâringita ilûnatik unurningit 895ovut; tokovorlo.

18 **Jared** jârekaramé 162nik, Hênog ernertârivâ.

19 Kingorngagullo sulle jârinik 800nik inôvok ernertârlune
panniktârlarmelo.

20 Jâringita ilûnatik unurningit 962ovut; tokovorlo.

21 **Henog** jârekaramé 65nik, Metusala ernertârivâ.

22 Metusalalo ernertârigamiuk, Hênog arvertarpok Gûde
aiparivlugo jârinik 300nik sulle, ernertârlune panniktârlar-
melo.

23 Jâringita ilûnatik unurningit 365ovut.

24 Hênog Gûde aiparivlugo arvertarpok; sakijârungnai-
porlo, Gûdib tigungmago.

25 Metusala jârekaramé 187nik, Lâmek ernertârivâ.

26 Kingorngagullo sulle jârinik 782nik inôvok ernertârlune
panniktârlarmelo.

27 Jâringita ilûnatik unurningit 969ovut; tokovorlo.

28 **Lamek** jârekaramé 182nik, ernertârpok.

29 Tâмна Noamik atserarpâ okarlune: Tâpsoma manigo-
romârpâtigut kappiasungniptingne aggaptalo sulijaksakar-
ningane nuname ôminarsijaujome Nâlekamut.

30 Kingorngagullo sulle jârinik 595nik inôvok ernertâr-
lune panniktârlarmelo.

31 Jâringita ilûnatik unurningit 777ovut; tokovorlo.

32 Noa jârekaramé 500nik, ernertârivait Semelo Ha-
melo Jafetelo.

KAP. VI.

Ullitornivaksûb okautauninganik.

1 **INUILLE** unuksivallialermatta nuname panniktârmat-
talo,

2 Tagva Gûdib erningita inuit panningit kemergolerpait
pinnarnarasugivlugit, annerijamiglo nellît nularivait.

3 Tagva Nâlegak okarpok: Anernera inungnêtsainaro-
mângilak, uviniongmatla illa; nelliata uvluksangit tagva
jârit 120.

4 Taipsomane nuname inukpakarpok kingornganelo, Gûdib erningita inuit panningit nuliarigamigit kitorngakarlu-tiglo tâpkonangat; tamadja pitsartujoksuit itsak tussauma-jaudlartut.

5 **Nalegarle** takovok inuit uivêtoksôninginik nuname, ôimatingitalo issumangita senajangit idluênarmatta kaut tamât.

6 Tagva Nâlegak kakkialerpok, inuit pingortigamigit nuname, ômatinigullo kiksarutigivâ.

7 Nâlegarlo okarpok: Inuit pingortitakka pêjaromavakka nunamit inuillo nergjutillo pâmgortullo tingmitjallo aglât kilaub atânêtut, kakkialerama pingortigapkit.

8 Noale saimaneksivok Nâlekab ijîgingne.

9 **Tamadja** unipkautsit Noamik: Noa angutauvok idluartok, pidlaraksausuertok inôkatime akornganne; Gûde aiparivlugo Noa arvertarpok.

10 Pingasuniglo Noa ernertârpok: Sememiglo, Hame-miglo, Jafetemiglo.

11 Nunale asserorsimavok Gûdib sângane, idluitulinerмик tatavlune.

12 Tagva Gûdib nuna ullernaigivâ, sunaubva asserorsimavok, uvinilît ilûnamatsiatik apkutigijatik asserormattigik nuname.

13 Tagva Gûde Noamut okarpok; Uvinilît ilûnamatsiatik naggatiksangat nelliutivok uvamnut, nuna idluitulinerмик tatamat, ahâk, asseroromavakka nuna illagivlugo.

14 Illingnut umiaksoaliorit pingermik, takamanelo iglunik senavlutit, kutsorlugolo kutsumik illuagut sillatâgullo.

15 Imâk senajaksarivat; tallertut 300tut takitigijok, tallertut 50tut silliktigijok, tallertut 30tut poktotigijok.

16 Igalâkartitaksarivat umiaksoak, tallertut poktotigijok senavlugo kollânit, upkoakartilugolo umiaksoak senerangagut, kollerêktokartilugolo allermik ketterdlermiglo kollermiglo.

17 Ahâk, ullitornivaksoarmut nuna tikkitaurkojomavara, asseroromavlugit uvinilît tamaita ômanartomik anernelît kilaub atânêtut. Ilûnamatsiatik nunamêtut nungutaksauvut.

18 Igville angervigivagit, umiaksoarmullo ikijariakarpotit igvit, ernitillo, nuliallo, ernivit nuliangillo illagivlugit.

19 Umiaksoarmullo itertitsijuksauvotit ômajut ilûnatik nerkelît illanginik, attunit aiparêngnik angumiglo arnamiglo tokotailitaurkovlugit ilingnêdlutik.

20 Tingmitjat ingmikut pitjutilît, nergjutillo ingmikut

itjutit, pâmgortullo sunatuinait nunamêtut ingmikut pitju-
it illangit, attunit aiparêklutik itertuksauvut illingnut
okotailitaurkovlugit.

21 Nerkiksanik sunatuinarnik nerkiksauvaktunik neksar-
uksauvotit torkorlugillo, nerkiksaurkovlugit illingnut tâpko-
ungalo.

22 Noablo Gûdib perkojangit tamaita nâletsiarlugit
piniarutigivait.

KAP. VII.

Ullitornivaksoak.

1 **NALEKABLO** Noa okautivâ: Umiaksoarmut ikkilerit,
gvit inukotitillo ilûnatik idluartorigapkit sâme kinguvarêt
ikkua akornganne.

2 Nergjutit ivsornaitut sunatuinait illanginik ilaurkoji-
erit illingnut, attunit aiparêngnik sevenenik, nergjutillo
ivsornartut illanginik attunit aiparêngnik atausingnik.

3 Taimaktauk tingmitjat kilaub atânêtut illanginik, attu-
nit aiparêngnik sevenenik, kinguvâksakarungnartut nungu-
aurkonagit nunaksoarme ilûnâne.

4 Uvlut sevenit nâkpatta, uvlut 40 unnuallo 40 nâvlugit
sillalurkojijomârpunga nunamut, nunamit pêjaromavlugit
majut tamaita pingortitakka.

5 Noable Gûdib perkojangit tamaita nâletsiarlugit pinia-
rutigivait.

6 Noa jârekarmat 600nik, ullitornivaksûb nuna tikkipâ.

7 **NOALO** umiaksoarmut ikkivok ernine nulianelo ernimelo
nuliangit illagivlugit, ullitornivaksûb sivorngagut.

8 Nergjutit ivsornaitut illangit, ivsornartullo illangit,
tingmitjallo illangit, pâmgortullo nunamêtut ilûnatik illangit

9 Illauvut Noamut umiaksoarmut attunit aiparêklutik,
porlo Nâlekab Noa perkongmago.

10 Uvlulle sevenit nâlermatta, ullitornivaksûb nuna tikki-
erpâ.

11 **Noa** jârekarmat 600nik, takkerub aipangata uvlungita
eventeeninganne, uvlorme tamattomane ittinersûb puilavi-
git ilûnatik aitangalerput kilaublo igalângit ilûnatik angma-
erput.

12 Sillalukarporlo nuname uvlut 40 unnuallo 40 nâ-
vlugit.

13 Uvlorme taipsomaneluatsiak Noa ikkivok umiaksoar-

mut, Semelo, Hamelo, Jafetelo, ernine, nulianelo, ernimelo nuliangit pingasut illagivlugit.

14 Taimaktauk ômajut sunatuinait ingmikut pitjutilît, nergjutillo sunatuinait ingmikut pitjutilît, pâmgortullo sunatuinait pâmgorpaktut nuname ingmikut pitjutilît, tingmitjallo sunatuinait ingmikut pitjutilît, tingijungnartut ilûnatik, esarokartut ilûnatik.

15 Tâpkoa ilûnatik aiparêklutik ikkivut Noamut umiaksoarmut, uvinilît ômanartomik anernelît ilûnatik illangit.

16 Aiparêklutik ikkivut, uvinilît ilûnatik illangit, sorlo Gûdib perkongmago. Nâlegarlo pallangairsivok kingorngagut.

17 Tagva ullitornivaksoak nunamut nelliutilerpok uvlut 40 nâvlugit, imaksoarlo angijororlerpok, umiaksoak pokilaktilugo kangatartilugolo nunab kânganit.

18 Imaksoarlo sugaluluarpok angijororlune nuname, umiaksoarlo imaksûb kângagut ingergavok,

19 Imaksoarlo sugaluluarpok angijomik nuname, kakkak-suit tamaita kilaub atânêtut ulliklugit.

20 Tallertut 15tut ittutigijomik imaksoak sugaluluarpok kakkat ulliklugit.

21 Tagva ippidlarput uvinilît ilûnamatsiatik aulajut nuname: tingmitjallo nergjutillo ômajullo pâmgortullo ilûnatik pâmgorpaktut nuname inuillo ilûnatik.

22 Ilûnamatsiatik panertomêtut, ômanartomik anerner-mik anerterijut kingâmikkut tokolerput.

23 Taimak nunamêtut ilûnamatsiatik nungutauvut; inuillo nergjutillo pâmgortullo tingmitjallo kilaub atânêtut, ilûnamatsiatik nunamit pêjartauvut. Noalo kissime amiakôvok umiaksoarmiokatingillo.

24 Imaksoarlo sugaluluarpok nuname uvlut 150 nâvlugit.

KAP. VIII.

Ullitornivaksoak sorairpok.

1 **GUDIBLE** Noa erkarpâ, ômajullo tamaita nergjutillo tamaita umiaksoamiokatingit, anoremiglo anordlertitsivok nunab kângagut, imaksoarlo tinersoariarpok.

2 Ittinersûblo puilavingit simiktaulerput, kilaublo iga-lângit, sillaluksoarlo kilangmit sorairkojauvok.

3 Imaksûblo nuna kemalerpâ kemakpalliavlugi, imaksoarlo miklivok, uvlut 150 nângmatta.

4 Takkit seveningata uvlungita seventeeninganne umiaksoak ikkarikpok Araratib kakkangane.

5 Imaksoarlo miklivalliavok takkit teningat tikkidlugo. Takkit teningata uvlungita sivorlerpânganne kakkat kângit naitainarput.

6 **Uvullo** 40 nângmatta, Noab igalâk umiaksoarmêtok enajane upkoerpâ.

7 Tullugarlo annitipâ, tâmna aularpok uttertarlunelo, nuna imakarungnailerkârtinago.

8 Taubelo annitipâ kaujjomavlune imakanginersaunginangât nuname.

9 Taubele miviksaminik naipitsinginame, tâpsomunga uttillerivok umiaksoarmut, imakarmat sulle nunaksoarme lûnâne. Issaktorlugo tiguvâ tagva, ingminut pitilugo umiaksoarmut.

10 Utakkivorlo amma uvlunik sevenenik, amma taube annitilugo umiaksoarmut.

11 Taubiblo tâpsoma tikkipâ unnulermat, sunaubvalo, napârtub orksuliub millukattanganik ômarmik kingmiartok. Tagva Noa tukkisilerpok imaksoak miklisimangmat.

12 Sullelo utakkivok amma uvlunik sevenenik; taubelo umiaksoarmut annitingmago, uttervigijungnairpâ.

13 (Noa) jârekarmat 601nik, takkerub sivorliub uvlungita sivorlerpânganne nuna imairutivok. Tagva Noab umiaksub kânga pêrpâ nautsertorlunelo, sunaubva, nunab kânga imairutivok.

14 Takkerublo aipangata uvlungita 27ingane nuna pannerpok.

15 **Gudiblo** Noa okarvigivâ okarlunelo:

16 Umiaksoarmut annilerit igvit nuliallo ernitillo ernivillo nuliangit illagivlugit.

17 Omajullo ilûnatik illingnêtit, uvinilît ilûnatik illagiangit, tingmitjallo nergjutillo pâmgortullo ilûnatik pâmgorpaktut nuname annilit illagivlutit; pivalliajuksauvut nuname, kinguvâktârkattarlutiglo unuksivalliajuksauvut nuname.

18 Tagva Noa annilerpok ernine nulianelo ernermelo nuliangit illagivlugit.

19 Taimaktauk ômajut ilûnatik, pâmgortullo ilûnatik, tingmitjallo ilûnatik, pâmgorpaktullo nuname ilûnatik, ingmiakut illagêklutik, annilerput umiaksoarmut.

20 Noalo Nâlekamut tunerguserviliorpok, tigusivlunelo nergjutit ivsornaitut sunatuinait illanginik, tingmitjallo ivsor-

naitut sunatuinait illanginik, ôtaksanik tunerguserpok tuner-guserviub kângane.

21 Nâlekablo naimavâ tippitsiariktok, ômamigullo okar-pok: Kingorngane nuna ominarsititsomairtara inuit pitjuti-givlugit; inub ômatingata kajungilarningit ajortoksôngmatta sorusioninganit, kingornganelo ômajut tamaita nungutitso-mairtakka, sorlo pisimagama.

22 Kingorngagut nunaksûb uvlungit nâvlugit karngasui-viksak kattersuiviksarlo, itje kiaglo, aujak okiorlo, uvlok unnuarlo sorairniatsangilat.

KAP. IX.

Perkojat nutât. Gûdib angerninga. Noab erningit.

1 **GDIBLO** saimauserpait Noa erningillo okarvigivlugit: Kinguvâktâkattarluse unuksivallialeritse, nuna nâmavlugo.

2 Nergjutit ilûnatik nunamêtut, tingmitjallo ilûnatik kilaub atânêtut, aulajullo ilûnatik nunamêtut, mingeritjallo ilûnatik imarbingmêtut erksigijaksarivâse koaksârutigivluse; aggapsingnut tunijaumavut.

3 Aulajut ilûnatik ômajut nerkiksauvut illipsingnut; tai-maktau perortunik tungujoktarnik tamainik tunitjivigivapse.

4 Kissianele nerke, aungminik sulle ômajutelik, nerrija-saringilase.

5 Illâle, ause inôtigijase aperkutigijomârpara, ômajunut tamainut aperkutigijomârpara; inublo inôtigijanga aperkutigijomârpara inungmut kinamullônêt, kattangutigingmago.

6 Nelliat inub aunganik kovisijok, tâpsoma aungatauk inungmut kovijaujuksauvok; Gûdib inuk senangmago ingminik adsilivlune.

7 Kinguvâktâkattarluse unuksivallialeritse, ômaridlaritse nuname unuksivalliavluse.

8 **Gudiblo** Noa erningillo okarvigivait okarlune:

9 Ahâk, illipsingnut angerpunga kinguvâksapsingnullo,

10 Omajunullo tarnelingnut tamainut illipsingnêtunut, tingmianullo, nergjutinullo, nunablo ômajunginut tamainut najortapsingnut, illa, umiaksoarmit anisimajunut ilûnama-tsianginut, ômajut nellilônêt nunamêtut illautilugit,

11 Illipsingnut angerpunga, mattoma kingorngane uvinigit ilûnatik asserortauniarungnairtuksaungmatta ullitornivaksûb imaksoanginut, mattomalo kingorngane ullitorni-

aksoakarniarungnairtuksaungmat nunab asserortautiksaganik.

12 Gûdelo okarpok: Tamadja nellunaikutaksak, illipsingnut angerama ômajunullo tarnelingnut tamainut illipsingnêtnut, kingorlerpaujuksanut aglât:

13 Ajagutakotiga nuvujanut illivara; tâмна nellunaikuksauvok, angerama nunamut.

14 Nuvujaniglo sakkijârtitsilerangama nunab kollâgut, jagutakotigalo takuksaulerangat nuvujane,

15 Tagva angernera erkaumajomârpara, illipsingnut angerama ômajunullo tarnelingnut tamainut, uvinilingnut tamainut, mattoma kingorngagut ullitornivaksoakarniarungnairtuksaungmat uvinigit ilûnatik asserortautiksanganik.

16 Ajagutarlo nuvujanêtuksauvok, uvangalo takosarlugo erkaumajomârpara Gûdib angerninga sokkosijuitok ômajunut arnelingnut tamainut, uvinilingnut nunamêtunut tamainut.

17 Gûdelo okarpok Noamut: Tamadja nellunaikutaksak angernimnut, uvinigit tamaitaksuit nunamêtut angervigigapkit.

18 **Tamadja** Noab erningit umiaksoarmit anisimajut: Semelo Hamelo Jafetelo. Hamelo Kânaanib atâtagivâ.

19 Pingasut tâpkoa Noab ernerivait, tâpkutigunalo nunaksoak ilûnane inukalerpok.

20 Noale perorsêvilerilerpok, vaineliksatalingmiglo perorêviliorpok.

21 Vainemiglo imerame, âmaingavok, tupperminelo inagavok kipiksimanane.

22 Hamible, Kânaanib atâtangata, atâtame kangusûtinga takogamiuk, okautigivâ kattangutîngminut sillatânêtûngnut.

23 Tagva Semib Jafetiblo kipiksak tiguvâk tuimingnut illivlugo, tunungavlugolo ulligiartorpâk atâtamik kangusûtinga; kênâgiglo allaumavuk, atâtamik kangusûtinga takomanago.

24 Noale vainetornerminut tuppalerame tussarlarmelo illivionerminik ernerminut nukardlermut,

25 Okarpok: Ominarsijaule Kânaane; kivganut kivgauksauvok kattangutimine.

26 Amma okarivok: Nakorijaule Nâlegak, Semib Gûdinga; Kânaanelo kivgaujuksauvok tâpsomunga.

27 Gûdib Jafete kinguvâksakartiliuk unuktunik, iniksakartilugo Semib tupingine, Kânaanelo kivgaujuksauvok tâpsomunga.

28 **Noale** ullitornivaksûb kingorngagut inôvok jârinik 350nik.

29 Noable jâringit ilûnatik 950ovut; tokovorlo.

KAP. X.

Inôkatigêt aglaksimavingat.

1 **TAMADJA** Noab erningita Semiblo Hamiblo Jafetiblo kinguvângit, kitorngakalermatta ullitornivaksûb kingorngagut:

2 **Jafetib** kinguvângit tagva: Gomer, Magog, Madai, Javan, Tubal, Meseg, Tiras.

3 Gomerib kinguvângit: Askenas, Rifat, Togarma.

4 Javanib kinguvângit: Elisa, Tarsis, Kittim, Dodanimelo.

5 Tâpkonangat nellojut kikertangit inukalerput nunakaringitigut ingmikut okauselingnik, ingmikut kitorngarênik.

6 **Hamib** kinguvângit tagva: Kus, Misraim, Put, Kânaan.

7 Kusib kinguvângit: Seba, Havila, Sapta, Râama, Sabteka. Râamab kinguvâgik: Seba, Dedan.

8 Kusiblo Nimrod ernerivâ. Tâamna pitsartujoksôlerpok nuname.

9 Pitsujoksôvlune NâleKab takoane. Tamanna pivlugo okartokarsôngovok: pitsujoksoak NâleKab takoane Nimrodetut.

10 Nâlegauvingit sivorlît tagva: Babel, Ereglo, Akadlo, Kalnelo Sinearib nunangane.

11 Tagvangat aularpok Assuremut, igluliorporlo Nini-
vemik, Rehobot-Iremiglo, Kalamiglo,

12 Taimaktauk Resenemik Niniviub Kalablo akorngangne: iglugasaksoarnik angidlartunik.

13 Misraimib kinguvângit: Ludît, Anamîllo, Leabîllo, Naftuhîllo.

14 Patrusîllo, Kasluhîllo (tâpkonangat Filisterit pivut) Kaftorîllo.

15 Kânaanib kinguvângit: Zidon angajuklek, Hetelo,

16 Jebusiterillo Amoriterillo Girgasiterillo,

17 Heviterillo Arbiterillo Siniterillo,

18 Arvaditerillo Zemariterillo Hamatiterillo. Kingorngane kitorngarêt Kânaanekut siamarput.

19 Kânaanekullo (nunangit) kiglekarput Zidonemit Gerar apkutigivlugo Gasamut; Sodomalo Gomorraro Adamalo Zeboimelo apkutigivlugit Lasamut.

20 Tamadja Hamib kinguvângit ingmikut kitorngarêt, ingmikut okauselît, ingmikut nunalît, ingmikut inôkatigêt.

21 **Semele**, Eberib kinguvângita ilûnatik atâtangat, Jafetib angajua kitorngakarivok.

22 Semib kinguvângit tagva: Elam, Assur, Arpagsad, Lud, Aram.

23 Aramib kinguvângit: Us, Hul, Geter, Mas.

24 Arpagsadib Sala ernerivâ; Salab Eber ernerivâ.

25 Eber ernekarpok maggungnik: aipa attekarpok Pelegemik; nelliuningane nuna aviktaungmat; nukanga attekarpok Joktanemik.

26 Joktaniblo ernerivait Almodad, Salef, Hasarmavet, Jara,

27 Hadoram, Usal, Dikela,

28 Obal, Abimael, Seba,

29 Ofir, Havila, Joba. Tâpkoa tamaita Joktanib kitorngarivait.

30 Nunakarpullo Mesaremit Sefar, kakkak kangilek tikidlugo.

31 Tamadja Semib kinguvângit, ingmikut kitorngarêt, ingmikut okauselît, ingmikut nunalît, ingmikut inôkatigêt.

32 **Tapkoangovut** Noab erningita kinguvângit ingmikut illagêt, ingmikut inôkatigêt. Tâpkonangat inuit siamarsimavut nuname ullitornivaksûb kingorngagut.

KAP. XI.

Nuvuguseksoak Babeleme. Okautsit adsigêngititaunngat. Semib kinguvângit.

1 **NUNAMIULLO** ilûnamatsiatik ingmigolingajunik okausekaratik okausekarput adsigêktunik.

2 Paungale aularamik, naternak tikipât nuname Sineareme; tamanna nunagilerpât.

3 Okakatigêkpullo: Attê, ivitânik senalaukta ikkomamut sittijorortilugit. Tagva ivitât ujararivait, kutsorlo macharivlugo.

4 Okarpullo: Attê, iglugasaksoarnik senalaukta nuvuguseksoarmiglo, nuvua aktuatilugo kilangmut, erkanartiluta, siamartitautailivlutalo nunanut tamainut.

5 Tagva Nâlegak akkarpok, iglugasaksuit nuvuguseksorlo takojartorlugit, inuit kitorngangita senajangit.

6 Nâlegarlo okarpok: Tagga, inugasaksuit atausiovut

adsigêktuniglo okausekarlutik; tamannauvok piniarningita pigiarningat, mânamillo pinasuarningit agviarlugit ajornarniarpok.

7 Attê, akkalaukta kanunga, okausingit adsigêgungnairtilugit, aipâ aipame okausinginik tukkisijungnairkovlugo.

8 Nâlekablo inuit tagvangat siamartipait nunanut tamainut, igloliorungnairpullo iglugasaksoarnik.

9 Tamanna pivlugo Bâbelemik attekarpud, Nâlekab tagvane inuit ilûnatik okausingit adsigêgungnairtingmagit, tagvangallo Nâlekab siamartingmagit nunanut tamainut.

10 **Tamadja** Semib kinguvângit: Jârekarlune 100nik Semib Arpagsad ernertârivâ, jârik magguk ullitornivaksûb kingorngane,

11 Kingorngagullo sulle jârinik 500nik inôvok, ernertârlune panniktârlarmelo.

12 Jârekarlune 35nik Arpagsadib Sala ernertârivâ,

13 Kingorngagullo sulle jârinik 403nik inôvok, ernertârlune panniktârlarmelo.

14 Jârekarlune 30nik Salab Eber ernertârivâ,

15 Kingorngagullo sulle jârinik 403nik inôvok, ernertârlune panniktârlarmelo.

16 Jârekarlune 34nik Eberib Peleg ernertârivâ,

17 Kingorngagullo sulle jârinik 430nik inôvok, ernertârlune panniktârlarmelo.

18 Jârekarlune 30nik Pelegib Regu ernertârivâ,

19 Kingorngagullo sulle jârinik 209nik inôvok, ernertârlune panniktârlarmelo.

20 Jârekarlune 32nik Regub Serug ernertârivâ,

21 Kingorngagullo sulle jârinik 207nik inôvok, ernertârlune panniktârlarmelo.

22 Jârekarlune 30nik Serugib Nahor ernertârivâ,

23 Kingorngagullo sulle jârinik 200nik inôvok, ernertârlune panniktârlarmelo.

24 Jârekarlune 29nik Nahorib Tara ernertârivâ,

25 Kingorngagullo sulle jârinik 119nik inôvok, ernertârlune panniktârlarmelo.

26 Jârekarlune 70nik Tarab ernertârivait Abralo Nahorelo Haranelo.

27 **Tamadja** Tarab kinguvângit: Tarab ernertârivait Abralo Nahorelo Haranelo. Haranible Lot ernertârivâ.

28 Haranele tokovok atâtame Tarab takoane, inûlervingmine Ureme, Kaldearit nunangane.

29 Abralo Nahorelo nulia nikpuk. Abrab nulianga Sarai-mik attekarpok, Nahorible nulianga Milkamik attekarpok, Haranib panninga; tâpsomale Milkalo Jiskalo pannigivak.

30 Saraile kitorngisuiname, kitorngakangilak.

31 Tarablo ernine Abra, ernimelo Haranib erninga Lot, ukkoanelo Sarai, ernime Abrab nulianga, illagivlugit aulakativait Uremit, Kaldearit nunanganit, ingergajomavlune Kânaanib nunanganut; Haranelo tikkinamitsuk, tagvane nunakalerput.

32 Taralo jârekarpok 205nik, tokovorlo Haraneme.

KAP. XII.

Abra annerijauvok. Ingergavok Kânaanemut Egiptenemullo.

1 **NALEKABLO** Abra okautivâ: Aularit nunangnit illangnillo atâtavillo iglunganit nunamut unertûtigijaksamnut illingnut.

2 Inugasaksoangortitsomavagit saimauserlutillo, attillo nertornartitsomavara saimanartitsomavlutillo.

3 Illingnik saimausêjut saimauseromavakka, illingniglo okarnerlûtijut okarnerlûtijomavakka, illikullo kinguvârêt ilûnamatsiatik nuname saimausertaujomârput.

4 Tagva Abra aularpok, sôrlo Nâlekab okautingmago, Lotiblo aulakativâ. 75nik Abra jârekarpok, Haranemit aularame.

5 Tagva Abrab illagivait nuliane Sarai Lotelo kangiane, perkutitiglo tamaita kattersortatik, tarnelillo tamaita pigijatik Haraneme, aularpullo ingergavlutiglo nunamut Kânaanemut, tikkipâlo nuna Kânaane.

6 Abralo ingergalerpok nunakut Sikkememut Moriblo napârtunginut. Taipsomane Kânaanikut tagvane nuna-karpok.

7 Nâlekablo Abra sakkervigivâ okautilâlo: Kinguvâksarnut nuna manna tunijomârpara. Tagva tunerguserviliorpok tagvane Nâlekamut sakkervigijiminut.

8 Tagvangallo aularivok kakkamut Bêtelib kangianut, tagvanelo tupertilerpok Bêtele killerivlugo Ailo kangilerivlugo. Tagvanelo Nâlekamut tunerguserviliorpok, Nâlekablo attinga tuksiarvigivâ.

9 Abra tagvangat amma aularivok ingergarlunelo sekkeranganut.

10 **Tagvanele** kângnartoksoakalermat, Abra attersarpok

Egiptenemut, taikane tujormiangojartorlune, kângnartoksoak angidlarmat nuname.

11 Pijokarporlo, Egiptene kanileramiuk, nuliane Sarai okautivâ: Takuit, kaujimavagit arnaujotit kênatsiariktok.

12 Imakâ, Egiptenemiut takogunitit, okarniarput: Tagga nulianga; uvamniglo tokotsiniarput igvillo inôtilutit.

13 Okalauniarpotit taimaimat najagigapkit, kanoerkona-nga pivlutit, tarnigalo inôrkovlugo illikut.

14 Abrale Egiptenemut tikkingmat, Egiptenemiut arnak takovât, ânanaugidlarlugo.

15 Angajokâksuillo Fâraomêtut takovât nertorlugolo Fâraomut. Arnarlo tigujauvok Fâraub iglunganut.

16 Abralo ajungitulivigivâ, taimna pivlugo perkutekalerti-lugo saukanik, tuktuvangniglo, siuterkortojuniglo angutini-
k, kivganiglo angutini-
k, kivganiglo arnanik, siuterkortojuniglo arnanik, kamêleniglo.

17 Kissianele Nâlekab Fârao sugiarpâ sugiarnermik angijomik inukotingillo Sarai Abrab nulianga pitjutigalugo.

18 Tagva Fâraub Abra kairkovâ okautilâlo: Sôk taimai-
liorvigivingâ? Sôk okautingilarma nuliaringangne?

19 Sôk najagivlugo okautigiviûk? Tigubaralo nuliari-
jomavlugo. Taggale nuliat, tiguguk aularlutillo.

20 Fâraublo angutekotine perkovait kanilârlugo nulia-
ngalo perkutigijangillo tamaita.

KAP. XIII.

Abralo Lotelo aviitivuk.

1 **ABRALO** majorarpok Egiptenemit, nangminek nulia-
ngalo pigijangillo ilûnatik, Lotelo illagivlugo, (Kânaanemut)
sekinerdlernut.

2 Abralo akluidlarpok nergjutinik silberemiglo golde-
miglo.

3 Ingergarnermine sekernganit tikkipok Bêtelemut, si-
vorngane tuppekarvigijaminut, Bêteliblo Aiblo akorn-
gangnut,

4 Nunamut tunerguserviliorvigijaminut sivorngane. Tag-
vanelo Nâlekab attinga tuksiarvigivâ.

5 Lotele, Abrab ingergakatinga, amma saugakotekarivok
nergjutiniglo tupperniglo.

6 Nunablo nunakatigêktilugit ajorpait; perkutingit unu-
dlarmatta, nunakatigêklutik sappperput.

7 Akkerartûtivullo Abrab nergjutekotinginik mianersijut Lotiblo nergjutekotinginik mianersijut. Kânaanikullo Feresiterillo taipso mane tagvane nunakarput.

8 Tagva Abrab Lote okautivâ: Omât, akkerartûtijuksaungigalloarpogut uvangalo igvillo, mianersijokotikkalo mianersijokotitillo, katangutigêkapta.

9 Nuna ilûnane sângnêngilâk? Aviutilaulung-ai? Saumingmut pijomagu vit, tallerpingmut piniarpunga; tallerpingmullônêt pijomagu vit, saumingmut piniarpunga.

10 Lotiblo ârlorlune Jordanib erkâ ilûnât ullernaigivâ, ilûnâne imilik (Sodomalo Gomorrâlo asserortaulerkârtinagik Nâlekamut) sorlo Nâle kab perorsêvinga, sorlo Egiptene, Zoare tikkidlugo.

11 Tagva Lotib annerivâ Jordanib erkâ ilûnât, kangimut ingergavlune. Taimaglo aviutivuk.

12 Abra nunakarpok nuname Kânaaneme, Lotelo nunakarpok iglugasangne (Jordanib) erkâne, tuppertikattarlune Sodoma tikkidlugo.

13 Kissiane le Sodomamiut uivêtoksôvut idluitulijoksôvutlutiglo Nâle kab sângane.

14 Lotelo Abramit avingmat, kingorngane Nâlegak okarpok Abramut: Attê, ârlorit takoniarlutillo innigijarnit avunga aungalo paungalo taunungalo.

15 Nuna takojat ilûnât tunijomavara perkutautsainartilugo illingnut kinguvâksarnullo.

16 Kinguvâksatillo unuksivalliatitsomavakka sanniktitut nuname. Sanningnik nunamêtunik kittitsijungnartokarpot, tâpsoma kinguvâksatittauk kittinajarivait.

17 Parngnailerit, nuna ingergavigiuk tukkimullo sennimullo, illingnut tunijomagapko.

18 Tagva Abrab tuppine nûtipait, tikkiutivlunelo nunakalerpok Mamrib napârtungine Hebronemêtune, tagvanelo Nâlekamut tunerguserviliorpok.

KAP. XIV.

Lotib piulijauninga Abramut. Melkisêdeke.

1 **PIJOKARPORLO**, Amrâfele attaniotilugo Sineareme, Arioggelo attaniotilugo Elâsareme, Kedarlaomerelo attaniotilugo Elame, Tidealelo attaniotilugo Gojime,

2 Tâpkoa unatadlarmatta Bêramut Sodomab attaninganut, Birsamullo Gomorrâb attaninganut, Sineamullo

Adamab attaninganut, Semeberemullo Zeboib attaninganut, Bêlablo attaninganut. Bêla tagva Zoare.

3 Tâpkoa ilûnatik illigêklutik naksarmut Siddimut pivut, (kingorngane) tesseksoangojomut tarriomut.

4 Jârit 12 Kedarlaomeremut kivgaugamik, jârit 13ingane nâlegomairpât.

5 Jârillo 14ingane Kedarlaomere tikkipok attanillo illagijangit, sâlagivaillo Rêfait Astarot-Karname, Sûsillo Hameme, Emimillo Kiriatab naternangane,

6 Horiterillo Seireme, kakkangine, El-Pâran tikkidlugo inukangitub kiglinganêtok.

7 Uttermivlutiglo En-Mispat tikkipât, tagva Kâdes; Amalekiterillo nunangat ilûnât, taimaktauk Amoriterit, Hâzazôn-Tâmame nunakartut, sâlagivait.

8 Tagva aularput Sodomab attanina, Gomorrablo attanina, Adamablo attanina, Zeboiblo attanina, Bêlablo attanina, imaitok, Zoarib, sorsugiartorlutik naksarme Siddime

9 Kedarlaomeremut Elab attaninganut, Tidealemullo Gôjib attaninganut, Amrâfelemullo Sinearib attaninganut, Arioggemullo Elâsarib attaninganut; attanit sittamat unatarput tellimanut.

10 Naksarlo Siddim kutsolingnik ittersakadlarpok. Kemâgamiglo Sodomab Gomorrablo attanîgik (illangillo) takanunga kattakput; amiakungillo kemâlerput kakkanut.

11 Tagva perkutit tamaita Sodomamêtut Gomorramêtullo tiguvaît nerkiksallo tamaita, aularlutiglo.

12 Lotelo Abrab kangianga perkutingillo neksarpait, aularamik, Sodomane nunakarmat.

13 **Tikkiporlo** kemâsimajut illangat okautigijartorlugo Abramut Ebrêrimut, nunakarmat Mamrib Amoriterib napârtungine, Eskolib Aneriblo kattangutingata. Tâpkoalo Abraelo angerkatigêkput.

14 Abrable kattangutine aularutjaujok tussaramiuk, sûtjakotine 318, iglomine inôlilauktut, sorsugiarkovait, ipkoalo udlapait Dane tikkidlugo.

15 Unnuakkullo nangminek kivgangitalo maggoilivlutik opingarpait sâlagivlugillo maliklugillo Hôba tikkidlugo Damaskusib tachardlinga.

16 Perkutillo tamaita uttertípait, Lotelo kattangutine perkutingillo, taimaktauk arnat inuillo.

17 **Uttilermat**, Kedarlaomere attanillo illagijangit sâla-

gerkârlugit, Sodomab attananga aularpok pagrearlugo naksarmut Sâvemut, tagva attanerub naksanganut.

18 Melkisêdekele, Sâlemib attananga, kakkôjanik vainemiglo kaitsivok; Gûdib kotsingnerôjub ajokertuijokutinga tâмна.

19 Saimauserpâlo okarlune: Saimausertaule Abra Gûdemut kotsingnerôjomut, kilangmiglo nunamiglo perkutetalingmut.

20 Gûdelo kotsingnerôjok nakorijaule, sorsugvigijarnik tunitjijok aggangnut. Abrablo tâмна tunitjivigivâ tigujame ilûnatik tellimaujoanik.

21 Tagva Sodomab attananga Abramut okarpok: Inuit uvamnut tunikit, perkutit igvit tigukit.

22 Abrable Sodomab attananga okautivâ: Aggakka issakpakka kongmut Nâlekamut Gûdemut kotsingnerôjomut, kilangmiglo nunamiglo perkutetalingmut,

23 Tamainit igvit perkutigijarnit tigusinianginama ivaluksakullungmiglônêt ungerutiksamiglônêt, okarkonak: Uvanga Abra akluitipara.

24 Inôsuktut nerrijangit kissêta pivakka, angutillo illagijama piksangit; Aneriblo Eskoliblo Mamriblo piksatik tigungmiligit.

KAP. XV.

Abra okpernerminik idluarsijutekartitauvok. Nâlekab angervigivâ.

1 **PIJOKARTUT** tamakkoa kingorngatigut Nâlekab okausinga Abramut pivok takotitjutikut, okarlune: Sivôraniarnak, Abra, uvanga tagva sapputjauvît, amigangitomiglo akkiler-tauvît.

2 Abrale okarpok: Nâlegak, Nâlegak, sumik tunitjivigijomavingâ? kitorngakarnanga arvertarpunga, iglumniglo kingormgujijuksak tagva Eliêsere Damaskusemiok.

3 Abralo amma okarivok: Takuit, kinguvâksakartingilarma, kivgarlo iglumne erniangomajok kingormgujijuksauvok uvamnik.

4 Sunaubvale, Nâlekab okausinga tâpsomunga (pivok) okartok: Tâмна kingormgujijuksaungilak illingnik, timingnille pijuksak kingormgujiniarpok illingnik.

5 Anerkovâlo sillamut okautivlugolo: Attê, kilak ârlorvigiuk uvloritjallo kittikit, kittilugit sappingikungne. Imâglo okautivâ: Taimaituksauvut kinguvâksatit.

6 Okperingmago, Nâlekab tamattominga idluarsijutekar-tipâ.

7 Okautivâlo: Uvanga Nâlegauvunga aularkojijok illingnik Uremi Kaldeamêtomit, nuna tamanna tunijomagapko illingnut, perkutaurkovlugo illingnut.

8 Okarporlo: Nâlegak, Nâlegak, suna nellunaikutaksarivigô, pigijomârapko?

9 Okautivâlo: Kaikit uvamnut tuktuvak pingasunik jârelik, tuktungajorlo pingasunik jârelik, saugarlo pingasunik jârelik, taubearsuglo taubeararlo,

10 Tagva tamakkoa tamaita kaipait, koppilugillo avgorpait, koppallo attunit akkilerêktilugit illivait; tingmiâgle koppingilak.

11 Tingmiaksuillo ômajovinit mivigivait, Abrable aijalikpait.

12 Sekinerle nippilermat, Abra sinnisilerpok ittijomik; ahâglo, tâksûb koaksârnartub nellaupâ.

13 Tagva Abramut okarpok: Kaujimavilerit, kinguvâksatit tujormiangojomârmatta nuname perkutigingitamingne, taikanelo kippalôtitaujomârmatta kappiasuktitaavlutiglo jârit 400 nâvlugit.

14 Uvangale nunakatigêt taipkoa kivgartorvigijangit erkartoromârpakka, kingornganelo aularomârput perkutekadlarlutik.

15 Igville ullapirsautekarlutit sivorlerijarnut aijomârpotit, jârerkortoleruvillo illuvertaujomârpotit.

16 Ernerêlle kingorlerêt sittamaingit tamaunga uttero-mârivut, Amoriterit idluituliningat sulle nâmaksingimat.

17 Sekinerle nippilermat tâdlarmallo, sunaubva, igavik issilik, ikomalo koppakkut taipkoa akornгатigut ingergajok.

18 Uvlorme tamattomane Nâlekab Abra angervigivâ, okarlune: Nuna tamanna tunijomârpara kinguvâksarnut Egip-tenib kôksoanganit kôksoarmut Faratemut,

19 Keniterillo, Kenisiterillo, Kadmoniterillo,

20 Hêtiterillo, Fêresiterillo, Refaillo,

21 Amoriterillo, Kânaaniterillo, Gergesiterillo, Jebusiterillo.

KAP. XVI.

Ismaêle inôlertoκ.

1 **SARAI** Abrab nulianga ernilungilak tâpsomunga; arnarle Egip-tenemiok kivgarivâ, Hâgaremik attelik.

2 Saraiblo Abra okautivâ; Takuit, Nâlekab parngnanair-pânga ernitailivlunga: kivgara uvinikatigiung-ai? imakâ

tâpsomûna kitorngakartitaujomârpunga. Abrablo Saraib nippinga nâlekpâ.

3 Tagva Saraib, Abrab nuliangata, tiguvâ Hâgare Egiptenemiok taimna kivgarne, tunivâlo Abramut uiminut, nuliarijaurkovlugo tâpsomunga; jârit tellimaujortut nâvlugit nuna-karamik nuname Kânaaneme.

4 Hâgarelo uvinikatigingmago singailerpok. Tâpsomale, singaidlune nelojungnairame, angajokâne nachogilerpâ.

5 Tagva Sarai Abramut okarpok: Idluitulivionera illingnut pile. Kivgara tunilaukpara illingnut; singaidlune-lo nelojungnairame, nachogilerpânga. Nâlegak erkartuijôle uvamnullo illingnullo!

6 Abrale okarpok Saraimut: Takuit, kivgat pigivat, idluarijarnik piniarvigiuk. Saraible taimna pidlarmago kemâvâ.

7 Nâlekable engelingata naipipâ puilavingme inukangitome, puilavingme apkosinerub Suremut ilingajub sennianê-tome.

8 Okautivâlo: Hâgare, Saraib kivganga, nakit pivêt, namungarniarkêllo? Tâмна kioвок: Angajokâmnit Saraimit kemâvunga.

9 Nâlekable engelingata okautivâ: Uttilerit angajokârnut, illingniglo nikanasârit tâpsoma agganginut.

10 Nâlekablo engelingata okautivâ: Kinguvâksatit unuk-sivalliatitsomavakka, kittitaugiangat ajornarsitilugo unumut.

11 Amma NâleKab engelingata okautivâ: Ahâk, singailerêrpotit, ernermiglo ernijomârpotit, taimna Ismaêlemik atseraraksarivat, NâleKab pidlartaujotit tussarmatit.

12 Taimna inungoromârpok nujoartok sorlo, ilûnaita sorsugvigijomârpait, ilûnatiglo sorsugvigijomârpât; katangu-timelo kangiane nunakaromârpok.

13 Tagva NâleKab okautjime attinga taivâ: Igvit Gû-deovotit takojok (tamainik); okarame: Tamâne takungipigô uvamnik takojok?

14 Taimaimat puilavik tâмна taivât: “Omajub Takojub uvamnik puilavinganik.” Tâmnale Kâdesiblo Bârediblo akorngangnêpok.

15 Hâgarelo ernermik ernivok Abramut, Abrablo ernine, Hâgarib erniarijanga, Ismaêlemik atserarpâ.

16 Abralo jârekarpok 86nik, Hâgare Ismaêlemik erningmat tâpsomunga.

KAP. XVII.

Abralo Sarailo attertârpuk. Anguteojut kippijauvut. Isaak okautigijauvok.

1 **ABRALE** jârekarmat 99nik, Nâlekab sakkervigivâ okautilâlo: Uvanga Gûdeovunga ajugakangitok, sakkamne arvertarit pidlaraksausuerlutillo.

2 Angernera pivlungalo pivlutillo nelautsititsomavara unuksivalliadlartitsomavlutillo.

3 Tagva Abra pâmakterpok. Gûdiblo sulle okarvigivâ okarlune:

4 Uvangaugama, angernera pivot, nunakatigêksuillo unuktut atâtagijomârpatit.

5 Kingorngane Abramik attekারণnairtuksauvotit, attik-salle tagva Abraha, nunakatigêksoarnut unuktunut atâtaurkogapkit.

6 Uvangelo unuksivalliadlartitsomavagit inugasaksoan-gortitsomavlutillo, illingnillo attanersuit pijomârput.

7 Angernerale pivlunga pivlutillo kinguvâksatillo pivlugit, kingunikkut kingorlerêktut, nelautsititsomavara, angernek nâksaungitomut ilingajuksak, illingnut Gûdeojomavlunga kinguvâksarnullo kingunikkut.

8 Nunalo tujormiangovigijat, nuna Kânaane ilûnât, illingnut tunijomârpara kinguvâksarnullo kingunikkut, perkutautsainarkovlugo (tâpkonunga), Gûdigijomârpângalo.

9 Gûdelo Abrahamut okarpok: Igville perkojara nâlegaksarivat, igvillo kinguvâksavillo kingunikkut kingorlerêktut.

10 Perkojarale nâlegaksarijase pivlunga pivluselo, kingunikkullo kinguvâksatit pivlugit, imaipok: Anguteojut ilûnatik akunapsingne kippijaksauvut.

11 Uvinipse amingata nuvua kippijaksarivase. Tamadja nellunaikutaksak, illipsingnut angerama.

12 Angutearsuit nelliât uvlokarpat sittamaujortunik, kippijaksarivase illipsingne kingorlerêgnipsingne; taimaktauk kivat iglungne inôlersimajut kênaujanullo takorngartanit sunatuinarnit pissiarijaumajut, illapsingnit pingitut (kippijaujariakarput).

13 Ilûnatik kippijaksauvut iglungne inôlersimajut kênaujanullo pissiarijaumajut; uvinipsingne angernera sakkertuksauvok, angernek nâksaungitomut ilingajuksak.

14 Angullo kippimanekangitok kippijaungipat uviningme

amingata nuvuagut tâpsoma tarninga pêjartaujomârpok inôkatiminit, angernera tappagingmago.

15 **Gudelo** Abrahamut amma okarivok: Sarai nuliat Saraimik taijaksarijungnairpat, Sarale tagva attiksanga.

16 Pitsartutitsomagapko, tâpsomangat ernermik tunitjivigijomârpagit; pitsartutitsomagapko, inugasaksoangoromârpok, nunakatigêksuillo attaningit tâpsomangat pijomârput.

17 Tagva Abraha pâmakterpok kungalerlunelo, ômami-gullo okarpok: Angut 100nik jârekartok ernertârtuksaugalloarkâ? Saralo 90nik jârekartok ernijuksaugalloarkâ?

18 Abrahalo Gûdemut okarpok: Kanoktôk Ismaêle inôle sângne!

19 Tagva Gûde okarpok: Ahammarik, Sara nuliat ernermik ernijuksauvok illingnut, taimna Isaamik atseraraksarivat, angerneralo tâpsomunga nelautsititsomavara, angernek nâksaungitomut ilingajuksak, kinguvâksanginullo kingorngagut pijuksanut.

20 Ismaêlo pivlugo tussarivagittauk: Ahâk, pitsartutipara kinguvâksatâkattartitsomavaralo unuksivalliadlartitsomavlugolo. Attanernik 12nik ernertâromârpok inugasaksoangortitsomavaralo.

21 Angernerale nelautsititsomavara Isaamut, Sârab erniarijomârtanganut illingunt achâgo nelliutome piviksaujome.

22 Okarvigijungnairamiuk, Gûde Abrahamit kongmuarpok.

23 **Tagva** Abrahâb tiguvâ ernine Ismaêle kivganelo tamaita inôlersimajut iglumine, tamaitalo kênaujaminut pissiarijane, Abrahâb inukotingit angutiojut tamaita, uviningitalo amigata nuvatigut kippivait uvlorme taipsomane, sorlo Gûdib okautingmago.

24 Abrahâlo jârekarpok 99nik, uviningata amingata nuvua kippijaungmat.

25 Ismaêlo erninga jârekarpok 13nik, uviningata amingata nuvua kippijaungmat.

26 Uvlorme atausênarme kippijauvuk Abrahâlo erningalo Ismaêle.

27 Inukotingillo anguteojut ilûnatik iglungane inôlersimajut pissiarijaumajullo takorngartanit kênaujanut kippijaugivut illagivlugo.

KAP. XVIII.

Nâkelab Abraha tikkipâ. Sodomab asseroraksauninga. Abraham tuksiudjininga.

1 **NALEKABLO** sakkervigivâ Mamrib napârtungine, tupperme pângane iksivatilugo uvlub kiakadlarningane.

2 Arloramele takosarlunelo, sunaubva, angutit pingasut takolerpait timiminêut. Takogamigille, akpangerlune pagreartorpait tupperme pânganit, okkolerlunelo nunamut.

3 Okarlunelo: Nâlegak, ijîngnut saimaneksiguma, kivgat kângerniarnago pît.

4 Imerkik kaitsijokarniarpok, ittikaselo ubvarsigik, napârtublo attâne kikkalauritsetôk,

5 Niakôjagalâmiglo kaitsijomavunga nakoksijutiksapsingnik, kingorngane ingergalaurniarpose, kivgase apkusaralloarapsiuk, Okarput: Taimailiorit, sorlo okaravit.

6 Abrahamo tuavidlune tuppermut iterpok Saramut, okarlunelo: Tuavitit, senaugak ôktûtutut pingasutut angitigijok imermut akkulugo, niakôjaliorit.

7 Tuktuvangnullo Abraha akpangerpok, nochatsiak pijok tiguvlugo kivgaminullo tunivlugo; tâpsomalo tuavidlune âkiksorpâ.

8 Imublo orksuanik imutuinarmiglo nochavinermiglo âkiksortaminik kaitsivlune manijivigivait, nerrilermattalo, seniane nangerpok napârtub atâne.

9 **Tagva** okautivât: Naûk nuliât Sara? Kiovait: Takka-manê tuperme.

10 Okarporlo (illangat): Achâgo amma tikkitsomârivunga illingnut nelliutikpat, tagva nuliât Sara ernekaromârpok. Tamanna Sarab tussarpâ tupiub tunuanêutub pânganêdlune.

11 Tamarmiglo Abraha Saralo inutokaulerpuk jârekadlarlutik, Saralo arnat ilusinganik atorungnairpok.

12 Taimaimat Sara ingminik ijerivok okarlune: Ningiôgama, uvinikatigêmut ilingajuksaugalloarkêk, uigalo îtôngmat?

13 Tagva Nâlegak Abrahamut okarpok: Sôk Sarab tamanna ijûtigivaûk okarlune: Ernijuksaugalloarkingâ ningiôjunga?

14 Nâlekamut sumiglônêut ajornartokarkâ? Achâgo nelliutikpat tikkitsomârivunga illingnut, tagva Sara ernekaromârpok.

15 Sarale misiarpok okarlune: Ijolaungilanga! sivôra-game. Okarporle: Taimaingilak, ijorpotit.

16 **Angutit** tagva nikkoviput tagvangat, sângalerlutiglo Sodomamut; Abrahablo illagivait kannilâromavlugit.

17 Tagva Nâlegak okarpok: Abrahamut piniaromârtam-nik angigutjijuksaugalloarkêk;

18 Abrahamit nunakatigêksuit pitsartudlartut pijomârmatta, nunakatigêksuillo nunamêtut ilûnamatsiatik tâpsomûna saimausertaujomârmatta?

19 Kaujimavara pitjutigilâllo, perkojerkovlugo kitorngaminik inukotiminiglo kinguvâksaminik, NâleKab apkutiksaurkojanganik malerkovlugit, idluartulivlutik ajungitulivlutiglo, Nâlegak nâmaksititserkovlugo Abrahamut okautigijaminik.

20 Nâlegarlo okarpok; Sodomamiut Gomorramiullo pivlugit niplianek angijôngmat, ajortuliningillo sugaluluadlarmatta,

21 Tamanna pivlugo akkaromavunga takosarlugit, taimailiormaringmangâta, sorlo nipliaviogama, taimailiungimangâtalônêt; kaujijomavara.

22 **Angutiglo** taipkoa sangulerpuk Sodomamut ailerlutik; Abrahablo nokangalerpok NâleKab sângane.

23 Abrahablo sângiarpâ okautivlugolo: Idluartut asserorkassiutijomavigît idluitut asserorlugit?

24 Iglugasaksoarne tamakkonane idluartokangikune 50-nik! Tâpkoatauk asseroromavigît iglugasaksuillo issumagijungnairomanagit idluartut 50 tagvanêtut pivlugit?

25 Taimailiornek ajornarpok illingnut, idluartut tokokasiutivlugit, idluitut (tokogungne), idluartut idluitutitut ilingatilugit. Ajornarpok taimak illingnut. Sillaksoarmiunik erkartuijok idluangitomik illiortuksauvâ?

26 Nâlegak okarpok: Idluartut 50 nagvârupkit iglugasaksoarne Sodomame, tagva iglugasaksuit tamaita issumagijungnairomavakka tâpkoa pivlugit.

27 Abrahamb kiovlune okautivâ: Takuit, okarasuarpunga Nâlekamut, ivjotuinaugalloartunga argjatuinaugalloarlungalo:

28 Idluartut tellimanik ikkinersaungikunik 50nit, tâpkoa tellimat pivlugit iglugasaksuit ilûnaita asseroromavigît? Okautivâ: Tagvane 45 nagvârupkit, asseroromangilakka.

29 Ammalo okarvigivâ okarlune: Tagvane 40 nagvârtau-ngikunik? Okarporlo: 40 pivlugit taimailiorvigijomangilakka.

30 Okarporlo: Ningarniarnaktôk, Nâlegak, amma okar-

migama sulle: Tagvane 30 nagvârtaungikunik? Okarporle: Tagvane 30 nagvârupkit taimailiorvigijomangilakka.

31 Okarporlo: Takuit, illerasungnanga okarasuarpunga Nâlekamut. Tagvane 20 nagvârtaungikunik? Kiovorle: 20 pivlugit asseroromangilakka.

32 Okarporlo: Ningarniarnaktôk, Nâlegak, tamattomanênak okarniarama sulle: Tagvane tellimaujortut nagvârtaungikunik? Okarporle: Tellimaujortut pivlugit asseroromangilakka.

33 Tagva Nâlegak aularpok, Abrahamut okarêrame, Abrahalo utterpok nunagijaminut.

KAP. XIX.

Sodomab asserortauninga. Lotib piulijauninga.

1 **ENGELIK** magguk taipkoa Sodomamut tikkipuk unnu-lertilugo, Lotele Sodomab itertarviksoangane iksivavok. Lotiblo takogamigik, nikovipok pagreartorlugik, nunamut okkol-lerlune.

2 Okarlunelo: Okoksê, Nâlegâkka, itilauritik kivgaptik iglunganut, siniktarlutik tagvane, ittikatiglo ubvarsigik, uvlârorlutik ingergalaurniarpotik apkutiksaptingnik. Tâpkoa okarpuk: Aukagle, iglut akorngane unnuiniarpoguk.

3 Katsungaitomik tagva inadlarmagik, kippilugungnairlutik iglunganut iterpuk. Nerkiksaliorpaglo niakôjamiglo sêrnartokangitomik igavok; nerrivuglo.

4 **Sulle** innilarkârtinagik, iglugasaksuit angutingita Sodomamiut iglo illumavât, inôsuktut inutokaujullo, inuit ilûnamatsiatik.

5 Lotelo kairkovât okautivâllo: Naûk angutîk taipkoa unnuak illingnut itertûk? Uvaptingnut anitikik, ajortulivigijomagaptigik.

6 Lotiblo anivigivait pâmut, upkuak tunumigut parnganairlugo,

7 Okarlunelo: Idluituliniarasetôk, kattangutikka!

8 Takuitse, maggungnik pannekarpunga, angumut uvinekataulungitungnik sulle, tâpkoa anitilaulâkka illipsingnut, issumapsingniglo piniarviginiarpase; kissianele angutîk taipkoa aktorniarasigik, terliklutik iglumnut itermanik.

9 Tâpkoale okarput: Pêrâlugit! Amma okarivut: Atausek una tujormiak tikkitok attaniojuksauvâ? Attaek! piluartomik taipkonangat kapiasuktilaptigit. Angullo tâmna,

Lote, pagvisarpât angijomik. Opaklutiglo upkuak serkominasuarpât.

10 Tagva angutík taipkoa issaklutik Lote anuarpâk ingmingnut iglomut, upkoarlo parngnanairpâk.

11 Angutillo iglub pânganêtot tautungitipait, inôsuktullo inutokaujullo, merngortulerput tagva, upkoak nagvârlugo ajuleramitsuk.

12 Angutíglo Lotemut okarpuk: Tamâne illakaruvit ningaumiglônêt, ernerniglônêt, panningniglônêt, ilûnaita illagijatit iglugasaksoarne, tagvangat aulartikit !

13 Iglugasaksuit tamakkoa asserorniaraptigik, iglugasaksuit pivlugit Nâlekab sângane niplanek angijôngmat. Nâlekablo tilivâtiguk, asserortaurkovlugit.

14 Tagva Lote anilerpok ningauksângne okarvigilugik pannîngme uiksâgik, okarlune: Parngnailutik aularitik iglugasaksoarnit tamakkonangat, Nâlekab iglugasaksuit tamakkoa asserorniarmagit. Ningauksâkitale mittagsugivâk.

15 **Kaulermalle**, engelík Lote tuaverkovâk okautilâllo: Parngnaisâlerit, nuliallo panníkiglo magguk tamânêtuk nek-sakkit, asserortaudlaroaravit iglugasaksoarmiut idluitulininginut.

16 Tuavilukatailingmalle, angutík aggangitigut tiguvâk, Lote nuliangalo pannîgiglo, Nâlekab nâpkigingmago, aulartipâglo. Iglugasaksuille avatânêtilugo kemakpâk.

17 **Aulartimatikik**, (Nâlegak) okarpok: Inôtsit piulijartoruk; keviarniarnak nokanganiarnaktauk tamattoma erkâne ilûnâne. Kakkamut kemâlerit nungutaurkonak.

18 Lotiblo okautivâ: Taimainiarnangatôk, Nâlegak.

19 Takuit, kivat saimaneksivok illingnut, mikkijôngitomiglo nâpkigivarma, inôsera piuligangne. Kakkamulle kemâjungnangilanga tokolidlaroarama, kanoetomut tikkitauvlunga.

20 Takuille, iglugasait ukkoa kanitomêtot kemâvigijomajakka, mikijôvullo. Tagvane piulijauviksarsilanga-ai? mikijôgalloarmatta, tarniga inôrkovlugo.

21 Okautivâ tagva: Ahâk, tamattomanetauk kippi-lungilagit, pivlutit iglugasait okautigijatit mumigomanginapkit.

22 Tuavigit piulijauviksarsilerillo tagvane, piniarungnanginama sumik, tikkerkârtinak tagvunga. Tamanna pivlugo iglugasait taipkoa Zoaremik taijauvut.

23 **Lotelo** Zoaremut tikkisimangmat, sekinek nuilerpok.

24 Tagva Nâlegak orksorumik ikomamiglo sillalurkojivok Sodomamut Gomorramullo kilangmit Nâlekamit.

25 Iglugasaksuillo tamakkoa erkâlo ilûnât mumikpait, iglugasaksuillo inungit tamaita, perorsiallo nunamêtut.

26 (Lotible) nulianga keviarame, nappajungorpok tarriok.

27 **Abrahale** uvlârsârôtîlugo makipok, sângavigilaukta-minut Nâlekamut aivlune.

28 Sodomab Gomorrablo nunangak takosarpâ, nunablo tamattoma erkâ ilûnât. Takosarmallo, sunaubva, isserluksoak nunamit kangatarpok, sorlo kiaksautiâlub isserlukso-anga.

29 Gûdible iglugasaksuit nunab tamattoma erkânêtut asseroramigit, Abraha erkaumavâ, Lotelo aulartipâ iglugasaksoarnit mumiktaminit, Lotib nunagilauktanginit.

30 **Lotelo** Zoaremit majorarpok kakkarlo nunagilerpâ pan-nîngne illagivlugik, nunakariak Zoareme sivôragigamiuk; kai-rosungmelo innekarput tâmnalo pannîgiglo tamarmik.

31 Angajuklek tagva nukaminut okarpok: Atâtavuk inutokaulerpok, angutekangilarlo nuname uvaptîngnut pijuk-samik nunamiut illusingatut.

32 Attê, atâtavuk vainemik imertilaulavuk tutiklugolo, kinguvâksarserkovlunuk atâtaptîngnit.

33 Tagva atâtatik vainemik imertipâk unnuak tâmna. Angajukliublo atâtane aivigivâ tutiklugolo; tâmnalo inarni-nganiglônêt makininganiglônêt missigilungilak.

34 Uvlângolermat, angajuklek nukaminut okarpok: Ta-kuît, ikpeksak atâtaga tutilaukpara. Unnuak amma vaine-mik imertilaulavuk, igvit tagva aiviginiarpat tutiklugolo, ki-nguvâksarserkovlunuk atâtaptîngnit.

35 Tagva unnuak amma atâtatik vainemik imertipâk, nukardliublo tutigijartorpâ; tâmnalo inarninganiglônêt maki-ninganiglônêt missigilungilak.

36 Taimak Lotib pannîgik tamarmik singaititaulerpuk atâ-tamingnut.

37 Angajuklerlo ernermik ernivok, tâmna atserarpâ Moa-bemik. Tâmna atâtagivât Moabiterit mânaulertut.

38 Nukardlerlo amma ernermik ernivok, tâmna atse-rarpâ Ben-Amimik. Tâmna atâtagivât Amonib kinguvângita mânaulertut.

KAP. XX.

Abraham nunakarninga ilinganingalo Gêrareme.

1 **ABRAHALO** tagvangat aularpok nunamut sekinerdlermut, Kâdesiblo Suriblo akorngangne nunakalerpok tujormiangovlune Gêrareme.

2 Nulianelo Sara Abraham najagivlugo okautigingmago, tagva Abimêlegib, Gêrarib attaningata, tiliklerlune Sara aijaurkovâ.

3 Gûdible umnuarme Abimêlege sinnaktômanikut tikkipâ, okautivlugolo: Ahâk, tokolertuksauvotit arnak tâмна tigujat pivlugo, angutib nuliaringmago.

4 Abimêlegible aktolunginamiuk, okarpok: Nâlegak, inuit idluartut tokotsomagalloarkigît?

5 Najagivlugo okalungilâk uvamnut? Amma tâмна nangminek (arnak) okarpok annigivlugo. Omatipkut nelâgôrlunga, aggapkullo passijaksaunanga, taimailiorpunga.

6 Gûdiblo sinnaktômanikut okautivâ: Uvangatauk kaujimavagit, ômatikkut nelâgôrlutit taimailioravit. Tamanna pivlugo idluitulerkonak uvamnut aktuitalitipagit tâpsomina.

7 Mânale angutib nuliane pigiliuk, nelautaijôngmat, tuksiarutiniarpâtillo inôrkovlutit. Uttertitsomangikungnele, kaujilerit tokolertuksaugavit pigijatillo ilûnatik.

8 Abimêlegelo tagva uvlâkut makiname, kivgarne tamaita kairkovait tussartipaillo okautsit tamakkoa tamaita okautivlugit; angutillo taipkoa sivôralerput angijomik.

9 Abimêlegible Abrahatauk kairkovâ okautivlugo: Sôk taimailiorvigivitigût? Sumik idluitulivingâ illingnut, taimaitoâlungmik ajortoksoarmik uvamnut nâlegauvimnullo pititsijomagavit? piniaraksaungitunik piniarvigivarma.

10 Abimêlegiblo Abraha amma okautivâ: Suna pitjutigiviûk, taimailiorlutit?

11 Abraha okarpok: Issumakarama: Gûdemik sivôrajokarpallaingilak nuname tamattomane; nuliara pivlugo tokoniarpânga.

12 Nelâguttauk najagigalloarpara, atâtama pannigingmago: anânamale pannigingilâ, uvangalo nuliarivara.

13 Gûdiblo aularkongmanga atâtama iglunganit, okautivara: Imâk nagliginiarparma: annigivlunga okautiginiarparma tikkiviksaptingne tamaine.

14 Tagva Abimêlegib saukat tuktuvaillo kivgallo angutit arnallo tiguvait tunivlugillo Abrahamut, nuliangalo Sara tâpsomunga uttertipâ.

15 Okarporlo: Ahâk, nunaga atuinauvok illingnut, nuna-kalerit nanelônêt nâmagijarnik.

16 Saramullo okarpok: Ahâk, annît kênaujanik tausende-nik tunitjivigivara; tamakkoninga ilûnatik illingnêtut ijingit mattusertauvut pivlutit; tainaglo passijaksautailivotit tamaita pivlugit.

17 Abrahable Gûde tuksiarvigingmago, tagva Gûdib Abimêlege nuliangalo kivgangillo arnat inûlivait, ernilerivullo.

18 Nâlekab arnat tamaita Abimêlegib iglunganêtut ernitailitingmagit Sara Abrahâb nulianga pivlugo.

KAP. XXI.

Isaak inôlertok. Ismaêle aulartitaujok. Abraha Abimêlegelo angerkatigêkpuk.

1 **NALEKABLO** Sara issumagivâ, sorlo okarame, taimai-liorvigivlugo sorlo okausekarame.

2 Saralo singailerpok ernermiglo ernivok Abrahamut inutokauningane, nelliutome Gûdib okautigijangane.

3 Abrahablo ernine, Sarab erniarijanga, atserarpâ Isaamik.

4 Abrahablo ernine Isaak kippivâ; uvlokalermat sittamaujortunik, sorlo Gûdib perkongmago.

5 Abraha 100nik jârekarpok erninga Isaak inôlermat.

6 **Saralo** okarpok: Gûdib ijûtautipânga, tussartut ilûnatik ijûtiginiarmanga.

7 Amma okarivok: Kia Abraha okautigalloarkaûk, Sara amâmaktitsiniarmat? ernermik ernigama tâpsomunga inutokauningane.

8 Sorrusiarsuglo aglisilerpok amâmagungnairtitaavlunelo. Abrahâlo nerrimârsarsoarmik âkiksoivok taipsomane, Isaak amâmagungnairtitaungmat.

9 **Sarablo** mallugivâ Ilagarib Egiptenemiub erninga, erniarijanga Abrahamut, mittautekartok.

10 Abrahamullo okarpok: Kivgak taimna erningalo ken-nugikik, kivgab taipsoma erningata kingormgujukatigijaksaringimago ernera Isaak.

11 Okautsille tamakkoa Abrahâb nâmagingimarikpait ernine pitjutigivlugo.

12 **Gudible** Abraha okautivâ: (Okausingit) nâmagitui-nakkit nukapiak kivgallo pivlugik. Sarab kanok okarvingingmatit, nippinga nâlengniarpat, kinguvângnik taijaujuk-saujut Isaamit pijomârmatta.

13 Kivgable erningatauk inugasaksoangortitsomavara, igvit kinguvârigangne.

14 Tagva Abraha uvlâkut makipok, takoaksarlo imekaullo imalik tigulugit illivait Hagarib tuinganut, nukapiarlo tunivâ tâpsomunga, aulartilugolo. Tagva aularpok saksârlunelo inukangitome Bersêbab kanitangane.

15 Imekarungnairmalle imekautime, nukapiak ukpigait illangita atânut innangatipâ.

16 Ailunelo kargjub tupvingatut kaningitigijomik, akkianut ingilerpok, okarame: Nukapiab tokolerninga takolugo sapperpara. Akkianut ingilerpok, nipliadlarlunelo keavok.

17 Tagva Gûdib nukapiab nippinga tussarpâ. Gûdiblo engelingata kilangmit Hagare nipliavigivâ okautilugo: Hagare, suvêt? Sivôraniarnak, Gûdib nukapiab nippinga tussarmago inninganit.

18 Nikovilerit, nukapiarlo tiguvlugo aggangnut tessioruk, tâmna inugasaksoangortitsomagapko.

19 Gûdiblo ijîgik uitipak takotilugo puilavingmik. Tagvunga inermik kallusijartorpok imekautimut, nukapiarlo inertipâ.

20 Gûdiblo nukapiak illagivâ, tâmnalo perorpalliavok inukangitome nunakarlune, pittiktarnermiglo illisimatsiarpok.

21 Inukangitorlo Paran nunagivâ, anânangatalo Egip-tenemit nuliakartipâ.

22 **Nelliutome** taipsomane Abimêlege okarpok Abrahamut, Pikolelo, sorsuktuksarsoakotingita angajokângat, okarlune: Gûdib illagivâtit piniarnerne tamaine.

23 Tagva mâna Gûde tailugo angerviginga tamâne, uiverikleromatsanginavit uvamniglônêt kitorngamniglônêt erngutamniglônêt, naglingnerle sakkertitara illingnut sakkertitaksarigangne uvamnuttauk nunamullo tujormiangovi-gijarnut.

24 Tagva Abraha okarpok: Angeromavunga.

25 Abrahablo Abimêlege inerterpâ imektarvik pivlugo, Abimêlegib kivgangita tigujangat aksorornermut.

26 Abimêlegible kiovâ: Kina taimailiortok nellovara; igvillônêt tamattominga kaujitolungilarma, uvangalônêt tus-salungitara, uvlome kissiane.

27 Tagva Abraha saukkanik tuktuvangniglo tigusivok tunivlugit Abimêlegemut, tamarmiglo angerkatigêkpuk.

28 Abrahablo saukkat illangit, saugârsuit arnat sevenit, ingmigolingatipait.

29 Tagva Abimêlege okarpok Abrahamut: Suksauvât saugârsuit ukkoa sevenit ingmigolingatitatit ?

30 Kiovâle: Saugârsuit ukkoa sevenit aggamnit tigu-jaksarivatit, nellunaikutaksautilugit, uvanga imektarvik tamanna poagijarapko.

31 Tamanna pivlugo nuna tamanna Bersêbamik taijauvok, tamarmik tagvane angervingmanik.

32 Taimaglo angerkatigêmarikpuk Bersêbame. Tagva aularpuk Abimêlege Pikolelo, sorsuktuksarsoakotingita angajokângat, angerarlutiglo Filisterit nunanganut.

33 Abrahale napârtoarsungmik illijivok Bersêbame, tagvanelo Nâlekab Gûdib issokangitub attinga tuksiarvigivâ.

34 Akkunillo tujormiangovok Filisterit nunangane.

KAP. XXII.

Isaab tunergutauninga. Nahorib kinguvângit.

1 **MATTOMA** kingornagut Gûdib Abraha ôkorpâ okarvigivlugo: Abraha ! Kiovâle: Mânêpunga.

2 Okautivâlo: Isaak ernituat, nagligijat tiguleruk ailutillo nunamut Moriamut, taikanelo ôtaksamik tunergutautileruk kakkat illangane, okautiginiartamne illingnut.

3 Tagva Abraha uvlâkut makipok, siuterkortojokotineloksisivaviktârpâ, kivgânglo magguk ernineloksis illaurkovait, ikoalatiksangiglo ketjiorpok, aularluneloksis ingergavok taikunga, Gûdib okautigijanganut tâpsomunga.

4 Uvlûk pingajuangne Abraham ârlorlune aiviksane takovâkaningitomit.

5 Kivgângneloksis okautivak: Tamâne innilanganiarpotik siuterkortojorlo, uvanga nukapiarlo takpaunga aijomavoguk; tuksiarêrumnuk, tikkit somârivoguk illiptingnut.

6 Abrahablo kejuut tunergumut ôtaksamut tiguvait nangmartaurokovaillo ernerninut Isaamut, nangminerlo ikomamik savingmiglo aggangminut tigusivok; taimaidlutiglo pisukatingêlerpuk.

7 Tagva Isaak atâtaminut Abrahamut okarpok: Atâtak ! Abraham kiovâ: Ernîk, mânêpunga ! okarporlo: Tamadja ikoma kejuillo, kissianelesaugak ôtaksak naûk ?

8 Abrahâb kiovâ: Gûde saugarmik ôtaksamik tautugakarniarpok, ernîk ! Pissukatigêkpuglo.

9 Takpaungalo Gûdib okautigijanganut tikkinamik, Abraha tunerguserviliorpok, kejuillo illiorkappait kânganut, erninelo Isaak kellaksorlugo illivâ tunerguservingmut, kejuut kânganut.

10 Issaklunelo savik tiguvâ, ernine tokotsomavluglo.

11 Tagva Nâlekab engelingata kilangmit kaigarsugvigivâ okarlunelo: Abraha ! Abraha ! Kiovâle: Mânêpunga.

12 Okautivâ: Nukapiak issaktailvlugo âniatiniarnago pît; mâna kaujimagapkit Gûdemik sivôrajotit ernituat ivlerinago pivlunga.

13 Arlorlune tagva Abrahâb takosârpâ tunuminêtok angusalok, nakjungagut nâsimajok ukpiganut; aivigivlugolo angusalok tiguvâ tunergutautipâlo ôtaksamik, ernime simertinga.

14 Abrahâblo nuna tamanna atserarpâ: Nâlegak tautugakarniarpok. Tamanna pivluglo sulle uvlome okartokarpok: Kakkame, Nâlekab tautugakarviane.

15 Nâlekablo engelingata aipanganik Abraha kaigarsugvigivâ kilangmit,

16 Okarlunelo: Nangminimnik taivlunga angervikpunga, okarpok Nâlegak, taimailioravit, ernituallo ivleringinangne,

17 Tamanna pivluglo saimauseromavagit, kinguvâksatillo unuksivalliatitsomavakka uvloritjatitut kilangmêtutitut, siorakatitullo imarbiksûb sikjanganêtutitut. Kinguvâksavillo akkerartortimik upkoaksoangit pigijomârpait.

18 Kinguvâksakkullo inôkatigêksuit ilûnamatsiatik nuname saimausertaujomârput, nippiga nâlegangne.

19 Tagva Abraha utterpok kivgângminut, aularlutiglo ingergakatigêkput Bersêbamut; Abrahâlo nunakarpok Bersêbame.

20 **Pijokartut** tamakkoa kingorngane Abraha okautsau-lerpok: Ahâk, Milkatauk nukangnut Nahoremut ernernik ernivok.

21 Tamadja attingit: Uz angajuklek, Buzelo nukanga, Kemuelelo, Aramib atâtanga,

22 Kêsedelo, Hazolo, Pildaselo, Jedlafelo, Betuelelo.

23 Betuelible Rebekka pannigivâ. Sittamaujortut tâpkoa Milkab erniarivait Nahoremut, Abrahâb nukanganut.

24 Pannervgangalo Reumamik attelik kitorngakarpok-tauk: Tebamik, Gahamik, Tahasemik, Makamiglo.

KAP. XXIII.

Sara tokolerpok iluvertaumlunelo.

1 **SARA** inôvok járini 127nik, taimak unuktigijunik Sara járekarpok.

2 Saralo tokolerpok Kiriat-Arbame, tagva Hebroneme, nuname Kânaaneme. Abrahah tagva Sara oggurijartorpâ keavlugolo.

3 Abrahahlo nikovipok tokungajokotime sânganit okariartorlune Hêtib kitornganginut, okarlune:

4 Tujormiangovlunga akunapsingne nunakarama, iluverviksamik perkutekartisinga illipsingne, tokungajokotiga sâmnêtok illijaurkovlugo.

5 Tagva Hêtib kitorngangita Abrahah kiovât okarlutik:

6 Tussartigut, Nâlegak, Gûdemut nertornartitaumlutit akunaptingne, tokungajokotit illijartoruk iluverviksapta ânanaunerpânganut, akunaptingne agviartokarniangilak ilu-
vermik tokungajokotivit illijauviksanganik.

7 Tagva Abrahah nikovilerpok okkovlunelo nunab inungita, Hêtib kitorngangita, sângine.

8 Okarvigilugillo okarpok: Perkogapsinga, tokungajokotiga sâmnêtok illijartorlugo, tussarsinga tagva, Efronelo, Zoarib erninga, kenuvigijartorsiuk pivlunga,

9 Tunidjerkovlugo uvamnut kairosukutiminik Makpêlamik, perorsêvingne kiglinganêtomik. Akkinganik akkiler-
taumaringniarlune tuniliuk uvamnut, iluverviksarijomagapko akunapsingne.

10 Efronelo iksivavok Hêtib kitorngangita akorngane. Tagva Efronib Hêtitereojub Abrahah kiovâ, Hêtib kitorngangit tussartilugit, ilûnaita iglugasaksuit itertarviksoangagut itertut, okarlunelo:

11 Aukak, Nâlegak, tussarlaungmingale! Perorsêvik illingnut tunivara, kairosungalo illingnut tunivara, inôkatima takoanne tunivâkka illingnut; tokungajokotit illijartoruk.

12 Tagva Abrahah okkovok nunab inungita sângine.

13 Efronemullo okarpok, nunab inungit tussartilugit, okarlunelo: Tussalaungatôk! Perorsêviub akkinga tuniniartara, tigulauruk uvamnit, tagva tokungajokotiga illijartor-
niarpara tagvunga.

14 Tagva Efronib Abrahah kiovâ okarvigivlugolo:

15 Nâlegak, tussalaungatôk! Perorsêvik sêkeletut 400tut

silberemik akkekartok uvamnullo illingnullo sugalloarkâ ? Tokungajokotit illijartulauruk tagvunga !

16 Abrahablo Efrone nâlekpâ, silberemiglo ôktorvigivâ okautigijanganik Hêtib kitorngangit tussartilugit, silberemik sêkeletut 400tut, niuvertit tiguvaktangititut.

17 **Taimak** Efronib perorsêvinga Makpêlamêtok, Mamrib akkiane, perorsêvik kairosungalo napârtullo ilûnatik perorsêvingmêtut kiglinganêtullo

18 Perkutautitaumarikput Abrahamut, Hêtib kitorngangit, ilûnatik iglugasaksuit iterviksoangagut itertut, takonârtilugit.

19 Kingorngane Abrahab Sara nuliarne illijartorpâ perorsêviub kairosunganut Makpêlamêtomut, Mamrib akkiane, tagva Hebroneme, nuname Kânaaneme.

20 Taimak perorsêvik kairosungalo Hêtib kitornganginit pititaumarikput Abrahamut, iluverviksamik perkutekar-kovlugo.

KAP. XXIV.

Isaak nulianikpok.

1 **ABRAHA** inutokaulerpok, jâringit unuktôtilugit Nâle-kablo saimauserpâ (ilinganingine) tamaine.

2 Abrahablo okautivâ kivgarne, iglomine inutokauner-paujok, pimaklerteojok perkutinginik tamainik: Aggatit sibviamnut illikit,

3 Nâlegarlo kilaub Gûdinga nunablo Gûdinga taivlugo angermarikkinga, ernimnut nuliaksarsinianginavit Kânaanib panninginit nunakatigijamnit.

4 Inôlervigijamnulle illamnullo ingerganiarpotit, taikangat ernera Isaak nuliaksarsivlugo.

5 Kivgab okautivâ: Arnable maligomangipanga nunamut mattomunga ? ernît uttertitaiksarivigô tagva nunamut ipso-munga kemaktarnut ?

6 Abrahab okautivâ: Taimailitailigit, ernera uttertitaiksaringilat taikunga !

7 Nâlekab, kilaub Gûdingata atâtama iglunganit inûlervimnillo aulartingmanga okarvigivlungalo angermariklungalo, okarlune: Kinguvâksarnut nuna tamanna tunijomavara; tâpsoma engeline sivunikkut tillilârpâ, taikangallo ernera nuliaksarsilârpâ.

8 Arnable maligomangipattit, uvamnutt angernivit ili-

ngavigijungnairniarpâtit. Kissiane ernera uttertitaksaringilat taikunga.

9 Tagva kivgab aggane illivait angajokâme sibvianganut, angervigivlugolo tamattominga.

10 **Kivgablo** kamêlit tellinaujortut, angajokâme kamêlekotingita illangit tîguvait aularlunelo, sunatuinaillo angajokâme perkutingit neksarlugit. Aularlunelo ingergavok Mesopotâmiamut, Nahorib iglugasaksoanginut.

11 Iglugasaksuillo sillatâne kamêlit akopitipait imektarviub sennianut unnungmat, arnallo imektarvigivaktangat nelliutingmat;

12 Okarlunelo: Nâlegak, Gûdeojotit angajokâmnut Abrahamut, tikkitautilaolangatôk uvlome, nâpkigosungnîllo sakkertilauruk angajokâmnut Abrahamut!

13 Takovarua imektarviub senniane kikkartunga, iglugasaksuillo inungita panningit annilârput imektariartorlutik.

14 Uigasuillo illanganut okaleruma: Imektautit manileruk imertilungalo;—tâmnalo okarpat: Imilaurit, kamêlikotitittauk imertitsomagivakka;—tâmnaule piksaurkojat kivgarnut Isaamut, taimaglo kaujititauniarpunga, nâpkigosungnermik sakkertitsigavit angajokâmnut.

15 Okautsit makkoa nârkârnagit sulle, sunaubva, Rebekka kailerpok, Betuelib panninga, Abrahamb nukangata Nahorib nuliangata Milkab erningata panninga, imektautine tuimiklugo.

16 Inôsuktorlo tâmna kênatsiarikpok, uigasuk, angumiglo sulle aipaksarsilungitok. Tâmna attersârpok imektarvingmut, imektautinelu ullipkinamiuk, majoralerivok.

17 Kivgab tagva akpangerdlune pâriartorpâ, okarlunelo: Imektautingnit imigalâlangatôk!

18 Okautivâ: Imilaurit, Nâlegara! Imektautinelu aggangminut akkartisârpâ imertilâllo.

19 Imertijarêramiuglo okautivâ: Kamêlekotitittauk imertitsomagivakka, imerugungnairtilugit.

20 Tuavilunelo imektautine kovivâ imervinginut, ammalo imektarvingmut akpangerlune imektarivok, kamêlekotingit tamaita imertilugit.

21 Angutiblo tattaminiarivâ nippekaranele, kaujijomav-lune ingergarnine sullitsiartitaungmangât sullitsiartitaungimangâllônêt Nâlekamut.

22 Kamêlit ilûnatik imerêrmattale, angutib kingarmiutak goldeojok, sêkelib koppangatut okumaitigijok, tallermiutaglo

magguk, sêkeletut goldetut tellimaujortotut okumaitigijuk tiguvait,

23 Okarlunelo: Kia pannigivâtît? Okautilaungatôk! Atâtavit iglungane siniktarvikarungnaralloarkitâ?

24 Okautivâ: Betuelib pannigivânga, Milkab erningata, Nahorimut erniarilauktangata.

25 Amma okautivâ: Ivît nerkiksallo amigalungilat uvaptिंग्ने, siniktarviksakatsiarpoktauk.

26 Tagva angutib okkungalerlune Nâlegak opigidlarpâ,

27 Okarlunelo: Nâlegak, angajokâma Abrahâb Gûdinga, nakorijaule, nâpkinningnine miksekârninelo angajokâmnut allalungimagik. Uvangalo NâleKab nangminek tessiorpânga apkome angajokâma nukangata iglunganut.

28 Uigasuglo akpangerpok, tamakkoalo tamaita okautigijartorpait anâname iglungane.

29 Rebekalo annekarpok Lâbanemik attelingmik. Lâbanelo akpangerpok imektarvingmut, angumut tâpsomunga,

30 Takogamigit kingarmiutak tallermiutaglo najarme tal-lingingne, tussalaitalo Rebekab najarme okausingit, unip-kârmat: Imâk okautivânga angutib taipsoma. Tikkina-miuglo angut imektarvingme kikkartok, kamêlit senniane,—

31 Okautivâ: Itilaurit, saimausertaujotit Nâlekamut! Sôk sillame kikkarkêt? Iglo pijarêrpara, kamêlikotitillo iniksarsiomivlugit.

32 **Tagva** angut iglomut iterpok; kamêlillo anudjarpait, ivingnik nerkiksanglo tunitjivigivlugit. Imermiglo kaitsivut, tâpsoma ingergakatingitalo ittigangita ubvartaujutik-sanganik.

33 Nerkiksallo sâmiutivait tâpsomunga. Tâmnale okarpok: Nerrijomangilanga okarkârnanga perkojaunimnik. Okarporle: Attê, okalerit!

34 Okarpok: Abrahâb kivgarivânga.

35 Nâlekablo angajokâra saimausidlarpâ angijorortilugolo, saukaniglo, tuktuvangniglo, silberemiglo, goldemiglo, kivganiglo angutinik, kivganiglo arnanik, kamêliniglo, siuter-kortojuniglo tunitjivigivlugo.

36 Saralo, angajokâma nulianga, ernermik ernilaukpok angajokâmnut, inutokaugalloarame. Tâpsomunga tunivait perkutine tamaita.

37 Angajokâmalo angerkovânga ingminut, okarlune: Nuliaksarserkongilagit ernimnut Kânaanib paninginit nuna-katigijamnit:

38 Atâtamale iglunganut illamnullo ingergavlutit ernera nuliaksarsijaksarivat.

39 Uvangale angajokâmnut okarpunga: Arnable maligomangipanga, kanok tagva?

40 Okautivânga: Nâlekab sakkâne arvertarpunga: tâpsoma engeline illaurkolârpâ illingnut ingergatsiartiluttillo, nuliaksarsijungnarkovlutit ernimnut illamnit, atâtamalo iglunganit.

41 Angernivit ilingavigijungnairniarpâtit illamnut tikki-kuvit; angerutiginagolo kippilukpatit, angernivit ilingavigijungnairniarpâtit.

42 Uvlome imektarvingmut tikkinama, okarpunga: Nâlegak, Gûdeojotit angajokâmnut Abrahamut, tamaunga ingergarama, ingergarnera sullitsiartitauletôk illingnut!

43 Takovarma, tamâne imektarviub senniane kikkartunga, uigasungmiglo anijokarpat imektariartortomik, okarvigigupkolo: Imektautingnit imigalâlangatôk!

44 Taimnalo okarpat: Imilaurit, kamêlikotitittauk imertitsomagivakka;—tâmnaule arnak Nâlekab piksaurkojanga angajokâma erninganut.

45 Okautsit makkoa nârкъâr nagit sulle ômatipkut, sunaubva, Rebekka kaivok, imektautine tuimiklugo, atersalerporlo imektarvingmut imektarlune. Tagva okautivara: Imertilaunga!

46 Imektautinelô akkartisârpâ tuiminit, okarlunelo: Imilaurit, kamêlikotitittauk imertitsomagivakka. Imeramalo kamêlittauk imertinivait.

47 Apperigapko okarlunga: Kia pannigivâtît?—kiovânga: Betuelib pannigivânga, Milkab erningata, Nahoremut erniari-lauktangata. Tagva kingarmiutak illivara kinganganut, tallermiutaglo tallîgingnut.

48 Okkungavlungalo Nâlegak opigivara, Nâlegak nakorivlugo, angajokâma Abrahamb Gûdingata tessiormanga apkome idluartome, angajokâma katangutingata panninganik tiguserkovlunga erninganut.

49 Illipsele sakkertitsijomagupse naglingermik nelâgornermiglo angajokâmnut, kaujitissinga. Pijomangikupselônêt, kaujiti-laungmisinga. Tallerpiublônêt saumiublônêt tungânut sâniarpunga tagva.

50 Labaniblo Betueliblo kiovâk okarlutiglo: Tamanna Nâlekamit pivok. Sumik okarlunuk illingnut sapperpoguk, ajortomiglônêt ajungitomiglônêt.

51 Tagga, Rebekka sângnêpok, tiguleruk ingergalutillo, angajokâvit erninganut nuliaksaurkovlugo, sorlo Nâlegak okarmat.

52 Okausingit tamakkoa Abrahâb kivgangata tussaramigit, okkungalerpok nunamut NâleKab sângane.

53 Kivgablo perkutit goldeojut, perkutillo silbercojut, annorâllo, tiguvait Rebekkamullo tunivait. Anningale anânangalo pivianartunik tunitjivigivak.

54 Tagva nerrivlunelo imerpok angutit illagijane illagivlugit, siniktarpullo. Kaulermalle, makiput okarporlo: Aularkolersingatôk angajokâmnut !

55 Anningale anânangalo okarpuk: Uigasuk uvlilerle sulle uvaptingne tellimaujortuniglônêt; kingorngane aulalârpotit.

56 Okautivaille: Agviarniarasinga, NâleKab ingergarnera sullitsiartingmago. Aularkolersingatôk, angajokâmnut ingerarkovlunga.

57 Okarput: Uigasuk kairkolavut tukisiniarlugo.

58 Rebekkalô kairkovât apperivlugolo: Angut una ingergakatigijomaviûk ? Kiovek: Ahaila, ingergakatigijomavara.

59 Tagva aularkovât Rebekka kattangutitik pairijigijangalo, illautilugik Abrahâb kivganganut ingergakatinginullo.

60 Rebekkalô pillorirkovât okautilugo: kattangutîk tausendeokattartunik pijokarle illingnit; kinguvâksavillo ômigijimik upkoaksoangit perkutigiligit !

61 **Tagva** Rebekka parngnailerpok, kivgane illagivlugit; kamêlinullo ikkinamik, angut malikpât. Kivgable Rebekka tigugamiuk, aularpok.

62 Isaarle tikkisimavok “Omajub uvamnik takojub puilavinganit”; nunab sekerngane nunakarama.

63 Unnulermallo, pisukpok natername, issumaksarsiorlune. Arloramelo kamêlit tikkilertut takovait.

64 Rebekkablo ârlorlune Isaak takogamiuk, kamêlemit akkarsârpok.

65 Kivgamullo okarpok: Angut tâmna kinauvâ, pagrearluta naternakut pisuktok ? Kivgak okarpok: Tâmnauvok angajokâra. Tagva kênailitak tiguvâ mattuvlunelo ingminik.

66 Kivgablo Isaak pinialauktaminik tamainik kanok unipkârvigijartorpâ.

67 Isaable Rebekka itertipâ anânagilauktame Sarab tuppinganut, Rebekkalô illaliorlugo nuliarivâ nagligilâlo. Tai-mak Isaak manigortaulerpok anâname tokungata kingorngagut.

KAP. XXV.

Abraham erningit Keturamit. Abraha tokovok. Ismaêlib kinguvângit. Esauelo Jakolo.

1 **ABRAHALO** nuliannikkivok Keturamik attelingmik.

2 Tâpsomungalo erniarivait Simralo, Jokasânelo, Mêdalo, Mîdialo, Jisbakelo, Suarelo.

3 Jokasâniblo Seballo Dedanelo ernertârivak. Dedanible Assurillo Latusillo Leumillo kinguvârivait.

4 Mîdiable kinguvângit (imaiput): Efalo Eferelo Hanorlo Abidalo Eldaalo. Tâpkoa tamaita Keturab kinguvârivait.

5 Abrahablo perkutine tamaita tunivait Isaamut.

6 Pannervgaminille kitorngarijane pilliutitik tunidjivigivait, inôvlunelo sulle nûtipait ernerninit Isaamit paunga kangillît nunangannut.

7 Abrahable inôsingata jâringita unurningit 175ovut.

8 Abrahalo anernangerlune tokovok kêrtovlune, îtôvlune, nâmaksimariklune, sivorliminullo illaliudjauvok.

9 Isaablo Ismaêliblo ernîkita illijatorpâk kairosungmut Makpêlamut, Efronib, Zoarib Hêtitereojub erningata perorsêvinganut, Mamrib akkianêtomut,

10 Perorsêvingmut, Abraham pissiarilauktanganut Hêtib kitornganginit. Tagvunga Abraha nuliangalo Sara illijartortauvuk.

11 Abrahablo tokungata kingorngagut, Gûdib erninga Isaak saimauserpâ. Isaarlo nunakarpok “Omajub uvamnik takojub puilavingane”.

12 **Tamadja** unipkautsit Ismaêlemik, Hagarib Egiptene-miub, Sarab kivgangata erniarilauktanganik Abrahamut.

13 Tamadjalo Ismaêlib erningita attingit, tâpkoa maliklugit kinguvângit atserartauvut: Nebajot, Ismaêlib erniarikâr-tanga, Kedar, Adbêl, Mibsam,

14 Misma, Duma, Masa,

15 Hadar, Têma, Jetor, Nafis, Kedma.

16 Tâpkoangovut Ismaêlib erningit, tamakkoangovullo attingit (ilingatitaumajut) tangmârvinginut iglugasanginullo; attanit 12 inôkatimingnut ilingajut.

17 Ismaêliblo jâringit 137olaukput; anernangerlunelo tokovok, sivorliminullo illaliudjauvok.

18 Nunakarpullo Havilamit Suere tikkidlugo, Egiptenib

tungânêtok, apkome Assiriamut. Kattangutimelo ilûnatik kangiane nunakarpok.

19 **Tamadja** unipkautsit Isaamik, Abrahâb erninganik: Abrahâb Isaak ernerivâ.

20 Isaarlo jârekarpok 40nik, Rebekka nuliariigamiuk, Betuelib Siriamiub panninga, Mesopotamiamit pijok, Labanib Siriamiub najanga.

21 Isaablo Nâlegak kenuvigivâ nuliane pivlugo, kitorngisuingmat. Nâlekablo tussarpâ, Rebekkalô nulianga singailerpok.

22 Nutaraksâgle aporkattauntingmanik timingane, okarpok: Taimaipat, sûdlunga taimailivingâ? Nâlegarlo apperijartorpâ.

23 Nâlekablo okautivâ: Inôkatigêksuit magguut timingnêput, inugiartoksuit magguut timingnit anijomârput; inôkatigêksuit aipaingit sâlakaromârput aipaîningnik, anginersarlo kivgaksauvok mikkinersamut.

24 **Erniviksangale** nelliutingmat, nutte, maggoliarkarpok timingane.

25 Annerkârtorlo aupallângavok, merkokarlune kissiktut; tâmna Esauemik atserarpât.

26 Kingorngagut nukanga annivok, aggangillo angajume Esauib kingminganik tigumiarpot; tâmna Jakomik atserarpât. Isaarlo 60nik jârekarpok, erniangongmanik.

27 Nukapiâgle inôsuleramik, Esaue ômajoksiorteolerpok iglomêjuitok, Jakole sinaungaitok tuppermiôvok.

28 Isaablo Esaue nagligivâ, tâpsoma pijaviningit mamarivlugit; Rebekkable Jako nagligivâ.

29 **Uvlullo** illangane, Jako nerkiksaminik igangmat, Esaue naternamit tikkipok merngortorlune.

30 Jakomullo okarpok: Aupalluktak nerrilaulago-ai? manna aupalluktak, merngortudlarama. Taimaimat Edomemik taijaugivok.

31 Jakoble okautivâ: Erniangokârnît pissiarilaulago uvlo-me!

32 Esauib kiovâ: Takkuit, tokojuksatuinaugama, erniangokârnera suksarivigô?

33 Jakob okautivâ: Tagva angerviginga mâna! Angervigivâ tagva, erniangokârnine niorvgutigivlugo Jakomut.

34 Jakoblo tunivait Esauemut kakkôjat makpatâgulaillo pîseojârtut igamajane; tâmnalo nerrivok imilarmelo, nikovilerporlo aularlunelo. Taimak Esauib erniangokârnine suglugivâ.

KAP. XXVI.

Isaab ingergarninganik.

1 **KANGNARTOKSOARLO** nelliutivok nuname, kângnartoksoak taimnaungitok sivorlek Abraha inôtilugo nelliussimajovinek. Tagva Isaak ingergalerpok Abimêlegemut, Filisterit attaninganut, Geraremut.

2 Nâlekablo sakkervigivâ okautilâlo: Ingergarniarnak Egiptenemut, nunamêtualerille okautigijamne illingnut.

3 Nuname mattomane tujormiangolerit, uvangalo illagijomavagit saimauserlutit, illingnut kinguvâksarnullo nunat tamakkoa tamaita tunijomagapkit, angerneralo angernerijara atâtangnut Abrahamut sokosijuititsomavara.

4 Kinguvâksatillo unuksivalliatitsomavakka kilaub uvlori angititut, kinguvâksarnullo nunat tamakkoa tamaita tunijomavakka. Kinguvâksakullo inôkatigêksuit nunamêtut ilûnamatsiatik saimausertaujomârput,

5 Imâk pivlugo: Abrahâb nippiga nâlengmago, maligaksaurkojakkalo malingmagit, perkojakkalo ilusiorkojakkalo piniaraksaurkojakkalo.

6 **Isaak** tagva Gerareme nunakalerpok.

7 Inuillo tagvanêtut nulianga apperkutigijarangatsuk, okarpakpok: Najagivara; nuliarivlugo okariak kappiagigamiuk, (issumakarlune:) Tamânemiut tokoniarpânga Rebekka pivlugo, kênatsiaridlarnermat.

8 Pijokarporlo; tagvanêlukitâlermat, Abimêlege, Filisterit attaningat igalâkut itsuarpok takolerlugolo, sunaubva, Isaak nuliainik Rebekkamik erkitsijok.

9 Tagva Abimêlegib Isaak kaikovâ okautilâlo: Atso illâ, nuliarivat. Sôk najagivlugo okarkêt? Isaablo kiovâ: Issumagama: tokoniarpallukpânga tamna pitjutigivlugo.

10 Abimêlegiblo okautivâ: Sôk taimailiorpitigût? Serlak inuit illangata nuliat tuttilungilâ; passitiksakartinajarpaptigut tagva.

11 Abimêlegiblo inukotine tamaita inerterpait okautivlugit: Nelliât angumik ôminga nulianganiglônêt aktuijok tokotaksauvok.

12 Isaarlo nuname mattomane karngasoivok, karngasortanclo hundertertorlugit kattersoivok jâreme ômane, NâleKab saimausermago.

13 Angullo tâмна angijororpok, angijororpalliatuinarlunelo angijomariolerpok tâva.

14 Saukkallo tuktuvaillo kattimajoksuit, kivgallo unuktut pigivait; tamanna pivlugo Filisterit annerutivât.

15 Imekarvîllo tamaita, atâtangata kivgangita poagijartaviningit, atâtanga Abraha inôtilugo sulle, Filisterit simikpait kibviarlugillo ivjomut.

16 Abimêlegelo Isaamut okarpok: Aularit, sôngoluadlaravit uvaptingnut!

17 **Tagva** Isaak tagvangat aularpok, tangmârlunelo Gerarib naksangane, nunakalerlunelo tagvane.

18 Imekarvîllo poagijartaupsârkovait, poagijartaujovinît atâtanga Abraha inôtilugo, Filisterille kibviartangit Abrahâb tokungata kingorngagut, attekartipaillo sorlo atâtangata atse-
rarlaungmagit.

19 Isaablo kivgangit naksarme poagijaramik, puilavik issungitomik imilik nagvârpât.

20 Mianersijulle Geraremiut akkerartorpait Isaab kivgangit, okarlutiglo: Uvagut imek tâмна perkutigivavut. Tamanna pivlugo puilavik tâмна Esekemik taivâ, aivautigingmat-
suk tâмна pitjutigivlugo.

21 Tagva imekarviksak assia poagijarpât, tâmnatauk akkerartûtigivât; tamanna pivlugo Sitnamik atserarpâ.

22 Tagvangallo nûpok, imekarviksak assia poagijarlugo, tâмна akkerartûtigingilât; tamanna pivlugo Rehôbotemik atserarpâ, okarlunelo: Mâna Nâlekab inniksaliorpâtigut aglisitilutalo nuname mattomane.

23 Tagvangallo aularpok Bersêbamut.

24 Nâlekablo unnuarme taipsomane sakkervigivâ okautilâlo: Uvanga tagva atâtavit Abrahâb Gûdinga. Sivôranianak, illagigapkit saimäuseromagapkillo, kinguvâksatillo unuksivalliatitsomagapkit kivgara Abraha pivlugo.

25 Tagvanelo tunerguservingmik senavok, Nâlekablo attinga tuksiarvigivâ, tangmârlunelo tagvane, Isaablo kivgangita imekarviksak poagijarpât.

26 Abimêlegiblo tikkipâ Geraremit, illanârijangatalo Agusab, sorsuktuksaksoangitalo angajokângata Pikolib.

27 Isaable okautivait: Sôk tikkipisê uvamnut? omigivlunga aulartinapsinga illipsingnit.

28 Tâpkoa okarput: Missigimarikpogut Nâlekab illagingmatit. Tamanna pivlugo okarpogut: Angerkatigêlauktatôk uvagullo igvillo, angerkatigilaptigillo,

29 Idlultulerkonak uvaptingnut, sorlo uvagut aktulaungi-naptigit, sorlolo piniarvigigaptigit ajungitotuïnarmik, aular-kolutillo ullapirksautekarluta. Igvillo Nâlekamut saimau-sertaumavotit.

30 Tagva nerrimâraksanik âkiksoivok, nerrilerpullo imi-larmiglo.

31 Uvlârarsukullo makileramik, angerkatigêkput; Isaablo aularkovait, ullapirksautekarlutiglo aularput tâpsomangat.

32 Uvlorme taipsonane Isaab kivgangita tikkipât, okau-tivlugo imekarvingmik poagijartamingnik, okarlutik: imer-mik nagvârpogut.

33 Tagva Sêbamik taivâ, tamanna pivlugo iglugasaksuit Bersêbamik taijauvut uvlomemut.

34 **Esau**ele jârekaramé 40nik, nuliarilerpak Judi, Berib Hêtiterib panninga, Basmâtelo, Elonib Hêtiterib panninga.

35 Tâpkoa kiksautauvuk Isaamut Rebekkamullo.

KAP. XXVII.

Saimanartok angajuklermut pijuksak Jakob pivâ.

1 **PIJOKARPORLO**, Isaak inutokaulerame, takpêdlunelo tautugungnailerame, Esaue kairkovâ, ernine angajuklek, okautivlugolo: Ernîk! Kiovâle: Mânêpunga.

2 Okautivâlo: Takovarma îtôlertunga, tokoviksaralo nel-lovara.

3 Taimaimat sakkutit tigulaukit kargjokautillo pittiksillo, naternamullo aularlutit ômajoksiorit piksamnik,

4 Nerkiksaliorlungalo mamaktunik, ikligijamnik, kaitsi-vigivlungalo nerrerkovlunga, tarnima saimauuseraksaringmattit tokolerkârnanga.

5 Rebekkable tussâvâ Isaak ernerninut Esauemut okar-tok. Esauelo naternamut aularpok ômajoksioromamut kai-tsijomamullo.

6 Tagva Rebekka okarpok Jakomut ernerninut, okarlune-lo: Takkuit, atâtat tussâvara angajungnut Esauemut okartok:

7 Omajoksiolerit piksamnik nerkiksaliorlungalo mamak-tunik nerrijaksamnik, saimauuseromagapkit Nâleka sângane tokolerkârnanga.

8 Nippiga mâna tussaruk, ernîk, kanok perkogapkit!

9 Nergjutekotinut ailerit, tuktungajoarângniglo maggung-nik aiklerit, ajungitûgnik, atâtat taipkungninga nerkiksa-liorniarapko mamaktunik ikligijangnik.

10 Atâtat âtsiviginiarpat tagva nererkovlugo, saimauser-niarmatit tokolerkârane.

11 Jakoble anânane Rebekka okautivâ: Takkuit, angajuga Esaue merkokarpok, uvangale merkokangilanga.

12 Atâtama tapsiktorpallungniarpânga, uiveriklertotut tagva ilinganiarpunga tâpsomunga, idluilukutiksamiglo piti-tsiniarpunga uvamnut, saimanartok pinago.

13 Tagva anânangata okautivâ: Ernîk, illingnut idluiluku-tiksak uvamnut ilinganiarpok; nippiga nâletuinaruk; aikleriartorit taipkungninga uvamnut.

14 Tagva aikleriartorpok anânane âtsivigivlugo, anânangalo nerkiksaliorpok mamaktunik atâtangata ikligijanginik.

15 Rebekablo tiguvaît Esauib, ernime angajukliub anno-rângit ânanât, pairijane iglome, tâpkoningalo Jako attitipâ ernine nukardlek.

16 Tuktungajoaraglo amîgingnut aggangit immuserpait, kongasingalo merkokangitok.

17 Nerkiksallo mamaktut, kakkôjallo senajane, ernorme Jakob agganginut tunivaît.

18 **Atatanelo** itervigivâ okarlune: Atâtâk ! Kiovâle: Mânêpunga; kinauvêt, ernîk ?

19 Jakoblo atâtane okautivâ: Esaueovunga ernerkârtat; piniarpunga okautsitit maliklugit; makilaurit, iksivavlutillo nerrilaurit pigijamnit, saimausertaurkovlunga tarningnut.

20 Isaable ernine okautivâ: Ernîk, kanok illiorlutit piniut-jisaraidlarnerkêt ? Kiovâ: NâleKab Gûdivit naipitsitingma-nga.

21 Tagva Isaab Jako okautivâ: Maungalerit, ernîk, tapsigomagapkit, tâmnaungmangârpit ernera Esaue, tâmnaungimangârpillônêt.

22 Jakolo atâtaminut Isaamut pivok; tapsigamiuglo okarpok: Nippît tagva Jakob nippinga, aggaktille tagva Esauib aggangit.

23 Illitaringilâlo, aggangit merkokarmatta Esauib angajungata aggangititut, saimauserpâlo.

24 Okautivâlo: Nelâgut tâmnauvêt ernera Esaue ? Kiovâ: Tâmnauvunga.

25 Tagva okautivâ: Kaikit, ernima pijanginit nerrilanga, tarnimnut saimausertaurkovlutit. Atsivigingmagolo, nerri-vok; vainemiglo âtsivigingmago, imerpok.

26 Atâtangatalo Isaab okautivâ: Kailaurit, ernîk, kuniklungalo !

27 Sâvigivâ tagva kuniklugolo. Annorângitalo tippingat naigamiuk, saimauserpâ okarlunelo: Ahâk, ernima tippinga naternab tippingatun-ipok, NâleKab ânanausijangata.

28 Gûdib tunitjivigilitit kilaub mitsuksoanganik, nuna-miglo ajoksarnangitomiK, kakkôjaksaniglo vainemiglo amigangitunik !

29 Inugasaksuit kivgartoraksarivâtît, inôkatigêksuillo pâ-maktervigijaksarivâtît. Attaniolerit katangutingnut, anânavillo kitorngangita pâmaktervigijaksarivâtît. Illingnik okautekaluktok okauserlugviole, illingniglo saimarsaijok saimausertaule !

30 **Pijokarporlo**, Isaab okautsine saimanartut Jakomut nângmagit, Jakolo serlamarik atâtaminut Isaamit aningmat, tagva angajua Esaue tikkipok ômajoksiorvingmit.

31 Tâmnatauk mamaktunik nerkiksanik âkiksoivok, âtsilarmelo atâtaminut, okautivâlo: Atâtaga makile, nerri-vlunelo ernime pilauktanganit, tarnivit saimauseraksaring-manga.

32 Atâtangatalo Isaab aperivâ; Kinauvêt ? Okarpok: Esaueovunga ernerirkârtat.

33 Tagva Isaak angijoksoarmik koaksâdlarpok, okarlunelo: Kinauvâ tagva ômajoksiorok imna kaitsijok uvamnut ? Tamainillo nerrivunga tikkerkârtinak, saimauserparalo, saimausertauningalo sokoserniangilak illa.

34 Esauible atâtame okausingit tussaramigit, kaggudlarpok angijomik ajornartomiglo; atâtaminullo okarpok: Atâtâk, uvangatauk saimausilaungminga !

35 Okarporle: Nukat uiveriklerlune iterame, saimanartok illingnut pijuksak tigugêrpâ.

36 Okarporlo: Tukkelingmik Jakomik attekalingilâk ? maggoertorlune mâna uiveringmanga. Erniangokârnera tigunamiuk, ahâglo, mâna saimanartok uvamnut pijuksak tigugivâ. Okarporlo: Saimanartomik uvanga pijaksamnik torkortaumajokangilatît ?

37 Isaab Esaue kiovâ okautilâlo: Attaningortipara illingnut, katangutingillo tamaita kivgangortipakka tâpsomunga, kakkôjaksaniglo vainemiglo piksakartipara; kanok tagva igvit piniarvigijaksarivagît, ernîk ?

38 Esauelo atâtaminut okarpok: Atâtâk, saimanartok tâmnainak pigiviûk ? Uvangatauk saimausilaungminga, atâtâk ! Nipliadlalerporlo Esaue, keasivlunelo.

39 Tagva atâtangata Isaab kiovâ okarlunelo: Ahâk, apsi-

mavlutit nunamit ajoksarnangitomit kilaublo mitsuksoanganit pângat pijomit nunakaromârpotit.

40 Saviksoarnit inôgutiksarsijomârpotit, nukallo kivgar-toraksarivat. Pijokaromârpore, nâlegungnairlugo nangmaut kongasernit kippijomârangne.

41 **Esauiblo** Jako omigilerpâ saimanartok pivlugo, atâtangata illijanga taipsomunga; ômatimigullo okarpok: Nelliutisarainiarpok oguarviksak atâtaga pivlugo, nukara Jako tokotsomavara tagva.

42 Rebekkale okautjaulerame ernime angajukliub Esauib okausinginik makkoninga, tillikliutjivok, ernine nukardlek Jako kairkovlugo, okautilâlo: Ahâk, angajuvit Esauib akkinniarasuarpâtit, tokotsomavlutit.

43 Taimaimat nippiga tussaruk mâna, ernîk! Opalungailerit kemâvlutillo annimnut Labanemut Haranemut.

44 Tagvanêlerillo, angajuvit ningarosungninga soraitsiarivlugo;

45 Angajuvit ningaumajârninga illingnut soraitsiarivlugo, puigutsiarivlugolo kanok piniarvigigangne; tagva tillikliutjomârpunga, taikangat kairkovlutit. Sôk tamaptingnik attautsikut aksârtaujuksauvêk?

46 Isaamullo Rebekka okarpok: Ariutsivunga Hêtib panningit inôkatigivlugit. Jako nulianikpat Hêtib panningita illanganik, ukkotitunak ovanemiut panningititut-itomik, inôsek suksarinajarpigô?

KAP. XXVIII.

Jako kemâvok Haranemut.

1 **ISAAB** tagva Jako kairkovâ saimauserlugolo; perkologolo okautivâ: Nulianingniarnak Kânaanib panningita illanganik!

2 Parngnailerille ingergarniarlutit Mesopotâmiamut, anânavit atâtangata Betuelib iglunganut, taikangallo nulianilerit Labanib, anânavit anningata panningita illanganik.

3 Gûdible ajugakangitub saimauserlitit, kinguvâktârtiluttillo, unuksivalliatiluttillo inôkatigêksoangortilutit;

4 Illingnullo tuniliuk saimanartok Abraham pinga, illingnullo kinguvâksarnullo kingunikkut, kingormgujerkovlutit nunamik tujormiangorvigijarnik, Gûdib tunijanganik Abrahamut!

5 Taimak Isaab Jako aularkongmago, ingergavok Meso-

potâmiamut Labanemut, Siriamiomut, Betuelib erninganut, Jakoblo Esauiblo anânangata Rebekkab anninganut.

6 **Esauele** tukisilerame, Isaab Jako saimauserlugo aular-kongmago Mesopotâmiamut, taikangat nulianirkovlugo, saimauserlugolo inerterlugolo okautingmago: Nulianingniarnak Kânaanib panningita illanganik,

7 Jakoblo atâtakûngne nâlengmagik aularlunelo Mesopotâmiamut;

8 Tukisileramelo Esaue, atâtame Isaab Kânaanib panningit idluaringimagit;

9 Tagva Ismaêlemut aivok, nulianiklunelo Mahâlatemik, Ismaêlib Abrahâb erningata panninganik, Nabajotib najanganik, nuliarigêrtângminut illautilugo.

10 **Jakole** aularpok Bersêbamit, ingergavlunelo Haranemut.

11 Nunallo illanganut tikkiname, unnuivok tagvane, sekinnek tachisimangmat. Ujaraillo tagvanêtit illanganik tigusivok akitiginiardlugo, tagvungalo innalerpok.

12 Sinnaktômavorlo: sunaubva majûtut nuname nappajut, issuallo aktoajok kilangmut. Sunaubvalo, Gûdib engelingita majoarvigivait akkarvigilaitalo.

13 Sunaubvalo, Nâlegak kollâne nangerpok okarlunelo: Uyanga Nâlegauvunga, atâtavit Abrahâb Gûdinga, Isaablo Gûdinga. Nuna innangavigijat tunijomavara illingnut kinguvâksarnullo.

14 Kinguvâksatillo nunab sanningititut unuktigijomârput, siamaromârpotillo paunga taunungalo avungalo aungallo, illikkullo kinguvâksakullo kinguvârêt nunamêtit ilûnamatsiatik saimausertaujomârput.

15 Ahâglo, illagivagit saputijomavagillo, naukullônêt ingergaralloarmangârput; uttertitsomavagillo nunamut matto-munga, allarniatsanginapkit, piniarkârtinanga tamainik okautigijamnik illingnut.

16 **Jakolo** siningminit tupalerame, okarpok: Illâle! tamadja NâleKab najugâ, uvangalo nellovara.

17 Kuksasuklunelo okarpok: Kappianarmêk nuna tamanna! Tamannauvok illa Gûdib iglunga; tamannauvok kilaub upkoanga!

18 Uvlârarsukullo Jako makiname, ujarak tiguvâ, akitigijane, nellunaikutangortilugolo nappartipâ, orksumiglo koverivâ kânga.

19 Nunalo tamanna Bêtelemik taivâ: sivornagut igluga-sait Lûsemik attekaralloarmatta.

20 Jakolo angerpok, angerutekarlune imâk: Gûdib illa-gikpanga, saputivlungalo apkome mattomane ingergarvigijamne, nerkiksanglo tunitjivigikpanga nerrijaksamnik, annorâniglo attijaksamnik,

21 Atâtamalo iglunganut utteruma kanoenanga, tagva Nâlegak Gûdigijomavara.

22 Ujararlo una nappartitara, nellunaikutaksautilugo igluksaujomârpok Gûdemut, ilûnatiglo uvamnut tunijavit tellimaujoanimmarik tunitjivigijomârpagit.

KAP. XXIX.

Jakob Lealo Rahelelo nuliarilerpak.

1 **TAGVA** Jako aularpok kangilit nunanganut ingergav-lune.

2 Takojaksarsioramelo, takolerpâ imekarvik natename, saukallo kattimajut pingasuit senniane akopijut, imekarvingmit tâpsomangat saukat kattimajut imertitauvangmatta; ujararlo imekarviub pânganêtok angijôvok.

3 Saukallo kattimajut ilûnatik tagvunga kattingatitaulerangata, ujarak imekarviub pânganit aksakâtilugo saukat imertipait, kingorngane ujarak imekarviub pânganut ilingnivlugo inninganut.

4 Jakoblo aperivait: Katangutikka, nanemiongovisê? Kiovât: Haranemiongovogut.

5 Amma aperivait: Labane, Nahorib erninga, illitarivisiûk? Kiovât: Illitarivavut.

6 Aperigivok: Kanoengitsiaralloarkâ? Kiovât: Kanoengitsiarpok; taggale panninga Rahele saukanik tikkiutjijok.

7 Okarivok: Takovose uvloklingimat sulle, nergjutillo kattingatitaujariakangimatta sulle; saukat imertirkârlugit nerrinasuktitsartorsigik.

8 Kiovât: Sapperpogut, nergjutit kattimajut ilûnamatsiatik kattingatitaurkârtinagit. Taimaipatta, ujarak aksakâtilugo imekarviub pânganit saukat imertipavut.

9 **Sulle** okakatigêktilugit, Rahelib atâtame saugakutingit tikkiutivait, taipkoninga miânersijôgame.

10 Jakoble Rahele takoleramiuk, angame Labanib panninga, saukallo angame Labanib saugakutingit, tagva ujarak aksakâtitsartorpâ imekarviub pânganit, angamelo Labanib saugakutingit imertipait.

11 Jakoblo Rahele kunikpâ, niplerlunelo keavok.

12 Rahelelo, Jakob nellojungnairtingmago, atâtangata ujurugingmago Rebekkablo erneringmago, akpangerpok, atâtane kaujititsartorlugo.

13 Labanible tussaramiuk ujoruminik Jakomik okartok, akpangerpok pagreartorlugo, erkilugolo kunikpâ, iglominullo itertipâ. Tagva Labanemut tamakkoninga tamainik unipkârpok.

14 Labanible okautivâ; Ahale, sauningma uviningmalo illagivâtit. Takkerlo nâvlugo tagvanêngmat,

15 Labanib Jako okautivâ: Ujurugigalloarapkit, akkekangitomik kivgartoraksarivingâ? Okalaurit, sumik akkileraksarigapkit.

16 Labanele pannekarpok maggungnik, angajuklek Leamik attekarpok, nukardlek Rahelemik attelik.

17 Leale ijitsiarilungilak, Rahelele taututsiarikpok kênatsiariklunelo.

18 Jakoble Rahele nagligigamiuk, okarpok: Pannît nukardlek Rahele pivlugo jârinik 7nik kivgartoromavagit.

19 Labanib kiovâ: Tunijaksarigalloarapko, igvit idluarner-sarivagit angumit assingnit; uvamnêtuarit.

20 Taimak Jako kivgartorpok jârinik 7nik Rahele pivlugo; uvlotuinaunasugivaille ikkitunik, nagligigamiuk.

21 **Jakob** tagva Labane okautivâ: Nuliaksara tuniuk uvamnut; uvluksakka nângmatta, sennilerijomavara.

22 Labaniblo nunakatine tamaita kairkovait, nerrimâ-raksamik âkiksoivlune.

23 Unnungmalle, pannine Lea tiguvâ tâpsomunga itertilugo; tâpsomalo tuttikpâ.

24 Labaniblo kivgarne arnak Silpa tunivâ panniminut Leamut, kivgaurkovlugo tâpsomunga.

25 Uvlângolermalle, sunaubva, Lea. Tagva Labanemut okarpok: Sôk taimailiorkingâ? Kivgartorlungilagît Rahele pivlugo? Sôk uiveridlarkingâ?

26 Labanib okautivâ: Nunaptingne ilusekalungilagut nukardlek tunerkârlugo angajuklermit.

27 Vôge nâniaruk ômunga, tagva aipangatauk tunijomavavut illingnut, jârinik 7nik sulle kivgartorniaruvit uvamnut taimna pivlugo.

28 Taimailiorlune Jakob vôge nâvâ taipsomunga. Tagva Labanib pannine Rahele tunivâ, tâpsomunga nuliangorkovlugo.

29 Kivgarnelo arnak Bilha tunivâ panniminut Rahelemut, kivgaurkovlugo tâpsomunga.

30 Tagva Raheletauk tuttigivâ; Rahelele nagliginersarivâ Leamit, kivgartorpâlo sulle jârit 7 nâvlugit.

31 **Nalekable** Lea ômigijaujok takogamiuk, timinga angmarpâ, Rahelele kitorngisuipok.

32 Lealo singailerpok ernertârlunelo, atserarlugolo Rubenemik, okarame: Nâlekab ajulernera takonârpâ; mâna uima nagliginiarpânga.

33 Amma singailerpok ernertârlunelo, okarlunelo: Nâlekab ômigijaujunga tussaraminga, ômingatauk tunitjivigivânga; Simeonemiglo atserarpâ.

34 Amma singailerivok ernertârlunelo, okarlunelo: tamatomane uima ungagilerniarpânga, pingasunik ernernik ernigama tâpsomunga: tamanna pivlugo Levimik atserarpâ.

35 Amma singailerivok ernertârlunelo, okarlunelo: Tamattomane Nâlegak nakorijomavara. Tamanna pivlugo Judamik atserarpâ; ernijungnailerpok tâva.

KAP. XXX.

Jakob kitorngangit akluiningalo.

1 **RAHELELE** missigilerame ernilunginerninik Jakomut, angajune sinaungagivâ, Jakomullo okarpok: Kitorngakar-tinga. Pingikuvit tokolertuksauvunga.

2 Tagva Jakob ningausinga katsungailerpok Rahelemut, okarporlo: Gûdib simmertigivângâ timingnik singaitailititsijub?

3 Okautivâle: Kivgara Bilha tagga, tâmna tuttiguk, sâmne ernikpat uvangatauk tâpsomûna kitorngakartitaurokovlunga.

4 Tunitjivigivâlo kivgaminik Bilhamik, nuliangorkovlugo tâpsomunga. Jakoblo tuttikpâ.

5 Bilhalo singailerpok ernertârlunelo Jakomut.

6 Tagva Rahele okarpok: Gûdib idluarsarpânga, nippigalo tussarpâ, ernermiglo tunitjivigivânga. Tamanna pivlugo Danemik atserarpâ.

7 Bilhalo, Rahelib kivganga, amma singailerivok, aipanganiglo ernertârlune Jakomut.

8 Tagva Rahele okarpok: Angajuga sorsugutigivara sorsungnarmik Gûdemut sâlakarlungalo; atserarpâlo Naftalimik.

9 Leale missigilerame ernijungnainerminik, kivgane Silpa tiguvâ tunilâlo Jakomut, nuliangorkovlugo tâpsomunga.

10 Silpalo, Leab kivganga, ernertârpok Jakomut.

11 Tagva Lea okarpok: Pilloringmêk ! Atserarpâlo Gademik.

12 Silpalo, Leab kivganga, aipanganik ernertârpok Jakomut.

13 Tagva Lea okarpok: Pilloringnarmêk ! (inuit) pannigita pilloringneraromârnanga; atserarpâlo Asseremik.

14 **Kakkojaksat** kattersortauviata nelliuningane Ruben pissukkame, akpiujat nagvârpait natername, angerautiv-lugillo anânaminut Leamut. Rahelelo okarpok Leamut: Ernerpit akpiujakotingita illanginik pekarlangatôk.

15 Kiovâle: Suglugiviûk, uiga tigugangne, amma ernima akpiujakotinginik tigusijomagavît ? Rahelelo okarpok: Unêt, unnuak igvit tuttikitit, ernivit akpiujakotingita akkiksanganik.

16 Unnungmelo Jako naternamit angeralermat, Leab pagreartorpâ, okarlunelo: Uvanga tuttingniarparma, pimari-gapkit, ernima akpiujakotinginik akkilêvlunga. Tuttikpâ tagva unnuarme mattomane.

17 Gûdiblo Lea tussarpâ, singailerporlo, tellimanganik ernertârlune Jakomut,

18 Okarlunelo: Gûdib akkilerpânga, kivgara uimnut tuni-gapko, atserarpâlo Isassaremik.

19 Lea amma singailerivok, pingasôjuaniglo ernertârpok Jakomut.

20 Okarporlo: Pilliumik ajungitomik Gûdib pillitsivigivânga, uima mâna najorniarpânga, ernernik pingasôjortunik ernimagama tâpsomunga, atserarpâlo Sêbulonemik.

21 Mattoma kingorngagut panniktârpok, tâmna Dinamik atserarpâ.

22 **Gûdiblo** Rahele erkarpâ tussarlugolo, timingalo angmarpâ.

23 Tagva singailerpok ernertârlunelo, okarlunelo: Nachonarnera Gûdib pêjarpâ.

24 Atserarpâlo Josefemik, okarlunelo: Nâlekab tunit-jivigilingatôk sulle ernermik aipanganik.

25 **Pijokarporlo**, Rahelib Josefe erniaringmago, tagva Jakob Labane okautivâ: Aularkolaungatôk, nunamnut innigijaksamnut ingergarkovlunga.

26 Nuliakka kitorngakkalo pilakka, illingnut kivgartûtigijakka, aularlangalo; kivgartornera kaujimagangne, kanok kivgartorvigigapkit.

27 Labanib okautivâ: Ijîkpit sângangne saimaneksila-

ngatôk. Tukkisivunga, Nâlekab saimausermanga igvit pivlutit.

28 Amma okarpok: Kaujilaunga akkiliusiaksarnik, tunijomavara tagva.

29 Okautivâle: Kaujimavotit kanok kivgartorapkit, nergjutekotitillo kanok ilingangmangâta uvamnêdlutik.

30 Ikitunik perkutekalaukpotit tikkigama, siamarlutigle unuksivalliadlarpot, Nâlekablo saimauserpâtit aulanipkut tamât. Kissiane kanga iglo nangminiksara issumagijaksarivigô?

31 Okautivâ: Sumigle tunitjijuksauvêk illingnut? Jakoble okautivâ: Sumiglônêt tunitjijuksaungilatit uvamnut; okauseriniartakka maliklugit piniarvigigunga, saugakotitit mianerivlugit pairijomavakka amma.

32 Uvlome nergjutekotivit kattimajut ilûnatik akorngatigut pissugomavunga, ingmigolingatiniarlugit millaktat okkileriallo tamaita, kernertat tamaita saukanêtut, okkileriallo millaktat tuktungajunêtut. Tâpkoa akkiliusiari-lakka.

33 Idluarneralo kingorngagut kiolârpok pivlunga, kailâruvit akkilertauniksara pivlugo illingnut. Millaktangongitut okkilerialungitullo tuktungajut akorngane, kernertaungitullo saukat akorngane tigligângonerartaujuksauvut uvamnut.

34 Labanib okautivâ: Sôkiak, taimailerle, sorlo okaravit.

35 Uvlormelo taipsomane ingmigolivait tuktungajut angusahuit koppugârtut okkileriallo, tuktungajullo arnait millaktat okkileriallo tamaita, kakortamik akkudlilît tamaita, kerner-tallo tamaita saukat akornganêtut, pairijaurkolaitalo ernerminut.

36 Uvluniglo pingasunik ingergatilugit ungasiktipait Jakomit. Jakoblo pairivait Labanib nergjutekotingit sinnikôjut.

37 **Tagva** Jakob tiguvait kejuit ômat, ukpigait, kairoliu-jallo, ukpigaillo paungakarpaktut akkerungit, ameraijarlugillo kakortamik koppugâkartipait, kakortak kejungmêtok takuksautilugo.

38 Kejuit tâpkoa ameraijartane illivait nergjutit nellânut kôgvingnut, imervingnut, nergjutit imeriartormatta tagvunga, singaititaulerpullo imeriartorlutik.

39 Nergjutillo kejuit nellâtigut singaititaulerangamik, piarakalerput koppugâktunik millaktaniglo okkilerianiglo.

40 Jakoblo saugârsuit avitipait, nergjutillo sangmitipait koppugâktunut kernertanullo Labanib nergjutekotingita

akornganêtnut, taimaglo ingminut kattimajunik piksarsivok; tâpkoa Labanib kattimajokotinginut pitailitipait.

41 Pijokarporlo, nergjutit sôngonersat nuliarêgarangatta, Jakob kejuut imervinginut illivait, nergjutit kattimajut nellânut, singaititaulerkovlugit kejuut nellâne.

42 Sangênersanulle illilungilait. Taimaimat sangênersat Labanib pigilerpait, sôngonersalle Jakob pigilerpait.

43 Taimak angut tâмна perkutekalerpok angijoksoarmik, nergjutit kattimajuit pigilerlugit, kivgallo arnait, kivgallo angutit, kamêlillo, siuterkortojullo.

KAP. XXXI.

Jako Labanemit kemâvok.

1 **LABANIBLO** erningita okausingit tussaumavait, okarmatta: Jakob tiguvaat atâtapta pingit tamaita; atâtaptalo pinginit makkoninga perkutevaksoakalerpok.

2 Jakoblo Labanib kênanga taková, sunaubvalo, sivornganetut ilingajungnairtok ingminut.

3 Nâlekablo Jako okautivâ: Utterit atâtavit nunanganut illangnullo; illagijomavagit.

4 Tagva Jako tillikliutjivok Rahelelo Lealo kairkovlugik naternamut nergjutekotiminut.

5 Okautivaglo: Atâtaptik kênanga takovara, sivornganetut ilingajungnairtok uvamnut; atâtamale Gûdingata illagivânga.

6 Nangminek kaujimavotik, pitsartunimnut tamainut atâtatik kivgartorapko.

7 Atâtaptigle uiverivânga, akkilertaugiaralo tellimaujortorlune ablatsautipâ; kissiane Gûdib asseroitailitipâ uvamnik.

8 Okalerangat: Millaktat akkiliusiariniarpattit,—nergjutit ilûnatik millaktanik tagva piarakalerput; okalerangalle: koppugârtut akkiliusiariniarpattit,—nergjutit ilûnatik koppugârtunik tagva piarakalerput.

9 Taimak Gûdib atâtaptik nergjutekotingit tiguvait, uvamnullo tunivlugit.

10 Nergjutillo nuliarvingat nelliutingmat, takosarpunga takovlungalo sinnaktômatilunga: sunaubva, angusaluit nergjutinut nuliartut tagva koppugârtut millaktallo okkileriallo.

11 Gûdiblo engelingata okautivânga sinnaktômatilunga: Jako ! kiovaralo: Mânêpunga.

12 Okautivângalo: Takosarit takovlutillo: angusaluit ilû-natik nergjutinut nuliartut tagva koppugârtut millaktallo okkileriallo, tamaita takogapkit, kanok Labanib iliorviging-mattit.

13 Uvanga tagva Gûde Bêteleme (takoja), tagvane nellu-naikutak mingoarpas, tagvanelo angerutekarlutit angervigivarma. Parngnailerit mâna, aularlutillo nunamit ômangas, nunamut inûlervigijarnut utterit.

14 Raheliblo Leablo tagva kiovâk okarlutik: Kingorm-gutijaksanik piksakaralloarkinûk atâtamnuk iglungane?

15 Takkorngartâktut iliorvigingilâtigûk? aulaigamitiguk; akkivuglo nungupait.

16 Perkutit tamaita, Gûdib tigujangit atâtaptingnit, uvaguk pivavuk kitorngaptalo. Mânalo tamaine iliortuinarit, sorlo Gûdib okarvigingmattit.

17 **Tagva** Jako parngnailerpok, kitornganelo nulianelo kamêlinut ingitipait.

18 Aularutivaillo nergjutekotine tamaita, perkutinelo tamaita pissiarijane, nergjutit nangminerijane Mesopotâmiamapijane, Isaamut atâtaminut nunamut Kânaanemut aijomavlune.

19 Labanele aularsimavok, saugakotine sallijartorlugit; Raheliblo tiglikpait atâtame gûdingoakotingit.

20 Jakoblo terliarpâ Labane Siriamiok, okautinginamiuk kemâgame.

21 Taimak kemâvok perkutingillo tamaita, aularlunelo kôksoak ikârpâ kakkamut Gileademut torârlune.

22 Uvlullo pingajuane Labane okautjaulerpok, Jako kemângmat.

23 Tagva kattangutine illagivlugit udlapâ; uvlullo sevenit ingergarvigerkârlugit, anguvâ kakkame Gileademe.

24 Gûdible Labane Siriamiok tikkipâ sinnaktômatilugo unnuarme, okautivlugo: Udjertulerit, Jako okarviginiarungne, ajungitomit sangurkonak ajortomut.

25 **Labaniblo** Jako anguvâ. Jakole tangmârtilugo kakkame, Labane kattangutingillo tangmârivut kakkame Gileademe.

26 Tagva Labanib Jako okautivâ: Sûvlutit terliarpingâ, pannîkkalo aularutivlugik sorlo saviksoarmut aksârningaujûk?

27 Sôk angigutjivlutit kemâvét terliarlunga okarvigina-galo? Kannilârajarpagit kuviasuklunga ingerlungalo, kil-aulillo kellularaillo atorlugit.

28 Ernikkalo pannikkalo kuniklugit perkongilarmalônêt. Tamattomane sillaitotut iliorpotit.

29 Aggakka sappilungigalloarput pidlarluse, kissiane atâ-tapse Gûdingata ikpeksak unnuak okautivânga okarlune: Udjertulerit, Jako okarviginiarungne, ajungitomit sangurkonak ajortomut.

30 Kissianele mâna aularomadlaralloaravit, paingudlaravit atâtavit iglunganut; sôk gûdingoakotikka tiglikpigit?

31 Jakoble Labane kiovâ okarlune: Sivôragama; pan-ningnik aksârnidlaroaravit.

32 Gûdingoakotingnigle nagvârviginiartat inôjuksaungilak. Kattangutipta takkoane pitit uvamnênertut kennerasuarkit tiguylugillo. Jakole nellovok, Rahelib tiglingmagit.

33 Tagva Labane iterpok Jakob tuppinganut, Leablo tuppinganut, kivgâglo arnâk tuppingangnut, nagvâranele. Leablo tuppiganit anivlune iterpok Rahelib tuppinganut.

34 Rahelible gûdingoat tigulugit kamêliblo iksivautaktanganut illivlugit iksivavigingmagit, Labanib tuppek ilûnât tapsikârpâ tapsêsinanelo.

35 Tâmnalo okarpok atâtaminut: Angajokâma ningarviginiaraninga, nikovitsanginama sângne, arnat ilusingat atorapko. Kennerasuaralloaramelo, gûdingoat nagvângilait.

36 **Tagva** Jako ningalerpok, Labanelo suangavâ, kiovlugolo Jakob Labane okautivâ: Sumik tammarkingâ, sumik idluitulivingâ, udladlaramga?

37 Pikka tamaita tapsikârangne, suna iglovit pinga nagvârkiûk? Illileruk maunga kattangutima kattangutivillo takkoanut, erkartuijôrkovlugit akonaptingne.

38 Jârit 20 ukkoa illingnênama, saugakotitit tuktungajokotitillo erninerlutsangilat, nergjutekotitillo kattimajut angusalungit nerrilungilakka.

39 (Omajoâlungnut) alliktorsimajut âlungilakka illingnut, uvanga taukseriakarpakka; aggamnit sakkerkovatit uvlôtilugo tigliktaujut, unnuangotilugolônêt tigliktaujut.

40 Imaipunga: Uvlôtilugo kiangnut sujukpunga, unnua-ngotilugolo keujarnermut, siniktailikattarlungalo.

41 Taimak jârit 20 ukkoa iglungnêpunga; jârit 14 kivgartorvigivagit pannîkik pivlugik, jârillo pingasojortut nergjutekotitit pivlugit, akkilertaugiaralo tellimaujortoertorlutit abla-tsautipat.

42 Atâtama Gûdingata illagingipanga, Abraham Gûdingata, Isaablo sivôragijangata, tagva sunakartinanga aular-

konajarparma. Gûdible ajulernera aggamalo sullijangit ta-konâramigit, inerterpâtit ikpeksak unnuak.

43 Labaniblo Jako kiovâ okarlune: Uvanga ukkoa pannigivâkka, uvanga ukkoa ernerivakka, uvanga kattimajut ukkoa nergjutekotigivakka, takojatit tamaita pigivakka. Pannîkkale ukkoa kanok piniarvigijungnarpâkkâ uvlome, erningillônêt erniarijangit?

44 Attê, angerkatigêlauluk uvangalo igvillo kigligiutsiju-tiksamik uvamnullo illingnullo.

45 Tagva Jakob ujarak tiguvâ nappartilugolo nellunaiku-taurkovlugo.

46 Kattangutinelo Jakob okautivait: Ujarkanik katter-soijartoritse. Tagva ujarkanik tigusivut kallerêktilugit, kallerêktitallo kângane nerrivut.

47 Labaniblo taivait Jegar-Sahadutamik, Jakoble taivait Gâletemik.

48 Labanelo okarpok: Kallerêktitat ukkoa kigligiutsiju-tiksauvut uvlome uvamnullo illingnullo. Tamanna pivlugo Gâletemik atserarpât,

49 Ammalo Mizpamik, okarmat: Nâlegak udjertorteole uvamnullo illingnullo, kaningiutilârumnuk.

50 Pannîkka kapiasuktinajarûngne, ubvalo pannîngma assîgingnik nulianigajaruvit sulle—inungmik uvaptîngnêtoka-lungilak, ahâgle, Nâlegak kigligiutsijeovok uvamnullo illingnullo.

51 Amma Labanib Jako okautivâ: Tagga kallerêktitat ukkoa, taggalo nellunaikutaliak nappartitara uvamnullo illingnullo;

52 Kallêrektitat ukkoa kigligiutsijutiksauvut, nellunaikutaliarlo tamanna kigligiutsijutiksauvok, uvangalônêt kallerêktitat ukkoa kângeromanginapkit illingnôrlunga, igvil-lônêt kallerêktitat ukkoa nellunaikutaliarlo tamanna kângeromanginangne uvamnôrlutit idluitomik.

53 Abrahâb Gûdinga, Nahoriblo Gûdinga, atâtangatalo Gûdinga erkartuijôjuksauvok uvaptîngnut. Jakolo anger-vikpok atâtame Isaab sivôragijanga taivlugo.

54 Jakolo tunergutiksamik tunitjivok kakkame, kattan-gutinelo kairkovait nerriartorkovlugit. Nerrijarêramiglo siniktarput kakkame.

55 Labanelo uvlârarsukut makiname, erninelo pannîng-nelo kunnikpait saimauuserlugillo, tagva Labane aularpok, nunaminut utterlune.

KAP. XXXII.

Jako sivôravlune tuksiarpok Gûdemiglo pânikipok.

1 **JAKOLE** apkutimigut ingergavok, Gûdiblo engelingita pârpât.

2 Takoleramigillo, okarpok: Tamadja Gûdib kattimga-joksoakotingit; nunalo tamanna taivâ Mahanaimik.

3 **Jakole** sivunermigut kivgartortuksanik tillikliutjivok Esauemut angajuminut, Seirib nunanganut, Edomib naternanganut.

4 Perkovaillo okarlune: Imâk okausekaritse angajokâmnut Esauemut: kivgat Jako imâk okautjivok: Tujormiangovlunga Labaneme mulluvunga mâna tikkidlugo,

5 Perkutekarpungalo tuktuvangnik, siuterkortojuniglo, saukaniglo, kivganiglo angutinik, kivganiglo arnanik, tillikliutjivungalo, angajokâra kaujitsomavluglo, ijîngnut saimanekserkovlunga.

6 **Tillijaujut** Jakomut utterput okarlutik: Angajungnut Esauemut tikkipogut; aulalerêrpok pâriartorlutit, angutit 400 illagivlugit.

7 Tagva Jako erksidlalerpok kapiasuklune, avikpaillo inuit illagijane, saukallo tuktuvaillo kamêlillo kattimajut, maggoilivlugit,

8 Okarlune: Esauib kattimajut aipaingit tikkilugit pidlaralloarpagit, aipaingit tagva kemâjungnarniarput.

9 Jakolo okarivok: Nâlegak, atâtama Abrahâb Gûdinga, atâtamalo Isaab Gûdinga, okartotit uvamnut: nunangnut utterit illangnullo, ajungitulivigijomavagit,

10 Nelopkotijutigivakka pitsiarnerit tamaita nertornarnerillo tamaita kivgarnut sakkertitatit. Jordane una ikârapko, ajaupiara pituarivara, mânale kattimajut magguut pivakka.

11 Piulilaungatôk angajuma agganginit, Esauib agganginit, sivôragigapko, tikkidlaroarmat pidlarlunga arnallo sorru-tsillo.

12 Okaravit: Ajungitulivigijomavagit, kinguvâksatillo unuksivalliatitsomavakka siorkatitut imarbiksûb sikjangane, unumut kitiksaujungnairtilugit.

13 Unnuarmelo tamattomane tagvanêpok, piminillo najortaminit tiguvait, angajuminut Esauemut tujûtiksane:

14 Tuktungajut 200 angusaluillo 20, saukat 200 angusaluillo 20.

15 Kamêlillo sârliat 30 nochangillo, tuktuvaillo 40 angusa-luillo 10, siuterkortojullo arnait 20 nochaillo 10.

16 Tâpkoa kivgame agganginut pitipait, kattimajut ingmi-kôrlugit, okautivaillo kivgame: Sivunipkut ingerganiarpose, kattimajut ingmigolingajut akkunekartilugit.

17 Sivorlerlo perkovâ okarlune: Angajuma Esauib pârpaitit apertsorlutillo okarpat: Kimut ilingavêt? namungarkêllo? ungortatillo tamakkoa kia perkutigivagît?—

18 Okartuksauvotit tagva: Kivgavit Jakob perkutingit tamakkoa, tujûtigivait angajokâmnut Esauemut, taggalo malikpâtigut.

19 Taimaktauk aipanga perkovâ, pingajuaglo, ilûnaitalo kattimajunik ungortut, okautilaitalo: Taimak Esaue okauti-jaksarivase, naipilerupsiuk.

20 Okartailiniarasele: Tagga, kivgavit Jakob malikpâtigut. Issumakarama: tujûtinut sivunimnêtunut saimartitso-mavara, kingorngagullo takojomavara, inakâ illaliorniar-pânga.

21 Tujûtiksai tagva sivorlerput, nangminerle kattima-jokotine illagivait unnuarme tamattomane.

22 Unnuarmelo tamattomane makilerpok, nuliângnelo kivgâglo arnâk kitornganelo 11 tiguvaît, Jakobib ikârtorvia-gut ikârtiniarlugit.

23 Tiguvlugit kôb akkianut ikârtinamigit, perkutinelo tamaita ikârtinamigit,

24 Jako kissimetôlerpok. Tagvane angutib pâvâ kau-lersiarivlugo.

25 Missigivlune sâlagivlugo ajoramiuk, sibviangagut ak-torpâ, Jakoblo sibvianga uniortitauvok, pângmanik.

26 Okarporlo: Sapkunga, kaulermat. Kiovâle: Sapkonian-gilagit, kissiane saimauuserunga.

27 Okautivâle: Kinauvêt? Kiovâ: Jakôvunga.

28 Okarporlo: Kingorngagut Jakomik attekarungnairlu-tit, Israelemik attekartuksauvotit, Gûdemullo inungnullo sorsugavit sâlakarlutillo.

29 Jakoblo aperivâ okarlune: Attît tussarlagi-ai? Okau-tivâ: Sôk attera aperkutigiviûk? Tagvanelo saimau-serpâ.

30 Jakoblo nuna tamanna atserarpâ Pnielemik, okarlune: Gûde takogapko kênarsivlugo, tarnigalo piulijauvok.

31 Pnielemillo aularmat, sekinerub nuilervigivâ, tussiak-porlo sibviamigut.

32 Tamanna pivlugo Israêlikut sibviab nukkinga nerkik-saringilât uvlomemut aglât, Jako aktormago sibviangata nukkingagut.

KAP. XXXIII.

Jakolo Esauele naipiutivuk.

1 **JAKOLO** takojaksarsiorame, sunaubva, Esaue takolerpâ aggertok angutit 400 illagivlugit. Kitorngane tagva aviutipait, Leamullo Rahelemullo kivgângnullo arnângnut pitilugit.

2 Kivgânglo arnâk kitorngangillo sivorliotipait, Lealo kitorngangillo tâpkoa kingornganêtipait, Rahelelo Josefelo kingorliotipak;

3 Nangminerle sivorlerpok nunamullo okkolerpok 7ertör-lune, angajune tikkitsiarivlugo.

4 Esauele akpangerpok pâriartorlugo, nagligivlugolo erkipâ kuniklâlo; tamarmiglo kugviolerpuk.

5 Takosarlune arnat kitorngangillo takogamigit, okarpok: Kikkût ingergakatitit ukkoa? Kiovâ: Kitorngakka tamadja, Gûdib tunijangit kivgarnut.

6 Arnânglo kivgâk kitorngangitalo sângeriarorpât okkovlutik;

7 Amma Leab kitorngangitalo sângeriarorpât okkovlutik; kingorngagut Josefib Raheliblo sângeriarorpâk okkovlutik.

8 Okarporlo: Kattimajut ipkoa tamaita naipitakka suksarivigît? Kiovâ: saimanekserkovlunga angajokâma sângane.

9 Esauib okautivâ: Perkutekatsiarpunga, nukâk, perkutitit pigituinakkit.

10 Jakob kiovâ: Aukagle saimaneksiguma sângne, piliutikka tigulaukit aggamnit, imâk pivlugo, kênat takogapko, Gûdib kênanga takolugo sorlo, illalioramgalo.

11 Piliutikka, illingnut kaitaujut tigulaukittôk; Gûdib pilingmanga, tamainik pekatsiarpunga. Sâlagingmagolo, tiguvait.

12 Okarporlo: Aularluta ingergarnialerta, illagijomavagit.

13 Kiovâle: Angajokâra nellungilak, sorrutsit annajanarmatta, saukaniglo sârlianik illakarama tuktuvangniglo; uvlorme atausênarme piluarlutik ungortaugunik, nergjutit ilûnatik tokonajarput.

14 Angajokâra ingergalauletôk kivgame sivorngagut, uva-nga sukkaitomik ingergarniarpunga iluserivaktaptut, nerg-

jutit sorrutsillo pissugungnarningit maliklugit, tikkiniarlungalo Seiremut angajokâmnut.

15 Esaub okautivâ: Tagva inukotima illangit illingnêrkomavakka. Kiovâle: Sujût? Saimaneksituinarlanga angajokâma sângane.

16 Tagva Esaue uvlorme taipsomane utterpok apkutimigut Seiremut.

17 Jakolo Suggotemut aularpok igloliorlunelo ingminut, nergjutekotiminullo iniksaliolune. Tamanna pivlugo nuna tamanna Suggotemik taivâ.

18 **Jakole** kanoengitsiarlune Mesopotâmiamit tikkigame, iglugasangnut Siggememut pivok, Kânaanib nunanganêtunut, iglugasaillo sângane tangmârpok.

19 Nunalo tâмна tuppervigijane pissiarivâ Hemorikunit, Siggemib atâtanganit, ketsitanik (kênaujanik) 100nik akkilerlugo.

20 Tunerguserviliorporlo tagvane, atserarlugo Gûdib, Israêlib Gûdingata (tunerguservikotinganik).

KAP. XXXIV.

Dina idluituliviovok; kattangutingita idluitulijok akkiniarpât.

1 **DINA**, Leab panninga, erniarilauktanga Jakomut, aniovok nunab inungita panningit takojartorlugit.

2 Tâмна Siggemib takogamiuk, Hemorib Heviterib nunab attanertangata erningata, tiguvâ tuttiklugolo nachonartipâ.

3 Tarningatalo ungagivâ Dina Jakob panninga, uigasuglo nagligivâ, tussarnertunik okausekarvigivlugo.

4 Siggemiblo atâtane Hemore okarvigivâ okarlune: uigasungmik tâpsominga nuliaksarsilaunga.

5 Jakolo tussaumalerpok pannime Dinab nachonartitauninganik; erningille naternamêngmatta nergjutekotine, Jako niplialungilak taipkoa tikkitsiarivlugit.

6 **Hemorele**, Siggemib atâtanga aningmat Jakomut okarvigijomavlugo,

7 Jakob erningit angerarput naternamit, tussatuaramitsuk. Angutillo sinaungagivlugo ningaumajâdlarput, kangunartoksoarmik taimna piniarmat Israêleme, Jakob panninga tuttinamiuk; taimailiortokartuksaungimat.

8 Hemorib tagva okarvigivait okarlune: Ernima Siggemib tarningata pannise ungagidlarpâ, nuliangotilauksiuk tâpsomunga.

9 Ningaugijigêlaukta: pannise tunivlugit uvaptingnut, pannivullo tiguvlugit illipsingnut;

10 Nunakatigêklutalo. Nuna atuinauvok illipsingnut, nunaginiarlugo ingergaviginiarlugolo igloliorgivisiuk.

11 Siggemiblo Dinab atâtanga kattangutingillo okautivait: Saimaneksilaulangatôk sâpsingne, pijomajapsingnik tunitjijomavunga.

12 Tunergutiksai piliutiksallo angidlarkotuinarsigik; kanok okautiniarapsinga tunitjivigijomavapse, kissiane uigasuk nuliangotisiuk uvamnut.

13 Jakoble erningita Siggeme atâtangalo Hemore kiovakit terliarlugik, najangat Dina nachonartingmago;

14 Okautilugiglo: Taimak sapperpogut, najavut tunivlugo angumut kippisimangitomot; tamanna kangunarajarpok uvaptingnut.

15 Imâk kissiane pijomajaptingnik kippilugomangilagut: Uvaptitut ilingalerupse, angutise tamaita kippijaurkogupsigik,

16 Tagva pannivut tunijomavavut illipsingnut, panniselo tiguvlugit uvaptingnut, nunakakatigivluselo inôkatigêngo-jomârpogut atausît.

17 Tamattomingale nâlegomangikuptigut, kippijaujomangikupselo, tagva pannivut neksarlugo aularomavogut.

18 Okautsit tamakkoa Hemorib erningatalo Siggemib idluarivait.

19 Inôsuktorlo tâmna taimailiosâlerpok, Jakob panninga ungagigamiuk. Nertortauluarporlo tamainit atâtame inukotinginit.

20 **Hemorelo** erningalo Siggeme iglugasait itertarvianut tikkinamik, iglugasait inungit okarvigivait okarlutik:

21 Inuit taipkoa ulapirksautekarasuarput uvaptingnut; nuna nunagivlugo aulavigilitsuk! Takkoitse, nuna inekilua-lungilak taipkununga, panningit nuliarijomavavut, pannivullo taipkununga tunivlugit.

22 Imâgle kissiane angutit taipkoa angervigijomavâtigut, nunakakatigijomavluta inôkatigijomavlutalo, angutivut ilûnatik kippijaulerpatta, sorlo taipkoa kippimangmatta.

23 Kattimajokotingit perkutingillo nergjutekotingillo tamaita pigileromângilavût, angervigituinaruptigik nunakakatigivlugillo?

24 Tagva ilûnatik iglugasait itertarvingatigut aniâjut Hemore erningalo Siggeme nâlekpakit, angutillo tamaita kippijautipait, tamaita iglugasait itertarvingatigut aniâjut.

25 **Pijokarporlo**: Uvlut pingajuane ânialiumingmatta, Jakob ernîgik, Simeonelo Levilo, Dinab anîgik, tamarmik saviksoarmik tigusivuk, iglugasangnullo iterpuk nangiartuilutik, angutillo tamaita tokopait.

26 Hemoretauk erningalo Siggeme tokopakik saviksûb kênangagut, Dinalo tiguvâk Siggemib iglunganit aularlutiglo.

27 Tagva Jakob erningita tokotaumajut tikkipait, igluga-saillo asserorpait, najatik nachonartingmatsuk.

28 Saukallo tuktuvaillo siuterkortojuullo tiguvait iglugasaksoarnêtut naternamêtullo.

29 Perkutingillo tamaita kitorngangillo tamaita nuliangillo aularutivait, sunatuinaillo iglunêtut asserorpait.

30 Jakole Simeonemut Levimullo okarpok: Pilukoserpapinga, ominarsitinaptinga nunab inunginut Kânaanemiunullo Feresiterinullo. Uvangale inukotikkalo unuktôngilagut. Taipkoale kattileromârput unataclarvigivlunga nungutidlarlungalo uvangalo inukotikkalo.

31 Kiovâk: Najavut anguniarpaktotut iliorvigijaksari-galloarpatsûk?

KAP. XXXV.

Jako ingergavok Bêtelemut Hebronemullo.

1 **GUDIBLO** Jako okautivâ: Parngnailerit Bêtelemullo ingergalerit, taikane nunakarlutit, taikanelo tunerguserviliorlutit Gûdemut, illingnut sakkersimajomut taipsothane, angajungnit Esauemit kemâgavit.

2 Jakob tagva iglomiokatine illagijanelo tamaita okautivait: Tujormiangovigijapta gûdingoakotingit akunapsingnêtut pêrsigik, sujungaititsiluselo, assinginik anorârluse.

3 Parngnailerlutalo ingergalaukta Bêtelemut, taikane tunerguservilioromagama Gûdemut, tâpsoma tussarmanga kapiasungnima nelliuningane, illagingmangalo apkome ingergarvigijamne.

4 Tagva tujormiangovigijamik gûdingoakotingit tamaita pigijatik tunivait Jakomut, siumiutatiglo arngoat. Jakoblo sauvait napârtoksûb Siggememêtub atânut.

5 Tagva aulalerput. Kakkilârnerublo, Gûdemut pijub, iglugasait tamattoma erkânêtut tikkipait, uclaniktailitilugit Jakokunik.

6 Jakoblo Luse tikkipâ, Kânaanib nunangaknêto, tagva Bêtele, inukotine tamaita illagivlugit.

7 Tagvanelo tunerguserviliorpok, nuna atserarlugo El-Bêtelemik, Gûdib tagvane sakkervigilaungmago taipsomane, kemâgame angajuminit.

8 Deboralo, Rebekkab pairijigilauktanga, tokovok, iluvertauvorlo Bêtelib nellâne, napârtoksûb atânut, atserarpâlo “Napârtomik keavingmik.”

9 **Gudiblo** Jako amma sakkervigigivâ, Mesopotâmiamit tikkingmat, saimauserpâlo.

10 Gûdiblo okautivâ: Jakomik attekarpotit; kingorngagulle Jakomik attekারণnairlutit Israêlemik attekartuksauvotit. Atserarpâlo Israêlemik.

11 Gûdiblo okautivâ: Uvanga Gûdeovunga ajugakangitok. Kinguvâktâkattarit unuksivalliavlutit; inôkatigêt, illa inôkatigêksuit illingnit pijomârput, attanîllo makkitingnit pijo-mârput.

12 Nunalo, tunijara Abrahamut Isaarmullo, tunivara illingnut, kinguvâksarnullo kingunikkut tunijomârpara nuna.

13 Gûdelo kongmuarpok okausekarvigijaminit tâpsomunga.

14 Jakole inuksuliorpok tagvane, (Gûdib) okausekarvigijangane tâpsomunga, inuksumik ujaramik, imiksamiglo tunergutaujomik koverivâ, orksumiglo koverivlugo.

15 Jakoblo Gûdib okausekarvigijanga tamanna Bêtelemik atserarpâ.

16 **Betelemit** tagva aularput. Tikkikassalungimatta sulle Efratemut, Rahele ernisulerpok, ernisuklunelo siorniudlarpok.

17 Ernisklune taimak siorniudlarmat, ernisuksêjub okautivâ: Sivôraniarnak, tamattomûna ernertârmigavit.

18 Anernangileramele tokolerlune, Benonimik atserarpâ, atâtangatale Benjamimik atserarpâ.

19 Rahelelo tokovok, iluvertauvorlo apkosinerme Efratemut, tagva Betlehemut ilingajome.

20 Jakoblo nellunaikutak nappartipâ iluvingata kânganut, tamadja Rahelib iluvingata nellunaikutanga sulle uvlome.

21 **Israelelo** tagvangat aularpok tangmârlunelo Ederib nuvgusingata ungatâne.

22 Pijokarporlo, Israêle nuname taipsomane iglokarti-lugo, Rubenib Bilha, atâtame panervganga, itervigingmago tuttiklugolo. Israêliblo tussaumavâ.

23 Jakoble erningit 12ovut. Leab erningit: Ruben,

erniangokârtok Jakomut, Simeonelo Levilo Judalo Isassarelo Sebulonelo.

24 Rahelib ernîgik: Josefelo Benjamilo.

25 Bilhab, Rahelib kivgangata, ernîgik: Danelo Naftalilo.

26 Silpab, Leab kivgangata, ernîgik: Gadelo Asserelo.

Tamádja Jakob erningit, erniangomajut tâpsomunga Mesopotâmiamie.

27 **Jakoblo** atâtane Isaak tikkipâ Mamrime, Kiriati-Arabame, tagva Hebroneme, Abrahablo Isaablo tujormiangovigijangangne.

28 Isaarlo járekarpok 180nik.

29 Isaarlo anernangerlune tokovok, sivorliminullo illaliutjauvok, îtôvlune nâmaksimariklunelo. Ernîkitalo Esauib Jakoblo illijartorpâk.

KAP. XXXVI.

Esauekut.

1 **TAMADJA** unipkautsit Esauemik—imaitok: Edomemik.

2 Esauib nuliarivait Kânaanib panningita illangit: Ada, Elonib Hetiterib panninga, Oholibamalo, Anab panninga, Sibeonib Horiterib erngutanga,

3 Basmatalo Ismaêlib panninga Nebajotib najanga.

4 Adablo Esauemut erniarivâ Elifase; Basmatablo erniarivâ Reguele.

5 Oholibamablo erniarivait Jêguselo Jagadlalo Koralo. Tamadja Esauib erningit erniangomajut tâpsomunga Kânaanib nunangane.

6 Esauiblo tiguvait nuliane erninelo panninelo iglomio-katinelo tamaita, saugakotinelu nergjutekotinelu perkutinelu tamaita, Kânaanib nunangane pissiarijane, nunablo assianut nûpok, nukane Jako kemaklugo,

7 Perkutekaluaralloarmut nunakatigêgungnangimanik, nunablo tujormiangovigijangata ajorpait nergjutekotingita unurningit pivlugit.

8 Taimak Esaue Seirib kakkangine nunakalerpok. Esaue tagva Edome.

9 **Tamadja** Esauib kinguvângit; tâmna Edomiterit Seirib kakkanginêtut atâtagivât.

10 Tamadjalo Esauib erningita attingit: Elifase Adab erninga Esauib nuliangata; Reguele Basmatib erninga Esauib nuliangata.

11 Elifasib erningit tagva: Teman, Omar, Sefo, Gaetam, Kenase.

12 Elifasiblo Esauib erningata panervgarivâ Timna; tâpsoma Amalek erniarivâ Elifasemut. Tâpkoangovut Adab kinguvângit Esauib nuliangata.

13 Reguelib erningit tagva: Nagat, Sera, Sama, Misa. Tâpkoangovut Basmatib kinguvângit Esauib nuliangata.

14 Ukkoale Oholibamab ernerivait Anab panningata Sibeonib erngutangata, Esauib nuliangata: Jêguselo, Jagadlalo, Koralo ernerivait Esauemut.

15 **Tamadja** Esauib kinguvângita angajokângit, Elifasib Esauemut erniangorkârtub erningit: angajokâk Teman, angajokâk Omar, angajokâk Sefo, angajokâk Kenase,

16 Angajokâk Kora, angajokâk Gaetam, angajokâk Amalek. Tâpkoangovut Elifasekut angajokângit Edomib nunangane; Adab tâpkoa kinguvârivait.

17 Ukkoa tagva Reguelib erningit Esauib erningata: angajokâk Nagat, angajokâk Sera, angajokâk Sama, angajokâk Misa. Tâpkoangovut Reguelekut angajokângit Edomib nunangane; Basmatib tâpkoa kinguvârivait Esauib nuliarijangata.

18 Ukkoalo tagva Oholibamab erningit Esauib nuliangata: angajokâk Jêguse, angajokâk Jagadla, angajokâk Kora. Tâpkoangovut Oholibamakut angajokângit, Anab panningata, Esauib nuliangata (kinguvângita).

19 Tâpkoangovut Esauib kinguvângit, tâpkoangovullo angajokângit. Tamadja Edome.

20 **Tamadja** Seirib Horiterib erningit, nunab inungit: Lotan, Sobal, Sibeon, Ana, Dison, Eser, Disan.

21 Tâpkoangovut Seirib erningita Horiterit angajokângit Edomib nunangane.

22 Lotanib ernerivak: Horilo Hemalo; Timnalo Lotanib najagivâ.

23 Ukkoalo Sobalib ernerivait: Aluan, Managat, Ebal, Sefo, Onam.

24 Sibeoniblo ernerivak: Ajalo Analo. Ana tâmnauvok puilavingmik ônantomik nagvârtok inukangitome, atâtame Sibeonib siuterkortojokotinginik mianersigame.

25 Tamadja Anab kitorngâgik: Disonelo Oholibamalo Anab panninga.

26 Ukkoalo Disonib ernerivait: Hemdan, Esban, Jetran, Kêran.

27 Ukkoa Eserib ernerivait: Bilhan, Savan, Akan.

28 Ukkoa Disanib ernerivak: Us, Aranelo.

29 Ukkoangovut Horiterit angajokângit: Angajokâk Lotan, angajokâk Sobal, angajokâk Sibeon, angajokâk Ana,

30 Angajokâk Dison, angajokâk Eser, angajokâk Disan. Tâpkoangovut Horiterit angajokângit, Seirib nunangane angajokaujut.

31 **Tamadja** attanît attaniojut Edomib nunangane, Israêlikut attanekartinagit sulle:

32 Bela, Beorib erninga attaniovok Edomeme; iglugasaksoakotingit Dinhabamik attekarpur.

33 Bela tokungmat kingorngagut Joba attaniovok Serab erninga, Busramit pijok.

34 Joba tokungmat kingorngagut Husa attaniovok, Temaniterit nunanganit pijok.

35 Husa tokungmat kingorngagut Hadad attaniovok Bedadib erninga; tâpsoma Midianiterit sâlagivait Moabiterit naternangane, iglugasaksoakotingillo Avitemik attekarpur.

36 Hadad tokungmat kingorngagut Samla attaniovok, Masrekamit pijok.

37 Samla tokungmat kingorngagut Saule attaniovok, Rehobotemit kôksoarmêtomit pijok.

38 Saule tokungmat kingorngagut Baal-Hanan attaniovok Agborib erninga.

39 Baal-Hanan Agborib erninga tokungmat kingorngagut Hadar attaniovok, iglugasaksoakotingillo Pagunik attekarpur, nuliangalo Mehetabêlemik attekarpok Matredib panningata.

40 **Tamadja** Esauekut angajokângita attingit, ingmikut kinguvarêt, ingmikut nunakatigêt kanok attekartut: angajokâk Timna, angajokâk Alua, angajokâk Jetet.

41 Angajokâk Oholibama, angajokâk Ela, angajokâk Pinon,

42 Angajokâk Kênase, angajokâk Teman, angajokâk Mibsar,

43 Angajokâk Magdiel, angajokâk Iram. Tâpkoangovut Edomiterit angajokângit, nunamingne pigijamingne kanok nunakartut. Esauelo Edomiterit atâtagivât.

KAP. XXXVII.

Josefe kattangutiminut niorvgutigijauvok.

1 **JAKOLO** nunakarpok atâtame tujormiangovigijangane, nuname Kânaaneme.

2 Tamadjalo Jakomik unipkautsit: Josefe 17nik jâre-karame, saukanik mianersijôvok kattangutine illagivlugit; inôsuktublo atâtame nuliâkita Bilhablo Silpablo kitorngangit illagivait; okautigiluktaulerangattalo Josefib okautigisârpait atâtaminut.

3 Israêlible Josefe nagliginersarivâ kitorngaminit tamainit, inutokaunermine ernertâriganiuk, taksapatâmiglo annorâ-kartipâ.

4 Katangutingitale malugigamitsuk atâtanganut nagliginersarijaujok katangutinginit tamainit, omigilerpât illanâr-nartomiglo okarvigivlugo sapperpât.

5 Josefelo sinnaktômanermik sinnaktômangmat katangutiminut okautigivlugo, anginersamik omigivât.

6 Imâk okautingmagit: Sinnaktômanera tussalauksiuk sinnaktômanerijara.

7 Perorsêvingmêdluta ivingnik kippitaksaujunik kippi-tsivogut; sunaubvalo, kippitakka ingmingnik makilerput nangerlutiglo; avatânêdlutiglo kippitapse kippitakka okkuningavigivait.

8 Tagva katangutingata okautivât: Igvit attanerijak-sarigalloarpitigît nâlegaksarivlutillo? Sugaluluartomiglo omigilerpât sinnaktômaningit pivlugit okausingillo pivlugit.

9 **Aipanganik** sinnaktômavok kingorngane, katangutiminullo unipkautigivâ, okarlune: Okoksê, aipanganik sinnaktômavunga: sekinerublo takkerublo uvloritjallo 11 okkungavigivânga.

10 Unipkautigingmagolo atâtaminut katangutiminullo, atâtangata suakpâ okautivlugo: Sinnaktômanek sinnaktômanerijat sujôk? Uvanga katangutivillo pâmaktervigijar-toraksarigalloarpitigît?

11 Katangutingitalo sinaungagivât, atâtangatale okautsit tamakkoa torkorpait.

12 Katangutingillo aularput, atâtamik saugakutingit mianerivlugit Siggememe.

13 Israêlib tagva Josefe okautivâ: Katangutivit saukat

mianeringilaît Siggememe? Kait, tillijomagapkit taipkonunga. Okautivâle: Tamânêpunga.

14 Okautivâlo: Aularit takojartorlutit, katangutitit kanoengitsiarmangâta, saukallo kanoengitsiarmangâta, okariartorvigilungalo ilinganinginik. Tagva tillivâ Hebronib naksaanganit. Siggememut tikkingmat,

15 Natername tamartok angutib naipipâ. Tâpsoma aperiâ okarlune: Suna kenerpiûk?

16 Kiovâ: Katangutikka kenerpakka; okautilaungminga nanêdlutik mianersimangâta.

17 Angutiblo okautivâ: Tamângat aularsimavut, okartut tussarapkit: Dotanemut ingerganialerta. Josefib tagva katangutine malikpait naipiniarlugit Dotaneme.

18 Tâpkoale ungasiktomit takogamitsuk, tikkilerkârtinago issumaksarsiokatigêlerput tokotsomavlugo,

19 Okarkatigêklutik: Takkuitse, sinnaktômasôk tamau-ngalerpok.

20 Attê, tokolaulavut, itersaliat illanganut egidlugo okautigivlugolo ômajôlungmut nerrijaumajok. Sinnaktômanigita sunauningit takuksauniarput tagva.

21 Rubenib tamanna tussaramiuk, piulivâ agganginit okarlune: Inuartaililavut!

22 Okarivorlo Rubene: Aungmik kovisiniarase, itersaliamulle mattomunga inukangitomêtomut egisiuk, aggapsingnulle pijauniarane!—agganginit piulinasuarlugo atâtanganullo uttertinasuarlugo.

23 **Josef** tagva katangutine tikkingmagit, annoraijarpât, annorânga taksapatâk atortanga pêrlugo.

24 Tiguvâllo egidlugolo itersaliambut: itersaliarle sunakangilak, illua imekangilak.

25 Ingilerpullo nerriniarlutik. Takosaramik, takovait inugasait Ismaêliterit Gileademit tikkitut kamêlekotingillo tauvlukutinik mingoarutiniglo kutsuniglo nangmartut; ingergavut Egiptenemut akjartorlugit.

26 Tagva Judab katangutine okautivait: Suksari-galloarpitigô, nukavut tokoleruptigo aungalo angiarilugo?

27 Attê, niorvgutigilaulavut Ismaêliterinut ukkonunga, aggappingnut pijautailitilugo, nukarigaptigo uvinekatigivlugolo. Katangutingitalo nâlekpât.

28 Niuverniantille tâpkoa Midianiterit sennerkongmatta Josefe amuvât itersaliambut kakitilugo niorvgutigilâllo Ismaê-

literinut kênaujanik 20nik akkekartilugo. Tâpkoale Josefe Egiptenemut neksarpât.

29 **Rubenele** itersaliamut tikkiname, sunaubva, Josefe-kangilak itersaliame, tagva annorâne alikpait.

30 Katangutinelo tikkinivait okarlune: Inôsuktok tai-kanêtsungnairmat, uvanga namungarniarkêk?

31 Tagva Josefib annorânga tiguvât, tuktungajorlo tokolugo aunganut annorânga missukpât.

32 Tillikliutivâllo annorâk taksapatâk âtautilugo atâta-mingnut okautjaurkolâllo: Tâмна nagvârpavut; nautsertoruk, ernivit annorâringmangâgo annorâringimangâgolônêt.

33 Illitarivâlo okarlune: Tagga! ernima annorânga; ôma-joâlub nerrimavâ; atso illâ! Josefe aliktorsimavok.

34 Jakoblo annorâne alikpait pôksajaniglo tapserusêvlune sibviamigut ernine oggurivâ uvlunik unuktunik.

35 Erningitalo panningitalo ilûnatik manigoriartoralloarpât, kissiane manigortaujomangilak, okarlune: Ogguarlunga ernimmik kannungarniarpunga tokungajut ininganut! Atâtangatalo keavâ.

36 Midianiterille Egipteneme niorvgutigivât Potifaremut, Faraub pimaklertokotinganut, attanermik udjertortut angajokânganut.

KAP. XXXVIII.

Judalo Tamarelo.

1 **NELLIUTOME** taipsomane Juda aularpok katangutiminit, angut Adullamiok itervigivlugo Hiramik attelik.

2 Tagvane Judab takovâ Kânaanemiut illangata Suamik attigub pannia, tiguvlugolo tuttikpâ.

3 Singailerporlo ernermiglo ernivok, tâмна Gêremik atserarpâ.

4 Amma singailerivok ernermiglo ernivok, tâмна Onanemik atserarpâ.

5 Ammalo ernermik ernivok, tâмна Sêlamik atserarpâ. Judale Kesibemêpok erniaringmago.

6 Judable ernine angajuklek Gêre nuliaksamik tunitjivigivâ Tâmaremik attilingmik.

7 Kissiane Judab erninga angajuklek ajortôvok Nâlekab sângane, taimaimat Nâlekab tokopâ.

8 Tagva Judab Onane okautivâ: Angajuvit nulianga

tuttiguk; ukkuararsugigangne nuliarijaksarivat, angajungnut kinguvâksarsiniarlutit.

9 Onanelo nellungilak, kinguvâksak nangmineriaksaringinamiuk, tuttiklugolo angajume nulianga nunamut kattaktitsivok, angajuminut kinguvâksarsijomanane.

10 Taimailiorninga ajortôngmat Nâlekab sângane, tâmnatauk tokopâ.

11 Judablo ukkuane Tâmare okautivâ: Uigarniovlutit atâtavit iglunganêtuarit ernera Sêla inumariolerkârtinago! —issumakarama: Tâmnatauk tokolârpallaivok angajûngmitut. Tâmarelo aularpok atâtame iglunganêtuarlune.

12 **Uvlut** unuktut nângmatta, Suab pannia Judab nulianga tokovok. Oggorijungnairamiuk, Juda majorarpok saugakotiminik sallijunut Timnatemut, illanârijane Hira illagivlugo.

13 Tâmarelo unipkautivât okautivlugo: Takkuit, sakkît Timnatemut majorarpok, saugakotine sallijartorlugit.

14 Tagva annorât atorpaktane uigarnionermine pêrpait, kênailitamut ingminik mattuvlune uliklunelo, ingiporlo Enaib itertarvianut, apkosinermê tub Timnatemut ilingajome, Sêla inumariojarêrtok takogalloarlugo nuliangotitaulunginame tâpsomunga.

15 Judable takogamiuk, anguniarpaktônasugivâ, kênarne mattungmago.

16 Sâvigivâlo apkosinerme okarlune: Tuttilaulagin-ai? nellovlune ukkuarinamiuk. Kiovâ: Sumik tunitjivigijomavingâ tuttingniarlunga?

17 Okarporlo: Tuktungajok piarak illingnut tilikliutiniarpara nergjutekotimnit. Kiovâle: Tilikliuterkârnago satoraksanik tunitjiviginiarkingâ?

18 Okautivâ: Sumik satoraksamik tunitjiviojomavêt uvamnut? Kiovâ: Nakitjutingnik nuvijutingniglo ajaupiarniglo aggangnêtomik. Tagva tamakkoninga tunitjivigivlugo tuttikpâ; tâpsomunga singailerpok.

19 Kingorngane (Tâmare) nikovidlune aularpok tagva ngat kênailitanelo pêrpâ, annorât atorpaktane uigarnionermine attingmivlugit.

20 Judable tuktungajok piarak tilikliutivâ illanârijamigut Adullamiokut, satoraksat arnamit utterkolugit; kissiane nagvângilâ taimna.

21 Tagva inuit taikanê tut aperivait okarlune: Naûk anguniarpaktok taimna Enaime apkosinerme iksivalauktok? Kiovâlle: Anguniarpaktokalaungilak tagvane.

22 Judamullo utterpok okarlune: Nagvângilara; inuillo taikanêtut okarput anguniarpaktokalaungitomik.

23 Juda okarpok: Unêt tigutuinarligit, kangusuktitaurokonanuk. Tuktungajok piarak una tilikliutigalloarapko, nagvângilat.

24 **Takkit** pingasukassait nângmatta, Juda unipkautijauvok okautjauvlune: Ukkuat Tâmare ajortulivok, sunaubvalo, singailerpok ajortulinermut. Juda okarpok: Anitisiuk, ikitaksauvok.

25 Anititaugame, sakkiminut tilikliutjivok okarlune: Makkoa inuanut singaititauvunga. Illitarksilerit, kia perkutigimangâgit, nakitjut una, nuvijutingalo, ajaupiarlo una.

26 Judablo illitarivait okarlunelo: Idluarnersauvok uvamnit, tunilaunginapko ernimnut Sêlamut. Kingornganele uvinikatigijungnairpâ.

27 **Ernisulermat**, sunaubva, maggoliaksangnik illumioarpok.

28 Erningmalle, aipangata aggârsungit sakkerput. Tagva ernisuksêjok ivaluksamik aupaluktamik tigusivlune agganillo nappersivlune okarpok: Tâмна sivorliovlune anivok.

29 Agganele uttertingmagit kingumut, sunaubva katangutinga anivok; okarpok tagva: Sôk pivlutit taimak angitigijomik aliksivêt? Tâмна Pêresemik atserarpât.

30 Kingorngane katangutinga anivok, ivaluksamik aupaluktamik tallermiutalik. Tâмна Sêramik atserarpât.

KAP. XXXIX.

Josef pititaulerninga parngnanairsimavingmut.

1 **JOSEFELE** attersautivât Egiptenemut; Potifariblo, Faraub pimaklertokotingata, attanermiglo udjertortut angajokângata, angutib Egiptenemiub, pissiarivâ Ismaêliterinit tagvunga attersautijinginit.

2 Nâlekablo Josefe aiparivâ, angutaulerporlo piloriktok, angajokâme Egiptenemiub iglunganêdlune.

3 Angajokângatalo malugivâ, NâleKab aiparingmago aggangitalo sulijangit taimak NâleKab piloriktingmagit.

4 Josefelo saimaneksivok sângane kivgartorlugolo; pimaklertungortipâlo igluminik, perkutinelo tamaita pitipait agganginut.

5 Pijokarporlo, pimaklertungortingmago igluminik perkutiminiglo tamainik, taimangat NâleKab Egiptenemiub

iglunga piloriktipâ Josefe pivlugo. Nâlekablo piloriktitsininga atorpok perkutinginut tamainut iglomelo perorsêvingmelo.

6 Taimaimat perkutine tamaita pitipait Josefib agganginut, nangminerlo sunalônêt kamagijungnailerpâ, taimna pitilugo; neriksak kissiat nerrijaksane (kamagivâ). Josefelo taututsi-arikpok kênatsiariklunelo.

7 **Taimailingatilugo** ovatsiarôlermat, angajokângata nuliangata Josefe takonârpâ ikligunermut, okarlunelo: Tuttilaunga!

8 Kunuvorle, okautivlugolo angajokâme nulianga: Takovotit, angajokâma iglome sunalônêt kamagijungnairmago pitilunga, perkutinelo tamaita aggamnut pitingmagit.

9 Uvamnît anginersaujokangilak iglome mattomane, ivlersilungilarlo sunamiglônêt uvamnût, illingnik kissingnik, nuli-arigamitit. Kappianarmêk, ajortoksoak tamanna piniara-jarupko Gûdemut ajortulivlunga!

10 Nâlengilâlo Josefib, tuttingnago najornagolônêt, uvlut tamaita taimak innagalloarmago.

11 Uvlullo illangane Josefe iglomut itermat sulijaksane piniaromavlugit, inukangilak tagvane iglome iglub inungita illanganiglônêt.

12 Tagva annorângagut tiguvâ okarlune: Tuttilaunga-ai? Kissiane annorâne agganginut kemaklugo sillamut kemâvok.

13 Arnable, takogame annorâne kemaklugo aggangminut sillamut kemângmat,

14 Iglub inungit kairkovait okautivlugillo: Okoksê, angut Ebrêereojok uvaptingnut itertinerpâ, uivêtokutauniartiluta tâpsomunga. Uvamnût iterpok tâmna tuttigomavlunga, uvangale kaggudlarpunga.

15 Niplialerdlunga kaggudlarlungalo tussaraminga, annorâne sennimnut kemaklugo sillamut kemâvok.

16 Tagva annorânga senniminut illivâ angajokânga tikki-tsiarivlugo.

17 Okarvigivâlo okautsinik makkoninga, okarlune: Kivgak Ebrêereojok itertitat uvaptingnut, iterpok uvamnût uivêtokutigijomavlunga.

18 Kissiane niplialerdlunga kaggudlarama, annorâne sennimnut kemaklugo sillamut kemâvok.

19 Angajokângatale nuliame okausingit okautigijangit tussaramigit, okarmat: Taimak kivgavit iliorpânga,—tagva ningausinga katsungailerpok.

20 Angajokângatalo Josefe tiguvâ parngnanairsimavingmut pitilugo, attanerub parngnanairsortaurkojangita parngnanairsimavianut. Tagvanêlerporlo parngnanairsimavingme.

21 **Nalekable** aiparivâ pitsiarvigivlugo saimaneksitilugolo parngnanairsimaviub angajokângata sângane.

22 Parngnanairsimaviublo angajokângata parngnanairsortaujut tamaita Josefemut pairijaurkovait, tamaitalo sulijak-sangit tagvane tâpsoma suliarivait.

23 Pijaksarme nellianiglônêt parngnanairsimaviub angajokânga kamajungnairpok, Nâlekab aiparingmago, sulijangillo Nâlekab piloriktingmagit.

KAP. XL.

Josefib parngnanairsortaukatîngne sinnaktômanîgik nelonaijarpak.

1 **PIJOKARTUT** tamakkoa kingorngatigut, Egiptenemiut attaningata imiksaliortinga kakkôjaliortingalo idluitulivuk angajokâmingnut Egiptenemiut attaninganut.

2 Faraublo ningarilerpak kivgakotîngne tâpkoa imiksaliortit angajokângat kakkôjaliortillo angajokângat.

3 Parngnanairsortaurkovaglo attanermik udjertortut angajokângata iglunganut, parngnanairsimavingmut Josefib parngnanairsortauvianut.

4 Attanermiglo udjertortut angajokângata Josefe kivgartorkovâ tâpkungninga. Parngnanairsimavingmêpuglo uvlut kapsit.

5 **Tamarmiglo** sinnaktômavuk, Egiptenemiut attaningata imiksaliortinga kakkôjaliortingalo parngnanairsimavingme parngnanairsortaumajûk, tamarmik ingmikut sinnaktômavlutik unnuarme atauserme, attunit sinnaktômanermik ingmigut tukelingmik.

6 Josefiblo uvlâkut itervigigamigik, takovak, sunaubva, kiksartûk.

7 Aperivaglo Faraub kivgâgik parngnanairsortaukatigijângne angajokâme iglungane, okarlune: Sôk tauturlukitîk uvlome ?

8 Kiovâk: Sinnaktômavoguk, nellonaijaijokartinago tuki-nganik. Josefible okautivak: Nellonaijaigiaik ilingalungilâk Gûdemut ? Unipkârvigitinga-ai ?

9 Tagva imiksaliortit angajokângata sinnaktômanerijane unipkautigivâ Josefemut, okautivâlo: Sinnaktômavunga vaine-kutemik sâmnêtomik.

10 Vainekut akkerokarpok pingasunik, tungujoksivlunelo perorpok nuvugulâkarlarmelo, paungangillo innersimalerput.

11 Faraublo ermgusiarsunga tigumiarpara, paungallo tiguvlugit iptêjarpakka Faraub ermgusiarsunganut, ermgusiarsuglo tunivara Faraub agganginut.

12 Josefib okautivâ: Tamadja tuinga: akkerkut pingasut tagva uvlut pingasut.

13 Uvlut pingasut nâkpatta, Faraub niakuit makitilârpâ uttertilutit kivgartorvigijarnut, Faraublo ermgusiarsunganik tunitjilârivotit agganginut, iluserilauktaktut taipsomane imiksaliorteolauravit.

14 Erkalaungmingale kanoengitsiaruvit, nâpkigivlunga taivlungalo Faraomut, iglomit ômangat anititaurkovlunga,

15 Tigligaugama Ebrêrit nunanganit, taimaktauk mâne idluitulilunginama sunamik pitjutaujomik parngnanairsortau-giamut.

16 Kakkôjaliortit angajokângata ânanâmik nellonaijajok tussaramiuk, Josefemut okarpok: Uvangatauk sinnaktôma-vunga: sunaubva, amârgaujanik pingasunik kakkôjârsukta-lingnik kakkaktunga.

17 Amârgaujamelo kollerme kakkôjatsiakarpok sunatui-narnik Faraub nerkiksanginik, tingmitjallo nerrivait amârgau-jamit kakkaktamnit.

18 Josefib kiovâ okarlune: Tamadja tuinga: Amârgaujat pingasut tagva uvlut pingasut:

19 Uvlut pingasut nâkpatta, Faraub niakuit makitilârpâ illingnit pêrlugo, nivingatilutit kejungmut; tingmitjallo uvinît nerrilârpât illingnit.

20 Uvlullo pingajuane, Faraub inûlerviane, nerrimârak-sarsoarmik âkiksoigame kivgaminut tamainut, imiksaliortit angajokângata niakunga makitipâ kakkôjaliortillo angajokâ-ngata niakunga kivgame akorngane.

21 Imiksaliortillo angajokângat uttertipâ kivgartorvigi-janganut, ermgusiarsungmik tunitjerkovlugo Faraub aggangi-nut.

22 Kakkôjaliortille angajokângat nivingartaurkovâ ke-jungmut, sorlo Josefib nellonaijaivigingmagik.

23 Imiksaliortille angajokângata Josefe erkarungnairlugo puigorpâ.

KAP. XLI.

Josefe aulatsijungolerpok Egipteneme.

1 **JARIK** magguk nângmanik, Farao sinnaktômavok: kôksoarme nangerdlune.

2 Sunaubvalo, kôksoarmit kakivut tuktuvait sevenit takominartut kuinijullo, nerrinasuktut iviksoarnik.

3 Sunaubvalo, kingorngatigut tuktuvait sevenit assingit kôksoarmit kakivut takominaitut sallôjullo, kôksûb sinâne tuktuvait ipkoa sennianêlutik.

4 Tuktuvaillo tâpkoa takominaitut sallôjullo nerrivait tuktuvait taipkoa sevenit takominartut kuinijullo. Tagva Farao tupalerpok.

5 Sinisingmivlune aipanganik sinnaktômavok: Sunaubva, sullugainerit sevenit nuilerput ivingmit atautsemit angijut silliktullo.

6 Sunaubvalo, kingorngatigut nuilerput sulugainerit sevenit amitut, uarngnarmut kunorlertut.

7 Sulugainerillo amitut tâpkoa êvait sulugainerit taipkoa silliktut angijullo. Tupalerlune Farao malugosulerpok sinnaktômanerminik.

8 Kaulermalle, tarnimigut issumajârpok, tiliklerporlo kairkovlugit aglangnik illisimajut tamaita, sillatujullo tamaita Egiptenemêtit, sinnaktômanerijanelo unipkautigivait tâpkonunga. Kissiane nellonaijaijungnartokalungilak tamakkonunga Faraomut.

9 Tagva imiksaliortit angajokângata Farao okarvigivâ okarlune: Uvlome idluitulinimnik erkailerpunga.

10 Taipsomane, Faraub kivgângne ningaringmagik, uvangalo kakkôjaliortillo angajokângat parngnanairsimavingmut pitilunuk, attanermik udjertortut angajokângata iglunganut;

11 Taipsomane sinnaktômavoguk unnuarme atautseme uvangalo taimnalo, attunit sinnaktômanermik ingmigut tuelingmik.

12 Tagvanelo illagivavuk inôsuktok Ebrêereojoyok, attanermik udjertortut angajokângata kivganga. Taimna unipkârvigigaptigo, sinnaktômaniptingnik nellonaijaivigivâtiguk, nellonaijaivigivlunuk attunit sinnaktômaniptingnik.

13 Sorlolo nellonaijaivigingmattiguk, taimak nelautsivoktauok: uvanga kivgartorvigijamnut uttertitauvunga, imnale nivingarpâ.

14 **Farao** tagva tiliklerpok Josefe kairkovlugo, tuavidlarlutiglo anitipât parngnanairsimavingmit. Sallijaurkârdlune annorâtârame, iterpok Faraomut.

15 Faraublo Josefe okarvigivâ: Sinnaktô mavunga nellonaijajokartinago tukunganik: igville tussarpagit okautigijauvlutit, sinnaktômanernik tussartuaruvit, sappingingangne nellonaijarlugo.

16 Josefiblo Farao kiovâ okarlunelo: Uvanga pingitunga; Gûdib Farao ajungitunik nellautaiviginiarpâ.

17 Faraub tagva Josefe okautivâ: Sinnaktô mavunga kôksûb sinâne nangerdlunga:

18 Sunaubva, kôksoarmut kakivut tuktuvait sevenit kuinijut takominartullo, nerrinasuktut iviksoarnik:

19 Sunaubvalo, kingorngatigut kakivut tuktuvait sevenit assingit piungitut, takominaitut, sallôjut. Taimak takominaitigijunik takolungitunga Egiptenib nunangane ilûnâne.

20 Tuktuvaillo tâpkoa sallûdlartut takominaitullo nerri-vait tuktuvait taipkoa sevenit sivorlît koinijut.

21 Illumingnullo pitigalloarmagit, malungnalungilat illuanut pititaujut, sivornganetut takominaiput. Tagva tupa-lerpunga.

22 Amma sinnaktô mavunga: Sunaubva, sulugainerit sevenit nuilerput ivingmit atautsemit silliktut ajungitullo:

23 Sunaubvalo, kingorngatigut nuilerput sulugainerit sevenit piungitut, amitut, uarngnarmut kunorlertut.

24 Sulugainerillo tâpkoa amitut êvait sulugainerit ipkoa ajungitut. Tamakkoa okautigigalloarpakka aglangnik illisimajunut, kissiane nellonaijaivigijungnangilânga.

25 **Josefib** Farao kiovâ: Tamattomingatsainak Farao sinnaktô mavok. Gûdib Farao nellojungnairtipâ piniaromârnerminik.

26 Tuktuvait taipkoa sevenit ajungitut tagva jârit sevenit, sulugainerillo taipkoa sevenit ajungitut tagva jârit sevenit. Sinnaktômanek tâmnatsainauvok.

27 Tuktuvait taipkoa sevenit sallôjut takominaitullo, kingorliovlutik kakijut, tagva jârit sevenit; tamaktauk sulugainerit sevenit amitut uarngnarmullo kunorlertut: sevenenik kângnartunik jârekaromârmat.

28 Taimaipok, sorlo Faraomut okarama: Gûdib Farao nellojungnairtipâ piniaromârnerminik.

29 Takkuit, jârit sevenit akluinartut nelliutijomârput Egiptenemut ilûnânut.

30 Kingorngatigullo jârit sevenit kângnartut pijomârput; Egiptenib akuinartoksôninga puigortautilugo; kângnartoksûblo nunamiut nungutsomârpait.

31 Akuinartomiglo nuname kaujijungnairomârput kângnartoksoak pivlugo kingorngagut pijomârtok, okumailuaro-mârmât.

32 Faraole maggoertorlune taimak sinnaktômangmat, tu-kekarpok: Gûdeme tamanna kajusijutaumaringmat, Gûdelo tuavilune taimailulârmât.

33 Taimaimat Faraub angut silatutsiartok illisimajorlo kennerliuk mâna, aulatsijungortiniarlugolo Egiptenemut.

34 Taimailiorlunelo Farao illijingmile pimajiksaminik nunamut, tigulugolo ilûnarsoangita tellimangat Egipteneme, jârit akuinartut nelliutitilugit.

35 Jârillo ajungitut nelliutitilugit, nerkiksanik sunatui-narnik kattersoilit taipkoa, kakkôjaksanik kematuliviliutjivlutik Faraub kamagijaksanginik, nerkiksaujunik iglugasaksoarmiunut, torkorlugillo.

36 Nerkiksalle tamakkoa nunamiut piksarijomârpait jârinut sevenenut kângnartunut, Egiptenemut pijomârtunut, nunamiut kângmut perlerkonagit.

37 **Okautsit** tamakkoa Faraublo kivgangitalo ilûnatik idluarivait.

38 Faraublo kivgane okautivait: Nagvârnialloarkitâ angumik ôma assianik, Gûdib anerninganik illumilingmik?

39 Josefemullo Farao okarpok: Gûdib tamakkoa tamaita illingnut nellonairmagit, taimaimat illiktut silatujomik illisimajokangilak.

40 Igvit iglumne aulatsijuksauvotit, inukotimalo ilûnatik okautsitit nâlegaksarivait, attanersûb iksivautanga kissiat pinersaujutigivara illingnit.

41 Amma Faraub Josefe okautivâ: Takovat, aulatsijungortigapkit Egiptenemut ilûnânut.

42 Faraublo ketterdlermine (nakitjut) aggangminit pêrpâ Josefib agganginut illivlugo, annorâtârtilugolo sâtomik, kakortamik, kelaumgujangoarniglo goldeojunik ujamiktilugo.

43 Kemukserkovâlo kamutikotîngme (aksalloalîk) aipâkikut, nipliavullo sivorngagut: Pâmakteritse! Taimak Egiptenemut ilûnânut aulatsijungortipâ.

44 Farauble Josefe okautivâ: Uvanga tagva Farao. Igville perkungitarnik aggangminiglônêt ittigaminiglônêt aulatsijokartuksaungilak Egipteneme ilûnâne.

45 Faraublo Josefe atserarpâ: Sapnat-panîamik, nuliakar-tipâlo Asnatemik, ajokertuijub Onemêtub Potiferab paninganik. Tagva Josefib Egiptene takojartorpâ.

46 **Josefe** jârekarpok 30nik, Faraub Egiptenib attanertangata sânganut nangeriartorame. Faraomille aularlune ingergalerpok Egiptenekut ilûnâgut.

47 Nunalo amigangiluartunik paungakarpok jârine taipkonane sevenene akluinartune.

48 Jârillo sevenit taipkoa nelliutitilugit, nerkiksat sunatuinait Egiptenemêtut kattorsorpait, iglugasaksoarnut piti-lugit. Nerkiksat, iglugasaksuit nelliata erkâne perortut, illuanut pitipait.

49 Taimak Josefe каккôjaksanik unuktovaksoarnik kematuliviliutjivok, imab siorangititut itilugit; kititsungnaisinnalerpait, kititaujungnangimatta.

50 **Jarit** kângnartut nelliuterkârtinagit Josefe maggungnik ernertârpok, Asnatib, Potiferab ajokertuijub Onemêtub paningata, erniaringmagik tâpsomunga.

51 Josefiblo angajuklek Manassemik atserarpâ, (okarlune:) Gûdib puigortingmanga siorniornimnik atâtamalo iglunganik ilûnânik.

52 Aipanga Efraimik atserarpâ, (okarlune:) Gûdib aglisi-tingmanga nuname kappiasugvingme.

53 **Jarillo** sevenit taipkoa akluinartut, Egiptenemut nelliutijut, nângmatta,

54 Jârit sevenit kângnartut nelliutilerput, sorlo Josefib okautigingmagit. Kângnartoksûblo nunat tamaita tikkipait, kissiane Egipteneme ilûnâne nerkiksakarpok.

55 Egiptenemiullo ilûnatik kâlermatta, inuit nipliadlarput Faraomut nerkiksakaromamut. Farauble Egiptenemiut tamaita okautivait: Josefemut aileritse; sumik perkungmase, piniaraksarivase.

56 Kângnartoksoarle pidlalerpat nunanut tamainut, Josefib ilûnâne kematulivît каккôjaksatalît upkoerpait, pissiak-sakartilugo, kângnartoksoak sugalulualermat Egipteneme.

57 Nunanillo tamainit Egiptenemut tikkilerput, niuvervigijomavlugo Josefe, kângnartoksoak sugaluluarmat nunane camaine.

KAP. XLII.

Jakob erningit ingergatainarput Egiptenemut.

1 **JAKOBLE**, takogame Egipteneme kakkôjaksanik pissijaksakarmat, ernine okautivait: Sôk takonautituinarkisê?

2 Okarporlo: Ahâk, tussarpunga, Egipteneme kakkôjaksanik pissijaksakarmat; taununga attersaleritse kakkôjaksanik pissiniutivluta taunangat, inôjungnarkovluta tokolerkonatalo.

3 Tagva Josefib katangutingit tellimaujortut attersarput, kakkôjaksanik pissijartoromavlutik Egipteneme.

4 Benjaminele, Josefib nukanga, Jakob illaurkolungilâ katangutinginut, okarame: kanoetomut tikkitaujungnara-jarmat.

5 Taimak Israêlib erningit tikkiutivut kakkôjaksarsiniartut illagivlugit, Kânaanib nunangane kângnartokarmattauk.

6 **Josefible**, attaniotijub nuname, tâpsoma kakkôjaksat tuniorkapait nunab inunginut tamainut. Katangutingitalo Josefe tikkinamitsuk, pâ mangavigivât.

7 Josefiblo katangutine takonâramigit illitarilerpait, takorngartausertorporle, kuksanartomiglo okarvigilugit okarpok: Nakit pivisê? Kiovât: Kânaanib nunanganit nerkiksarsiniarluta.

8 Josefiblo katangutine illitarigalloarmagit, tâpkoa illitaringilât.

9 Josefele sinnaktômanermik erkaivok, kanok sinnaktômagame pivlugit, okarporlo: Nautsertoriarteovose, nunab sappulutakangininga nane takojartorlugo.

10 Kiovâllo: Aukagle, attanek. Kivgatit tikkiput nerkiksarsijomavlutik.

11 Tamapta angutib atautsib ernerivâtigut, pingitsertulungilagut, kivgatit nautsertoriarteolungilat.

12 Okautivaille: Aukak, nunable sappulutakangininga nane takojartorpase.

13 Kiovât: Uvagut kivgatit angutib atautsib, nuname Kânaanemêtub, ernerivâtigut—nukarêt 12—, nukardlerpâk sulle atâtaptingnêpok, atausek sakkijarungnairpok.

14 Josefiblo okautivait: Taimaipok, sorlo okarvigigapse: nautsertoriarteovose.

15 Mattominga ôktortauniarpose: Sorlo Farao inôngmat

illa, tagvangat aulartuksaungilase, katangutise nukardlerpâk tikkingipat ovunga.

16 Illase atausek tillisiuk, nukapsingnik aiklerkovlugo, illipsele parngnanairsimavingmêniarpose. Taimak okausise ôktoromavakka, miksekârtunik okausekarmangâpse. Taimaingipat,—sorlo Farao inôngmat illa!—nautsertoriarteovose.

17 Pitipaillo ilûnaita parngnanairsimavingmut atautsemut uvlunik pingasunik.

18 Uvlullo pingajuane Josefib okautivait: Imailioritse, tagva inôjuksauvose, Gûde opigigapko.

19 Pingitsertulungikupse, illase atausek kelaksorsimale parngnanairsimavipsingne, illipsele aularitse, kakkôjaksat inukotipse perlerêkutiksangit angerautivlugit.

20 Nukaselo tikkiutisiuk uvamnut, tagva okausise okper-narniarput tokolertuksaungilaselo. Taimailiorput tagva.

21 **Okausekautivullo** : Sôkiak pidlartauvogut nukavut pivlugo, tarningata kappiasungninga takogaptigo, kenuvigingmattigut, uvagullo tussaromalungitavut; tamanna pivlugo kappianartomut tamattomunga tikkitauvogut.

22 Rubeniblo kiovait okarlune: Okarvigilaungilapsê, okarlunga: Idluituliniarase nukapiamut? kissiane nâlegomangilase. Sunaubva, aunga akkilertaulerpok.

23 Nellovulle, Josefib tukisingmagit, okartekarlune okarvigingmagit.

24 Tunupaillo keavlune; amma sâvigivait okarvigivlugit; Simeonelo tiguvâ akornganit kelaksorlugolo takoane.

25 **Josefelo** perkojivok, pôngit kakkôjaksanik tattataurkovlugit, kênaujakotingillo illijaumerkovlugit ilûnatik attunit pônginut, takoaksamiglo tunitjiviorkovlugit. Taimailiorvigivaillo.

26 Tagva kakkôjaksarsiatik illivait siuterkortojokotimینگnut aularlutiglo tagvangat.

27 Siniktarvingmele illangata pône kellarutjâramiuk, siuterkortojokutine nerripkaromavlugo, kênaujakutine takovait, sunaubva, pôngme kalliutijut.

28 Katangutiminullo okarpok: Kênaujakotikka amma pigigivakka, tagga pômnênerput. Tagva koaksârput sajuklutiglo, okausekautivullo: Sôk Gûdib taimailiorvigivâtigût?

29 Atâtamingnut Jakomut angeraramik nunamut Kânaanemut, iliortaunermingnik tamainik unipkârvigivât, okarlutik:

30 Angutib taipsoma, nunab nâlegangata, kuksanartunik okausekarvigivâtigit, nunamik nautsertoriarteonerarluta.

31 Kioyavulle: Pingitsertulungilagut, nunamik nautsertoriarteotsangilagut.

32 Atâtapta ernerivâtigit—nukarêt 12—, kissiane atausek sakkijârungnairpok, nukardlerpârlo atâtaptिंगnêpok sulle nuname Kânaaneme.

33 Tagva angutib taipsoma, nunab nâlegangata, okautivâtigit: Mattominga ôktûtekarniarpunga, pingitsertulungimangâpse: Katangutise atausek uvamnêniarpok, illipsele, inukotipse perlerêkutiksangit neksarlugit, aularniarpose.

34 Katangutiselo nukardlerpâk tikkiutisiuk uvamnû, tagva tukisiniarpunga nautsertoriarteolunginapse pingitsertulunginapselo; katangutiselo uttertitsomagivara illipsingnut, niuverungnarniarposelo nuname.

35 **Pôtiglo** navingmagit, sunaubva, ilûnatik attunit kênaujakotingit kipsisimajut pônginêput. Takogamigle kênaujakotimingnik kipsisimajunik, koaksârput, tâpkoa atâtangallo.

36 Tagva atâtangata Jakob okautivait: Kitorngairutilerpapsinga; Josefe sakkijârungnairpok, Simeone sakkijârungnairpok, Benjamin neksaromavase. Makkonunga tamainut tikkitauvunga.

37 Rubenible atâtane kiovâ okarlunelo: Uttertینگkupko illingnut, ernikka tokotaksarivakik. Aggamnut pitituinaruk, illingnut uttertitsomavara.

38 Okarporle: Ernera illagivluse attersakataujuksaungilak, angajua tokungmat, tâmnalo kissime amiakôngmat. Ingergatiluse apkome kanoetomut tikkitaupat, kêtojunga kanungartinajarpapsinga tokungajut ininganut kiksarnermut.

KAP. XLIII.

Jakob erningit aipanganik ingergavut Egiptenemut.

1 **KANGNARTOKSOARLE** okumaidlarpok nuname.

2 Kakkôjaksaniglo, Egiptenemit tikkiutijamingnik nu-ngutsingmatta, atâtangata okautivait: Amma ingergaleritse, nerkiksagalânik pissiniutivluta.

3 Tagva Judab okautivâ okarlune: Angut taimna ilungertumarikpok uvaptingnut, okarlune: Kênara takojaksaringilase, kissiane nukase illagigupsiuk.

4 Taimaimat, nukavut uvaptingnut illaurkogungne attersaromavogut taununga nerkiksanic pisiniutivlutit.

5 Illaurkongikungnele, attersaromangilagut taununga, angut taimna okarmat uvaptingnut: Kênara takojaksaringilase, kissiane nukase illagigupsiuk.

6 Israêlele okarpok: Sôk taimak ajortomik pivisingâ, angut taimna kaujitigupsiuk nukakarnipsingnik sulle?

7 Kiovât: Angutib taipsoma aperkutigiluarpâtigut illavullo, okarlune: Atâtase sulle inôvâ? Sulle nukakarkisê? Kaujitipavut tagva, sorlo apertsormattigut. Kanorle kauji-jungnarkitâ okarniarmat: Nukase tamaungartisiuk?

8 Judablo atâtane Israêle okautivâ: Inôsuktok uvamnut illaurkoguk, tagva parngnaileromavogut ingergalutalo, inôrkovluta tokolerkonatalo uvagullo igvillo kitorngavullo.

9 Uvanga akkisartoromavara, aggamnit pijomajaksarivat. Illingnut uttertingikupko ijîkpit sângangnut pitilugo, inôsera nâvlugo passijaksaujutigijomavara.

10 Taimak utterkeangatuinalungikupta, maggoertorluta utterêrajarpogut.

11 Tagva atâtangata Israêlib okautivait: Taimaitsariakarpait, imailioritse: Nunab pingita annernarnerpât illanginik pôpsingnut illijivluse, angumut taipsomunga pilliutinik neksaritse: mingoarutegalâmik erngautaujagalâmiglo, tauvlukutininik, kutsomiglo, saunanik, saunâlungniglo.

12 Kênaujaniglo aipainginik neksaritse, taipkoa pôpsingne kallipautivlutik uttersimajut neksarmivlugit; tammartokarnerpallaingmat.

13 Nukase illagisiuk, parngnailerluselo ingergalermititse angumut taipsomunga.

14 Gûdible ajugakangitub nâpkigijautilise angutib taipsoma sângane, katangutise Benjaminelo illaurkojauniartilugik illipsingnut! Uvangale kitorngairutiguma, kitorngairutivunga.

15 Tagva angutit tâpkoa tiguvait pilliutiksatic, kênaujallo neksarpait maggoertorlutik, Benjaminelo illagivlugo parngnailerput, ingergavullo Egiptenemut, Josefelo tikkipât.

16 **Josefible** takogamigit Benjaminelo illagijangat, pima-klertokotine okautivâ: Angutit ukkoa itertikit iglomut, nergjutiniglo tokotsivlutit nerkiksaliarit, ketteralersiumik nerrikatiginiarmanga.

17 Taimailiorporlo angut, Josefib okausingit maliklugit, angutit itertilugit Josefib iglunganut.

18 Tâpkoale sivôralerput, Josefib iglunganut itertitauleramik, okarpullo: Kênaujat taipkoa sivorngane pôptingnut

uttersimajut pivlugit itertipâtigut tamaunga, opaluigomavluta pidlaromavlutalo, kivgaurkovluta tâpsomunga uvagullo siuterkortojokotivullo.

19 Tagva Josefib pimaklertokotinga sâvigivlugo okausekarvigivât iglub pângane,

20 Okarlutik: Angajokâng-ai? Sivorngane tamaungarapta nerkiksanik pissiniarluta,

21 Siniktarvingmut tikkidluta pôvut kellarudjâraptigik, sunaubva, illûnata attunit kênaujavut pôptingne kallipautivut, kênaujavut ilangersimalungitut; tamakkoa neksarpavut.

22 Kênaujaniglo aipainginik neksarpogut, nerkiksanik pisiniaromavluta. Nellovogut kia kênaujavut pôptingnut illimangâgit.

23 Kiovait: Ullapirksautekaritse sivôraniaraselo. Gûdipse atâtapsele Gûdingata pilliutitik tunitjivigivâse pôpsingnut; kênaujase pivakka. Tagva Simeon anitipâ tâpkonunga.

24 Josefiblo iglunganut itertipait imermiglo kaitsivok, ittikamingnik ubvarkovlugit, siuterkortojokotingillo nerripkar-pait.

25 Tâpkoale pilliutiksat âkiksorpait Josefe tikkitsiarivlugo uvlub ketterarningane, tussaramik tagvane nerrijuksaunermingnik.

26 **Josefe** iglomut itermat, piliutit neksartatik tâpsomunga âpait iglomut pâmangavigivlugo.

27 Tâpsomalo apertsorpait kanoengitsiarmangâta, okarlune: Atâtase îtok okautigijase kanoengitsiarkâ? Sulle inôvâ?

28 Kiovât: Kivgat atâtavut kanoengitsiarpok, sulle inôvok. Okkovlutiglo pâmangavigivât.

29 Josefiblo takosarlune nukane Benjamin, anâname erninga, takovâ okarlunelo: Tâmnauvâ nukase okautigijase uvamnut? Okarivorlo: Gûdib saimarlitit, ernîk!

30 Josefelo anisârpok, illumigut nukane nagligidlaramiuk, keaviksarsiorlunelo sinigvingminut iterpok kealarmelo tagvane.

31 Ermikamele anivok nunuvlunelo okarpok: Nerkiksamik kaitsileritse!

32 Kaitsivullo tâpsomunga ingmikut, taipkonungalo ingmikut, Egiptenemiunullotauk ingmikut, Egiptenemiut Ebrêrit nerrikatigijaksaringimagit, Egiptenemiunut tamanna ma-kojungnarmat.

33 Ingerkovaillo tâpsoma sânganut, angajuklek angajuk-

lioninga maliklugo, nukardlerlo nukardlioninga maliklugo. Tamanna pivlugo tataminiadlarpur.

34 Nerkiksaniglo âtsivut Josefib sânganit taipkonunga, Benjamin âtsivigivlugo illangita piksangit tellimairtorlugit; imerpullo inermik nâmaksivlutik illagivlugo.

KAP. XLIV.

Josefib katangutine ôktorpait.

1 **TAGVA** pimaklertokotine perkovâ okautilâlo: Angutit tâpkoa pôngit nerkiksanik tattakit ajungitanginik, ilûnatiglo attunit kênaujangit kalliutivlugit pônginut.

2 Ermguseralo, ermguŝek silbereojok, nukardlerpâb pônganut kalliutijaksarivat, kênaujallo kakôjaksarsiniutigijangit. Taimailiorporlo, sorlo Josefib okarvigingmago.

3 Kaulermalle, angutit tâpkoa siuterkortojokotingillo aularkovait.

4 Iglugasaksoarnille anisimangmatta, kanitomêtilugit sulle, Josefib pimaklertokotine okautivâ: Attê, tuavilutit angutit taipkoa udlakit; angukungnelo okarvigijaksarivatit: Sôk ajungitok ajortomut akkiniarpisiûk?

5 Tâmmaungilâk nâlekama imervigijanga nelautaijutigijangalo? Idluitulivose taimailiorapse.

6 Angugamigillo, okautsit tamakkoa okautigivait taipkonunga.

7 Kiovâlle: Sôk angajokâvut taimaitunik okausekarkâ? Taimailiornek ajornarpok kivgarnut.

8 Takkuit, kênaujat pôptingne kalliutisimajut nagvârap-tigik, uttertipayut illingnut nunamit Kânaanemit. Sugapta nâlekavit iglunganit silberemik goldemiglônêt tigliktuksaunajarkitâ?

9 Kivgavit nelliat mattominga nagvârviojok tokotaksauvok, amma uvaguttauk kivgaujomavogut nâlegapti-ngnut.

10 Okautivait: Sorlo okarapse taimaile. Nelliat mattominga ngavârviojok kivgaujuksauvok uvamnut, illipsele kivgauniangilase.

11 Tuavilutiglo ilûnatik pôtik illivait nunamut, ilûnatiglo pôtik kelarudjârpait.

12 Kenerasuarporlo angajuklerpâb pônganit pigiarlune nukardlerpâb pônganut tikkidlune; ermguŝerlo Benjaminib pôngane nagvârtauvok.

13 Tagva annorâtik alikpait, siuterkortojokotitiglo ussiler-tormivlugit, ilûnatik iglugasaksoarnut utterput.

14 **Judalo** katangutingillo iterput Josefib iglunganut tagva-nêtilugo sulle, pâmakterpullo sânganut.

15 Josefible okautivait; Sugapse taimailiorkisê? Kauji-mangilasê, angut uvaptun-itok nelautaijungnarmât?

16 Juda okarpok; Sumik okartuksauvitâ attaniptingnut? Kanorlo okausekartuksauvitâ? Kanorlônêt idluarsitilutâ? Gûdib kivgavit idluituliningit nagvârpait. Tagga! attanimnut kivgaulerpogut uvagut tâmnalo ermguusermik nagvârviojok.

17 Okarporle: Taimailiornek ajornarpok uvamnut. Ermguusermik nagvârviojok tâmna kivgaujuksauvok uvamnut, illipsele ullapirksautekarluse paungaritse atâtap-singnut.

18 **Tagva** Judab sângerpâ okarlune: Attaneng-ai? kivgat okâlagalâlauletôk attanera tussartilugo, ningaumajârnîllo kat-sungainiaranetôk kivgarnut, Faraotut igalloaravit.

19 Attanerma kivgatit aperingmagit okarlune: Atâta-karkisê katangutekarluselônêt?

20 Kiovogut tagva attaniptingnut: Itomik atâtakarpogut, inôsuktokarivoktauk inutokauningane inôlertomik; tâpsoma angajua tokovok, kissine amiakôvok anânaminit, atâtangatalo nagligidlarpâ.

21 Tagva kivgatit okautivatit; Tamaungartisiuk uvamnut, takojomagapko.

22 Uvagulle okarpogut attanimnut: Inôsuktub atâtane kemaklugo sapperpâ; kemakpago, atâtanga tokolerajarpok.

23 Tagva okarpotit kivgarnut: Nukase tamaungarkatingikupsiuk, kênara takojaksaringilase.

24 Tagva paungarpogut kivgarnut atâtamnut, kaujutilugo attanima okausinginik.

25 Atâtaptalo okautivâtigut; Aularmititse, nerkiksagâlâmik pisiniutivluta.

26 Kiovogulle; Attersarluta ajorpogut. Nukavut illagiguptigo kissiane attersaromavogut, angutib taipsoma kênanga takojaksaringinaptigo nukavut illaginago.

27 Tagva kivgavit atâtama okautivâtigut: Nelungilase nuliara maggungnik erningmat uvamnut:

28 Aipâ uvamnit aularsimavok, okarpungalo: Aliktorsimajok, nelonalungilak; takojungnaipara mâna tikkidlugô.

29 Unatauk uvamnit aularutikupsiuk kanoetomullo tik-

kitaupat, uvanga kêrtojunga kanungartinajarpapsinga tokungajut inninganut kiksarnermut.

30 Kivgarnut atâtamnut mâna angeraruma inôsuktok illaginago, (tarningata ôma tarninga ungagidlarmago).

31 Imainiarpok: Takogune, inôsuktok sakkijârungnairmat, tokolerajarpok, uvagullo kivgavit atâtavut kivgait kêrtojok kanungartinajarpavut tokungajut inninganut kiksarnermut.

32 Kivgait okarpok atâtamnut inôsuktok akkisartoromav-lugo, okarlunga: Illingnut uttertingikupko, inôsera nâvlugo passijaksaujutigijomavara.

33 Tamanna pivlugo kivgat attanimnut kivgauvlune tamânêle inôsuktok simerdlugo, inôsuktorle paungarle katangutine illagivlugit.

34 Sugama atâtamnut paungartuksauvêk inôsuktok illaginago? Kapiantok atâtama tikkitautigijanga takojaria-karajarpara.

KAP. XLV.

Josefe katangutiminut nelonailivok.

1 **TAGVA** Josefe najortime ilûnatik sângane nunojungnar-ungnailerpok, nipliavorlo: Ilûnatik uvamnit anilit! Najorto-kangilarlo, Josefe katangutiminut nelonailingmat.

2 Keadlalerporlo, Egiptenemiut tussâtilugit Faraublo kiv-gangit tussâtilugit.

3 Josefelo okarpok katangutiminut: Josefeovunga; atâ-tagasulle inôvâ? Katangutingitale kiovlugo sapperpât, kênanga koaksârutiginamitsuk.

4 Katangutinelokautivait: Kailauritsetôk uvamnut! Tagva aivigivât. Okarporlo: Josefeovunga katangutise niorv-gutigijase Egiptenemut.

5 Kissiane issumajârniarase mâna, ningautiniaraselo niorv-gutigigapsinga tamaunga; inûlijauniksapsingnut Gûdib sivunapsigut tilingmanga.

6 Jâringnik maggungnik kângnartoksoakarêrpok mâna nuname, sulle jârit tellimat nâvlugit poagrejartokarane kattersoijokarniangilak.

7 Gûdible sivunapsigut tamaunga tilivânga nungumari-ktailijomavluse nuname, inûlijomavluselo piulijaujutiksamut angijoksoarmut.

8 Taimaimat, illipse tililungilapsinga tamaunga, Gûdible. Tâpsoma Faraomut atâtangortipânga, nâlegangortilarmalo

iglunganut ilûnânut, attaningortilungalo nunamut Egiptenemut ilûnânut.

9 Tuavileritse mâna paungarluse atâtamnut okautijartorlugolo: Imâk ernivit Josefîb okaudjaurkovâtî: Gûdîb attaningortingmanga Egiptenemut ilûnânut; katsungatailivlutit attersalaurit uvamnut.

10 Goseneme nunakartuksauvotit kanitamnêdlutit, igvillo kitorngatillo erngutatillo saugakotitillo tuktuvakotitillo perkutitillo ilûnatik.

11 Tagvane pattangaititsomavagit, sulle jârinik tellimanik kângarnartoksoakarniarmat, ajulerkonak igvit inukotitillo perkutitillo tamaita.

12 Ahâk, iipse takovânga, nukamalo Benjaminib ijîkita takovânga, kanipkut okarvigigapse.

13 Nakorijaunera ilûnât Egipteneme okautigisiuk atâtamnut takojaselo tamaita; tuavidluselo atâtaga tamaungartisiuk.

14 Nukanelo Benjamin kongasingagut erkipâ keavlunelo, Benjaminelo keagivok kongasingane.

15 Katangutinelo tamaita kunikpait keavigivlugillo, kingornganelo katangutingita okarkatigivât.

16 **Farauble** iglungane tussaumajauvok, okartokarmat: Josefîb katangutingit tikkisimavut. Tamanna Faraub kivgangitalo kувiasûtigivât.

17 Faraublo Josefe okautivâ: Katangutitit okautikit: Imailioritse; siuterkortojokotise ussiltorsigik aularluselo Kânaanib nunanganut.

18 Atâtaselo inukotiselo illagivlugit kailauritse uvamnut, nunab Egiptenib pitangita ânanauninginik tunitjivigijomavapse, nunablo pitangita ajungininginik neriksakarniarpose.

19 Igvit perkojauvotit; imailioritse [gôk]: Kamutit aksaloalît neksarniarsigik nunamit Egiptenemit kitorngapsingnut nuliapsingnullo, atâtaselo aivlugo tikkilermittise.

20 Perkutiselo ivleriniarasigik, nunab Egiptenib ilûnane pitangita ânanauningit nangmineriaksarigapsigik.

21 Taimailiorpullo Israêlib erningit. Josefîblo kamutinik aksaloalingnik tunitjivigivait Faraub perkojanga maliklugo, takoaksanginiglo.

22 Ilûnaita attunit tunitjivigivait annorâtsiamik atautsemik, Benjaminele tunitjivigivâ kênaujanik 300nik annorâtsianiglo tellimanik.

23 Amma atâtaminut tujûtigivait siuterkortojut tellimaujortut, Egiptenib pitangita ânanauningita illanginik nangmar-

tut, siuterkortojuлло arnaujut tellimaujortut, kakôjaksanik kakôjaniglo, atâtame takoaksanginik, nangmartut.

24 Katangutine tagva aularkovait. Aularmatta okautivait; ningautiniasetôk ingergatiluse.

25 **Egiptenemillo** paungaramik, atâtatik Jako, nuname Kânaanemêtok, tikkipât.

26 Unipkârvigivlugolo okautivât; Josefe inôvok sulle, attaniovorlo nuname Egipteneme ilûnâne. Kissiane ôma-tinga ônartailivok, okperingimagit.

27 Tagva Josefib okausingit tamaita okautigivait tâpsomunga okauserijangit taipkonunga. Kamutillo aksaloalît takolermagit, Josefib tujûtigijangit, kemuksiutigijaksane, tagva atâtangata Jakob anerninga ômalerivok.

28 Okarporlo Israêle: Nâmaksivok! Ernera, Josefe sulle inôvok; takojartoromavara tokolerkârnanga.

KAP. XLVI.

Jakokut nûput Egiptenemut.

1 **ISRAELE** tagva aularpok perkutine tamaita neksarlugit. Bersêbamullo tikkiname, ômajomik tunerguserpok atâtame Isaab Gûdinganut.

2 Gûdiblo Israêle okarvigivâ takotitjutikut unnuarme, okarlune: Jako, Jako! Kiovorlo: Tamânêpunga.

3 Okautivâlo: Uvanga Gûdeovunga, atâtavit Gûdinga; sivôranak, attersartuksaugavit Egiptenemut, tagvane inugasaksoangortitsomagapkit.

4 Uvanga attersarkatigijomavagit Egiptenemut, uvangalo amma uttertitsomârivagit tamaunga, Josefiblo aggane ijîngnut illijomârpait.

5 Tagva Jako aularpok Bersêbamit; Israêliblo erningita atâtatik Jako, kitorngatiglo, nuliaticiglo, kemuksiutivait kamutitut aksaloalingnut Faraub tujûtigijanginut kemuksiutigijaksanginut.

6 Tiguvaillo nergjutekotitik perkutitiglo pisiarijatic nuname Kânaaneme, Egiptenemullo pivut, Jakolo kinguvângillo ilûnatik:

7 Ernine, ernimelo erningit, paninelo, ernimelo paningit, kinguvânelo tamaita Egiptenemut illagivait.

8 **Tamadja** Israêlib kinguvângita Egiptenemut tikkitut attingit: Jakolo erningillo: Jakob erninga angajuklek Rubene.

9 Rubenib erningit: Hanok, Pallu, Hetseron, Karmi.

10 Simeonib erningit: Jemuel, Jamin, Ohad, Jakin, Sugar, Saulelo, arnab Kânaanemiub erninga.

11 Levib erningit: Gerson, Kagat, Merari.

12 Judab erningit: Ger, Onan, Sela, Peres, Sera. Gerelo Onanelo tokovuk nuname Kânaaneme. Peresib ernîgik: Hetseron Hamulelo.

13 Isassarib erningit: Tola, Puva, Jobe, Simeron.

14 Sebulonib erningit: Sered, Elon, Jaleel.

15 Tâpkoangovut Leab kitorngangit, erniarijangit Jakomut Mesopotâmiam, paningalo Dina. Inuit ilûnatik, ernît panîllo katilugit, 33ovut.

16 Gadib erningit: Sifon, Haggi, Suni, Esbon, Eri, Arodi, Areli.

17 Asserib erningit: Jimna, Jesua, Jesui, Beria, najangalo Sera. Beriable ernîgik: Heber Malkielelo.

18 Tâpkoangovut Silpab kitorngangit, Labanib tunijangata paniminut Leamut. Tâpkoa Jakomut erniarivait: inuit 16.

19 Rahelib Jakob nuliangata ernîgik: Josefe Benjaminelo.

20 Josefelo Egipteneme ernertârpok Manassemik Efraimiglo, Asnatib, ajokertuijub Onemêtub Potiferab paningata, erniarijâgingnik tâpsomunga.

21 Benjaminib erningit: Bela, Beker, Asbel, Gera, Naman, Eigi, Ros, Mupim, Hupim, Arde.

22 Tâpkoangovut Rahelib kitorngangit, erniarijangit Jakomut, katilugit inuit 14.

23 Danib erninga: Husim.

24 Naftalib erningit: Jatseel, Guni, Jetser, Sillim.

25 Tâpkoangovut Bilhab kitorngangit, Labanib tunijangata paniminut Rahelemut. Tâpkoa erniarivait Jakomut, katilugit inuit 7.

26 Inuit tamaita Jakob Egipteneliarkatingit, uviningata kinguvângit (erningita nuliangit kissêta pinagit)—tâpkoa tamaita katilugit 66ovut.

27 Josefiblo ernîgik, Egipteneme erniarijaujuk tâpsomunga, maggôvuk. Jakokut, Egiptenemut tikkitut, tamaita katilugit 70ovut.

28 **Jakoblo** Juda sivunermigut tilivâ Josefemut, apkomik Gosenemut unertutjerkovlugo sivunermigut. Nunamullo Gosenemut tikkiput.

29 Tagva Josefe anujerkojivok, kemukserlunelo paungarpok Gosenemut, atâtane Israêle pâriartorlugo. Takûtiler-manik, kongasingagut erkipâ keakitârlune kongasingane.

30 Israêlo Josefemut okarpok: Mâna tokoleromavunga, kênat takogapko, sulle inôjotit.

31 Josefiblo katangutine atâtamelo inukotingit okautivait: Majorarniarpunga Faraokaujitisomavlugo, okautijomavaralo: Katangutikka atâtamalo inukotingit nunamit Kânaanemit uvamnut tikkiput;

32 Angutillo taipkoa mianersijôvut, nergjuserigamik; saugakotitiglo tuktuvakotitiglo perkutitiglo tamaita neksarpait.

33 Farauble kairkokpase apertsorluse: Sumik inôgutiksarsijutekarkisê?

34 Tagva okartuksauvose: Kivgatit nergjutinik mianersi-jeovogut sorusioniptingnit mâna tikkidlugo, uvagullo sivorlivullo, nunakarkovluse Goseneme; saukanik mianersijut ilûnatik Egiptenemiunut makojugijaungmatta.

KAP. XLVII.

Jakokut nunakarpus Goseneme.

1 **JOSEFIBLO** Faraokaujitisartorpâ okarlune: Atâtagalo katangutikkalo saugakutingillo tuktuvakotingillo perkutingillo ilûnatik tikkiutivut nunamit Kânaanemit; ahâglo, Gosenemêput.

2 Katangutiminillo tamainit tellimat tiguvait pitilugit Faraub sânganut.

3 Faraublo katangutingit aperivait: Sumik inôgutiksarsijutekarkisê? Kiovât: Kivgatit saukanik mianersijôvut uvagullo sivorlivullo.

4 Okarivullo Faraomut: Tikkisimavogut tujormiangoniar-
dluta nuname, kivgakotivit saugakotingit nerrinasugviksa-
karungnairmatta, kângnartoksoak sugaluluarmat nuname
Kânaaneme. Taimaimat kivgatit mâna Goseneme nunakar-
kolaukittôk!

5 Faraublo Josefe okautivâ, okarlune: Atâtallo katangu-
titillo tikkiutingmatta illingnut,

6 Egiptene ilûnane attuinauvok illingnut; nunab illangane
ânanaunerpâme nunakartikit atâtallo katangutitillo, illa,
Goseneme nunakarlit. Kaujikuville, akorngane piloriktunik
angutekarmat, nergjutekotimnik kamajingortikit!

7 Josefiblo atâtane Jako itertipâ, Faraub sânganut pitilugo.
Jakublo Faraosaimauserpâ.

8 Faraublo Jako aperivâ: Jârit inôvigijatit kapsiovât?

9 Jakub Faraokiovâ: Jârit tujormiangovigijakka tagva

130: ikiput ajularmiglo jârit inôvigijakka, inorlugit jârit sivorlima inôvigijangit tujormiangovigijangit.

10 Jakublo Faraosaimauserpâ, tâpsomangallo anivok.

11 Josefiblo atâtane katangutinelonunakartipaitnuna-kutekartilugit Egipteneme, nunab illangane ânanaunerpâme, Ramesesibnunaangane, Faraubperkojanga maliklugo.

12 Josefiblo atâtane katangutinelonatâtameloinukotingit tamaita nerkiksanik pitatserpait sorusekarningit maliklugit.

13 **Nerkiksakarungnairporlo** nuname ilûnâne; kângnartoksoak sugaluluarmat, Egiptenemelo Kânaanemelo perlerput kângmut.

14 Josefiblo kênaujat tamaita Egiptenemêtut Kânaanemêtullo, kakkôjaksat pisiat akkingit, katitipait, Josefiblo kênaujat Faraub iglunganut pitipait.

15 Kênaujallo nungungmatta Egipteneme Kânaanemelo Egiptenemiut ilûnatik Josefe tikkipât okarlutik: Nerkiksaptingnik tunitjivigitigut! Sôk takkungne perlertuksauvitâ, kênaujat nungunermatta?

16 Josefib okautivait: Nergjutekotise kaisigik, tagva nerkiksanik, nergjutekotipse akkiksanginik, tunitjivigijomavapse, kênaujat nungunermatta.

17 Tagva nergjutekotitik tikkiutivait Josefemut; horsillo saukallo, tuktuvaillo siuterkortojullo, akkilerlugit Josefib nerkiksanik tunitjivigivait. Taimaglo nerkiksanik pitatserpait jâreme tamattomane, nergjutekotingit tamaita akkilerlugit.

18 Jâre tamanna nângmat, jârib aipangane amma tikkini-vut tâpsomunga, okautivlugo: Attanivut angigutijomangilavut, kênaujat nungungmatta, nergjutekotillo pisiangongmatta attaniptingnut, amiakokangilak attaniptingnut, timiptingnik perorsêviptingniglo kissênik.

19 Sôk takkungne perlertuksauvitâ perorsêvivullo asserortuksauvlutik? Pisinialaurit uvaptingnik perorsêviptingniglo, nerkiksanik akkilerluta, tagva kivgauniarpogut Faraomut uvagullo perorsêvivullo. Karngasûtiniktauk tunitjivigilaungmitigut, inôrkovluta tokolerkonatalo perorsêvivullo asserulerkonagit!

20 Tagva Josefib Egiptenemiut perorsêvingit tamaita pisiarivait Faraomut, Egiptenemiut ilûnatik perorsêvitik niorvgutigingmagit, kângnartoksoak sugaluluarmat tâpkonunga. Taimaglo Faraub nuna perkutigilerpâ.

21 Inuillo nûtipait iglugasaksoarnut Egiptenemiut nuna-ngita issuklianit issukliata aipânut.

22 Ajokertuijulle perorsêvingit kissêta pisiaringilait, ajokertuijunut piksakarmat Faraomit, nerkiksakarpuulo taipkoonunga ilingajomik, Faraub tunivaktanginik. Tamanna pivlugo perorsêvitik niorgutigilungilait.

23 Josefiblo inuit okautivait: Okoksê, uvlome illipsingnik perorsêvipsingniglo pisivunga Faraomut. Tagga, karngasûtiksatsat piksase, perorsêvît karngasoivigisigik.

24 Imailingajuksauvorlo katersortaujomârtut pivlugit: (tellimaulivlugit) Tellimangit atausît tunijaksarivase Faraomut, tellimangille sittamat illipse piksarivase: karngasûtiksatsat perorsêvingnut, nerkiksase inukotipselo kitorngapselo nerkik-sangit.

25 Okarput: Inûlivaptigut illa! Saimaneksituinarta attanipta sângane, tagva kivgauniarpogut Faraomut.

26 Josefiblo Egiptenemiut ilusiksakartipait perorsêvît pivlugit uvlok tamanna tikkidlugo, tellimangit tunivlugit Faraomut. Ajokertuijut perorsêvingit kissêta pinagit, tâpkoa Faraub perkutigingilait.

27 Israêlikullo nunakalerput Egipteneme nuname Goseneme. Tamanna nunakutigivlugo kinguvâktârkattarput unuksivalliavlutik.

28 **Jakolo** Egipteneme inôvok jârinik 17nik; jârillo inôvigijangit tagva 147.

29 Israêlible tokoviksanga kaglilermat, ernine Josefe kairkovâ okautivlugolo: Saimaneksiguma illingne, tagva aggatit sibviamnut illilaukit, (nellonaijaivlutit) nelâgut nagligigamga; iluvernarnangatôk Egipteneme!

30 Sivorlikka iluverkakatigijomavakka, Egiptenemillo âtaksarivarma, taipkoa iluvinganut illivlunga. Okautivâ: Taimailioromavunga sorlo okaravit.

31 Okarivorlo: Angimarigviginga! Angimarigvigivâlo. Israêlelo inangavingmine egarpok akkitiminut.

KAP. XLVIII.

Jako Efraimik Manassemiglo saimartitsivok.

1 **PIJOKARTUT** tamakkoa kingorngatigut Josefe okautjauvok: Ahâk, atâtat kanimavok. Tagva ernîngne illaurkovak Manasselo Efraimelo.

2 Jakolo kaujititsartorpât okarlutik: Ahâk, ernît Josefe kailerpok illingnut. Israêlelo sôngosarlune iksivalerpok nellavingmine.

3 Jakole Josefemut okarpok: Gûdib ajugakangitub sak-kervigilaujuvânga Luseme, nuname Kânaaneme, saimauserlungalo,

4 Okarvigivlunga: Ahâk, kinguvâktârtitsomavagit unuk-sivalliatitsomavlutillo inugasaksoangortilit, nunalo manna sorairtuksaungitotmik perkutautitsomavara kinguvângnut kingunikkut.

5 Taimaimat ernîkik tâpkoa, Egipteneme ernertârijâkik, ilingnut tikkerkârtinanga Egiptenemut, nangmineri-jomavâkka; Efraimelo Manasselo Rubenetut Simeonetullo nangmineri-jomavâkka.

6 Kingorngatigulle ernertârmiguvit, tâpkoa igvit nangmineri-jomârpatit, taigusekaromârpullo angajûngmik attîging-nik tâpkoa kingormgutijomârtâgingne.

7 Mesopotâniâmit tikkinama, Rahele tokovok takkumne, nuname Kânaaneme ingerartiluta, Efratib kanimarilungitan-gane; tagvanelo apkome Efratemut sangmijome iluverpara (Efrat tagva Betlehem).

8 Israêliblo Josefib ernîgik takoleramigik, okarpok: Kik-kuk ukkoâ?

9 Josefib atâtane kiovâ: Ernîkka ukkoa, Gûdib tunijâgik uvamnut tamâne. Okarivok: Kailik uvamnut, saimausero-magapkik.

10 Israêlible ijîgik inutokaunermut takpêlermanik, takojungnangilak nâmakto-mik. Tessiormagik tâpsomunga, kuniklugiglo erkipak.

11 Israêlo Josefemut okarpok: Kênat takolugo nerriugungnailauralloarpunga; sunaubvale, kinguvângnik aglât Gûdib takotipânga.

12 Josefiblo sânganit pêrpak nunamut pâmakterlune.

13 Tagva Josefib tamarmik tiguvak: Efraime tallerpingminut Israêlib saumia sâdlugo, Manasselo saumingminut Israêlib tallerpia sâdlugo, tessiorlugik tâpsomunga.

14 Israêliblo aggane tallerpît issakpait illilaitalo Efraimib niakoanut, nukardliogalloarmat tâmna, sauminelo illivait Manassib niakoanut, pijarellunelo aggangminut taimailiorpok, Manasse angajukliogalloarmat.

15 Josefelo saimauserpâ okarlunelo: Gûdib piksoma—atâtâkka Abrahalo Isaarlo arvertalaukpuk sakkâne—Gûdib uvamnik pairksijub inûlervimnit uvlomemut aglât,

16 Engelib ajortunit tamainit piuliklertub uvamnik, tâpsoma nukapiâk ukkoa saimauserligik, taijaulerkovlugik attim-

nik atâtângmalo attîgingnik Abrahablo Isaablo, aglisivalliar-kovlugik unuksivalliarkovlugiglo nuname !

17 Josefible atâtane takogamiuk tallerpingminik illijijok Efraimib niakoanut, idluaringilâ, atâtamelo aggangit tiguvait Efraimib niakoanit Manassib niakoanut pititsomavlugit.

18 Josefiblo atâtane okautivâ: Atâtâk, taimainak ! una angajukliovok, ôma niakoanut aggaktit tallerpît illilaukit.

19 Atâtangale taimailioromangilak, okarlunelo: Nelungilanga ernîk, nelungilanga ! Unatauk inôkatigêksoangortitaujomârpok angijôvlunelo, nukangale anginersaujomârpok ômangat inôkatigêt unuktu it kinguvâksarivlugit.

20 Taimak uvlorme taipsomane saimauserpak, okarlunelo: Israêlikune saimausêjokarangat kimik, okartuksauvok: Gûdib iliorvigilitit Efraimetut Manassetullo ! Taimak Efraim sivorliutivâ Manassemit.

21 Israêlelo Josefemut okarpok: Takovarman tokolertunga, Gûdible illagijomârpâse uttertiluselo atâtapse nunanganut.

22 Nunab illanga perkutautipara illingnut, piksariluartat katangutingnit, saviksoamnut pittiksimnullo aksârnigarijara Amoriterit agganginit.

KAP. XLIX.

Jakub ernine nelautaivigivait, tokovorlo.

1 **JAKUBLE** ernine kairkovait okarlune: Katimatitse, nelojungnairtitsomagapse tikkitautigijomârtapsingnik nellitome pijomârtome.

2 Katimatitse tussarluselo, Jakub erningit; atâtase Israêle tussarsiuk !

3 **Rubene**, igvit tagva ernera angajuklek, nukkiga, anguteonimalo sakkerkârtanga; anginerôjok, pitsartunerôjok.

4 Imertut tertipotit; pinerôjungnairtuksauvotit tagva, atâtavit inangavianut inaravit, tagvanêdlutit ivsornartinangne. Inangaviga inarvigivâ !

5 **Simeonelo** Levilo katangutigêkpuk; saviksoâktik sakkogivakit pikablanermut.

6 Kaggimiolerangamik, tarniga tagvanêrkolungitara; kati-malerangamik, ivlernartokutiga (tarne) illaurkolungitara; ningarlutik inuarmanik, kuksalailutik tuktuvait illakungortimattikik.

7 Kapianarmêk ningarningak ilungertortok, ningauma-

jârningak kassêtok! Aviuterkovakka Jakokune, siamartilugit Israêlikune.

8 **Igvit**, Juda, igvit nakorijaksarivâtit katangutivit. Aggatit akkerartortivit tununginêtuksauvut, pâmaktervigijaksarivâtit atâtavit kitorngangita.

9 Loeviarauvok Juda. Sâlakarkârlutit aglivalliavotit, ernîk. Pâmakpok, akopivok loevitut, loevitut piarakartotut; kia ullapilugo sappingilaûk?

10 Attaniub ajaupianga Judamit pêraksaungilak, opigijautiksarlônêt ittigangita akornganit, Silo (ullapirksaijok) tikkilerkârtinago; tâmnalo inôkatigêksuit nâlegaksarivât.

11 Siuterkortojokotine vaineikutimut pittukpâ, siuterkortojokotimelo piaranga vaineikutib akkerunganut; an-norâne ergortorpâ vainemut, ulliksoarnelo vaineikutib paungangita iptinganut.

12 Ijîgik aupaluksivuk vainemut, kigutingit kakorsivut imumut.

13 **Sebulone** nunakartuksauvok imarbiksûb sikjangane, umiaksuit kissarviane; kiglinga attavok Sidonemut.

14 **Isassarib** siuterkortojok nukkekatsiartok adsigivâ, akopijok avalut illuane.

15 Inilangaviksak ajungitok maluginamiuk, nunalo ânanauginamiuk, kollêngne manivak nangmarnermut kivgangor-dlune akkekangitok.

16 **Danib** inukotine erkartoraksarivait, Israêlib kinguvângititut assinititut.

17 Dane kuglugiangovok apkosinerme, kuglugiarâluk pissugvingme: horse kêngmago kingmingagut, inua niverpok kataklune.

18 Nâlegak, piuliklernît nerriugivara!

19 **Gade** inôkatigêksuit sorsugvigijomâralloarpât, tâpsomale sorsugvigingmivlugit kemâtitsomârpait.

20 **Asserib** nerkiksalianga orksuliovok, attanerit mamari-vaktanginik tunitijiomârpok.

21 **Naftalib** tuku ômariktok adsigivâ; tussarominartunik okausekarpok.

22 **Josefe** napârtoarsutun-ipok paungaliktut, napârtoarsutut paungaliktut puilaviub sennianêtotut; akkerungita karmak nâvât:

23 Pittiksilît ullapigalloarmatsuk pittiklugolo unangmivlugolo,

24 Tâpsoma pittiksinga sokosingilak, aggangitalo nukki-

ngit ajulungilat, ajugaujub Jakokune ikajormago, Israêlib pairijingata, kairtorijangata.

25 Atâtavit Gûdinganit tamanna pivok: Tâpsoma ikajorlitit, ajugakangitublo saimauserlitit pikuminartunik pângat kilangmit pijunik, pikuminartuniglo kanangat ittinermit pijunik, pikuminartunik amâmamit igliamillo pijunik!

26 Saimanartut atâtavit tunijangit pitsartunersauvut saimanartunit kakkat nutaungitut tunijanginit, kakkârulait aulajuitut allianarninginit. Josefib niakoanut pilit, kata-ngutingita akorngane attaniotijub kabjinganut!

27 **Benjaminib** amarok kêsuktoksoak adsigivâ; uvlâkut pijane nerrivait, unnukut aksâr nigarijane aitûtigivait.

28 **Tamadja** Israêlib kinguvârêngit 12 ilûnatik: tamadjalo atâtangata okauserijangit tâpkonunga, saimausermagit; ilûnaita attunit saimauserlugit saimauserpait.

29 Perkovlugillo okautivait: Illaliudjaujomâruma sivorlerijamnut, iluveriartorsinga sivorlima akornganut, kairosungmut Efronib Hetiterib perorsêvinganêtomut,

30 Perorsêviub Makpêlab kairosunganut, Mamrib akkianêtomut, nuname Kânaaneme. Taimna Abrahâb pisiarivâ perorsêvik illaliudlugo Efronemit Hetiteremit, iluverviksakarkovlugo.

31 Tagvunga Abrahâ illivât nuliangalo Sara. Tagvunga Isaak illivât nuliangalo Rebekka. Tagvunga Lea illivara.

32 Perorsêvik taimna kairosungalo pisiangomavuk Hetib kitornganginit.

33 Jakublo perkojane kitorngaminut sorairamigit, ittigane nellavingminut pitipait anernangerdlunelo, illaliutjauvorlo sivorlerijaminut.

KAP. L.

Jako iluvertauvok. Josefe tokovok.

1 **TAGVA** Josefib, atâtame kênanganut pûlune, keajutigivâ kuniklâlo.

2 Josefiblo kivgane âniasiortit perkovait, atâtane mingoartaurkovlugo. Tagva âniasiortit Israêle mingoarpât.

3 Uvlut 40 tâpsomunga nâvlugit, uvlut taimak unuktigijut nâjariakarmatta mingoartaugiamut. Egiptenemiullo uvlunik 70nik keavât.

4 Uvlullo taipkoa keaviojut sorairmatta, Josefib Faraub

inukotingit okarvigivait, okarlune: Saimaneksiguma illip-singne, tagva Faraο okarvigisiuk okautivlugo:

5 Atâtama angertipânga, okarlune: Takovarma tokoler-tunga; iluviksamnut nuname Kânaaneme pijarêrtamnut illi-jaksarivarma. Taimaimat takpaungarlangatôk atâtaga illi-jartorlugo; utteromârpunga.

6 Faraub okautivâ: Takpaungartuinarit atâtat illijartor-lugo, sorlo angertingmatit.

7 Tagva Josefe takpaungarpok, atâtane illijartoromav-lugo. Faraublo kivgangit ilûnatik illagivlugo takpaungarput, angajokaujut iglungane, angajokaujullo ilûnatik nuname Egipteneme,

8 Taimaktauk Josefib inukotingit ilûnatik, katanguti-ngillo, atâtangatalo inukotingit; kitorngatik kissêta, sauga-kotitiglo, tuktuvakotitiglo, kemakpait nunamut Gosenemut.

9 Amma kemuksertut ablângajullo horsine illagivlugo takpaungarput; ingergakatigêksuit.

10 Katjugvik Atat Jordanib akkianêtok tikkinamitsuk, angijomik ilungertortomiglo ogguarput tagvane; atâtane pivlugo ogguarnekk atorpâ uvlut 7 nâvlugit.

11 Nunable inungita Kânaanemiut ogguarnekk katjug-vingme Atatime takogamitsuk, okarput: Egiptenemiut ilu-ngertorlutik tagvane ogguarput. Tamanna pivlugo nuna tamanna Jordanib akkianêtok taijauvok Egiptenemiut oggu-arvinganik.

12 Erningitalo taimailiorvigivât, sorlo perkungmagit.

13 Ikârlugolo nunamut Kânaanemut illijartorpât peror-sêviub Makpêlab kairosunganut, Abrahamb pisiarijanganut (perorsêvik illaliudlugo) iluverviksaurkovlugo Efronemit Heti-teremit, Mamrib akkianêtomut.

14 Atâtanelo illijarêramiuk, Josefe Egiptenemut utterpok, tâmnalo, katangutingillo, ilûnatiglo illagivlugo takpaungar-simajut, atâtanga iluveriartorlugo.

15 **Josefible** katangutingit, atâtamik tokunga issumajâr-utigivlugo, okarput: Kapiarmêk, Josefib mâna omiginajar-pattigut akkiniarlutalo idluitunik tamainik piniartaptignik tâpsomunga !

16 Taimaimat Josefe okautjaurkovât: Tokolerkârane atât-tat perkojivok okarlune:

17 Imâk okariakarniarpose Josefemut: Katangutivit pi-ungituliningit idluituliningillo issumagijungnailaungmikit, idlui-tulivigingmatit illa. Taimaimat mâna issumagijungnailau-

kittôk atâtavit Gûdingata kivgangita idluituliningit ! Josefele keavok, taimak okarvigingmatsuk.

18 Katangutingitalo pâmaktervigijartorpât, okarlutik: Tagga, illingnut kivgaulerpogut.

19 Josefible okautivait: Sivôraniarase ! uvanga Gûdeogalloarkingâ ?

20 Illipse issumakalauralloarpose, idluitulivigijomavlunga, Gûdele ajungitomik issumakarpok taimailioromavlune, sorlo mâna sakkijâdlarmat, inôkatigêksuit inûlivlugit.

21 Taimaimat sivôraniarase mâna ! Uvanga patangaititsomavapse kitorngaselo. Manigorpaillo kiblingnartunik okausekarvigivlugit.

22 **Taimak** Josefe Egipteneme nunakarpok, tâmnalo atâtangatalo inukotingit; inôvorlo Josefe jârinik 110nik.

23 Efraimiblo kinguvârêngningita pingajungit Josefib takovait; taimaktauk Maggerib, Manassib erningata, erningit inôlerput Josefib sângane.

24 Josefiblo katangutine okautivait: Tokolerpunga; Gûdiblo nelipsaromârpâse, nunamit mattomangat paungartiluse nunamut angerutigijaminut Abrahamut Isaamullo Jakomullo.

25 Josefiblo Israêlikut angertipait, okarlune: Gûdib nelipsaromârpâse, tagva saunikka tamângat takpaungartitsomârpâse.

26 Tagva Josefe tokovok 110nik jârekarlune. Mingoarpâlo iklervingmut illivlugo Egipteneme.

MOSESIB AGLANGITA AIPAINGIT UBVALO

EXODUS,

TAMADJA AULARNEK.

KAP. I.

Israêlikut Egipteneme kivegaulerput.

1 **TAMADJA** Israêlib erningita Jakub Egipteneliakatingita attingit, attunit inukotitik illagivait:

2 Rubene, Simeone, Levi, Juda,

3 Isassare, Sebulone, Benjamin,

4 Dane, Naftali, Gade, Assere.

5 Inuillo ilûnatik Jakob kinguvângit uvinikut tagva inuit 70; Josefele Egiptenemêtsarêrpok.

6 Josefelo katangutingillo ilûnatik inôkatigijangillo taipso-manê ilûnatik tokungmatta,

7 Israêlikut, kinguvâktâkattarlutik pivallialerput unuk-sivallialutiglo angijororpalliadlarlutiglo; nunalo nâ mavât tâpkoa.

8 **Tagva** nutâmik attanekalerpok Egipteneme; tâpsoma Josefe kaujimangimarikpâ.

9 Okarporlo inukotiminut: Takovose, inuit ukkoa Israêlikut ununersaulermatta sôngonersauvlutiglo uvaptingnit:

10 Attê, pingitserternermut pivalliatailitilavut; unatar-tokartilugo illaudlaroarmatta unatarvigijiptingnut sorsugvigi-lutalo nunalo kemaklugo.

11 Tagva kivegartorlukatitsijunik angajokâkartipait, siorn-iortitaurkovlugit pijaksanut okumainartoksoarnut, Faraolo igluliorpât iglugasangnik kematuliviksaujunik: Pitomemiglo Ramsesemiglo.

12 Kissiane siorn-iortitauvallianingat maliklugo pivallia-tuinarput unuksivalliavlutiglo. Taimaimat Israêlikut sivô-ragilerpait.

13 Tagva Egiptenemiut sugaluluartomik kivegartortipait Israêlikut,

14 Siorn-iornadlartomiglo inôsekartipait okumainartomik kivegartortilugit: machaleritilugit ivitâliortilugillo sunatuinar-

niglo pijaksakartilugit perorsêvingne, sunatuinarnik sugalu-
luartomik kivgartorutekarêralloarmatta.

15 **Egiptenemiullo** attaningat okarpok ernisuksêjunut
Ebrêereojunut—tâpkoa illangat Sifaramik attelik, aipangalo
Puamik attelik—

16 Okarlune: Arnane Ebrêereojune ernisuksêlerangapse
ernivianelo takogupsiuk angutiarsuk, tagva tokotaksarivase,
arnaukpalle inûlisiuk.

17 Ernisuksêjulle Gûde sivôragivât, pinialungilallo sorlo
Egiptenemiut attaningata okautingmagit, angutiarsuille inû-
livait.

18 Tagva Egiptenemiutattaningata ernisuksêjut kairkovait
okautivlugit: Sôk taimailiorkisê, angutiarsuit inûligapsigik ?

19 Ernisuksêjut Faraο kiovât: Arnat Ebrêereojut arna-
titut Egiptenemiutitut ingimatta, nukkekatsiarmattale. Er-
nisuksêjok tikkilerkârtinago ernilerêrput taipkoa.

20 Tamanna pivlugo Gûdib ernisuksêjut ajungitulivigi-
vait. Inôkatigêllo unuksivalliavlutik unuktovaksôlerput.

21 Ernisuksêjullo Gûde sivôragingmatsuk, kinguvâkarti-
pait unuktunik.

22 Tagva Faraub inukotine tamaita perkovait okarlune:
Angutearsuit inôlertut ilûnaita kôksoarmut eginiarpase, ar-
nârsuille ilûnaita inôtilugit.

KAP. II.

Mosesemik.

1 **TAIPSOMANE** angutib Levikut illangata nuliarileriar-
torpâ Levib paningita illangat.

2 Arnarlo tâmna singailerpok ernermiglo ernivok. Soru-
sitsiangojorlo takogamiuk, ijeriartorpâ takkit pingasut nâv-
lugit.

3 Sivitunersamigle ijerlugo sapperamiuk, iklerviarsuk
ibviogak tiguvâ tâpsomunga; mingoarlugolo kutsomullo
târmullo, nutarârsuglo tagvunga illivlugo pitipâ iviksuit
akornganut kôb sinnânut.

4 Najangale kanigalâgungnairlune kikkarpok, nautser-
torlune kanok ilinganiarmangât.

5 Tagva Faraub paninga attersarpok ubvaromavlune
kôngme, uigasukotingillo pisulerput kôb sinnâgut. Ikler-
viarsugle iviksuit akornganêtok takogamiuk, kivgarne arnak
tillivâ aijaurkovlugo.

6 Mattueramiuk, nutarârsuk takovâ, sunaubvalo, angutearsuk keajok. Nagligilerpâ tagva okarlunelo: Tagga, nutarârsuit Ebrêereojut illangat.

7 Najangale okarpok Faraub paninganut: Arnat Ebrêereojut amâmaktitsijut illangat kairkojartoraksarivigô, nutarârsungmik illingnut amâmaktitserkovlugo?

8 Faraub paningata okautivâ: Attê! Uigasublo nutarârsub anânanga kairkojartorpâ.

9 Faraublo paninga okarpok tâpsomunga: Nutarârsuk una neksaruk, uvamnut amâmaktiniarlugo, akkilerniarapkit. Arnab nutarârsuk neksarpâ amâmaktilâlo.

10 Souserle aglisimangmat, âpâ Faraub paninganut, tâpsomalo ernerilerpâ atserarpâlo Mosesemik, okarame: Kôngmit kakitara.

11 **Pijokarporlo** taipsomane: Moseses inumariolerame, anivok katangutiminut, siorniornartunik suliakarningit takoniarlugit; takolerpâlo angut Egiptenemiok anaulerniktok angumik Ebrêereojomik, katangutime illanganik.

12 Ilûnânelo takojaksarsioralloarlune inuksinginame, Egiptenemiok taimna tokopâ sauvâlo siorkanut.

13 Uvlub aipangane amma anigame, angutik Ebrêereojuk pâjuk takovak, okarporlo pikaluktomut: Sôk inôkatit anaulerpiûk?

14 Tâmnale okarpok: Kia angajokângortipâtît idluarsaijungortilutillo uvaptingnut? Uvangatauk tokotsomavingâ, sorlo Egiptenemiok tokogangne? Tagva Moseses erksilerpok, okarlune: Sunaubva, tussaumajaulerkunga.

15 Faraublo tamanna tussaramiuk, Moseses tokonasuarpâ. Mosesesle kemâlerpok Faraomit, nuna Midia unnersiorvigivlugo, imektarviublo senniane kikkarpok.

16 Ajokertuijorle Midiamêtok panikarpok sevenenik; tâpkoa kallujartorput imerkautillo imertorpait, atâtamik saugakutingit imertitsomavlugit.

17 Tagva mianersijut tikkilerput, tagvangat ajaklugit. Mosesesle nikovipok, ikajorlugillo saugakutingit imertipait.

18 Atâtamingnut Reguelemut tikkingmatta, okarpok: Sugapse uvlome tikkisaraidlarkisê?

19 Kiovât: Angutib Egiptenemiub piulivâtigut mianersijut agganginit, kallûtivlutalo aglât, saukallo imertilugit.

20 Tagva okarpok paniminut: Nanêkâ taimna? Sôk angut taimna kemakpisiûk? Kairkolersiuik nerrikattaujuk-saungmat.

21 Mosesiblo angut tâмна angervigivâ tagvanêtsomavlune. Tâpsomalo Mosese tunitjivigivâ paniminik Ziporamik.

22 Tâмна ernermik ernivok, Mosesiblo Gersomemik atse-rarpâ, okarame: Tujormiangolerpunga nuname takorngar-tamne.

23 **Uvlut** unuktut taipkoa anigortilugit, Egiptenemiut attaningat tokolerpok. Israêlikullo anersaumidlarput kiv-gartorkojaunitik pivlugit, nipliadlarpullo; nipliadlarningillo kivgartorkojauningit pivlugit Gûdib sânganut pivut.

24 Gûdiblo ârosungningit tussâvait, angersimaninelo Abra-hamut Isaamullo Jakomullo erkarpâ.

25 Gûdiblo Israêlikut takonârpait issumagivlugillo.

KAP. III.

Mosesib kivgartorkojauninga.

1 **MOSESIBLE** sakkime Jetrub, ajokertuijub Midiamê tub, saugakutingit mianerivait, saukallo ungorlugit inukangitub kangianut, Gûdib kakkanga Hôrebe tikkipâ.

2 Nâlekablo engelingata sakkervigivâ ikomab ikoalaninga-gut ukpigait kakkilautelît akornganit. Takonâramelo takolerpait ukpigait kakkilautelît ikoalagalloartut ikomanut, nungutaungitulle.

3 Moseselo okarpok: Tagvungarlanga, takotitjutsoak tamanna takolugo, suna pivlugo ukpigait kakkilautelît ikomanut nungutaungimangâta.

4 Nâlekable takogamiuk takojartortok, Gûdib tagva nipliavigivâ ukpigait kakkilautelît akornganit, okarlunelo: Mosese! Mosese! Kiovâ: Mânêpunga.

5 Okarporlo: Kaglitailigit maunga, ittigagutîkik ittigarnit pêkik, nuna tullerartat ivlernarmat.

6 Amma okarpok: Uvangauvunga atâtavit Gûdigijanga, Abrahamb Gûdigijanga, Isaablo Gûdigijanga, Jakoblo Gûdigijanga. Tagva Mosesib kênane mattuvâ; Gûde takonârlugo sivôragame.

7 **Nalegarlo** okarpok: Inukotima siorniorningit Egipteneme takovakka tussarpakkalo, angajokâtik kivgartorlukatitsijut nipliajutigingmagit, kapiasungningit nellungilakka.

8 Akkarpungalo, Egiptenemiut agganginit piulijartoromagapkit aulartitsomavlugillo nunamit tamattomangat nunamut ajungitomut nerrotojomullo, nunamut imumik igupsaujârtullo orksuanik kôlingmut, Kânaanemiut Hetiterillo

Amoriterillo Feresiterillo Heviterillo Jebusiterillo nunganut.

9 Mâna Israêlikut nipliadlarningit pivut sâmnut, kapiasungningillo takovakka, kanok Egiptenemiut kapiasuktingmagit.

10 Taimaimat ailerit mâna taikunga, Faraomut tillijomagapkit, inukotimnik Israêlikunik aulartitserkovlutit Egiptenemit.

11 **Moseselo** okarpok Gûdemut: Kinauvêk uvanga Faraomut aijuksaujunga, aulartitsijuksauvlungalo Israêlikunik Egiptenemit ?

12 Kiovâle: Uvanga illagijomavagit; imaitorlo nellunai-kutaksarivat uvanga tilligapkit: Inuit Egiptenemit aularter-kârungne, Gûde kivgartorvigijomârpase kakkame matto-mané.

13 Moseselo okarpok Gûdemut: Ahâk, Israêlikunut tikki-kuma, okarvigigupkillo: Atâtapta Gûdingata tillivânga,—taipkoalo aperikpanga: Kanorle attekarkâ?—sumik tagva okartuksauvingâ ?

14 Gûdelo okarpok Mosesemut: Tâmnauvunga tâmnatsainak ! Okarporlo: Taimak okartuksauvotit Israêlikunut: Tâmnaujungagôk, tâpsoma tillivânga illipsingnut.

15 Amma Gûde okarpok Mosesemut: Imâk okartuksauvotit Israêlekunut: Nâlekab atâtapse Gûdingata, Abrahâb Gûdingata, Isaab Gûdingata, Jakob Gûdingata tillivânga illipsingnut. Tamadja attera nâksaungitomut pijara, tamadja taigusera kinguvarêt kingordlinginut.

16 Tagva angajokaujut Israêlikune katititsartorkit okautivlugillo: Nâlekab atâtapse Gûdingata, Abrahâb Gûdingata, Isaab Gûdingata, Jakob Gûdingata sakkervigivânga okarlune: Takonârpapse, kanorlo piniarviogapse Egipteneme:

17 Okarpungalo: Egiptenib kapianartoksôninganit paungartitsomavapse Kânaanemiut Hetiterillo Amoriterillo Feresiterillo Heviterillo Jebusiterillo nunanganut, nunamut imumik igupsaujârtullo orksuanik kôlingmut.

18 Nippîllo nâlegaksarigalloarpât tagva, itertuksauvoselo, igvit angajokaujullo Israêlikune, Egiptenemiut attaninganut, okarvigilugo: Nâlekab Ebrêrit Gûdingata nelipsarpâtigut. Mânalo ingergalertatôk inukangitomut, uvlut pingasut ingergavigivlugit, tunerguseriartorluta Nâlekamut Gûdiptingnut.

19 Uvangale nellungilanga, Egiptenemiut attaningata aularkoniatsangimase, aggangnik pitsartujunik sokûtekarane aglât.

20 Kissianele aggakka isaklugit Egipteneme sugiaro-mârpara tatamnartunut sunatuinarnut piniaromârtamnut akorngane. Kingorngagullo aularkojomârpâse.

21 Inuillo saimaneksititsomavakka Egiptenemiut sângane, imaitsomârporlo: Aularluse aularomângilase piksakarase.

22 Arnat attunit sillalermingnit iglomiokatimingnillo piksarsiortuksauvut illulekutinik silbereojunik goldeojuniglo an-norâniglo; tamakkoa ernipsingnut panipsingnullo illijomârpase Egiptenemiunit tiguvlugit.

KAP. IV.

Mosese tatamnartulititauvok. Egipteneliarpok.

1 **MOSESE** kioвок okarlune: Ahâgle, okperijomângilânga, nippigalo nâlegomângilât, okaromârpulle: Nâlekab sakkervi-gitsangilât.

2 Nâlekable okautivâ: Suna tigumiarkiûk? Okarpok: Ajaupiak.

3 Okarporlo: Nunamut egileruk! Nunamullo egingmago, tagva kuglugiangorpok; Mosesiblo kemâlerpâ.

4 Nâlekable okautivâ: Isaklugo pamiungagut tiguleruk! —isaklugo tagva tigungmago, aggangine ajaupiangorivok—

5 Okperkovlugit, Nâlekab atâtangita Gûdingata, Abrahâb Gûdingata, Isaab Gûdingata, Jakob Gûdingata sakkervigingmatit.

6 Nâlekablo amma okautivâ: Aggatit ikkiavit illuanut illikit! Tagva aggane ikkiame illuanut illivait, amuarma-gillo sunaubva, kallaktut aputitut kakortigijut.

7 Okarporlo: Amma aggatit illikit ikkiavit illuanut! Illigivaillo amma ikkiame illuanut, amumagillo sunaubva, uviningatut ilingalerêrivut.

8 Tagva okperijomângikunitit, nippîllo nâlengnago tatamnartokut sivorlikut, nippît okperijomârpallaivât tatamnartokut kingorlikut.

9 Tatamnartugle tâpkoa magguk okperinajangipattikik nippîllo nâlengnago, imermik kallujartorit kôngmit nunamut pannertomut kovilugo, tagvainak kôngmit kallujat aungoromârpok nuname pannertome.

10 Mosesele okarpok Nâlekamut: Takûk, Nâlegak, okaloritsangilanga, sivornganelônêt mânalônêt okausekaravit kiygarnut, kaneralo okaralo okumaingmanik.

11 Nâlekable okautivâ: Kia inuit kanekartipagît? ubvalo

kia okajuitut tussilartullo tautuktullo tautungitullo taimaitipagît ? uvanga Nâlegak pingitungâ ?

12 Taimaimat aularit taikunga. Uvanga kanît najoromavara ajokertoromavagillo okautigijaksarnik kanok.

13 Okarporle: Nâlegak, tillilauruktôk kinalônêt tillijomajat.

14 Tagva Nâlegak ningaumajârpok Mosesese pivlugo, okarlunelo: Arone Leviteojok angajugingipiûk ? Kaujimavara tâmna okaloringmat. Ahâglo, pagrearpâtit, takogunitillo ômamut kuviasugomârpok.

15 Tâmna okarvigijaksarivat, okausiksat illivlugit kani-nganut. Uvangalo kanît najoromavara kaningalo, ajokertoromavaptiglo iliortuksauniptingnik kanok.

16 Tâmnalo okartigijaksarivat inungnut, illingnut kanertut-ituksauvok tâmna, igvillo tâpsomunga Gûdetut-ituksauvotit.

17 Ajaupiarlo una tigujaksarivat aggangnut, tâpsomûna tatamnartunik piniartuksaugavit.

18 **Moseselo** aularlune utterpok sakkiminut Jêtromut, okarporlo tâpsomunga: Omât, aularlangatôk ! Katangu-tikka Egiptenemêtut uttervigilakka, takojomavlugit sulle inôngmangâta. Jêtro okarpok: Ullapirksautekarlutit aularit.

19 Nâlegak okarpoktauk Mosesemut Midiamêtilugo: Attê, Egiptenemut utterit, angutit illingnik tokotsinasuartut ilûnatik tokungmatta.

20 Tagva Mosesese nuliane ernîngnelo illagivlugit siuterkortojokullo ingergatilugit utterpok Egiptenemut, Gûdiblo ajaupianga tigumiarpâ.

21 Nâlegarlo okarpok Mosesemut: Tikkingmikuvit Egiptenemut, kamatsialerit, tatamnartunik tamainik illijamnik aggangnut piniarkovlutit Faraub sângane. Uvangale ômatinga mangaititsomârpâ, inuillo aularkojomângilait.

22 Tagva okartuksauvotit Faraomut: Nâlegak okausekarpok imâk: Israêle tagva erna angajuklek.

23 Okautivagillo: Ernera aularkojaksarivat, kivgartorkovlugo uvamnik. Aularkojomangikungne, tagva ernît angajuklek tokotsomavara.

24 **Apkometilugole** siniktarvingme NâleKab tikkipâ tokonasuarlugo.

25 Tagva Ziporab savik ujaraujok tiguvâ, ernimelo uvingata amingata nuvua kippivâ, ittiganginullo egilugo okarpok: Illâ, auliksôvlutit uigivagit.

26 Tagva pijungnairpâ. Taipsomane okarpok: Aulik-sôvlutit uigivagit, kippimanek pitjutigivlugo.

27 **Nalekablo** Arone okarvigivâ: Aularit Mosese pagrear-lugo inukangitomot. Aularamelo naipipâ Gûdib kakka-ngane, kunikpâlo.

28 Mosesiblo Aronemut okautigivait tamaita Nâlekab tilijime okausingit, tatamnartullo tamaita perkojangit.

29 Moseselo Aronelo aularpuk Israêlikut angajokângit tamaita katitilugit.

30 Aroniblo okautsit tamaita Nâlekab okauserijangit Mosesemut okauserivait, tatamnartullo piniarnerivait inuit sângane.

31 Inuillo okpilerput; tussaramiglo Nâlekab Israêlikut takojartormagit, kapiasuktitauningillo takonârmagit, tagva okkungalerput opigosuklutik.

KAP. V.

Faraub kununinga. Israêlikut sugaluluartomik siorniortitauvut.

1 **KINGORNGANE** Moseselo Aronelo okariartorpuk Faraomut: Imâk okarpok Nâlegak Israêlib Gûdinga: Inukotikka aularkokit, inukangitome uvamnut uvloksiortuksaungmatta.

2 Faraub kiovak: Nâlegak taimna kinauvâ, nippinga nâlegaksarigapko Israêlikut aularkojaksarivlugit? Nâlegak taimna nellovara, Israêlikullo aularkoniatsangilakka.

3 Okarpuk: Ebrêerit Gûdingata tikkipâtigut. Inukangitomot aularkolauktiguttôk uvlut pingasut ingergavigivlugit, Nâlekamut Gûdiptingnut tunerguseromagapta, kani-masiâlungmut saviksoarmullônêt pijaurkonata.

4 Tagva Egiptenemiut attaningata okautivak: Illiptik, Mosese Aronelo, sôk inuit sulijaksanginit kikartitsomaviti-kîk? Pijaksakarvipsingnut aituinaritik.

5 Faraolo okarpok amma: Takovatik inuit unulualerêrtut nuname, illiptiglo kikarkojomavatik aglât sulijaksanginit.

6 Faraublo uvlorme taipsomane inuit angajokângit aula-tsijingillo perkovait okarlune:

7 Sivornganetut iliorungnaivluse ivît atortut ivitâlioriamut tunijaksarijungnairpase inungnut; nangminek ivingnik atoraksamingnik katersoijartulit!

8 Ivitâlle unurningit, senajaksarijangit mâna tikkidlugo, senajaksaurkoniarivase, ikiglitinagit mikijomiglônêt. Erkea-

sugamik niplialerput okarlutik: Gûdiptingnut tunerguseriartorta.

9 Angutit kivgartorvingat sugaluluartitaule, sulijaksanik ajoksarkonagit, okautsiniglo uiverijaunartunik kamarkonagit.

10 Tagva anivut inuit angajokângit aulatsijingillo, okarpullo inungnut: Faraο okarpok imâk: Ivingnik tunitjiviojungnairkovapse.

11 Illipse nangminek ivingnik katersoijartoritse nane-tuinak, senajaksarijasele ikiglititauniatsangilat.

12 Tagva inuit siamalerput Egiptenemut ilûnânut, iviviner-nik kippanik katersoilutik ivititut atoraksamingnik.

13 Angajokângitale ômaridlarkovait okarlutik: Senajaksarijase pijarêrsigik, uvloinak senajaksat uvloinak pijarêrlugit sivornganetut ivikartitaugapse.

14 Israêlikullo aulatsijingit, angajokât Faraub inukot-ingita illijangit, anaujaulerput okautjauvlutik: Sôk senajaksarijase ikpeksarlônêt uvlomelônêt pijarêngipisigîk sivornganetut ?

15 **Tagva** Israêlikut aulatsijingit iterput nipliadlarpullo Faraomut, okarlutik: Sôk kivgatit taimailiorvigivigît ?

16 Ivingnik kivgatit tunitjiviojungnairput, sullele okautjauvogut: Ivitâlioritse!—sunaubvalo, kivgatit anaujauvut; inukotitille idluitulivut.

17 Faraole okarpok: Erkeasukpose; erkeasugapse illa okarpose: Nâlekamut tunerguseriartorta.

18 Anititse mâna kivgartoriartorluse. Ivingnik tunitjivioniangilase, ivitâllo unurningit senajaksarijase senajaksarivase.

19 **Tamattomuna** Israêlikut aulatsijingit tukkisilerput erkagijaunginermingnik, okartokarmat: Ikiglititsijuksaungilase ivitât unurninginik, uvloinak pijaksase pijarêraksarivase.

20 Faraomit anigamik, Moseselo Aronelo nellaupakit utakijûk.

21 Okautivakillo: Nâlekab takonârlitik erkartuivlune, ominarsitigaptigut Faraomut kivganginullo, saviksoak tunivlugo agganginut tokotaurkovluta.

22 Mosesib tagva Nâlegak sâvigivâ, okarlune: Nâlegak, sôk inuit ukkoa pilukpigît taimak? Sôk tillivingâ tammaunga ?

23 Taimangat, Faraomut okariartorama atterne, inuit ukkoa angiluartomik pilukpait, igvillo inukotitit piulingimarikpatit.

KAP. VI.

Gûdib Mosese kivgartoriartorkovâ amma. Mosesib sivorlingit.

1 **NÂLEGARLE** okarpok Mosesemut: Mâna takojomârpo-
tit, kanok Faraomut ilioromârama, aggangnut pitsartujunut
(aksorôtjauvlune) aularkojomârmagit, aggangnut pitsartu-
junut (aksorôtjauvlune) kenugijomârmagit aglât nunaminit.

2 **Gudiblo** Mosese okarvigivâ, okarlune: Uvanga Nâlegau-
vunga.

3 Sakkertipungalo Abrahamut Isaamullo Jakomullo Gû-
deojunga ajugakangitok, atterale una: **Nalegak**—nellunailu-
ngitara taipkonunga.

4 Angervigivakka, nunamik Kânaanemik tunitjvivigijo-
mavlugit, nunamik tujormiangovigijanganik, tujormiangovlu-
tik nunagijanganik.

5 Ammatauk Israêlikut nipliadlarningit tussarpakka,
Egiptenemiut kivgartortingmagit; angersimaneralo erkau-
mavara.

6 Tamanna pivlugo Israêlikunut okarit: Uvanga Nâle-
gauvunga Egiptenemiullo siornortitsininginit aularutijomâr-
papse, nûtiluse kivgartortitsininginit, piulivluse talikut isami-
jokut, sugiartauviksoakullo.

7 Illalioromârpapselo inukotigijomavluse, Gûdeojomavu-
ngalo illipsingnut: tukkisijuksauvoselo uvangaugama Nâlegak
Gûdise aularutijise Egiptenemiut siornortitsininginit.

8 Itertitsomavapselo nunamut isagutigijamnut (angerama)
tunijomavlugo Abrahamut Isaamullo Jakomullo; illipsingnut
tamanna tunijomârpara perkutautilugo illipsingnut, uvanga
Nâlegaujunga.

9 Mosesiblo tamakkoa okautigivait Israêlikunut, tussa-
lungilâlle mungunermut, okumainartomiglo kivgartorkojau-
nermut.

10 **Tavga** Nâlekab Mosese okarvigivâ, okarlune:

11 Farao Egiptenemiut attaningat okautijartoruk, aular-
kojilerkovlugo Israêlikunik nunaminit.

12 Mosesible Nâlegak okautivâ, okarlune: Ahâk, Israêli-
kut tussangilânga, kanok tagva Faraub tussarniarpângâ
kangasinâkartunga kippisimangitûngnik?

13 Nâlegarle okarpok Mosesemut Aronemullo, pijaksa-
kartilugik Israêlikunut, Faraomut Egiptenemiut attaninganut
aularutjaurkovlugit Egiptenemit.

14 **Tamadja** atâtakakatigêne angajokaujut: Rubenib, Israêlib ernerirkârtangata erningit: Hanok, Pallu, Hitseron, Karme; tagva illagêt Rubenemit pijut.

15 Simeonib erningit: Jemuel, Jamin, Ohad, Jakin, Soggar, Saulelo, arnab Kânaanemiub erninga; tagva illagêt Simeonemit pijut.

16 Tamadja Levib erningita attingit illagêngningillo: Gerson, Kagat, Merari; jârillo Levib inôvigijangit tagva jârit 137.

17 Gersonib kinguvângit: Libnilo Simeilo kitorngarêngningillo.

18 Kagatib kinguvângit: Amra, Itsear, Hebron, Usiele. Jârillo Kagatib inôvigijangit tagva jârit 133.

19 Merarib kinguvângit: Maheli Musilo. Tamadja Levi-kut kitorngarêngningit illagêngningillo.

20 Amrablo adsane Jokiba nuliarilerpâ; tâpsomangat Aronelo Moseselo ernertârivak. Jârillo Amrab inôvigijangit tagva jârit 137.

21 Itsearib kinguvângit: Kora, Nifag, Siggeri.

22 Usielib kinguvângit: Misael, Elsafa, Siteri.

23 Aroniblo nuliarilerpâ Elisabak, Aminadab paninga, Nagusub najanga, tâpsomangallo ernertârivait Nâda, Abihu, Eleasure, Itamare.

24 Korablo kinguvângit: Assire, Elkana, Abiasafe. Tagva Korakut kitorngarêngningit.

25 Eliasarible Aronib erningata nuliarilerpâ Putielib paningita illangat; tâpsomangat Pinehase ernertârivâ. Tâpkoangovut Levikut sivorlingine angajokaujut illagêngningillo.

26 Aronelo Moseselo tâpkoangovuk okautjaujuk Nâlekamut: Aularutitikik Israêlikut Egiptenemit, katimajuit ingmikôrtilugit.

27 Tâpkoangovuk okartuk Faraomut Egiptenemiut attaninganut, Israêlikut aularkovlugit Egiptenemit, Mosese tâmna Aronelo.

28 Uvlormelo taipsomane Nâlegak okausekarpok Mosesemut Egiptenemiut nunangane,

29 Okarlune: Uvanga Nâlegauvunga; okauserijakka tamaita illingnut okauseriniarpatit Faraomut Egiptenemiut attaninganut.

30 Tagva Mosese kiovok Nâlekamut: Takovarman kangsînâkartunga kippisimangitûngnik; kanok tagva Faraub tus-sarniarpângâ?

KAP. VII.

Imek aungorpok.

1 **NALEGAK** okarpok Mosesemut: Ahâk, Faraomut Gûdetut-itipagit, Aronelo angajuit okartigijaksarivat.

2 Igvit perkojamnik tamainik illingnut okartuksauvotit, Aronible angajuvit okautigijaksarivait Faraomut, Israêlikunik aularkojerkovlugo nunaminit.

3 Uvangale Faraub ômatinga sittisititsomavara, nelunai-kutat tatamnartullo (piniaromajakka) unuksitilugit Egiptenemiut nunangane.

4 Faraublo tussaromaniangilâtik; tagva Egiptenemiut isagomavakka, katimgajoksoakutikka, inukotikka Israêlikut, aularutivlugit Egiptenemit sugiartauviksoatigut.

5 Egiptenemiullo tukkisijuksauvut uvanga Nâlegaugama, Egiptenemiut isagupkit, Israêlikullo aularutikupkit akornganit.

6 Moseselo Aronelo taimailiorpuk; sorlo Nâlekab perkungmagik, taimak iliorpuk.

7 Moseselo 80nik jârekarpok, Aronelo 83nik jârekarpok, taimak okausekaramik Faraomut.

8 **Nalegarlo** okarpok Mosesemut Aronemullo, okarlune:

9 Okarvigilutik Farao okarpat: Tatamnartomik takuksautitsileritik! tagva Aronemut okartuksauvotit: Ajaupiakotit tiguvlugo, Faraub sânganut egileruk, kuglugiangortilugo.

10 **Tagva** Mosese Aronelo Faraomut iterpuk taimailiorlutiglo, sorlo Nâlekab perkungmagik. Aronible ajaupiakotine egipâ Faraub kivgangitalo sânganut kuglugiangortilugo.

11 Tagva Faraub illisimajut angakullo kairkovait, tâpkoalo, Egiptenemiut illisimajokotingit aglangnik, taimailiorivut angakonermingnut.

12 Nellikârdlutik ajaupiakotitik egipait kuglugiangortilugit, kissiane Aronib ajaupiakotingata ajaupiakotingit êvait.

13 Taimailingagalloarmat Faraub ômatinga mangaitilerpok, tussaromangilaglo, sorlo Nâlegak okarmat.

14 **Nalegak** tagva okarpok Mosesemut: Faraub ômatinga mangaipok, inuillo aularkovlugit kunuvok.

15 Ailerit Faraomut uvlâkut. Ahâk, kôngmut aimiarpok, igville nangeriartorit kôb sinnânut utakivlugo, ajaupiarlo kuglugiangolauktok tigumiaraksarivat.

16 Okarvigijaksarivallo: NâleKab Ebrêêrit Gûdingata tili-vânga illingnut, okautjaurkovlutit: Inukotikka aularkokit, kivgartorvigijaksaringmanga inukangitome. Kissiane mâna tikkidlugo tusaromangilatit.

17 Imâk okarpok Nâlegak: Mattomunga tukkisijuksau-votit, uvanga Nâlegaugama: Ahâk, ajaupiamut tigumiartam-nut kôb imanga anaugupko, ablatsângorniarpok aungorlune.

18 Mingeriat kôngmêtut tokolerniarput, kôglo tippiludlarniarpok, Egiptenemiullo makojuginiarpât kôb imanga imerungnairlugo.

19 Nâlegarlo okarpok Mosesemut: Arone okautileruk: Ajaupiakotit tiguvlugo aggaktit isaktikit Egiptenib imangita kollâtigut, kôngita kôgvingitalo tessingitalo tessekullungitalo kollâtigut, aungortilugit; aukartuksauvorlo Egiptenemiut nunangane illûnâne, imektautine ilûnaine kejungnelo ujarangnelo.

20 Tagva Mosese Aronelo taimailiorpuk, sorlo NâleKab perkungmagik; ajaupiarlo silluktilugo kôb imanga anaungmago Faraub kivgangitalo sângane, tagva kôb imanga ilûnane ablatsângorpok aungorlune.

21 Mingeriallo kôngmêtut tokolerput; kôblo imanga tippiludlalerma, Egiptenemiut, kôb imanga imerlugo ajulerpât; aukarporlo Egiptenemiut nunangane ilûnâne.

22 Egiptenemiullo illisimajokotingit aglangnik taimailiorivuttauk angakonermingnut. Taimaimat Faraub ôimatinga mangaitilerpok tussaromangilaglo, sorlo Nâlegak okarmat.

23 Tagva Farao utterlune angerarpok, tamannalo ôamiutaringilâlônêt.

24 Egiptenemiullo ilûnatik kôb avatâgut itersaliorput imiksamingnik imeksiorlutik, kôb imanga imerlugo ajoramitsuk.

25 Uvlullo sevenit nâvut, Nâlegak anaunerkârtilugo kôngmik.

KAP. VIII.

Narrâjit, kiktoria, niviuvait.

1 **NALEGARLO** tagva okarpok Mosesemut: Faraomut okariartorit: Imâk Nâlegak okarpok: Inukotikka aularkokit, kivgartorvigijaksaringmanga !

2 Aularkolugille kunudlaruvit, ahâk, tagva nunagijat ilûnât pidlarniarpâ para narrâjitigut.

3 Kôksoak narrâjinik nâmaniarpok, kakivlutiglo iglungnut tikkiniarput sinigvingnullo inangavingnullo, kivgavillo iglunginut, inukotivillo akornganut, igavingnullo niakôjak-saliorvingnullo.

4 Illingnullo inukotingnullo kivgarnullo tamainut narrâjit tikkiniarput.

5 Nâlegarlo okarpok Mosesemut: Arone okautileruk: Ajaupiak tigumiarlugo aggaktit isaktikit kôt kôgvillo tessillo kollâtigut, narrâjit timuarkovlugit Egiptenemiut nunanganut.

6 Aroniblo aggane isaktingmagit Egiptenib imangita kollâtigut, narrâjit timuarput Egiptenemiut nunangat nâmav-lugo.

7 Aglangniglo illisimajut taimailiorivuttauk angakoner-mingnut, narrâjit timuartilugit Egiptenemiut nunanganut.

8 **Tagva** Faraub Mosese Aronelo kairkovak, okautiv-lugik: Tuksiutitinga Nâlekab sângane, narrâjinik pêjairkov-lugo uvamnit inukotimnillo, tagva inuit aularkojomavakka, Nâlekamut tunerguserkovlugit.

9 Moseselo okarpok Faraomut: Nertôtilerit pivlunga (okarvigivlunga), kanga tuksiutijaksarimangâpkit kivgatilillo inukotitillo, narrâjit illingnit iglungnillo pêjartaurkovlugit; kissiane kôksoarmêtuksauvut sulle.

10 Okarpok: Kaupat. Kiovorlo: Sorlo okaravit (taimai-niarpok), tukkisilerkovlutit Nâlegak Gûdivut nellekangimat.

11 Tagva narrâjit illingnit iglungnillo kivgarnillo inukotingnillo pêrniarput, kissiane kôksoarmêtuksauvut sulle.

12 Tagva Mosese Aronelo anivuk Faraomit. Mosesiblo Nâlegak tuksiarvigivâ narrâjit pitjutigivlugit pititangit Faraomut.

13 Nâlegarlo piniarpok, sorlo Mosese okarmat; narrâjillo tokolerput iglune, iglut akornganelo, perorsêvingnelo.

14 Katersorpaillo tamânelo ikanelo katitilugit, nunalo tippeludlarpok.

15 Faraole tukkisigame pagvisartaujungnainerminik, ômatine mangaitipâ tussarnagik, sorlo Nâlegak okarmat.

16 **Nalegak** okarpok tagva Mosesemut: Aronemut okarit: Ajaupiakotit isautivlugo nunab saningit anaukit kiktoria-ngorkovlugit Egiptenemiut nunangane ilûnâne.

17 Taimailiorpuglo. Aroniblo ajaupiakotine isautivlugo nunab saningit anaungmagit, kiktoriaat pilierput inungnut nergjutinullo; nunab saningit ilûnamatsiatik kiktoriaangorput Egiptenemiut nunangane ilûnâne.

18 Aglangniglo illisimajut taimailiorasuaralloarputtauk angakonermingnut kiktoriaat sakkertitsomavlugit, sapperpulle. Kiktoriallo inungnêput nergjutinelo.

19 Tagva aglangnik illisimajut okarput Faraomut: Tamadja Gûdib aggangit! Farauble ômatinga mangaitilerpok tussaromangilaillo, sorlo Nâlegak okarmat.

20 **Nalegarlo** okarpok Mosesemut: Uvlârorlutit nangeriar-torit Faraub sânganut—(ahâk, kôngmut ainiarpok)—okautiv-lugo: Imâk Nâlegak okarpok: inukotikka aularkokit, kivgar-torvigijaksaringmanga!

21 Aularkojomangikungnele inukotikka, ahâk, niviuvait tikkerkojomavakka illingnut kivgarnullo inukotingnullo ig-lungnullo, Egiptenemiut iglungit niviuvanik tattalugit nunalo nunagijangat.

22 Uvlormelo taipsomane Gosenib nunanga, inukotima nunagijangat, ingmikôrniarpara niviuvakartailivlugo, tukki-silerkovlutit uvanga Nâlegaugama nuname.

23 Adsigêngititsomavakkalo inukotikka inukotitillo; kau-pat nelunaikutaksamik taimak pijokarniarpok.

24 Nâlegarlo taimailiorpok, niviuvaksuillo tikkilerput Fa-raub iglunganut kivgangitalo iglunginut, Egiptenemiullo nunangane ilûnâne nuna sujuktaulerpok niviuvanut.

25 **Tagva** Faraub Mosese Aronelo kairkolugik okautivak: Tamâne nunaptingne Gûdipsingnut tunerguseriartoritse!

26 Mosesib kiovâ: Taimailiorupta piotsangilak, Egiptene-miut makojugijanginik tunerguserajarapta Nâlekamut Gûdip-tingnut; illâ, Egiptenemiut makojugijanginik tunerguserupta takoane, millorajangilâtigût ujarkanut?

27 Uvlut pingasut ingergavigivlugit ingergajomavogut inukangitomot, Nâlekamut Gûdiptingnut tunerguseriartor-luta, sorlo perkungmattigut.

28 Farao tagva okarpok: Aularkojomavapse, Nâlekamut Gûdipsingnut tunerguseriartorkovluse inukangitomot, kis-siane ungasiktomot pitailijuksauvose. Tuksiutisingatôk!

29 Mosese okarpok: Ahâk, anilerêruma illingnit, Nâlegak tuksiarvigijomavara, niviuvait kaupat pêrkovlugit Faraomit kivganginillo inukotinginillo; kissiane Farao uiveriklerung-nairmile, inuit tunerguseriartortailijungnairlugit Nâleka-mut.

30 Moseselo anigame Faraomit, Nâlegak tuksiarvi-givâ.

31 Nâlegarlo piniarpok Mosesib okausingit maliklugit,

niviuvaillo pêrpait Faraomit kivganginillo inukotinginillo; atautsemiglônêt amiakokangilat.

32 Farauble ômatine mangaitipâ tamattomanetauk inuillo aularkongilait.

KAP. IX.

Nûsilingnartok; ajuat puppiksoalît; nettarkonâluit.

1 **NALEGAK** tagva okarpok Mosesemut: Faraomut okariartorit: Imâk Nâlegak Ebrêerit Gûdingat okarpok: Inukotikka aularkokit, kivgartorvigijaksaringmanga.

2 Aularkolugille kunudlaruvit, nokangatitsomavlugit sulle,

3 Ahâk, tagva Nâlekab aggangit nergjutekotingnut nater-namêtunut pijuksauvut: horsinullo siuterkortojuunullo kamêlinullo tuktuvangnullo saukanullo, sugaluluartomik nûsiliktiglut.

4 Nâlekablo Israêlikut nergjutekotingit Egiptenemiullo nergjutekotingit adsigêngitiniarpait, Israêlikut nangmineringinit tokojokartuksaungimat atautsemiglônêt.

5 Nâlekablo kaujijautinivâ piviksanga taimak, okarlune: Kaupat Nâlegak taimailiorniarpok nuname.

6 Kaungmalle, Nâlegak taimailiorpok, Egiptenemiullo nergjutekotingit sunatuinait nûsilikput, Israêlikulle nergjutekotinginit tokojokalungilak atautsemiglônêt.

7 Faraolo takosaijokarkojingmat, nutte, Israêlikut nergjutekotinginit tokungajokalungilak atautsemiglônêt. Taimaigalloarmalle, Faraub ômatinga mangaitipok, inuillo aularkongilait.

8 **Tagva** Nâlegak okarpok Mosesemut Aronemullo: Tigusileritik paumik kiaksautemit, ittimâktik tattalugit, Moseselo siamangatitsile makkoninga kilangmut Faraub sângane,

9 Egiptenib nunanganut ilûnânut pujungolerkovlugit ajuangolerkovlugillo puppiksoalît inungnelo nergjutinelo, Egiptenib nunangane ilûnâne.

10 Tagva paumik tigusiavlutik kiaksaumit nangeriartorpuk Faraub sânganut; Moseselo siamangatitsingmat makkoninga kilangmut, ajuangorput inungnelo nergjutinelo.

11 Illisimajullo nangerlutik Mosesib sângane ajulerput ajuanut, ajualulermatta illisimajut Egiptenemiullo ilûnamatsiatik.

12 Nâlekable Faraub ômatinga mangaitipâ, tussaromangilaglo tâpsoma, sorlo Nâlegak okarmat Mosesemut.

13 **Nalegak** tagva okarpok Mosesemut: Kaupat uvlâror-lutit nangeriartorit Faraub sânganut, okautivlugolo: Nâlegak Ebrêerit Gûdingat okarpok imâk: Inukotikka aularkokit, kivgartorvigijaksaringmanga !

14 (Kunuleruvit) tamattomane kapiasûtaurkojakka tamaita tilijomavakka illingnuluatsiak kivgarnullo inukoting-nullo, tukkisilerkovlutit uvaptun-itokangimat nuname ilû-nâne.

15 Aggakka isaklugit mâna sugiarama illingnik inukoting-niglo nûsilingnartomut, pêjartaunajarkaugalloarpotit nunamit.

16 Tamanna pivlugole inûlivagit, pitsartunera takuksautitsomavlugolo illingnut, atteralo okautigijaurkovlugolo nuname ilûnâne.

17 Sulle atangusiguvit inukotimnut, aularkojomanagit,

18 Ahâk, tagva kaupat nelliutome tamattomane nettarkonâlungnik sugaluluartunik sillalurkojijomavunga, sorlo Egipteneme pijokalaungimat nunab mattoma pigiarninganit mâna tikkidlugolo.

19 Taimaimat tiliklerit mâna, nergjutekotitit ilûnamatsiatiglo perkutitit naternamêtut torkortautilugit. Inuit nergjutillo ilûnamatsiatik natername naipitauniartut katersortaungitululo iglunut, nettarkonâluit kattagvigikpagit, tokoniarpur.

20 Tagva Faraub kivgangita illangita, Nâlekab okausinganik kuksasuktut, kivgatik nergjutekotitiglo kemârkovait iglunut.

21 Illangitale, Nâlekab okausinganik erkasungitut, kivgatik nergjutekotitiglo naternamêtuarkovait.

22 **Tagva** Nâlegak okarpok Mosesemut: Aggaktit isakit paunga kilangmut, nettarkonarkovlugolo Egiptenib nunanganut ilûnânut, inungnut nergjutenullo, perorsianullo perorsêvingnêtunut ilûnamatsianginut nuname Egipteneme.

23 Mosesiblo ajaupiakotine isautingmago kilangmut, tagva Nâlegak kallertitsivlunelo nettarkonartitsivok, ikomalo katak-pok nunamut. Taimak Nâlegak nettarkonâlungnik sillaluktitsivok Egiptenib nunanganut.

24 Nettarkonartilugo, ikomamik kataktokarpok, aksaujanik (ikomaujunik) nettarkonâluit akorngane, sugaluluartunik. Taimak sivorngane pijokalaungilak Egiptenib nunangane ilûnâne inukalertainarninganit.

25 Nettarkonâlulillo nungupait Egiptenib nunangane ilûnâne tamaita naternamêtut inuillo nergjutillo, perorsiallo

tamaita perorsêvingnêut nungupait, napârtullo tamaita naternamêut navikpait.

26 Gosenemele, Israêlikut nunagijangane, kissiane nettarkonâlunġnik kataktokalungilak.

27 **Tagva** Farao tiliklerpok, Moseselo Aronelo kairkovlugik, okautivlugiglo: Tamattomane idluitulivunga; Nâlegak idluartôvok, uvangale inukotikkalo idluitoksôvogut.

28 Tuksialeritik Nâlekamut, Gûdib kallidartitsininga nettarkonâluillo sorairkovlugit; tagva aularkojomavapse tamânêrkojomairluse.

29 Mosesiblo okautivâ: Iglugasaksoarnit aniguma, aggakka isagomavakka Nâlekamut, tagva kallidlarungnairniarpok nettarkonarungnairniarlunelo, tukkisilerkovlutit Nâlekab nuna perkutigingmago.

30 Kissiane nellungilapse, igvit kivgatillo sulle Gûde Nâlegak sivôraginginapsiuk.

31 Taimak perorsiat flaksinik gêstaniglo taijaujut nungutaumavut, gêstat sullugainekarêrmatta, flaksillo nuvugulâkarêrmatta.

32 Vaitsinigle sapeltaniglo taijaujut nungutaulungilat, kinguraigamik tamakkoa.

33 Tagva Mosese Faraomit anivok iglugasaksoarnillo, agganelo isangmagit Nâlekamut kallerungnairpok nettarkonarungnairlunelo, sillaluglo katagungnairpok nunamut.

34 Faraole takogame, sillaluk kalluglo nettarkonâluillo sorairmatta, idluituligannituinarpok, tâpsomalo kivgangitalo ômatitik mangaitipait.

35 Taimak Faraub ômatinga mangaitipok, aularkongilaillo Israêlikut, sorlo Nâlegak Mosesemut okarmat.

KAP. X.

Piglertaujat, tâksoarlo.

1 **NALEKABLO** Mosese okautivâ: Faraomut iterit: tâpsoma ômatinga kivgangitalo ômatingit mangaitigapkit, sak-kijârtitsijungnarkovlunga nelunaikutamnik makkoninga sângane:

2 Igvillo unipkârungnarkovlutit ernivit erngutavillo siutinginut piniarnernik piniarnerijamnik Egipteneme, nelunai-kutaliarimajamniglo tâpkoa akorngane; kaujimarkovluse uvaugama Nâlegak.

3 Moseselo Aronelo iterpuk tagva Faraomut, okautivlugo-

lo: Imâk okarpok Nâlegak, Ebrêerit Gûdingat: Kanok sivitutigijomik manigotitailijomavêt illingnik sâmne? Inukotikka aularkokit, kivgartorvigijaksaringmanga.

4 Kippiluguvulle inukotikka aularkovlugit, ahâk, kaupat piglertaujat tikkititsomavakka nunangnut:

5 Tâpkoalo nunab kânga mattuniarpât, takojungnartokarungnairtilugo nunamik; nerrijuksauvullo nungutaungitut amiakunginik, amiakôjut illipsingnut nettarkonâlungnit, nerrijuksauvullo napârtunik tamainik illipsingnut perortunik perorsêvingne:

6 Tattaijuksauvullo iglungnik, kivgavillo ilûnatik iglunginik, Egiptenemiullo ilûnatik iglunginik, sorlo atâtatit atâtavillônêt atâtangit takolauksimangimatta, uvlormit nunamêvigilauktanginit uvlok tamanna tikkidlugo. Tunuvlunelo anivok Faraub sânganit.

7 Faraublo kivgangita okautivât: Kanok sivitutigijomik angut tâmna nigarniuteojuksauvâ uvaptingnut? Angutit aularkokit kivgartorkovlugit Nâlekamik Gûdimingnik: kaujimangilatît sulle Egipten asserortaungmât?

8 Tagva Mosese Aronelo tikkiutititaulerivuk Faraomut, tâpsomalo okautivak: Nâlegak Gûdise kivgartoriartorsiuk: kissianele kikkôvât aulartuksaujut?

9 Moseselo okarpok: Aularomavogut inôsuktovut inukoartovullo, ernivut panivullo, saukavut nergjutivullo illagivlugit; uvloksiortuksaugapta Nâlekamut.

10 Okautivaglo: Nâlekab taima illagijaksarivâse, aularkoniarupse kitorngase illagivlugit; okoksê, idluinek sivurlerivase.

11 Taimainiarase: illipsele angutaujose, Nâlegak kivgartoriartorsiuk, tamattominga kilanâlaurapse. Faraublo najorninganit ungumajauvuk tagva.

12 **Nalekablo** Mosese okautivâ: Aggatit isakit Egiptenib nunangata kollâgut piglertaujanut, majoarkovlugit Egiptenib nunanganut, nunablo perorsiangit tamaita nerrivlugit, tamaita nettarkonâluit nungungitangit.

13 Mosesiblo ajaupiakotine isautivâ Egiptenib nunangata kollâgut, Nâlekablo anore unangâk tikkiutitipâ nunamut uvlok tâmna nâvlugo, unnuarlo tâmna nâvlugo, uvlângolermallo unangâb piglertaujat tikkiutitipait.

14 Piglertaujallo majoarput Egiptenib nunanganut tamânut, mipullo Egiptenib erkânginut tamainut; sugaluluadlarput; sivorngatigut taipkutitunak piglertaujakalulaungilak, kingorngatigullo pijokartuksaungilarlônêt.

15 Nunablo kânga tamât mattuvât, nuna tâktungorlugo; nunablo perorsiangit tamaita nerrivait, napârtullo paungangit tamaita nettarkonâluit nungungitangit; amiakokarungnairporlo tungujoktamik sumiglônêt napârtune, perorsêvillônêt perorsianginik, Egiptenib nunangane ilûnâne.

16 **Tagva** Faraub erinesuklune Moseses Aronelo kairkojaurkovak, okarlunelo: Idluitulisimavunga Nâlekamut Gûdipingnut illiptingnullo.

17 Taimaimat idluinikka issumagijungnaisigiktôk tamatomanetuinak, Nâlegarlo Gûdise tuksiarvigitikko ajangititserkovlugo tokomik ômingainak uvamnit.

18 Anivorlo tagva Faraomit, Nâlegarlo tuksiarvигivâ.

19 Nâlekablo anore sangutipâ uarngnarsoangordlugo pitsartudlartok, tâpsomalo piglertaujat tiktautipait egilugillo imarbingmut suvlolingmut; piglertaujat amiakokangilat atautsemiglônêt Egiptenib erkângine tamaine.

20 Nâlekable Faraub ômatinga mangaitipâ, tâpsomalo Israêlikut aularkojomangilait.

21 **Nalekablo** Moseses okautivâ: Aggatit isakit paunga kilangmut, Egiptenib nunanga ulliktaurkovlugo tâksoarmut, illâ, tâksoarmut aktortaujungnartomut.

22 Moseselo aggane isaktipait paunga kilangmut; tâksoangorporlo tagva Egiptenib nunangane ilûnâne uvlunik pingasunik:

23 Tautûtilungilat, inniminillônêt makkitokangilak uvlut pingasut nâvlugit: kissiane Israêlikut ilûnatik kaumanekarput iglune najortamingne.

24 Faraublo Moseses kairkovâ, okarlunelo: Aularitse, Nâlegak kивgartorniarsiuk, kissiane saugakotise nergjutekotiselo kemaksigik: kitorngasele illagisigik.

25 Moseselo okarpok: Tunitjivigijaksarivaptiguttauk tunergutiksanik tokotaksanik tunergutiksaniglo ôtaksanik, Nâlekamut Gûdipingnut tunerguserungnarkovluta.

26 Nergjutekotivut illagijaksarivavut; kukkilik atauserlônêt kemaktaujokartuksaungilak; tâpkonangat tigusijuksaugapta Nâlegak Gûdivut kивgartoromavlugo; kaujimangilagullo sumik kивgartûtiksakartuksaungmangâpta Nâlekamik, tikkerkârtinata taikunga.

27 **Nalekable** Faraub ômatinga mangaitipâ, tâpsomalo aularkojomangilait.

28 Faraublo okautivâ: Kemanga, udjertorit illingnik,

kênara takonârungnairuk; uvlorme tâpsomane takonârvingne kênamnik tokojuksauvotit.

29 Moseselo okarpok: Nâmaktomik okarpotit, kênait takonâromairpara.

KAP. XI.

Kapianartoksoak kingorlerpâk sillûtauvok.

1 **NALEKABLO** Mosese okautivâ: Sulle kapiantoksoarmik atautsemik tikkiutjijomavunga Faraomut Egiptenemullo; kingorngane aularkojomârpâse tamângat; aularkoniarpâselo ajaktumarilârpâse aglât.

2 Taimaimat okâlagit mâna inuit siutinginut, angutit attunit kennurkovlugit sillalermingnit, arnallo attunit sillalermingnit kennurkovlugit perkutitik silbereojunik goldeojuniglo.

3 Nâlekablo inuit saimaneksitipait Egiptenemiut sângine. Aglât angut Mosese nâlengnartoksôlerpok nuname Egipteneme, Faraublo kivgangita sângine, inuillo sângine.

4 Moseselo okarpok: Imâk okarpok Nâlegak: Unnuabkerkangane anijomavunga Egipten apkutigivlugo.

5 Erniangokârtullo ilûnatik nuname Egipteneme tokojuksauvut, Faraub, iksivautaksoamine iksivajub, erniarirkârtanganit, arnab kivgab, serkalitsiviub tunuanêtub, erniarirkârtanga tikkidlugo; nergjutillo erniarirkârtangit ilûnatik.

6 Kaggudlarneksoakaromârporlo tagva ilûnâne nuname Egipteneme, sorlo sivorngagut nellekalauksimangimat, kingorngagullônêt nellekalulângimat.

7 Israêlikulle nellianut kingmerlônêt killujuksaulungilak, inungmullônêt nergjutemullônêt; kaujimarkovluse Nâlekab Egiptenemiut Israêlikullo adsigêngitingmagit.

8 Makkoalo kivgatit ilûnatik atersarvigilârpânga pâmaktervigivlungalo, okarlutik: Anigit, inuillo ilûnatik maliktut illingnik: kingornganelo anilârpunga. Anivorlo Faraomit ningaumajâdlarlune.

9 Nâlekablo Mosese okautivâ: Faraub tussaromangilâtik, tatamnartulinikka unukserkovlugit nuname Egipteneme.

10 Mosesiblo Aroniblo tatamnartut tamakkoa tamaita piniarnerivait Faraub sângane; Nâlekablo Faraub ômatinga mangaitipâ, tâpsomalo Israêlikut aularkolungilait nunaminit.

KAP. XII.

Kângerviksiutiksamik. Erniangokârtut tokotauvut. Israêlikut ajaktortauvut.

1 **NALEKABLO** Mosese Aronelo okarvigivak nuname Egipteneme, okarlune:

2 Takkek tamanna illipsingnut pigiarniojuksauvok takkernit: sivorlerpaujuksauvok jârib takkinginit illipsingnut.

3 Okaritik illagênut Israêlikunut ilûnânut, okarlutik: Takkiub ôma uvlungita 10ingane iglomiokatigêt angajokângit attunit tigusijuksauvut saugârsungmik, tamât saugârsungmik atautsemik kitorngarênut atautsinut:

4 Kissiane iglomiokatigêt ikiluarpatta saugârsungmut, tâpsomalo senniliatalo, iglominut kanitub, katilutik saugârsuk tigulikko, nerrikataujuksat unurningit kamagilugit.

5 Saugârsuk nochak angut kanoetokangitok, atautsemik jârelik, tigujaksarivase: tiguniarpaselo saukanit tuktungajunillônêt;

6 Najortiginiarpaselo takkiub tamattoma uvlungita 14ingat tikkidlugo; tagva Israêlikut kitorngarêt katimajut tamât tokotaksarivât unnujaraksinek kaujaraksinerlo kerkane.

7 Aublo illanga tigujaksarivât, iglublo nerrimârvioniartub upkuangata nappajûgik upkuablo kollâ mingoarlugit.

8 Nerkingalo nerrijaksarivât unnuarme tâpsomane, ikomame jarraksimajok, kakkôjamullo sêrnarsautekangitomut, amânullu sungaujunut nerrijaksarivât.

9 Mikkigautilugo nerrijaksaringilase, imermullônêt ôjotilugo, ikomamele jarraksimatilugo; niakoa niungillo tulimângillo tappilugit.

10 Amiakokartuksaungilak kaunut; uvlâkulle amiakoa nungutaksarivase ikomamut.

11 **Imaglo** nerrijaksarivase: kettipsigut ketterusersimavhuse, kamilijarluse ittikapsigut, ajaupialijarluselo aggapsigut; tuavidlhuse nerrijaksarivase: Nâlekab kângervia tamadja.

12 Unnuarme tamattomane nuna Egipten aulavigigapko, anaulugillo erniangorkârtut ilûnatik nuname Egipteneme, inuillo nergjutillo; Egiptenemiullo gûdingoanginut tamainut nellonaijajomavunga erkartuinerlik: tâmnauvunga Nâlegak.

13 Augle nellonaikutariniarpase iglune innigijapsingne: auglo takogupko kângervigijomavapse, asserornartoksoarlo illipsingnêtuksaungilak asserorlhuse, nuna Egipten sugiarupko.

14 Uvlorlo tamanna erkaumanartôjuksauvok illipsingnut, nelliunksiorutigijaksarivase Nâlekamut kinguvâpsigut; nelliunksiorutigijaksarivase âkiksimajok soraijuitomut.

15 Uvlut 7 nâvlugit kakkôjaktortuksauvose sêrnarsautekangitunik; uvlorme sivorlerpâme sêrnarsaut iglupsingnit pêraksarivase; tagva uvlormit sivorlerpâmit uvlut 7ingat tikkidlugo kakkôjaktortok sêrnarsautelingmik, tarne tâмна avitaujuksauvok Israêlikunit.

16 Uvlormelo sivorlerpâme ivlernartomik katimaniksakartuksauvok, uvlullo 7ingane ivlernartomik katimaniksakartuksaugivok illipsingnut; sumiglônêt suliviojuksaungilak, kisisiane tarningnut nerkiksaujut, tâpkoa suliarijaksatarivase.

17 Ivlersijuksauvose kakkôjat sêrnarsautekangitut uvloksiorvinganik; uvlorme tâpsomaneluatsiak tessiorapse illagêksoangonise nunamit Egiptenemit: tamanna pivlugo uvlok tâмна ivlerijaksarivase kinguvâpsigut soraijuitomut âkiksimajok.

18 **Takkiub** sivorlerpâb uvlungita 14ingane unnukut kakkôjaktortuksauvose sêrnarsautekangitunik, takkiub uvlungita 21ingata unnulerninga tikkidlugo.

19 Uvlut 7 nâvlugit sêrnarsaut naipitaujuksaungilak iglupsingne; sêrnarsautelingmik nerrijub, tâpsoma tarninga avitaujuksauvok illagênit Israêlikunit, takorngartaugunelônêt inûlersimajôgunelônêt nuname.

20 Sumiglônêt sêrnarsautelingmik nerrijuksaungilase; innigijapsingne tamaine sêrnarsautekangitunik kakkôjaktortuksauvose.

21 **Mosesib** tagva angajokaujut ilûnaita Israêlikune kairkovait, okautivlugillo: Saugârsungmik kenneritse tigusaluselo kitorngarênipsingnut, kângerviksiutiksamiglo tokotsileritse.

22 Tigusijuksauvoselo isupenik kellaksuganik, aungmullo illulerkutemêtomut missuklugit, upkuablo kollâ nappajûgiglo mingoarlugit aungmut illulerkutemêtomut, kaulerkârtinagolo anijokartuksaungilak iglome upkuangagut.

23 Tagva Nâlegak tamaunâromavok Egiptenemiut sugiarlugit; auglo kollânêtok nappajungnêtorlo takoguniuk, NâleKab upkuak kângeromavâ, asserorsaijorlo itertailitiniarpâ iglupsingnut sugiarluse.

24 Perkojak tamanna maligaksarivase ilusiorkojaujok illingnut kitorngapsingnullo soraijuitomik.

25 Taimaktauk tikkisimagupse nunamut NâleKab tuni-

jomajanganut illipsingnut angersimanine maliklugo, kivgartûtiksak tamanna maligaksarivase.

26 Kitorngapselo aperilârpase: Sunauvâ kivgartûtiksak tamanna ?

27 Kiolârpose: Tamanna tunergutiksak kângerviksiutiksak Nâlekamut, tâpsoma Israêlikut iglungit Egipteneme kângermagit, Egiptenemiut sugiarmagit, iglovullo saputivlugit. Inuillo okkovut opigosuklutiglo.

28 Tagva Israêlikut taimailioriartorput, sorlo Nâlekab Moseselo Aronelo perkongmagik, taimailiorput.

29 **Ahaglo**, unnuak ketterarmat Nâlekab erniangorkârtut nuname Egipteneme sugiarpait, Faraub, iksivautaksoamine iksivajub, erniarirkârtanganit, tigujaumajub parngnanairsimavingmêtub erniarirkârtanganut; nergjutillo erniarirkârtangit ilûnaita.

30 Faraolo makipok unnuarme, tâmna, kivgangillo ilûnatik, Egiptenemiullo ilûnatik; kaggudlarneksoakalerporlo Egipteneme; iglokangimat tokungajoktakangitomik.

31 Moseselo Aronelo kairkovak unnuarme, okarlunelo: Nikovigitse, aularluselo inukotima akornganit, illiptiglo Israêlikullotauk, Nâlegarlo kivgartoriartorsiuk, sorlo okalaurapse.

32 Neksarsigiglo saugakotise nergjutekotiselo, sorlo okarapse, nippagitselo. Pilorirkosingalo uvangatauk.

33 Egiptenemiullo inuit tetjarpait nunamit aulartitsomavlugit erinesârlugit; okaramik: Tamapta tokungajoinaudla-roarpogut.

34 Inuillo kakkôjaksatik aipajut sêrnartitausimangitut tigûllapait imulugillo annorâmingnut erksuklugillo.

35 Israêlikullo taimailiorput Mosesib okausinga maliklugo: Egiptenemiunillo piksarsiorput perkutinik silbereojunik goldeojuniglo, annorâniglo:

36 Nâlekablo inuit saimaneksitipait Egiptenemiut sângine, tâpkoalo tunitjivigivait pijomajanginik. Nungudjivullo Egiptenemiunik.

37 Israêlikullo ingergalerput Ramesesemit Suggotemut, angutainait pissuktut 600,000, sorrutsit kitinagit.

38 Takorngartallo unuktut majoarkatigivait; katimgajullo saukat nergjutillo unuktut.

39 Kakkôjaliorpullo sêrnarsautekangitunik kakkôjaksanit aipajunit neksartamingnit Egiptenemit, sêrnartitaungimat; ajaktortaulauramik Egiptenemit mulludlarungnaratiglo, âkiksoisimangilallônêt takoaksamingnik.

40 **Israelikulle** innekarningita sivituninga Egipteneme, tagva jârit 430.

41 Pijokarporlo, jârit 430 nângmatta, uvlorme tâpsomane-tsainak Nâlekab katingajoksoakotingit iluêngartut anivut nunamit Egiptenemit.

42 Unnuak tamadja erkaumanadlartok Nâlekamut, tâpsoma tessiormagit nunamit Egiptenemit; unnuak tamanna Nâlekab pinga erkaumanadlartok Israêlikunut tamainut king-uvânginullo.

43 **Nalekablo** Mosese Aronelo okautivak: Tamadja maligaksaurkojak kângerviksiorutiksamut: Takorngartaub ilangiutivigijaksaringilâ.

44 Kissiane kivgab kênaujanut pisiarijaujub ilangiutivigijungnarpâ kippijaurkârune.

45 Takorngataub kivgablo attartugaub ilangiutivigijaksaringilâ.

46 Iglome atauserme nerrijaujuksausvok; nerkingata illangalônêt anititaksaringilase iglub sillatânut; saunerlo atauserlônêt navgoraksaringilase.

47 Illagêktut Israêlikut ilûnatik taimailiortuksauvut.

48 Takorngartarlo innekarune illingne, Nâlekamullo uvloksiorkataujomagune kângerviksiorvingmik, tâpsoma angutekotine tamaita kippijautitaksarivait. Taimailiorkârlune najutijungnarpok ilangiutivlunelo; nunamelo inûlersimajotut ilinganiarpok; kippimangituble ilangiutivigijaksaringilâ.

49 Maligaksak tâmnatsainak ilingavok inûlersimajomut nuname takorngartamullo illipsingne nunakartomut.

50 Taimailiorput Israêlikut ilûnatik; sorlo Nâlekab Mosese Aronelo perkongmagik, taimailiorput.

51 Taimaglo uvlorme tâpsomanetsainak Nâlekab Israêlikut tessiorpait nunamit Egiptenemit illagêngningit maliklugit.

KAP. XIII.

Erniangorkârtut perkutautitauvut Gûdemut.

1 **NALEKABLO** Mosese okarvigivâ, okarlune:

2 Ivlernartikit uvamnut erniangorkârtut tamaita, igliarmik angmaijut tamaita Israêlikune, inungnelo nergjutinelo: uvanga pigivakka.

3 Tagva Mosesib inuit okautivait: Erkaumalersiuk uvlok tamanna, anivigijase Egiptenemit, iglomit kupalûtitauvigijapsingnit; aggangnut pitsartujunut Nâlekab tagvangat aular-

tilaungmase: sêrnarsarsimajomik kakkôjaktortokartuksaungilak.

4 Uvlorme tâpsomane anilaukpose takkerme Abibemik attelingme.

5 **Taimaimat** Nâlekab tikkiutitikpatit Kânaanemiut Hetiterillo Amoriterillo Heviterillo Jebusiterillo nunanginut angermarijutigilauktanganut atâtapsingnut tunijomavlugo illingnut, nunamut imungmik igupsaujârtullo orksunganik kôkto-mut, tagva piniutaunek tamanna uvloksiorutigijaksarivat takkerme ômane.

6 Uvlut 7 nâvlugit kakkôjaktortuksauvotit sêrnakangitomi, uvlullo 7inga uvloksiorviojuksauvok Nâlekamut.

7 Kakkôjak sêrnakangitok nerrijaujuksauvok uvlut sevenit nâvlugit; kakkôjarlo sêrnarsarsimajok takuksaujuksaungilak illingne, sêrnarsaullônêt takuksaujuksaungilak erkângne tamaine.

8 **Ernillo** nelonaijaivigijaksarivat uvlorme tâpsomane, okarlutit: Tamanna piniarutauvok Nâlekab piniarnerilauktanga uvamnut pivlugo, anigama Egiptenemit.

9 Nelunaikutauniarporlo illingnut aggakkut, erkaijutauniarlarmelo ijîkpit akorngangne, Nâlekab maligaksaurkojangit kanernêrkôvlugit: aggangnut pitsartujunut Nâlekab anitingmatit Egiptenemit.

10 Taimaimat ilusiorkojaujok tamanna nelliuneksiortigijaksarivat nelliutijarangat jârit tamaita.

11 **Nalekablo** tikkiutitikpatit Kânaanemiut nunanganut, sorlo angermarilaungmat illingnut atâtarnullo, tunijomavlugo illingnut,

12 Ilingatitaksarivatit Nâlekamut tamaita angmaijut igliarmik, nergjutekotivillo erniarirkârtangit tamaita; angutaujut perkutaujuksauvut Nâlekamut.

13 Siuterkortojublo erniarirkârtanga tamât tauksiutijaksarivat saugârsungmik; tauksiutijomangikungnelo kongesêjaraksarivat; inuille erniarirkârtangit ilûnatik kitorngavit akorngane taukserlugit uttertitaaksarivatit.

14 **Mattomalo** kingorngagut ernerpit aperikpatit, okarlune: Kanok tukkekarkâ tamanna? okautijaksarivat: Aggangnut pitsartujunut Nâlekab anitilaukpâtigut Egiptenemit, iglomit kipa-lûtitaavgijaptingnit:

15 Faraublo kununermut aularkojomangimattigut, Nâlekab tokorarpait erniangorkârtut tamaita nuname Egipteneme, inuit erniarirkârtangit nergjutillo erniarirkârtangit: tamanna

pivlugo tunergutigivakka Nâlekamut angutaujut tamaita angmaijut igliarmik; kitorngamale erniarirkârtangit taukserlugit uttertipakka.

16 Nelunaikutauniarporlo aggangne, erkaijutauniarlarmelo ijîkpit akorngangne; tagva aggangnut pitsartujunut Nâlekab anitingmatigut Egiptenemit.

17 **Pijokarporlo** Faraub inuit aularkosimangmagit, Gûdib tessiulungilait apkutikut Filisterit nunangagut, tamanna sivikinerpaugalloartilugo; Gûde okarmat: Inuit kakkialidla-roarmatta takogunik unatarnermik, utterniarlutiglo Egiptenemit.

18 Gûdible inuit kalusariartortipait imarbiub suvlohiub sunakajuitungata apkutâgut. Israêlikulle majoarput Egiptenemit annorârsimavlutik sorsuktuksatitut.

19 Mosesiblo Josefib sauningit neksarpait: tâpsoma Israêlikut angermariktsimalaungmagit, okarlune: Gûdib nelipsaromârpâse; saunikalo tamângat takpaungautitaksarivase.

20 **Aularput** tagva Suggotemit tangmârpullo Etameme, sunakajuitub kiglingane.

21 Nâlekablo sivorlerpait uvlôtilugo nuvujak nappajok innigivlugo, unertûtijomavlugit apkomik, unnuakullo ikoma nappajok innigivlugo, kaumarsaromavlugit, ingergajungnar-kovlugit uvlokullo unnuakullo.

22 Nuvujak nappajok pêngilâ uvlokut, ikomalônêt nappajok unnuakut inuit sivurnganit.

KAP. XIV.

Faraub Israêlikut udlapait. Faraokut ippivut imânut.

1 **NALEKABLO** Mosese okarvigivâ, okarlune:

2 Israêlikut okarvigikit sangulerkovlugit tangmârlutiglo Pi-Hakirotib nellâne, Migdolib imarbiublo akorngangne, Baal-Zefonib nellâne; tâpsoma sângane tangmârtuksauvose imarbiub kiglingane.

3 Farao okalârmat Israêlikut pivlugit: Tamarsimavut nuname, sunakajuitub apkutiksairutivait.

4 Faraublo ômatinga mangaititsomavara udlanerkovlugo tâpkoninga; opigijaujomavungalo Faraokut sorsuktuksarsoakutingitigullo, Egiptenemiut tukkisitsiarkovlugit uvangaugama Nâlegak. Taimailiorput tagva.

5 **Egipteniblo** attanina okautijaungmat inuit kemâsimangmatta, Faraub ômatinga ikajortingitalo ômatingit abla-

tsangorput inungnut, okarpullo: Sôk taimailiorkitâ, Israêlikut aularkogaptigik kivgartornermit uvaptingnik ?

6 Kamutinelo aksaloalîk unatautîk atuinarutipâ inukotinelo illagivait,

7 Kamutillo aksaloalît piojut 600 illagivait, kamutillo aksaloalît tamaita Egiptenemêut, attunit kemuksertekarlutik.

8 Nâlekablo Faraub Egiptenib attanertangata ômatinga mangaitipâ, tâpsomalo Isarêlikut udlapait. Israêlikulle anisimalaukput aggangnut kotsiktunut.

9 Egiptenemiulle udlapait, Faraub kamutingit aksaloalît unatautit horselît, horsenelo ikimajungit, sorsuktuksarsoa-kotingillo, angulugillo tangmârtersimajut imarbiub kiglingane, Pi-Hakirotib erkâne, Baal-Zefonib nellâne.

10 **Faraolo** kaglilermat, Israêlikut ijitik arlortipait, sunaubvalo, Egiptenemiut malikpait; kapiasudlalerpullo, Israêlikullo Nâlegak nipliadlarvigivât.

11 Mosesemullo okarput: Iluviksakangimat Egipteneme aularutivitigût sunakajuitome tokorkovluta ? Sôk taimailiorvivivitigût, aularutiluta Egiptenemit ?

12 Tamannaungilâk okauserijavut illingnut Egipteneme, okarluta: Pagvisarniaratigut, Egiptenemiulle kivgartortuinarlavut ? Egiptenemiut kivgartorlugit nakornersaungmat tokokuksaunermat sunakajuitome.

13 Mosesiblo inuit okautivait: Sivôraniarase ! kikartuinari-tse ! Nâlekablo piuliklerna nelonaijarniartanga uvlome pivluse takoniarlugo; Egiptenemiut takojase uvlome takojungnainiarapsigik issokangitomut.

14 Nâlegak sorsulârmat pivluse, illipselo nippangerniarpose.

15 Nâlekablo Mosese okautivâ: Sôk kaigarsukkêt uvamnut ? Israêlikut ingergarkokit:

16 Igville ajaupiat isautileruk, aggatillo isakit imarbiub kollânut, aviktilugolo: Israêlikullo imarbiub kerkagôrtuksauvut pannertokut.

17 Uvangalo, ahâk, Egiptenemiut ômatingit mangaititso-mavakka, malerkovlugit tâpkonina: uvangalo nertortaunik-sarsijomavunga Faraokut, katingajoksoakotingitigullo ilûnaitigut, kamutingitigullo aksaloaliktigut unatautiktigut, horsenelo ikimajungitigut.

18 Egiptenemiullo missigijuksauvut uvangaugama Nâlegak, nertortauniksarsimaguma Faraokut, kamutingitigullo aksaloaliktigut unatautiktigut, horsenelo ikimajungitigut.

19 **Gudiblo** engelinga, Israêlikut tangmârtertertut sivuningitigut ingergasôk, nûpok, kinguninginullo aivlune; nuvujarlo nappajok nûgivok sivuninginit nangeriartorporlo kinguninginut.

20 Aivorlo Egiptenemiut tangmârtertertut Israêlikullo tangmârtertertut kerkanut akornganut; nuvujauvorlo tâdlarlarmelo ipkonunga, unnuarimele kaumaivok ukkununga: ipkua ukkua kanitanganut pijungnarkonagit unnuak nâvlugo.

21 Mosesiblo aggane isaktipait imarbiub kollânut; Nâlekablo imak tinitipâ unnangârsoakut unnuak nâvlugo, imarbiglo pannertungortipâ, imallo aviktauvut.

22 Israêliblo kitorngangit imarbiub kerkagut ingergavut pannertokut: imaksuillo avalugivait talerpiata tungâgut saumiatalo tungâgut.

23 **Egiptenemiullo** udlapait maliklugillo imarbiub kerkanut, Faraub horsingit, kamutingillo aksaloalît unatautit, horsenelo ikimajungit.

24 Uvlârarsukullo pigârtib pigârvingane, Nâlekab Egiptenemiut sorsuktuksoakotingit takonârpait nappajomit ikomamit nuvujamillo, siorniortipaillo Egiptenemiut sorsuktuk-sarsoakotingit,

25 Kamutingillo aksaloalît aksaloangejarlugit, pêtorkovlugit: Egiptenemiut okarkovlugit: Israêlikunit kemâlerta, Nâlekab sorsugutigingmagit Egiptenemiumut.

26 **Nalekablo** Mosese okautivâ: Aggatit isakit imarbiub kollânut, imaksuit uttilerkovlugit Egiptenemiut kamutingillo aksaloalît unatautit, horsinelo ikimajungit ullutjau-tilugit.

27 Mosesiblo aggane isaktipait imarbiub kollânut, imarlo utterivok uvlâk nuilertilugo pivigivaktaminut; Egiptenemiullo kemânasuarpât: Nâlekablo Egiptenemiut ajaktorpait imarbiub kerkanut.

28 Imaksuillo utterput, ulliklugillo kamutit aksaloalît unatautit, horsenelo ikimajut, Faraublo sorsuktuksarsoakotingit ilûnaita tâpkoninga maliktut imarbingmut; atautse-miglônêt amiakokangilak.

29 Israêlikulle ingergavut pannertokut imarbiub kerkagut; imaksuillo avalugivait talerpiata tungâgut saumiatalo tungâgut.

30 Taimak Nâlekab Israêlikut piulivait uvlorme tâpso-manê Egiptenemiut agganginit; Israêlikullo Egiptenemiut tokungajut takovait imarbiub sikjangane.

31 Israêlikullo takogivât piniarnersoak Nâlekab piniarnerijanga Egiptenemiune, inuillo Nâlegak sivôragivât, okperi-lugolo Nâlegak, kivgangalo Mosese.

KAP. XV.

Mosesib Kujalijutâ. Imek sungarnitok mamaktungortitauvok.

1 **TAGVA** Mosese Israêliblo kitorngangit imgerput imgeru-temik ôminga Nâlekamut, okarpullo: Nâlegak imgervigijomavara, sâlakadlarmat inornadlartomik: horse ikimajingalo egipak imarbingmut.

2 Nâlegak sôngonerivara imgerutigilugolo piulijigilâllo; tâmna tagga Gûdiga, iniksaliromavaralo; atâtama Gûdinga, nertudlaromavaralo.

3 Nâlegak unatarteovok: attinga tagga Nâlegak.

4 Faraub kamutingit aksaloalît unatautit sorsuktuksarsoakotingillo egipait imarbingmut: sorsuktuksarsoakotingitalo angajokângit annerimajut ipimavut imarbingme suvlolingme.

5 Itinersûb ullikpait: kivivut erkanut ujarkatitut.

6 Nâlegak, aggatit tallerpît inornarsivut pitsartunerme; Nâlegak, aggakpit tallerpikpit omisuktit egilugit serkomi-pait.

7 Inornarnivillo angijoksôningane ochotipatit akkerar-tortitit: ningarnît aulartipat, tâpsomalo nungupait iviktitut.

8 Sordlungmigarnernut imat katersortauvut, imaksuit kagvarput sorlo kallerêktutitut, itinerillo igjorput imarbiub kerkane.

9 Omisuktok okarpok: Udlanigomavunga, angusijomavunga, aksârni gaujut aitortûtigijomavakka; ikligunera nâmaksititaujuksauvok tâpkonunga; saviksoara amujomavara, aggamalo nungutaksarivait.

10 Igville anorekotit anordlerkovat, imaksuillo ullikpait: akitotullo kivivut imânut pitsartujunut.

11 Kina Gûdit akorngane illiktut-ikâ, Nâlegak? kina illiktut-ikâ, inornadlarlune ivsornainerme, sivôranadlarlune nertoraksauvlune, tatamnartulivlunelo?

12 Aggatit tallerpît isaktipatit, nunab êvait.

13 Nâpkinergerne inuit piulijatit tessiorpatit: aulapatit pitsartunerne innigijarnut ivlernadlartomut.

14 Inôkatigêksuit tussalârput sivôravlutiglo; kapiasungnerub Filisterit tigudlalârput.

15 Edomib angajokângit kakkilâdlalârput; Moabib pitsar-

tujungit sajudlalârput; Kânaaniblo inungit ilûnatik auksilârput nuvujuatut.

16 Erksinerub koaksârnerublo tupvigilârpait; tallerpikpit pitsartuningagut aulangilârput ujaraktut; inukotitit kângiuterkârtinagit, Nâlegak, inuit pisiarijatit kângiuterkârtinagit.

17 Tikkiutititaksarivatit innekartilugillo kakkame kingormgutijarne, inneme inniliarimajarne innigijomavlugo, ivlernartovingme, Nâlegak, aggakpit atuinarutisimajangane.

18 Nâlegak attaniovok issokangitomit issokangitomot.

19 Faraub horsekotinga aingmat imarbingmut, kamutینگit aksaloalit unatautit, horsenelo ikimajungit illagivlugit, Nâlekablo imarbiub imangit tikkiutitilerivait tâpkonunga; Israêlikulle ingergavut panertokut imarbiub kerkagut.

20 **Miriamiblo** nelautaijub, Aronib najangata, kilaut tiguvâ aggaminut; arnallo ilûnatik anivut tâmna maliklugo kilausijarlutik okigêserlutiglo.

21 Miriamiblo tâpkoa akkiorpait: Nâlegak imgervigisiuk, sâlakadlarmat inornadlartomik; horse ikimajingalo egipak imarbingmut.

22 Mosesiblo Israêlikut aulartipait imarbingmit suvlo-lingmit, ingergavullo sunakajuitomot Suremik attelingmut; uvluniglo pingasunik ingergavut sunakajuitokut imeksinatiglo.

23 **Tikkinamiglo** Mâramut, Mârab imangit inerungnangilait sungarnimatta; tamanna pivlugo nuna tamanna atse-
rartauvok Mâramik (sungarnitomik).

24 Inuillo Mosese okarnerlûtivât, okarlutik: Sumik imer-
niarkitâ?

25 Tâpsomalo Nâlegak kaigarsugvigivâ, Nâlekablo uner-
tutivâ napârtomik, tâmnalo egigamiuk imermut, inek ma-
maktungortitauvok. Tagvane perkojaliorpait maligaksalior-
lugillo, tagvanelo ôktoripait,

26 Okarlunelo: NâleKab Gûdivit nippinga nâletsiaroma-
gungne, piniaromavlugillo tâpsoma sângane idluarijaujut,
siutit manijomagungne tâpsoma perkojanginut, maligaksaur-
kojangillo maligomagungne, illijivigijomangilagit kanimaserit
nellianiglônêt tikkitilauktamnik Egiptenemiunut: uvangau-
gama Nâlegak inûliklertît.

27 **Tikkipullo** Elimemut, tagvane puilavekarpok 12nik,
napârtuniglo Palmenik 70nik: tagvanelo tangmârterput imît
kanitangane.

KAP. XVI.

Tikkiput sunakajuitomut Sinimik attelingmut. Ajoksadlarlutik okarnerlûtjivut. Gûdib tiliklervigivait akigiarsungnik mannamiglo.

1 **ELIMEMILLO** aularput, illagêllo Israêlikut iluêngartut tikiput sunakajuitomut Sinimik attelingmut, Elimib Sinaiblo akorngangnêtomut, takkiub aipangata uvlungita 15ingane anilaungninginit nunamit Egiptenemit.

2 Illagêllo Israêlikut ilûnatik okarnerlûtjivut Mosesemut Aronemullo sunakajuitome;

3 Israêlikullo okautivakit: Atso illâ ! nakudlarajalaungnerpok tokolaurupta Nâlekab agganginut nuname Egipteneme, iksivalaurapta ukkusit igautit senniane kakkôjaktoraptalo akkeartorluta; tagva tikkiutitipaptigut sunakajuitomut ômunnga illagêt ukkoa ilûnaita tokotsomavlugit perlernermit.

4 **Nalekab** tagva Moseselo okautivâ: Ahâk, kakkôjamik piksapsingnik sillalurkojijomavunga kilangmit, inuillo anijuk-sauvut katersoivlutiglo uvlub piksanganik kaut tamât, ôktoromagapkit arvertaromamangâta perkojamne pijomangina-ngâtalônêt.

5 Kissianele uvlut 6ingane atuinarutijaksarivait angerautijatik, uvlut tamaita katersorpaktatik maggoertorlugo.

6 Moseselo Aronelo okarpuk Israêlikunut tamainut: Unnulerpat missigilârpose Nâlekab âsimangmase nunamit Egiptenemit:

7 Uvlâkullo takolârpose Nâlekab ivlernarninganik; tussarmat okarnerlûtjinipsingnik Nâlekamut: uvagugle sunauvinûk okarnerlûtigaptigûk ?

8 Moseselo okarpok: Taimailârpok, Nâlekab tunitjiviginiarpâse nerkêjamik nerkiksapsingnik unnukut, kakkôjamiglo akkeartûtiksapsingnik uvlâkut, Nâlekab okarnerlûtjinise tâpsomunga tussarmagit: uvagugle sunauvinûk ? Okarnerlûtjinise pilungilat uvaptîngnut, Nâlekamulle.

9 **Mosesiblo** Arone okautivâ: Illagêt Israêlikut ilûnaita okarvigikit: Kaglileritse Nâlekab sânganut, okarnerlûtjinise tussarmagit.

10 Aroniblo illagêt Israêlikut iluêngartut okarvigingmagit, takosarput sunakajuitomut, ahâglo, Nâlekab ivlernarninga takotipok nuvujarme.

11 Nâlekablo Moseselo okarvigivâ, okarlune:

12 Israêlikut okarnerlûtjiningit tussarpakka: okarvigikit, okarlutit: Unnupat nerketolârpöse, uvlâkullo akeartolârpöse kakkôjamik, missigilârpöselo uvangaugama Nâlegak Gûdise.

13 Atso illâ, unnulermat akigearsuit tikkiakivut, tangmârvik mattuvlugo: uvlâkullo mitsuksoak nunamêpok tangmârviub avatâne.

14 Mitsuksoarlo nungungmat, ahâk, amiakôjokarpok sunakajuitub kângane angmalukitânik mikijunik, sorlo kakkornartut mikitigijunik.

15 Israêlikullo takogamigit okaudjutivut: Mannauvut ukkoa! Kaujimalunginamik sunaungmangâta. Mosesiblo okautivait: Tamadja kakkôjak Nâlekab tunijanga illipsingnut nerkiksaurokvlugo.

16 Tamadja, tagga, Nâlekab perkojanga: Katersoigitse tâpkonangat ilûnase attunit nerrijuvaluapsingnik, homerib (ôktûtib, gallonib abvanganit anginersârsuub) tatautigijangatut angitigijomik attunit, inukotipse unurningit maliklugit; tigusingitse attunit tuppemioakingita piksangingnik.

17 Israêlikullo taimailiorput, katersoilarmiglo illangit anginersamik, illangit mikinersamik.

18 Homeremullo ôktormatsuk, angijomik katersoijok simnikokangilak, ikituniglo katersoijok amigaksilungilak; attunit katersoivut nerrijuvaluaminik.

19 Moseselo okarpok: Kautsamut amiakokartokarniarane.

20 Kissianele Mosese nâlelungilât, illangillo tamattoma illanganik amiakoput uvlâmut, kopergukalerporlo tippelulerlarmelo: Mosesiblo ningautidlarpait.

21 Katersorpaillo uvlât tamât, attunit nerrijuvaluaminik: sekinerlo ônarsingmat aukpok.

22 Uvlulle gingane katersoivut kakkôjanik maggoertoraksanik, homeringnik maggungnik inungmut atautsimut; illagêllo angajokângita Mosese okautijartorpât.

23 Tâpsomalo okautivait: Gûdib, tagga, okautigisimajanga: Kaupat Sabbateojok ivlernartok, merngoerserviksase Nâlekamut nelliutivok. Otitso majase ôtiniarsigik uvlome, igajomajaselo iganiarsigik; amiakoa torkorsiuk uvlâmut piksakumitarilugo.

24 Torkorpâllo uvlâmut, sorlo Mosese perkojingmat: tippelulungilarlo kopergukalungilarlônêt.

25 Moseselo okarpok: Tâamna uvlome nerrisiuk; tagva uvlome Sabbateovok Nâlekamut: uvlome nagvârniangilase taimaitomik natername.

26 Uvlune 6ne katersoraksarivase, uvlulle 7ingane, Sabbathejome, pitakarniangilak.

27 Sunaubvale, uvlut 7ingane inuit illangit anivut kater-soijomavlutik, nagvâlungilalle.

28 Nâlegarlo tagva okarpok Mosesemut: Kanok akuner-tigijomik perkojakka maligaksaurkojakkalo kippilûtigisimagomavisigik nâlegomanagit?

29 Takoitse, NâleKab tunitjivigingmase Sabbathemik, taimaimat uvlut 6ingane tunitjivigivâse uvlûk magguk kakkô-jaksanginik; ilûnase innigijapsingnêtuaritse, anijokarniarane inniminit uvlut 7ingane.

30 Taimaimat inuit merngoerserput uvlut 7ingane.

31 Israêlikullo tamakkoa taivait Mannanik: korianderib (perortut illangata) karngasûtiksangititut iput, kakortauvlutik; tippekarpullo sorlo kakkôjârsutut igupsaujârtut orksuanik illaliktut.

32 **Moseselo** okarpok: Tamadja, tagga, NâleKab perkojanga: Homere tattalersiuk tâpkoninga, torkorsimajuksanik kinguvâksapsingnut; takorkovlugit kakkôjanik nerrititsijutigilauktamnik illipsingnik aularutigapse nunamit Egiptenemit.

33 Mosesiblo Arone okautivâ: Illulerkumik tigusilerit, pititsivigivlugolo Mannanik, homerib tattautiluanganik, NâleKablo sânganut illiuk, torkorsimajuksaurkovlugit kinguvâksapsingnut.

34 Sorlo NâleKab Mosese perkongmago, taimak Aronib illivâ kigligiutsinektaliub sânganut, torkorsimajuksaurkovlugo.

35 Israêlikullo nerriut Mannanik jârit 40 nâvlugit, tikkerkârtinagit nunamut inulingmut; nerriut Mannanik tikkerkârtinagit nunab Kânaanib kiglinganut.

36 Homere tagva Efab tellimaujortunga.

KAP. XVII.

Israêlikut imertitauvut kairtomit. Amalekut sâlauvut.

1 **ILLAGELLO** Israêlikut ilûnatik aularput sunakajuitomit Sinimit ingergakattarlutik NâleKab perkojininga maliklugo, tangmârterpullo Refidime: tagvane imekangilak inuit imiksanganik.

2 Taimaimat inuit Mosese okarnerlûtivât, okarlutiglo: Imermik tunitjivigitigut imerungnarkovluta. Mosesiblo akivait: Sudluse okarnerlûtivisingâ? Suna pivlugo Nâlegak ôktorpisiûk?

3 Tagvanelo inuit kêdlarput; inuillo Moseselo okarnerlû-tivât, okarlutiglo: Sôk Egiptenemit majoartipitigût, uvagut kitorngavullo nergjutivullo tokotsomavluta kêdlarnermut?

4 Moseselo kaigarsukpok Nâlekamut, okarlune: Inuit ukkoa kanok piniarvigijaksarivakkâ? Milloromakasakpânga ujarkanut!

5 Nâlekablo Moseselo okautivâ: Inuit sakkangine sivumuarit, Israêlikullo angajokângita illangit illagikit; ajaupiallo, anautarilauktat kôngmik, tiguleruk agganut, ailerillo.

6 Ahâk, nangeromavunga sângne tagvane kairtub kângane Hôrebeme; kairtorlo anaujaksarivat, imerlo anilârpok tâpsomangat, inuit imerungnarkovlugit. Moseselo taimailiorpok Israêlikut angajokângita takoane.

7 Nunablo tâpkutsia atserarpâ Massamik (ôktorlungnermik) Meribamiglo (nangârnermik), Israêlikut nangârningat pivlugo, Nâlegarlo ôktormatsuk, okarlutik: Nâlegak akunaptingnêkâ akunaptingnêngilârlônêt?

8 **Amalekiterit** tagva tikkiput, Israêlikunut sorsuklutik Refidime.

9 Moseselo Josuamut okarpok: Angutininik anerosugit uvaptingnut, anilutillo Amalekiterinut sorsuklutit: kaupat nangeromavunga kakkaub kângane Gûdib ajaupianga aggan-nêtilugo.

10 Josualo taimailiorpok sorlo Mosesib okautingmago, Amalekiterillo sorsuklugit: Moseselo, Aronelo, Hurelo majorarput kakkaub kânganut.

11 Imaiporlo: Mosesib agganê isâktigamigit, Israêlikut sâlakalerput, agganêlo kataktigamigit, Amalekiterit sâlakalerput.

12 Mosesible agganit okumailerput, tiguvuglo ujarangmik illilugolo atânut, tâpsomalo iksivavigivâ; Aroniblo Huriblo najumivait agganit, aipangata igluanit aipangatalo igluanit; agganillo aulatjairput sekinerub nipilerninga tikki-dlugo.

13 Josuablo Amalek inungillo sâlagivait saviksûb kênanganut.

14 Nâlekablo Moseselo okautivâ: Tamanna erkaumajaurkovlugo aglaguk aglangnut makperterpaktunut, Josuablo siutîgingnut unipkautigiuk Amalekib erkaumajauninga nungutidlaromagapko kilaub atânit.

15 Moseselo tunerguserviliorpok atserarpâlo: Nâlekab iksivautaksoanganik:

16 Okarporlo: Aggait illivlugit Gûdib iksivautaksoanganut, Amalekiterit sorsudlarkit Nâlekamut kitorngarênit kitorngarênut.

KAP. XVIII.

Jetrob tikkininga Mosesemut. Jetrob attanertuininga.

1 **JETRO**, ajokertuijok Midiamé, Mosesib sakkia, tussarame tamainik Gûdib piniarninginik Mosesemut inukotiminullo Israêlikunut, Nâlekablo Israêlikut anitingmagit Egiptenemit;

2 Jetrub, Mosesib sakkiata, tiguvâ Zipora Mosesib nulianga, angerartitavininga,

3 Ernîgiglo; (aipâ Gersomemik attelik, okarmat: Tujormiangovunga nuname ilitarnangitome:

4 Aipangalo Eliêseremik attelik, okarmat: Atâtama Gûdingata ikajortima piulivânga Faraub saviksoanganit:)

5 Jetrub, Mosesib sakkiata, ernîgik nuliangalo illagellugit, Mosese tikkipât sunakajuitome, tangmârporlo Gûdib kakkanngane:

6 Okarporlo Mosesemut: Uvanga, Jetro, sakkit, tikkipunga illingnut nuliat ernîgiglo illagellugit.

7 Mosese anivok sakkine pagrearlugo, okkovlunelo kunikpâ; aperiutivuglo kanoelingamangârmik; tuppermullo iterpuk.

8 Mosesiblo sakkine unipkautivâ tamainik Nâlekab piniarninginik Faraomut Egiptenemiunullo Israêlikut pivlugit, siorniorneringlo tamainik tikkitigijamingnik apkosinerme, kanorlo Nâlekab piulingmagit.

9 Jetrolo kuviasudlarpok ajungitulinek tamât pivlugo, Nâlekab piniarnerijanga Israêlikunut piulijanginut Egiptenemiut agganginit.

10 Jetrolo okarpok: Kujanarsile Nâlegak piulijigijase Egiptenemiut agganginit, Faraublo agganginit, inuit piulijigijangat Egiptenemiut agganginit.

11 Mâna nellojungnairpunga Nâlegak anginersaungmat gûdinit tamainit; pingijairksârningine tâpsoma alliutivait.

12 Jetrolo, Mosesib sakkia, âtsivok ôtaksanik tunergutiksaniglo Gûdemut: Aronelo Israêliblo angajokângit kaivut Mosesib sakkia nerrikatigivlugo Gûdib sângane.

13 **Kaungmallo** Mosese ingipok inuit idluarsaromavlugit: inuillo nangerput Mosesib avatâne uvlârmit unnungmut.

14 Mosesiblo sakkia takonârmat tamainik piniarninginik inungnut, okarpok: Sunauvâ tamanna piniarnerijat inuit

pivlugit? Sugavit iksivavêt inutôvlutit, inuillo ilûnatik nangerdlutik avatingne uvlârmit unnungmut?

15 Mosesiblo sakchine okautiva: Inuit unneksiorviging-manga unertutijaujomavlutik Gûdemik:

16 Anârtûtiksakarpatia uvamnôrput, idluarsaivungalo in-ungmik inôkatiminiglo, ajokertorpakkalo Gûdib maligaksaur-kojanganik perkojanganiglo.

17 Mosesiblo sakkiata okautivâ: Iliornît tamanna nâma-lungilak.

18 Sujudlamarilârpotit, igvillo inuillo ukkoa illagijatit; tamanna okumailuarpok illingnut; inutôvlutit tamanna sul-arijungnangilat.

19 Nippiga tussaruk mâna, ajokertoromavagit, Gûdiblo illagijomavâtit: Igvit inuit pivlugit sakkijârit Gûdib sângane, âtsijungnarkovlutit sujuksautigijanganik Gûdemut:

20 Ajokertoraksarivatillo maligaksaurkojaujunik perko-janiglo, unertûtijaksarivatillo apkomik arvertarvigijaksari-janganik, piniarnerniglo piniaraksarijanganik.

21 Taimagletauk inuit ilûnatik akornganit kenertuksau-votit angutunik kakiarnaitunik, Gûdemik sivôrajunik, angu-tunik nelâgôrtunik, pijomatudlarnermik omisuktunik; anga-jokângortilugillo tâpkonunga, angajokautilugit 1000nut, anga-jokautilugit 100nut, angajokautilugit 50nut, angajokautilu-gillo 10nut.

22 Tâpkoalo idluarsailit inungnik neliutune tamaine: imai-lingalârporlo, pijariakortojut tamaita âlârpait illingnut, pijari-akitulle tamaita tâpkoa idluarsaijutigilârpait: taimak okiner-sauniarpok illingnut, tâpkoalo nangmarkatiginiarpait.

23 Taimailioruvit, Gûdiblo perkopatit, piganerungnalâr-potit, inuillo tamakkoa ilûnatik angerarungnalârput ulapirk-sautekarlutik.

24 Mosesiblo sakkime nippinga nâlekpâ, piniarlunelo ta-mainik okautigijanganik.

25 Mosesiblo angutit kakiarnaitut kenerpait Israêlikunit tamainit, aulatsijungortipaillo inungnut, angajokautilugit 1000nut, angajokautilugit 100nut, angajokautilugit 50nut, angajokautilugillo 10nut.

26 Tâpkoalo inuit idluarsarpait neliutune tamaine: oku-maitut âpait Mosesemut, pijariakitulle tamaita nangminek idluarsaijutigivait.

27 Mosesiblo sakchine aulartipâ; tâmnalo angerarpok nuna-minut.

KAP. XIX.

Gûdib okauserijangit inungnut Mosesekut Sinaimit. Inuit opalungaijartauvut.

1 **TAKKIT** pingajuane, Israêlikut aniningata nunamit Egiptenemit kingorngane, uvlorme tâpsomane tikkiput Sinaib sunakajuitunganut.

2 Aularsimangmatta Refidimit, tikkisimavlutiglo sunakajuitomut Sinaimut, tangmârpullo sunakajuitome; tagvane Israêlikut tangmârupt kakkaub nellâne.

3 Moseselo majorarpok Gûdemut, Nâlekablo kaigarsugvigivâ kakkamit, okarlune: Imâk okartuksauvotit Jakokunut, Israêlikullo okautilugit;

4 Egiptenemiunut piniarnerijakka takolaukpase, kanorlo nangmarapse nektoralit esarkunginut, tikkiutitiluselo uvamnūt.

5 Mânalo nippiga nâlegomagupsiuk nelâgut, angerutigalo nelautsitilugo, tagva pivianartokutiksaunersaulârpose adseogase uvamnūt inungnit tamainit: tagva nuna ilûnât pigivara:

6 Atanioviojuksaulârpose ajokertuijut uvamnūt, inôkati-gêllo ivsornaitut. Tamadja okautsit okauserijaksarijatit Israêlikunut.

7 **Moseselo** tikkipok inuillo angajokângit kairkojaurkovait, okautsillo tamakkoa tamaita NâleKab perkojangit tâpsomunga sângiutivait tâpkonunga.

8 Inuillo ilûnatik atautsikut kiovut, okarlutiglo: NâleKab okauserijangit tamaita piniaromavavut. Mosesiblo inuit okausingit âpait NâleKamut.

9 Nâlekablo Moseselo okautivâ: Ahâk, tikkitsomavagit nuvujame isortaksoarme, inuit tussarkovlugit okarkatigigupkit, illingnullo okperkovlugit nâksaungitomik. Mosesiblo inuit okauserijangit okautigivait NâleKamut.

10 Nâlekablo Moseselo okautivâ: Inuit aivigikit, ivsornaitilugillo uvlome kaupallo, ergortuilillo annorâmingnik,

11 Opalungaijarlillo uvlut pingajuanut: uvlut pingajuane Nâlegak akkaromârmat kakkamut Sinaimut inuit ilûnatik takoane.

12 Inuillo kigililervekartitaksarivatit avatâgut, okarlutit: Ulloreasugitse kakkamut majorarkonase, aktornagolônêt kiglinga: nelliat aktuijok kakkamik tokotaksauvok.

13 Aggaillônêt aktoraksaringilât, kissiane ujarangnut mil-

lortaugune pittiktauvlunelônêt; nergjuteokpallônêt inôkpal-lônêt inôjuksaungilak: tiptulaut sivitojomik nipliarpat, kakka-mut kaijuksauvut.

14 Moseselo atersarpok kakkamit inungnut, ivsornaitilai-talo; tâpkoalo annorâtik ergortorpait.

15 Inuillo okautivait: Opalungaijaritse uvlut pingajuanut, arnaselo aktorniarasigik.

16 **Sunaubvalo**, uvlut pingajuane uvlâkut kalluit kauma-laillo, nuvujarlo isortak kakkamêpok, tiptulautiblo nippinga nipperkortudlartok; inuillo ilûnatik tangmârvingmêtut saju-dlarpot.

17 Mosesiblo inuit anitipait tangmârvingmit Gûde pagrear-lugo; nangerpullo kakkaub kiglingane.

18 Kakkarle Sinai ilûnane iserludlarpok, Nâlekab akkar-vigingmago ikomakut; iserlungalo kongmuarpok sorlo iko-maksoakarviksûb iserlungatut, kakkarlo ilûnane sajukpiludlarpok angijomik.

19 Tiptulautiblo nippinga nipliangmat sivitojomik nip-perkortosivaliavlunelo, Mosese okarpok, Gûdiblo kiovâ nip-pekut.

20 Nâlegarlo akkarpok kakkamut Sinaimut, kakkaub kânganut. Nâlekablo Mosese kairkovâ kakkaub kânganut; Moseselo majorarpok.

21 Nâlekablo Mosese okautivâ: Atersarit, inuillo inerter-kit kibliguterkonagit Nâlekamut takojomamut, unuktullo tâpkonangat asserorkonagit.

22 Ajokertuijullo, Nâlekamut kaglilertut, ivsornaitilit nangminermingnik, Nâlegak kibliguterkonago tâpkonunga.

23 Mosesiblo Nâlegak okautivâ: Inuit tikkitsungnangilat kakkamut Sinaimut: inerteraptigut, okarlutit: Kiglilerve-kartitsilerit kakkaub avatâgut, ivsornaitiuglo.

24 Nâlekablo okautivâ: Attê, atersarit, majorartuksau-votillo, igvillo Aronelo aiparilugo, ajokertuijulle inuillo kib-ligutiniaratik majoraromavlutik Nâlekamut, tâmna kibligu-terkonago tâpkonunga.

25 Taimainat Mosese atersarpok inungnut okarvigilugillo.

KAP. XX.

Perkojat 10. Inuit kapiasukput, Mosesib manigorpait.

1 **GUDELO** okarpok okautsinik makkoninga tamainik, okarlune:

2 Uvanga Nâlegauvunga Gûdît, âtsisimajok illingnik nuna-mit Egiptenemit, iglomit kupalôvingmit.

3 Senipkut assimnik Gûdekartuksaungilatit.

4 Inungoarmik adsingoarmiglônêt senajuksaungilatit piv-lutit, takpâne kilangmêtub adsinganiglônêt, kilaub atânêtub adsinganiglônêt, nunab atânêtub imânêtub adsinganiglônêt:

5 Taimaitut tuksiарvigijaksaringilatit kivgartornagillo: Uvanga Nâlegaujunga Gûdît ilungertudlarlunga Gûdeogama, atâtat idluitulininginik pidlarnikteojunga kitorngangine uvam-nik omisuktune ernerêt kingorlerêt pingajungit sittamangillo tikkidlugit:

6 Nâpkinignergimigle sakkertitsivunga tausendeokattar-tune nagligijimne perkojamniglo nâlektune.

7 Nâlekab Gûdivit attinganik atonerluktuksaungilatit, Nâlekab pidlartailiniangimago atinganik atonerluktok.

8 Uvlok Sabbateojok erkaruk, ivlerijaurkovlugo illi-gnut.

9 Uvlut sixit kingorlerêklutik senajuksauvotit, suliaksa-tillo tamaita piniarlugit:

10 Uvlulle seveningane Nâlekab Gûdivit Sabbatinga neliu-tivok: tagva sumiglônêt senajuksaungilatit, igvit, ernîllônêt, panîllônêt, kivgallônêt angut, kivgallônêt arnak, nergjuteko-titillônêt, illagingitallônêt najugarnêtok:

11 Uvlune sixine Nâlekab kilak nunalo imarbiglo ilûnai-talo imab iluanêtut senalaungmagit, uvlullo seveningane merngoersilaukpok: tamanna pivlugo Nâlekab uvlok Sabba-teojok saimanartipâ ivsornaitilâllo.

12 **Atatangnik** anânangniglo nâlektuksauvotit: akkunêr-tomik inôniarkovlutit nuname Nâlekab Gûdivit tunijangane illingnut.

13 Inuartuksaungilatit.

14 Nuliarêngnergimik asseroijuksaungilatit.

15 Tigliktuksaungilatit.

16 Inôkatitit saglôtigivlugit okartuksaungilatit.

17 Inôkativit iglunganik pijomajuksaungilatit, inôkativit nulianganik, kivganganiglo angumik, kivganganiglo arnamik,

tuktuvakotinganiglo, siuterkortojojokotinganiglo, sunatuinar-niglônêt inôkativit perkutinginik pijomajuksaungilatit.

18 **Inuillo** ilûnatik malugivait kalluit, kaumalaillo, tiptu-lautiblo nippinga kakkaublo iserlungninga: inuillo tamanna takogamitsuk nûput, alivasiktomelo nangerput.

19 Mosesemullo okarput: Igvit okarvigigit, nâlegoma-vogullo: Gûdible okarviginiaratigit, tokolerkonata.

20 Mosesiblo inuit okautivait: Erksiniarase: Gûde tik-kisimangmat ôktoromavluse, sivôranarningalo kênapse sângi-nêrkovlugo, idluitulerkonase.

21 Inuillo alivasiktome nangerput, Moseselo kaglilerpok tâktoksoarmut isortamut Gûdib innigijanganut.

22 **Nalekablo** Mosese okautivâ: Imâk okartuksauvotit Israêlikunut: Takosimavose okarvigigapse kilangmit.

23 Silbereojunik gûdeokatajuksanik uvamnut senajuk-saungilase, illipsingnullo gûdeliortuksaungilase goldeojunik.

24 **Ivjomik** tunerguserviliortuksauvotit uvamnut, tâpsomalo kângane tunergusertuksauvotit tunergutinik ôtaksanik, tunergutiniglo kujalijutiksanik, saugakotingnit tuktuvakotingnillo; innine tamaine attimnik taisiviorkojamne tagvane tikkitsomavagit saimauseromavagillo.

25 Ujarangnigle tunerguservilioromaguivit uvamnut, ujarangnut senamajunut senajaksaringilat: senagutit kivigungne tâpsomunga ivsornartipat.

26 Majûtutigullônêt majoartuksaungilatit tunerguservimnut, kangunarnît sakkijârtitaurkonago tâpsoma sângane.

KAP. XXI.

Perkojat maligaksallo sunatuinait.

1 **TAMADJA** tagva maligaksat unertutigijaksarijatit tâp-konunga.

2 Pisiniaruvit kivgamik angumik Ebrêereojomik, jârit sixit nâvlugit kivgartortuksauvok: seveninganele aulartuksauvok akkilênane kivgaujungnairlune.

3 Inutôvlune itilaukpat inutôvlune aulartuksauvok: aipakalaukpalle, nuliangata aularkatigijaksarivâ.

4 Angajokângatale tunitjivigikpago nuliamik, tâmnalo ernertârpâ panitârpallônêt, angajokâb nuliak kitorngangillo perkutiginiarpait, tâmnalo inutôvlune aulartuksauvok.

5 Kivgarle nelonangitomik okarpat: Angajokâra aiparalo kitorngakkalo ungagivakka: kivgaujungnairmangilanga:

6 Angajokângata tikkítitaksarivâ idluarsaijunut; tikkítitaksarivâlo upkoarmut, upkoablônêt nappajuanut, angajokângatalo siutinga puttoraksarivâ puttorutemut; tâmnalo kivgartoraksarivâ soraijuitomik.

7 **Inuble** panine niorvgutigikpago anânaurkovlugo, tâmna anijuksaungilak sorlo angutit kivgat pingmatta.

8 Nâmaksititsilungipat angajokâminik tigujiminik nangminerijomavlugo, tâpsoma uttertítaksarivâ akkimut: niorvgutiksarilugole inôkatigênut takorngartanut pitsartunekartuksaungilak, uivêrilaauramiuk.

9 Ernerminulle aipaksautisimaguniuk, iliorvigijaksarivâ sorlo panine iliorvigigamigit.

10 Nuliarnigune tâpsoma senilianik, mikitlijuksaungilak tâpsoma nerkiksanginik, annorâksanganiglo, nuliablo piksanginik.

11 Tamakkoale pingasut piniarutigingigunigit tâpsomunga, tagva tâmna anijuksauvok kelarudjartauvlune akkilênanelo.

12 **Anauniktok** inungmik tokodlugo, tâmna tokotaksauvok.

13 Inugle terliarsilungipat, Gûdible pitipago agganginut, tagva unertutitsomavagit kemâviksariniartanganik.

14 Inuble pijarellune seniline tikkipago pingitserterlune tokotsomavlugo, tâmna tigujaksarivat tunerguservinmit aglât, tokotaukovlugo.

15 Anauniktok atâtaminik anânaminiglônêt, tâmna tokotaksaudlarpok.

16 Tigliktorlo inungmik niorvgutigilugolo, ubvalo nagvârtaukpat aggangine, tâmna tokotaksaudlarpok.

17 Okarniluktorlo atâtaminik anânamimiglônêt, tâmna tokotaksaudlarpok.

18 Angutillo ningautigunik, aipangatalo aipâ milorpago ujarangmut, tiglukpagolônêt, tokolungipat, inangavingminele nelangajuksaukpat:

19 Makkimikpat anilunelo ajaupialijarlune, milornilauktok tâpsominga pidlaraksaungilak: kissianele akkilêjuksauvok taipsoma sulitailititauninganik, âkiktaumariktítaksarivâlo.

20 Inuble kivgane angut arnarlônêt anaukpago ajaupiamut, tâmnalo tokokpat agganginut, pidlaraksaudlarpok.

21 Kissianele kaggujaukpat uvlormik atautsemik maggunniglônêt, pidlaraksauniangilak; perkutigigamiuk.

22 Inuit ningautigunik, arnarlo singaijok akkunarlugo, singainga pêrkovlugo, kanoetomigle maliktokartinago: pidlar-

taujuksauvok arnab uingata pijomajanga maliklugo; akkilê-juksauvorlo idluarsaijut nâmagijanganik.

23 Kanoetomigle maliktokarpas, tagva tunitjijuksauvotit inôtsemik inôtsemut,

24 Ijemik ijemut, kigumik kigumut, aggangnik aggangnut, ittikanik ittikanut,

25 Ônermik ônermut, ikkemiglo ikkemut, tiglûjarmiglo tiglûjarmut.

26 Inublo kivgane angut kivganelônêt arnak tiglukpago ijingagut, ije asserorlugo; kivgaujungnaivlune aulartitaksarivâ ijine pivlugo.

27 Tigluklugolônêt kivgane angut kivganelônêt arnak kigutairpago, kivgaujungnairlune aulartitaksarivâ kigutine pivlugo.

28 **Tuktuvaublo** angut arnarlônêt nakjungmigarpago tokodlugo, tuktuva milortaujuksauvok ujarkanut, nerkingale nerrijaxsaungilak; tuktuvauble inua pidlaraksaungilak.

29 Tuktuvagle nakjungmigarsôngolaukpat sivorngane, inualo kaujititaulaukpat tamattominga, parngnanairsorlaungipagolo, tâmnale tokotsigune angumik arnarmiglônêt; tuktuva taimna miloraksaauvok ujarangnut, inualotauk tokotaujuksauvok.

30 Kênaujanigle akkilêrkojaugune tagva tunitjijuksauvok illijivionermitut inôsine pisiarijomavlugo.

31 Nakjungmigarsimamangât ernermiglônêt paningmiglônêt maligaksak tamanna maliklugo piniarviojuksauvok.

32 Tuktuvaub kivgak angut kivgarlônêt arnak nakjungmigarpago, kivgab angajokânga tunitjiviojuksauvok silberemik sêkeletut 30tut. (Sêkele atausek 50 centsetut akkitutingoarpok.)

33 Inublo imektarvik angmarpago, inublônêt imektarvik poagijarpago, mattunagolo, tagvungalo tuktuva siuterkortojarlônêt nakkarpat;

34 Imektarviub inuata akkileraksarivâ, tunitjivlune kênaujanik taipkoa inuanut, kigdlorlo pigijaksarivâ.

35 Inuille nelliata tuktuvangata assime tuktuvinga akkunarpago tokodlugo, tuktuva ômajok niorvgutigijaksarivât, akkingalo avilugo; kigdlorlo avigaksarivâttauk.

36 Kaujijaukpallônêt tuktuva nakjungmigarsôngolaungmat sivorngane, inuatalo parngnanairsorlaungipago, tuktuvangmik tauksêjuksauvok tuktuvangmut; kigdlorlo nangminerijaksarivâ.

KAP. XXII.

Perkojat maligaksallo sunatuinait.

1 **INUK** tiglikpat tuktuvangmik saugarmiglônêt, tokodlugo niorvgutigilugolônêt, tauksêjuksauvok tuktuvangnik telimanik tuktuvangmut atautsimut, saukaniglo sittamanik saugarmut atausemut.

2 Tigligomajok naipitaukpat itârasuartilugo, anaujauk-pallo tokorkovlugo, aungmik kovijaujokartuksaungilak tâмна pivlugo.

3 Sekinek nuisimakpat tâpsomunga, aune pisiarijaksarivâ, tigligarijane uttertita ksaringmagit; sunakangikunele niorvgutigijaksauvok tiglingnine pivlugo.

4 Tigligak ômavlune naipitaukpat aggangine, tuktuvau-ngmangât, siuterkortojorlônêt, saugarlônêt, maggoertorlugo akkileraksarivâ.

5 Inub perorsêvik vaineliksataliglônêt nerrijautikpago, nergjutinelo tagvungautikpago nerrerkovlugo inub assime perorsêvingane, perorsêvingme ânanauninga vaineliksataling-melônêt ânanauninga tauksiutijaksarivâ.

6 **Ikoma** ikoalakpat, ukpigaillo ikilugit, kakkôjaksallo katitat, kakkôjaksallônêt sulle perortut, perorsêviglônêt, ikikataurkovlugit, ikitsijub akkileraksarivait.

7 Inub inôkatine tunitjviviguniuk kênaujanik perku-tiniglônêt piulimajaurkovlugit, inublo tâpsoma iglunganit tigliktaukpatta; tigliktok naipitaukpat akkilêle maggoertor-lugo.

8 Tigliktorle naipitaungipat, iglub angajokânga âtaujuk-sauvok idluarsaijunut, nautsertortaurkovlugo aggame isalau-ngmangâgit inôkatime perkutinginut.

9 Inub inôkatine passilerpago nâmangitulinerмик suna-mik, tuktuvak, siuterkortojorlônêt, saugarlônêt, annorâllônêt, assiosimajullônêt sunatuinait passijutaugalloarpatta, tamar-mik pitjutingit âtaujuksauvut idluarsaijunut; idluarsaijullo passijangat akkilêjuksauvok maggoertorlugo inôkatiminut.

10 Inub inôkatine unertutjvivigikpago siuterkortojomik, tuktuvangmiglônêt, saugarmiglônêt, sumiglônêt nergjutemik, piulimajaurkovlugo; unertutausimajok tokokpat, akkunar-taupallônêt, aularutijaukpallônêt, takonârtokartinago:

11 Tâpkoa angerkatigêmariktuksauvuk Nâlekamut, taip-soma aggame isaktilaunginamigit inôkatime perkutinginut;

perkuteliublo tamanna nâmagijaksarivâ, ipsomalo tauksigaksaringilâ.

12 Tigliktaukpalle tâpsomangat tauksigaksarivâ inuanut.

13 Alliktortaukpat âliuk nelonaijautigivlugo, alliktortarlo tauksitaurkojaksaringilâ.

14 Inuglo attarsikpat sunamik inôkatiminit, akkunartaukpallo tokokpallônêt inua tagvanêtinago, tauksigaksarivâ.

15 Inuatale najorpago tauksigaksaringilâ, attartortaukpat kênaujanut, attautimut kailaukpok.

16 **Inublo** uigasuk aipaksarilungitane uerisarpago tutiklugolo singairkovlugo, aiparijaksarivâ.

17 Atâtangatale panine kippilûtigimarikpago tâpsomunga, taimna akkilêjuksauvok kênaujanik, sorlo uigasuit patta-ngaititaujutekariakarningititut.

18 Arnak angakkok inôrkojaksarilungilat.

19 Nelliata nergjute tutikpago (uvinekakatigijomavlugo) tokotaksauvok.

20 Tunergusertok gûdit nellianut, Nâlegaujotôlungitomut, asserortauharihtuksauvok.

21 Takorngartak nakêlititaksarilungilat okumaiksartina-golo; takorngartaulaurapse nuname Egipteneme.

22 Kapiasuktitsijuksaungilase uigarnerit nellianik, illiar-sungmiglônêt.

23 Kanorlônêt kapiasuktigunge, unneksiorvigikpangalo, tussaromadlarpunga nipliarninganik;

24 Ningaumajârneralo ônarsilârpok, tokotsomavapselo saviksoarmut; nuliaselo uigarniolârput, kitorngaselo atâtairlârput.

25 **Inukotima** illangat aklujok illingnêtok attartortigunge kênaujanik, ilingavigijaksarilungilat kênaujaniaromajotut, akkilêtitaksarilungilat attautemik.

26 Tigusiguvit assivit annorânganik tauksiutiksautilugo, uttêtitaksarivat tâpsomunga sekinek nipilerkârtinago;

27 Kepituarivâ taimna, matuksarilugo uviningminut: sumik ussingasiksakarniarkâ? Imakâ nipliarvigilârpânga, tussaromavaralo; nâpkigosuktôgama.

28 Idluarsaijut mitautigijaksaringilatit, inôkativillo angajokângit okarnerlûtinagit.

29 Mulludlartuksaungilatit paungavit innertut, imiksavillo sivorlerpângit tunerguserilugit; ernivillo angajuklingat tunijaksarivat uvamnut.

30 Taimaktauk tuktuvatit saugatillo taimailiorvigijaksa-

rivatit; uvlunik sevenenik anânaminêtuksauvok, uvlulle Singane tunijaksarivat.

31 Ivsornaituksauvose uvamnut: nerrijuksaungilaselo ner-kêjamik ômajut naternamêtut aliktortanganik; egitaksarivase kingminut.

KAP. XXIII.

Perkojat maligaksallo sunatuinuit.

1 **UNIPKAUSIKSALIORTUKSAUNGILATIT** miksekârtôlungitomik; aggatit ilautailitikit idluitulijunut kiglīgiudjijôjomavlutit nelâgôngitomik.

2 Inugiartoksuit maligaksarilungilatit idluitulijomavlutit; idluarsaivingmelo kiojuksaungilatit idluarnekk muminasuaromavlugo inuit unuktut taimailiormatta.

3 Inuglo aklujok nertoraksarilungilat akkerartorninga pivlugo.

4 Omigijivit tuktuvakotinga siuterkortojokotingalônêt tammaumajok naipigungne uttertitaaksarivat tâpsomunga.

5 Illingnik omisuktub siuterkortojokotinga ochosimajok nangmartame atâne takogungne, ikajortailigosugalloarungne ikajoraksarivat.

6 Idluarnekk sangutitaksarilungilat pattangajomit erkartortaulertilugo.

7 Ungasigit pingitserternermit nelâgôngitomit; passijaksaungitullo idluartullo tokoniarnagit, idluitut idluarneraromanginapkit.

8 Tunergusianiglo tigusijuksaungilatit: tunergusiat tautuktut tautungitingmagit, idluartublo okausingit mumikpait.

9 **Takorngartarlo** okumaiksartitaksarilungilat: takorngartaub ômatinga illitarigapsiuk, illipse takorngartaulaurapse nuname Egipteneme.

10 Jârit sixit kingorlerêklutik nunat karngavigijaksarivat paungangillo katersorlugit:

11 Jârille seveningane merngoersertitaksarivat kikkartilugolo, inôkativit aklujungit nerrijungnarkovlugit; tâpkoalo amiakôtitangit ômajut naternamêtut nerrijaaksarivait. Taimailiorvigijaksarivallo perorsêvit vaineliksatalik perorsêvillo orksuktalik.

12 Uvlut sixit kingorlerêklutik, suliakartuksauvotit, uvlullo seveningane merngoersertuksauvotit, tuktuvait siuter-

kortojuillo merngoerсерунgnarkovlugik, kivgavillo arnab er-ninga, tujormiarlo nakokserkovlugik.

13 Tamaitalo okauserijakka illipsingnut nâleksigik: gûdillo assima attingit erkaumaniasigik, kanernillônêt tussartauniaratik.

14 **Pingasuertorlutit** jâreme uvloksiorviksiortuksauvotit uvamnut.

15 Uvloksiorvik sêrnarsautekangitunik kakkôjaktorvik uvloksiorutigijaksarivat: kakkôjaktortuksauvotit sêrnarsautekangitunik uvlunik sevenenik, sorlo perkogapkit, takkiub Abibib neliuningane: tâpsomane anilauravit Egiptenemit: tunergutiksaliजारanelo sakkertokartuksaungilak sârne:

16 Uvloksiorviglo sulinivit paungangita sivorlerpât, karn-gasortavinivit perorsêvingnut, katersivingat: uvloksiorviglo katersivik, jârib nâningane neliutijok, perutsiatit perorsêvingnit katersorêrungne.

17 Pingasuertorlutik jâreme angutitit ilûnatik sakkijâr-tuksauvut NâleKab Gûdib sângane.

18 Uvamnut tunergutaujub aunga tunergutiksarilungilat illakartilugo kakkôjamik sêrnarsautelingmik; uvamnullônêt tunergutaujub orksunga komergutaujuksaungilak uvlâk tik-kidlugo.

19 Nunavit perortungita sivorlerpângita ânanaunerpângit âtaksarivatit NâleKab Gûdivit iglunganut. Tuktungajoarak amâmaktok sulle igajaksarilungilat.

20 **Ahak**, sivunerne Engele tilijomavara, saputjerkovlugo illingnik apkome, tikkitilutillo iniksaliarimajamnut perkovlugo.

21 Illeragiuk, nippingalo nâleklugo, sinaungasarniarnagolo; tappanise issumagijungnairniangimagit: attera tâpsomanêng-mat.

22 Nippingale nâletsiarungne, piniarlutillo tamainik okau-serijamnik, omisukteojomavunga omigijingnut, akkerartorteovlungalo akkerartortingnut.

23 Engelima sivorlerniarpâtit, tikkitilutillo Amoriterinut, Hetiterinullo, Perisiterinullo, Kânaaniterinullo, Heviterinullo, Jebusiterinullo; tâpkoalo kippigomavakka.

24 Tâpkoa gûdingit pâmaktervigijaksaringilatit kivgartor-nagillo, piniarningillônêt malingnagit; ochomariktitaksariva-tille, gûdingoangillo okpikâtilugit.

25 Nâlegarlo Gûdise kivgartoraksarivase, tâpsomalo ner-kiksaitit imiksatillo saimartitsomavait; kanimaserillo pêjaro-mavakka akunapsingnit.

26 **Serkomitsijokaromângilak** piaraksamingnik, kitorngi-suitokaromâranelo nunangne; uvluksavillo unurningit nâ-maksititsomavakka.

27 Sivôranek uvamnik tilijomavara sivunerne, inuillo ilûnaita tikkilârtatit asseroromavakka, omigijitillo ilûnaita tunutitsomavakka illingnik.

28 Igupsaksuillo tilijomavakka sivunerne, tâpkoa Heviterit, Kânaaniterillo, Hetiterillo kemâtilârpait sivunernit.

29 Jâreme atauserme kemâtitsomangilakka sivunernit, nuna inuerutjaudlaroarmat, ômajullo naternamêtut unuksidla-roarmatta illingnut.

30 Nellekârdlutik kemâtitsomavakka sivunernit, unukser-kârtinak nunalo kingormgutlugo.

31 Kiglekartitsomavagillo imarbingmit suvlolingmit Filis-terit imarbinganut, sunakajuitomillo kôngmut: nunab inungit tunijomagapkit aggangnut; ungorlârpaitillo sivunerkut.

32 Tâpkoa gûdingillônêt angerkatigijaksaringilatit.

33 Inekartuksaungilat nunangne idluitulitidlaroarmatit uvamnut: tagva gûdingit kivgartorungne, tamanna nigarniutitut illingnut ilinganajarmat.

KAP. XXIV.

Moses majorarkojauvok Sinaimut.

1 **MOSESEMULLO** okarpok: Majorarit Nâlekamut, igvit, Aronelo, Nadabelo, Abihulo, 70lo Israêlikut angajokânginit; alivasiktomelo tuksiaritse.

2 Moseselo kissime kaglilertuksauvok Nâlekamut, tâp-koale kanitomot kaijuksaungilat; inuillônêt majorarkatigijaksaringilat.

3 **Mosesiblo** inuit okautijartorpait Nâlekab okausinginik tamainik, maligaksaniglo tamainik; inuillo ilûnatik nippemut atausermut kiovut, okarlutiglo: Nâlekab okauserijangit tamaita piniaromavavut.

4 Mosesiblo Nâlekab okausingit ilûnaita aglakpait, uv-lârarsukullo makipok, tunerguserviliorporlo kakkaub atâne, nappajuliorporlo 12nik, Israêlib kinguvârêngit 12 maliklugit.

5 Tiliklerporlo angutinik inôsuktunik Israêlikunit, tâp-koalo tunerguserput tunergutiksani otaksani tunergutiksaniglo kujalijutiksani tuktuvangnik Nâlekamut.

6 Aungitalo abvanga Mosesib tiguva kovilugolo pôgutaujanut; aublo abvanga serkerautigilugo tunerguservingmut.

7 Angerkatigêngnerublo aglangit tiguvait atuarsivlunelo inuit tussâtilugit: tâpkoalo okarput: Nâlekab okauserijangit tamaita piniaromavavut, nâlegomavlutalo.

8 Mosesiblo auk tiguvâ serkerautigilugolo inungnut, okarlunelo: Ahâk tagga, tamadja angerkatigêngnerub aunga, Nâlekab illipselo angerkatigêgutigijase okautsit tamakkoa pivlugit.

9 **Tavga** Mosese, Aronelo, Nadabelo, Abihulo, 70lo Israêlikut angajokânginit majorarput:

10 Israêliblo Gûdinga takovât: ittigangitalo atâne pita-karpok sorlo ujarkanik keblâlâjunik, sorlolo kilaktut alla-kidlarartilugo.

11 Tâpsomale aggane illilungilait Israêlikut angajokânginut: taipkoale Gûde takonârpât, nerrilutiglo imerput.

12 Nâlekablo Mosese okautivâ: Majorarit uvamnut kakkamut, tagvanêtuarlutillo: tunitjivigijomavagillo aglaksima-vingnik ujarkanik, maligaksaniglo perkojaniglo aglaktamnik; ajokertuijungnarkovlutit tâpkoninga.

13 Moseselo nikovipok kivgangalo Josua; Moseselo majorarpok Gûdib kakkanganut.

14 Angajokâllo okautivait: Utakigitse tamâne, tikki-tsiarilunuk: Takoitse, Aronelo Hurelo illipsingnêpuk: pitjutik-sakartokarpat, tâpkungnunga kaituinarle.

15 Moseselo majorarpok kakkamut, nuvujablo kakkak ulikpâ.

16 Nâlekablo pinnarnarninga kakkame Sinaime innekar-pok, nuvujablo ulikpâ uvlunik sixinik: uvlullo seveningane kaigarsukpok Mosesemut nuvujab iluanit.

17 Nâlekablo pinnarnarningata tautua ipok sorlo ikomatut nungutsijotut kakkaub kângane Israêlikut ijinginut.

18 Moseselo nuvujab iluanut iterpok, majorarlunelo kakka-mut: Moseselo kakkamêpok uvlunik 40nik unnuaniglo 40nik.

KAP. XXV.

Tupek ivsornaitok perkutingillo ajokertûtauvut.

1 **NALEKABLO** Mosese okarvigivâ, okarlune:

2 Israêlikut okarvigikit kaitserkovlugit tunergutunik uv-amnut: inungnit tamainit kuviasuklutik ômatimingnullo tunitjijunit tigujaksarivase tunergutit uvamnut.

3 Tamadja tunergutit tigujaksarijase tâpkonangat: Gol-delo, silberelo, kakorlerlo,

4 Tungujoktarlo, tungulângajorlo, aupalutsiartorlo, kab-lunâktajatsiarlo, tuktungajullo merkungit;

5 Saukallo angusaluit amingit aupaluktitaumajut, kab-vîllo amingit, kejutsiarsajallo;

6 Orksullo kollinut, tippigiksaullo orksunut mingoarutik-samut, isserluanerutiksamullo tippitsiariktomut;

7 Alliguillo tungujuangajut, alliguillo illijaksat ikkiarmut opinartomut, sagvingmiutarmullo.

8 Ivsornaitoviliorlillo uvamnut, inniksakarungnarkovlu-nga akorngane.

9 Tamaita illingnut unertûtigijakka, tupiub ôktûtinga perkutingitalo ôktûtingit maliklugit, taimak senajaksarivase.

10 **IKLERVILIORTUKSAUVUT** kejutsiarsajamit: taller-tut maggotut abvatullo takitigijuksauvok, tallertullo atausertut abvatullo senimukarlune, tallertullo atausertut abvatullo poktotigijuksauvok.

11 Kallinekartitaksarivallo goldemik illakangitomik, sil-latâgullo illuagullo kallinekartitaksarivat. Kângalo avalia-rutakartitaksarivat goldemik avatâgut.

12 Tâpsomungalo kovisijuksauvotit nuklunik sittamanik goldemit, illilugillo terrekunginut sittamanut; nuklûk mag-guk senerangata igluanut, nuklûglo magguk senerangata igluanut.

13 Akkigauteliortuksauvotillo kejutsiarsajamit, kalline-kartilugiglo goldemik.

14 Akkigautîglo illijaksarivakik nuklunut iklerviub sene-râgingnêtunut, iklervik akkigartaurkovlugo tâpkungnunga.

15 Akkigautîk nuklunêtsainartuksauvuk: pêjartaujuk-saungilak tagvangat.

16 Kigligiutjinîllo tunijomajakka illingnut illijaksarivatit iklervingmut.

17 Iksivaviliortuksauvotillo saimarvigijauvingmik golde-mit illakangitomit: tallertut maggotut abvatullo takitigijuk-sauvok, tallertullo atausertut abvatullo silliktigivlune.

18 Kerubîngniglo maggungnik goldemit senajuksauvotit; katjuklugik senajaksarivakik, iksivaviub saimarvigijauviub issûgingne.

19 Kerubelo aipâ issuanêtilugo aipâne, Kerubelo aipanga issuanêtilugo aipangane; iksivaviub saimarvigijauviub issû-gingne iglugêngne senajaksarivakik.

20 Kerubîglo issivitsijuksauvuk esarkumingnik kollâgut, iksivavik saimarvigijauvik uliklugo esarkumingnut, kênâgik

sângautijuksauvuk: iksivavik saimarvigijauvik sâvigivlugo kênâgik pijuksauvuk.

21 Iksivaviglo saimarvigijauvik illijaksarivat iklerviub kânganut, kiglīgiutjinîllo tunijomajakka illingnut illijaksarivatit iklervingmut.

22 Tagvanelo naipitsomavagit, okakatigijomavagillo iksivaviub saimarvigijauviub kollânit, kerubîk iklerviub kiglīgiutjinektaliub kânganêtuk akorngangnit, perkojat tamaita pivlugit tunijomajakka illikut Israêlikunut.

23 **Sâliortuksaugivotit** kejutsiarsajamit: tallertut maggotut takitigijuksauvok, tallertullo atausertut silliktigivlune, tallertullo atausertut abvatullo poktotigivlune.

24 Kallinekartitaksarivallo goldemik illakangitomik, avarialarutalioraksarivallo goldemik avatâgut.

25 Pinnarnarsautekartitaksarivallo atâta avatâgut aggait sillingningittitut silliktigijomik, sinningalo avaliarutalioraksarivat kollâgut goldemit.

26 Tâpsomungalo nukloliortuksauvotit sittamanik goldemit, nuklullo illivlugit niulungita sittamat terrekunginut sittamanut.

27 Nuklut sinnakjuata atânêtuksauvut, kejûk akkigautîk, sâmik akkigautîk, kaimitaurkovlugik tagvunga.

28 Akkigautîglo senajaksarivakik kejutsiarsajamit, kallinekartilugiglo goldemik, sâ akkigartaurkovlugo tâpkungnunga.

29 Pôgutanginiglo, allupsautinginiglo, kajutanginiglo kallutanginiglo kalluviojungnarkovlugo, senajuksauvotit goldemit illakangitomit.

30 Sâblo kânganut illijitsainartuksauvotit kakkôjanik takonâraksanik sâmne.

31 Nenneroakaviliortuksauvotillo goldemit illakangitomit: senajaujuksauvok katjuksimajomit: ikkogganga, akkerungillo, kingmingoangoangillo, paungangoangillo, nuvugulânangoangillo tâmnatsainaujuksauvut.

32 Akkerkut sixit anijuksauvut senerâgingnit; akkerkut pingasut senerangata aipânit, akkerkullo pingasut senerangata igluanit.

33 Akkerkut attunit kingmingoangoakartuksauvut pingasunik, paungangoamiglo nuvugulânangoamiglo: taimak akkerkut sixit nenneroakavingmit anijut attunit pitakartuksauvut.

34 Nenneroakaviublo nappajua kingmingoangoakartuk-

sauvok sittamanik, paungangoangit nuvugulângoangillo illa-givlugit.

35 Akkerkuglo akkilerêk atâgut paungangoakartuksaugivok, akkerkuglo akkilerêk atâgut paungangoakartuksaugivok, akkerkuglo akkilerêk atâgut paungangoakartuksaugivok, akkerkut sixit anijut nenneroakavingmit maliklugit.

36 Paungangoat akkerungillo tâmnatsainaujuksauvut: ilûnane goldeojuksauvok katjuksimajomik.

37 Akkisûtingillo sevenit senajaksarivatit, akkisurkovlugit ikomanginik, kaumaivlutiglo sangmijamingnik.

38 Takkersûtingillo argjakautingillo goldeojuksauvut illa-kangitomik.

39 Tâмна perkutingillo ilûnaita senajaksarivatit goldemit illakangitomit talentemit atautsimit. (Talente atausek paundititut 125ititut okumaitigivalaivok.)

40 Kamatsiarillo senarkovlutit tâpkoninga ôktûte uner tutaujok illingnut kakkame maliklugo.

KAP. XXVI.

Tupek ivsornaitok perkutingillo pivlugit.

1 **TUPERLO** senajaksarivat itsanit tellimaujortunit kab-lunâktajatsiamit, tungujoktamillo, tungulângajomillo, aupalutsiartomillo; ânanausilugillo kerubingoanut senajaksarivatit.

2 Itsaksak atausek tallertut 28tut takitigijuksauvok, itsaksarlo atausek tallertut sittamatut silliktigijuksauvok; itsallo ilûnatik adsigêktomik ôktûtekartuksauvut.

3 Itsat tellimat katitaujuksauvut tuglerêklutik, itsallo assingit tellimat katitaujuksauvut tuglerêklutik.

4 Erkearviliortuksauvotillo tungujoktanit itsaksab sivorliub sinningane katiningata sinningane, itsaksablo aipanga taimailioraksarivat sinningane, aipaminut katiningata sinningane.

5 Erkearviliortuksauvotit 50nik itsaksamut atautsimut, erkearvingniglo 50nik itsaksab aipangata sinningane katiningane, erkearvît erkeakterungnarkovlugit.

6 Erkeaktauteliortuksauvotillo 50nik goldeojunik, itsak-sallo katilugit erkeaktautitut: tupingorkovlugit atausemnik.

7 Itsaksaliortuksauvotillo tuktungajut merkunginit, mat-tuksaurkovlugit tupermut: 11nik itsaksaliortuksauvotit.

8 Itsaksak atausek tallertut 30tut takitigijuksauvok,

itsaksarlo atausek tallertut sittamatut silliktigijuksauvok: itsaksallo 11 adsigêktomik ôktûtekartuksauvut.

9 Itsaksallo tellimat katitaksarivatit ingmingnut, itsaksallo sixit ingmingnut, itsaksallo sixingat tappitarêktitaksarivat tupiub sângane.

10 Erkearvingniglo 50nik senajuksauvotit itsaksab sivorliub sinningane katiningane, erkearvingniglo 50nik itsaksab aipangata sinningane.

11 Erkeaktauteliortuksauvotillo 50nik kakorlermit, erkeakterlugillo erkearvingnut, tuperlo katilugo atausiorkovlugo.

12 Tupiublo itsaksangita amiakunga, itsaksab abvanga amiakôjok, nivingajuksauvok tupiub tunuane.

13 Tupiublo itsaksangita takiningita amiakungit nivingajuksauvut tupiub senerâgingne, senerâne ômane, senerânelo igluane, mattuvlugo.

14 Tupiublo mattuksanganik sillallermik senajuksauvotit saukat angusaluit aminginit mingoarsimajunit aupaluktamik, tâpsomalo kânganut sillalliksanganik kabvît aminginit.

15 **Satojaliortuksauvotillo** nappajuksanik tupermut, keju-tsiarsajamit.

16 Sâtojak atausek tallertut tellimaujortotut takitigijuksauvok, tallertullo atausertut abvatullo silliktigivlune.

17 Sâtojak atausek mangokartuksauvok maggungnik, nel-lekarêktûngnik: tupiub sâtujaksangit ilûnaita taimailioraksarivatit.

18 Sâtojallo âkiksoraksarivatit tupermut, sâtojat 20 sengeranganut sekernganut sângajomut.

19 Manguviliortuksauvotillo 40nik silbereojunik sâtojat atânêtuksanik; manguvîk magguk sâtojab atausiub atâne mangûgingnut maggungnut, manguvîglo magguk sâtojab assiata atâne mangûgingnut maggungnut.

20 Tupiublo senerangata igluanut tachânêtomut sâtojakartuksauvok 20nik.

21 Tâpkoalo manguingit 40 silberemit; manguvîk magguk alliovlutik sâtojamut atausermut, manguvîglo magguk alliovlutik sâtojab assianut.

22 Tupiublo tukianut kangianêtomut sâtojaliortuksauvotit sixinik.

23 Sâtojaliortuksauvotillo maggungnik tupiub terrekingnut iglugêngnut.

24 Katitaujuksauvuglo atâgut, katitaujuksauvuglo kol-

lâgut nuklormut atautsimut: tamarmik taimailijuksauvuk; terrekuksaujuksauvullo tamangnut.

25 Sâtojakartuksauvok snik, manguvînginiglo silbereojunik 16nik; manguvîngnik maggungnik sâtojab atausiub atâne, manguvînginiglo maggungnik sâtojab assiata atâne.

26 Senningajuksaliortuksauvotillo kejutsiarsajamit, tellimanik tupiub senerangata sâtojanginut.

27 Tellimaniglo senningajuksanik tupiub senerangata igluanut, tellimaniglo senningajuksanik tupiub tukianut kangianêtomut.

28 Senningajuksarlo ketterdlek sâtojat ketterkangagôrtok ikârtuksauvok issuanit issuanut.

29 Sâtojallo kallinekartitaksarivatit goldemik, nuklungillo, senningajuksat nuklungit, senajaksarivatit goldemit; senningajuksallo kallinekartilugit goldemik.

30 Tuperlo nappartitaksarivat ôktûtinga unertutijaujok illingnut kakkame maliklugo.

31 Upkoliortuksauvotillo tungujoktamt, tungulângajomillo, aupalutsiartomillo, kâblunâktajatsiamillo; ânanausilugillo kerubingoanut.

32 Nivingatitaksarivallo nappajunut sittamanut kejutsiarsajamit kallinesimajunik goldemik: niksingillo goldeojuksauvut, manguvîngne sittamane silbereojune.

33 Upkolo nivingatitaksarivat erkeaktautit atâgut, itertitsijungnarkovlutit iklervîngmik kigligiutjinektalingmik takamunga upkub ungatânut; upkolo aviksiniarpok illipsingnut ivsornaitovîngmik ivsornainerpâmiglo.

34 Iksivaviglo saimarvigijauvik illijaksarivat iklerviub kigligiutjinektaliub kânganut ivsornainerpâme.

35 Sâlo illijaksarivat upkub sillatânut, nenneroakaviglo sâb akkianut tupiub senerangane sekernganut sângajome: sâlo illijaksarivat tachânut sângajome.

36 Tupiublo upkoaksanganik tâlutaliortuksauvotit tungujoktamt, tungulângajomillo, aupalutsiartomillo, kablunâktajatsiamillo, takominarsauteliorgivlugolo.

37 Tâlutarmullo nappajuksaliortuksauvotit tellimanik kejutsiarsajamit, kallinekartilugillo goldemik, erkeaktautingillo goldeojuksaugivut: kovisijuksauvotillo manguvîngnik tellimanik kakorlermit tâpkoa piksanginik.

KAP. XXVII.

Otaksat tunerguservingat perkutingillo.

1 **TUNERGUSERVILIORTUKSAUVOTILLO** kejutsiarsa jamit, tallertut tellimatut takitigivlune, tallertullo tellimatu silliktigivlune; tunerguservik iktokeriktuksauvok: tallertullo pingasutut poktotigijuksauvok.

2 Nakjungillo senajaksarivatit terrekungine sittamane nakjungit tâmnatsainaujuksauvut; kallinekartitaksarivallo kakorlermik.

3 Senajuksauvotillo argjakautinginik, kalugautinginiglo pôgutaujangingiglo, kappokautinginiglo, aumakautinginiglo perkutingit ilûnatik kakorleojuksauvut.

4 Killapatâliortuksauvotillo tâpsomunga nulluangojârtomik kakorlermit; nulluangojârtublo terrekungine sittamane nukloliortuksauvotit sittamanik kakorlernik.

5 Illijaksarivallo tunerguserviub ikomakarvingata atânut nulluangojârtok tunerguserviub kerkanêtsiarkovlugo.

6 Akkigauteliortuksauvotillo tunerguserviub piksâgingnik akkigautîngnik kejutsiarsajamit, kallinekartilugiglo kakorlermik.

7 Akkigautîglo illijaujuksauvuk nuklûngnut, akkigautîglo tunerguserviub senerâgingnêtuksauvuk, akkigarianganut.

8 Sâtojanit senajaksarivat illokarane: sorlo unertutijaungmat illingnut kakkame, taimak senajaksarivat.

9 Tupiublo avatâ avalulioraksarivat; sekerngane avalut tâlutakartuksauvut kablunâktajatsiamik, tallertut 100tut takitigijunik;

10 Nappajungillo 20 manguvikartuksauvut 20nik kakorlernik; nappajullo kikkiaktangit ikârusingillo silbereojuksauvut.

11 Tachânelotauk tâlutakartuksauvok tallertut 100tut takitigijunik, nappajunginiglo 20nik, manguvinginiglo 20nik; nappajullo kikkiaktangit ikârusingillo silbereojuksauvut.

12 Tupiublo avatâta kangianêtub sillingninga tâlutakartuksauvok tallertut 50tut senimortotigijunik; nappajunginiglo 10nik, manguvinginiglo 10nik.

13 Avatâlo kitânêtok tallertut 50tut senimortotigijuksauvok.

14 Tâlutat upkoab senianêtut igluane tallertut 15tut ituksauvut: nappajungillo pingasut, manguvingillo pingasut.

15 Igluanelo tâlutat tallertut 15tut: nappajungillo pingasut, manguvingillo pingasut.

16 Avatâtalo upkoanganut tâlutakartuksauvok tallertut 20tut, tungujoktamik, tungulângajomiglo, aupalutsiartomiglo, kablunâktajatsiamiglo, takominarsauteliortauvlutik; nappajungillo sittamaujuksauvut, manguvingillo sittamat.

17 Nappajut ilûnatik avalunêtut ikârusekartuksauvut silbereojunik, kikkiaktangillo silbereojuksaugivut, manguvingillo kakorleovlutik.

18 Avalut illua tallertut 100tut takitigijuksauvok, sillingningalo tallertut 50tut illûnâne, poktoningalo tallertut tellimatut kablunâktajatsiamit, manguvingillo kakorleovlutik.

19 Tupiublo perkutingit ilûnatik atortangit kivgartornerme, kikkiaktangillo, avalullo kikkiaktangit kakorleojuksauvut.

20 **Israelikullo** kaitserkoniarpatit illingnut napârtut orksunganik kaugarsimajomik ikomaksanganut, kollek ikimatsainarkovlugo.

21 Illagêt tupingane, upkub sillatâne, kigligiutjinektaliub sângane, Aronib erningitalo kamagijaksarivât unnungmit uvlârmut NâleKab sângane; tamanna maligaksautsainartuksauvok kinguvânginut, Israêlikut akorngane.

KAP. XXVIII.

Perkojat Aron erningillo pitjutigivlugit.

1 **ARONELO** angajuit erningillo illagivlugit annerijaksarivatit illingnut Israêlikut akornganit, kivgartorkovlugit uvamnut ajokertuijôvlutik; Arone, Nadabelo, Abihulo, Eleâserelo, Itamârelo, Aronib erningit.

2 Aronemullo angajungnut annorâliortuksauvotit ivsornaitunik, opigijaurkovlugo ânanausijaurkovlugolo.

3 Tamaitalo illisimajunik ômatelît, illumertitakka anerner-mik illisimatitsijomik, okarvigijaksarivatit annorâliorkovlugit Aronemut ivsornaitokutautitaurkovlugo, ajokertuijônerme kivgartorkovlugo uvamnut.

4 Tamadjalo annorât senajaksarijangit; sagvingmiutak ikkiarlo, attigiujarlo, ulliglo pinnarnarsautelik, nessarlugarlo, tapserullo: ivsornaituniglo annorâliortuksauvut Aronemut angajungnut erninginullo, kivgartorkovlugo uvamnut ajokertuijônerme.

5 Atortuksauvullo goldemik, tungujoktamiglo, tungulângajomiglo, aupalutsiartomiglo, kablunâktajatsiarmiglo.

6 Ikkialiortuksauvullo goldemit, tungujoktamillo, tungulângajomillo, aupalutsiartomillo, kablunâktajatsiamillo, ânanausilugolo.

7 Kivilerêkutauiâgik katitaujuksauvuk sinnîgikut tamakut; taimak katitaujuksauvuk.

8 Ikkiablo takosungnaitub tapscrutinga kânganêtok tâmnatsainaujuksauvok senajauninga maliklugo; tagva goldemik, tungujoktamiglo, tungulângajomiglo, aupalutsiartomiglo, kablunâktajatsiamiglo.

9 Tigusijuksauvotillo alligûngnik tungajuangajûngnik maggungnik aglagvigivlugiglo Israêlib kitorngangita attinginik:

10 Attingit sixit alligorme atauserme, attingillo sixit assingit alligub aipangane, nukarêngningit maliklugit.

11 Alligulerijub aglanginut, aglangnut sorlo nakitjumêtnut alligûk tamarmik aglagvigijaksarivakik Israêlib kitorngangita attinginik: illijaksarivakiglo avaliarutanut goldeojunut.

12 Alligûglo illijaksarivakik ikkiab kivilerêkutauiâgingnut, erkaumajaujutiksaurkovlugik Israêlikunut: Aroniblo nangmaraksarivait attingit tuîngmine NâleKab sângane erkaumajaujutiksaurkovlugit.

13 Avaliarutaliortuksauvotillo goldeojunik.

14 Kelaumgujângniglo maggungnik goldeojûngnik illakan gitomik issûgingne; kepjarlugik senajaksarivakik, kelaumgujâglo kepjartâk atsungersorlugik avaliarutanut.

15 **Sagvingmiutarlo** erkartuinermut senajaksarivat pinarnarsautekartilugolo; ikkiab ânanausijauningatut senajaksarivat: goldemit, tungujoktamillo, tungulângajomillo, aupalutsiartomillo, kablunâktajatsiamillo senajaksarivat.

16 Iktokeriktuksauvok tappitarêklunelo; aggait atautsît isângningatut takitigijuksauvok, aggaillo atautsît isângningatut silliktigivlune.

17 Illijivigijaksarivallo allikunik, allikunik siaktunik sitamanik senilerêktunik: siaktut sivorlît tamadja: Ruby, Topaselo, Karbunkelelo;

18 Siaktut aipanga, tagva Emeralde, Safirelo, Diamantelo;

19 Siaktut pingajuat, tagva Ligure, Agatelo, Amitistelo;

20 Siaktullo sittamangat, tagva Berile, Onikselo, Jasperelo: illijaujuksauvullo avaliarutaksanginut goldeojunut.

21 Allikullo aglagviojuksauvut Israêlib kitorngangita at-

tinginik 12nik, attingit aglaksimavlutik sorlo nakitjutib aglangititut; attunit attekarlutik kinguvârê 12 maliklugit.

22 Sagvingmiutarmelo kelaumgujaliortuksauvotit goldemit illakangitomit kepjarsimajunik issûgingne.

23 Sagvingmiutarmelo nukloliortuksauvotit maggungnik goldemit, nuklûglo magguk atsungersoraksarivakik sagvingmiutab issûgingnut maggungnut.

24 Kelaumgujâglo kepjarsimajûk magguk goldeojûk nuviaksarivakik nuklûngnut maggungnut sagvingmiutab issûgingnêtungnut.

25 Kelaumgujâglo kepjarsimajûk issûgik aipâgik atsungersoraksarivakik senneroângnut, illilugiglo ikkiab kivilerêkutaunjâgingnut sâganêtungnut.

26 Maggungniglo nukloliortuksauvotit goldemit, sagvingmiutablo issûkita sinîgingnut atsungersoraksarivakik, illuanut, ikkiarmut sângavlutik.

27 Tâpkoalo assîgingnik nukloliortuksauvotit goldemit, atsungersorlugiglo ikkiab senerâgingnut iglugêngnut, atsungervîk sâkita nellâgingnut, ikkiab tapserutingata kollânut.

28 Sagvingmiutarlo kelaksoraksarivat nuklungitigut ikkiab nuklûgingnut, kelarutemut tungujoktarmut, ikkiab tapserutingata kollânêrkovlugo, sagvingmiutak pêrkonago ikkiarmit.

29 Aroniblo Israêlib kitorngangita attingit nangmaraksarivait sagvingmiutakut erkartuinermut ilingajokut ômatime nellâne, iterangame ivsornaitovingmut, erkaumajaujutiksaurkovlugit Nâlekab sângane soraijuitomik.

30 Sagvingmiutarmullo erkartuinermut ilingajomut illiaksarivakik kaumakut idluakullo; tâpkoalo Aronib ômatin-gata nellânêtuksauvuk iterangame Nâlekab sânganut: Aroniblo Israêlikut idluarsaijutiksangat nangmaraksarivâ Nâlekab sângane soraijuitomik.

31 Ikkiablo attigiujanga ilûnane senajaksarivat tungujoktamt.

32 Kollâta kerkagut itervikartuksauvok: itervingalo pergaimajôjamik nuilakartuksauvok, sorlo sorsuktuksab annorângata itervingatut, allirkonago.

33 Atâne periningane paungangoaliortuksauvotit tungujoktamt, tungulângajomillo, aupalutsiartomillo, periningata ilûnangagut, tâpkoalo akornagut sivaniarsungnik goldemit ilûnâgut.

34 Sivaniarsuk golde paungangoarlo, sivaniarsuk golde

paungangoarlo, attigiujab sinningagut perisimaningagut ilûnâgut.

35 Tâмна attijaujuksauvok Aronemut kivgartorangat; sivaningit tussaksaurkovlugit iterangat ivsornaitovingmut Nâlekab sânganut, anijarangallo, tokorkonago.

36 Sivumiutaliortuksauvotillo goldemit illakangitomit, aglagvigivlugolo, sorlo nakitjutib aglangititut: **Ivsornaitok Nâlekamut.**

37 Kellarutemullo tungujoktamut nuvijaksarivat, nessarlugarmiutaurkovlugo, nessarlugablo sivumiutaksarivâ.

38 Aroniblo kaunganêtuksauvok, Arone nangmarkovlugo ivsornaitut idluininginik, Israêlikut ivsornaitilârtanginik tunergutimingne ivsornaitune tamaine; kaunganêtsainartuksauvorlo, tâpkoa nâmagijaurkovlugit Nâlekab sângane.

39 **Ulliglo** kablunâktajatsiak takoranersautelioraksarivat; nessarlugarlo kablunâktajatsiamit senajaksarivat, tapserullo senajaksarivat nuilapaujaksajamit.

40 **Aroniblo** erningit ullilioraksarivatit, tapseruteliorlugillo nessarlugaliorlugillo, opigijaujutiksamut pinnarnarsijaujutiksamullo.

41 Attijautitaksarivatillo angajungnut Aronemut erninginullo illagivlugit; mingoaraksarivatillo, ivsornaitokutautilugillo, ivsornaitilugillo, kivgartorkovlugit sâmne ajokertuijônerme.

42 Karlilioraksarivatillo kablunâktajatsiamit, ussinganingit mattujaurkovlugit; kettinginit serkungit tikkidlugit pijuksauvut.

43 Attijaujuksauvullo Aronemut erninginullo iteraikpatta tupermut kigligiutjinelingmut, najornileraikpattalo tunerguservingmik kivgartoromavlutik ivsornaitovingne; idluinermik tokojutiksamik nangmarkonagit: tamanna maligaksaujuksauvok soraijuitok tâpsomunga kinguvânginullo tâpsoma kingorngane.

KAP. XXIX.

Ajokertuijut ivsornaititauningit tunergutillo pivlugit.

1 **IMAILIORVIGIJAKSARIVATILLO** ivsornaitilugit kivgartorkovlugit uvamnut ajokertuijônerme: Tigusijuksauvotit tuktuvangmik, saukangniglo angusalungnik maggungnik kanoetokangitungnik,

2 Kakkôjamiglo sêrnarsautekangitomatik, kakkôjaniglo sâ-

patânik sêrnarsautekangitunik orksunut akkusimajunik, kak-kôjârsuniglo sâtunik orksunut mingoarsimajunik: senaugamit kakortamit senajaksarivatit.

3 Amârgaujarmullo atautsemut illijaksarivatit, amârgaujarmelo kaitaksarivatit, tuktuvak saukaglo angusaluk magguk illagivlugit.

4 Aronelo erningillo kaitaksarivatit tupiub kigligiutjine-liub pânganut, imermullo ubvarlugit.

5 Annorâllo tigujaksarivatit, Aronemullo attijautilugit, ullik, ikkiablo attigiujanga, ikkiarlo, sagvingmiutarlo, tapser-userlugolo ikkiab tapserutinganut:

6 Nessarlugarlo illijaksarivat niakunganut, sivumiutarlo ivsornaitok nessarlugaub kânganut illivlugo,

7 Orksuk mingoarutiksak tigujaksarivat tagva, kovilugolo niakoanut, mingoarlugo.

8 Erningillo kaitaksarivatit attitilugillo ullingnik.

9 Tapseruseraksarivatillo tapserutitut, Arone erningillo, illijivigivlugillo nessarluganik: tâpkalo ajokertuinermik sulia-ksakalârput sorajuitomik: Aronelo erningillo ivsornaititaksarivatit.

10 Tuktuvaglo kaitautitaksarivat tupiub kigligiutjineliub sânganut, Aroniblo erningitalo tuktuvaub niakoa pattigaksarivât aggangmingnut.

11 Tuktuvaglo tokotaksarivat Nâlekab sângane, tupiub kigligiutjineliub pângata sângane.

12 Tuktuvaublo aungata illanga tigujaksarivat, aggang-nullo tunerguserviub nakjûgik mingoarlugik tâpsomunga, aublo amiakoa ilûnane kovilugo tunerguserviub tungavinga-nut.

13 Tunnorlo erchavît kânganêtok ilûnât tigujaksarivat, kiksautillo tingub avatânêtok, taktûgiglo, tunnorlo tâpkoa kângangnêtok, ôtilugillo tunerguservingme.

14 Tuktuvauble nerkinga, amingalo, annangalo, ôtitaksarivatit ikomamut tupersuit sillatâne: tamadja tunergutiksak ajortoerutiksak.

15 **Saugarlo** angusalok atausek tigujaksarivat; Aroniblo erningitalo angusalub niakoa pattigaksarivât aggangmingnut.

16 Angusaloklo tokotaksarivat, aungalo tigulugo serke-rautigivlugolo tunerguserviub avatânut.

17 Avgoraksarivallo angusalok, erchavingillo niungillo ergortorkârlugit, kattiganganut avgorsimajomut niakoanullo illivlugit.

18 Angusaloklo ilûnât ôtitaksarivat tunerguservingme: tunergutiksauvok ôtaksak Nâlekamut: tamadja tippigiksau-tauvok, tunergut ôtâk Nâlekamut.

19 **Saukablo** angusalub aipanga tigujaksarivat: Aroniblo erningitalo angusalub niakoa pattigaksarivât aggangmingnut.

20 Tokotaksarivallo angusalok, aungatalo illanga tiguv-lugo pitilugolo Aronib siutingata tallerpiata nuvuanut, erni-ngitalo siutingita tallerpingita nuvunginut, aggangitalo taller-pingita kublunginut, ittigangitalo tallerpingita puttugunginut, auglo serkerautigivlugo tunerguserviub avatânut.

21 Aublo tunerguservingmê tub illanga tigujaksarivat, ork-sublo mingoarutiksab illanga, serkerautigivlugolo Aronemut annorânginullo, erninginullo, erningitalo annorânginut tâмна illagivlugo: ivsornaititauniarporlo, annorângillo, erningillo, erningitalo annorângit, tâмна illagivlugo.

22 Tigujaksarivatittauk angusalub tunnûgik okpatîgiglo, tunnorlo erhavît kâganêtok, kiksaullo tingub avatânêtok, taktûglo, tunnorlo tâpkoa kâganêtok, tallerlo tallerpik; angusalok tâмна ivsornaijutaungmat:

23 Kakkôjarlo atausek, kakkôjarlo orksulik atausek, kakkôjârsuglo sâtok atausek amârgaujarmit sêrnarsauteka-ngitomik kakkôjaktalingmit NâleKab sânganêtomit:

24 Tamakkoalo ilûnaita pitilârpatit Aronib agganginut, erningitalo agganginut; isautikattarlugillo tunergutautilugit NâleKab sângane.

25 Tigujaksarivatillo agganginit ôtilugillo tunerguserviub kângane tunergutautilugillo ôtaksamik, tippigiksautiksauti-lugit NâleKab sângane: tunergutauvok ôtâk ikomakut Nâle-kamut.

26 Aroniblo ivsornaititaujutingata angusalub sakkiangit tigujaksarivatit isautikattarlugillo NâleKab sângane: tamanna ningeksiarijaksarivat.

27 Ivsornaititaksarivatillo sakkiangit tunergutaujut isau-tijaukattartut, tallerlo tunergutaujok isautijaujok kongmut, isautijaukattartok isautijaujorlo kongmut angusalormit ivsor-naijutiksaujomit, Aronemut erninginullo illingajomit:

28 Aroniblo erningitalo ningeksiarijaksarivait Israêlikunit maligaksakut soraijuitokut; tunergutaungmat isautijaujok kongmut: tunergutaujuksauvorlo isautijaujok kongmut Is-raêlikunit, tunergutinginit kujalijutinit tunergusertaujunit, llâ, tunergut isautijaujok kongmut Nâlekamut.

29 **Aroniblo** annorângit ivsornaitut erningita kingormguti-

jaksarivait tâpsoma kingornagagut, mingoartausiutigivlugit ivsornaititausiutigivlugillo.

30 Erningatalo inangertingata attijaksarivait uvlunik sevenik iterangat tupermut kigligiutjinelingmut kiygartoromaylune ivsornaitovingme.

31 **Angusaloklo** ivsornaititausiut tigujaksarivat, nerkingalo igalugo ivsornaitovingme.

32 Aroniblo erningitalo angusalub nerkinga nerrijaxsarivât, kakkôjallo amârgaujarmêmut tupiub kigligiutjineliub pângane.

33 Tamakkoalo ulapkosertausiutit nerrijaxsarivait ivsornaititaujutigivlugit idluarsititaujutigivlugillo: takorngartable nerrijaxsaringilait, ivsornaingmatta.

34 Nerkêjable ivsornaititausiutib illanga, kakkôjaublônêt illanga amiakolerpat uvlârmut, amiakoa nungutaksarivat ikomamut: nerrijaujuksaungilak, ivsornaingmat.

35 Taimailiorvigijaksarivatit Aronelo erningillo, ilûnaita perkojakka illingnut maliklugit: uvlut sevenit nâvlugit ivsornaititaksarivatit.

36 Kaut tamât tunergusertuksauvotit tuktuvangmik, tunergutauvlune ajortoerutiksamik ulapkosertaunermut: tunerguserviglo ivsornaititaksarivat ulapirksarungne, mingoaraksarivallo ivsornaitilugo.

37 Uvlunik sevenenik tunerguservik ulapirksaraksarivat ivsornaitilugolo; tunerguserviojuksauvorlo ivsornainerpâmik: ilûnatiglo aktuijut tunerguservingmik ivsornaituksauvut.

38 **Tamadja** tunergutigijaksarijatit tunerguservingme: Saugârsûk magguk atautsimik jârekartuk tunergutigijaksarivakik kaut tamât tunerguservingme.

39 Saugârsuk aipâ tunergutigijaksarivat uvlâkut; saugârsublo aipanga tunergutigijaksarivat unnukut:

40 Saugârsuglo aipâ illagivlugo senaugarmik îfab telli-maujoanik akkusimajomik orksunut kaugaktamut hinib sittamanganik; vainemiglo hinib sittamanganik tunergutiksauvlune imiksamik.

41 Saugârsublo aipanga tunergutigijaksarivat unnukut, illakartitaksarivallo tunergut nerrijaxsak uvlâkut adsigivlugo, tunergullo imiksak adsigivlugo, tippigiksautiksaurkovlugo, tunergut ôtâk Nâlekamut.

42 Tamanna tunergutiksauvok ôtaksak soraijuitor kinguvâksapsigut tupiub kigligiutjineliub pângane Nâlekab sângane: tagvane naipitsomavagit okakatigivlutillo.

43 Tagvanelo Israêlikut naipitsomavakka, tâpkoalo ivsor-naititaulârput ânanaunimnut.

44 Tuperlo kigligiutjinelik ivsornaititsomavara, tunergu-serviglo: ivsornaititsomagivakkalo Aronelo erningillo kivgar-torkovlugit uvamnut ajokertuijôneme.

45 Innekaromavungalo Israêlikut akorngane, Gûdiojoma-vungalo tâpkonunga.

46 Kaujijuksauvullo tâmnaugama Nâlegak Gûdingat aula-rudjijingat nunamit Egiptenemit, innekarungnarkovlunga tâpkoa akorngane: uvanga tagva Nâlegak Gûdingat.

KAP. XXX.

Tunerguservik isserluanititsivik tippitsiariktomik. Maligaksat inuit kititautilugit.

1 **TUNERGUSERVILIORTUKSAUVOTILLO** isserluaniti-tsivingmik tippitsiariksaumut atortuksamik: senajaksarivat kejutsiarsajamit.

2 Tallertut atausertut takitigijuksauvok, tallertullo atausertut silliktigivlune: iktokeriktuksauvok: tallertullo maggotut poktotigijuksauvok: nakjungillo tâmnatsainaujuksauvut.

3 Kallinekartitaksarivallo goldemik illakangitomik, kângalo sencerangillo avatâgut, nakjungillo; avaliarutalioraksarivat goldemik avatâgut.

4 Nuklûngniglo maggungnik senajuksauvotit tâpsomunga avaliarutangata atâgut, terrekungine, senerâgingne iglutut senajaksarivatit; inniksaujuksauvullo akkigautîgingnut akkigartaurkovlugo.

5 Akkigauteliortuksauvotillo kejutsiarsajamit, kallinekar-tilugiglo goldemik.

6 Illijaksarivallo tâlutab iklerviub kigligiutjinektaliub tuglianê tub sânganut, iksivaviub saimarvigijauviub kigligiutjinektaliub kânganê tub naipitsivigijomajama illingnik sânganut.

7 Kânganelo Arone isserluanititsijuksauvok tippitsiariktomik uvlât tamât; kollilerijarangat isserluanititsijuksauvok tippitsiariktomik kângane.

8 Unnungmelo Aronib kollît ikijarangagit isserluanititsijuksauvok tippitsiariktomik kângane, tippitsiariktomik nokkajuitomik Nâle kab sângane kinguvâpsigut.

9 Tippiiksaumik takorngartamik tunergusertuksaungi-

lase kângane tunergutimiglônêt ôtaksamik, tunergutimiglônêt nerkêjamik; kovisivigijaksaringilaselônêt tunergutimik imiksamik.

10 Aronelo atausiardlune jâreme ulapkosêjutiksalêjuksauvok nakjungine, ajortoerutjinermit ulapkosêjutiksab tunergutiksangata aunganut; atausiardlune jâreme ulapkosêjutiksalêjuksauvok kângane kinguvâpsigut: tamanna ivsornainerpauvok Nâlekamut.

11 **Nalekablo** Mosese okarvigivâ, okarlune:

12 Israêlikut kititaksat kitikungne, ilûnatik attunit tunitjijuksauvut tarnimik ulapkosêjutiksanganik Nâlekamut kitikungne; nûsilingnartokarkonago akorngane kitikungne.

13 Kititaumajunut illaujut attunit tunitjijuksauvut sêkelib abvangatut, ivsornaitoviub sêkelinga maliklugo: (sêkele geratut 20tut akkitutigivok:) sêkelib abvangatut Nâlekab tunergusarijaksarivâ. (Sêkele 50centsetut akkitutigingoarpok.)

14 Kititaumajunut illaujut ilûnatik attunit, jârekartut 20nik kângiutijullo, tunitjijuksauvut tunergutemik Nâlekamut.

15 Akluitut anginersamik tunitjijuksaungilat, aklujullo mikkinersamik sêkelib abvanganit tunitjijuksaungilat, tunitjijarangata tunergutemik Nâlekamut, tarnise ulapkoseromavlugit.

16 Kênaujallo ulapkosêjutaujut tigujaksarivatit Israêlikunit, ilingatilugillo tupiub kigligiutjineliub kivgartortauninganut; erkaumajaujutiksaurkovlugo Israêlikunut Nâlekab sângane, tarnise ulapkoseromavlugit.

17 **Nalekablo** Mosese okarvigivâ, okarlune:

18 Ubvarviliortuksauvotit kakorlermit, ikkoggangalo kakorleojuksaugivok, ubvarnermut: illijaksarivallo illagêktut tupingata tunerguserviublo akorngangne, imerlugolo imermik.

19 Aroniblo erningitalo aggangmingnik ittikamingniglo ubvarvigijaksarivât:

20 Itijarangata tupermut kigligiutjinektalingmut, imermut ubvartuksauvut, tokorkonagit; najornigangatalônêt tunerguservingmik kivgartoromavlutik, tunerguseromavlutik ôtaksamik ikomakut Nâlekamut:

21 Aggatik ittikatiglo ubvaraksarivait tokorkonatik: tamannalo maligaksautsainartuksauvok tâpkonunga, tâpsomungalo kinguvânginullo kinguvârêngningitigut.

22 **Amalo** Nâlekab Mosese okarvigivâ, okarlune:

23 Tigusigittauk illingnut tauvlukutiksani^k piojônerpânik, Mirrimik illakangitomik sêkeletut 500tut, Sinnamônemiglo mamaktomik tâpsoma abvangatut, tagva sêkeletut 250tut, Kalamûsemiglo sêkeletut 250tut,

24 Kassiamiglo sêkeletut 500tut, ivsornaitoviub sêkelinga maliklugo, orksublo napârtungata orksunganik hinitut:

25 Orksulioraksarivatillo mingoarutiksamik ivsornaitomik, mingoarut akkusimajok tippitsiariksautelerijub ilisimaninga maliklugo; mingoarutiksauvok orksuk ivsornaitok.

26 Tuperlo kigligiutjinektalik mingoaraksarivat tâpsomunga, iklerviglo kigligiutjinektalik,

27 Sâlo perkutingillo, nenneroakarviglo perkutingillo, tunerguserviglo isserluanititsivik tippitsiariktomik,

28 Tunerguserviglo tunergutinik ôtaksanik, perkutingillo ilûnaita, ubvarviglo ikkoggangalo.

29 Ivsornaititaksarivatillo ivsornairmarirkovlugit: aktuijut tâpkoninga ivsornaituksauvut.

30 Aronelo erningillo mingoaraksarivatit ivsornaitilugillo, kivgartorkovlugit uvamnut ajokertuijônerme.

31 Israêlikullo okarvigijaksarivatit, okarlutit: Tamadja orksuk mingoarutiksak ivsornaitok uvamnut kinguvâpsigut.

32 Kovijaujuksaungilak inub uvininganut, adsinganiglônêt senajuksaungilase, akkusimaninga adsigivlugo: ivsornai-pok, ivsornaigijaksarivaselo.

33 Nelli^{at} akkutsijok adsinganik, nelliallônêt pititsijok tâpsoma illanganik takorngartanut, avitaumariktuksauvok inôkatiminit.

34 **Nalekablo** Mosese okautivâ: Tigusigit illingnut tippitsiariksautiksani^k, Staktemik, Balsamiglo, Galbânumiglo, Wairauchemiglo illakangitomik: ilûnatik okumaitigijigêklutik:

35 Tamakkoalo tippitsiariktoliorutigijaksarivatit, akkusimavlutik tippigiksautelerijub ilisimaninga maliklugo, tarrêtsiarilugit, illakaratik ivsornailutiglo:

36 Illangalo serkalitsiaraksarivat, pitilugolo kigligiutjinî^t sânganut tuperme kigligiutjinektalingme, naipitsivigijomajamne illingnik: ivsornainerpârijaksarivase.

37 Tippitsiariksautiksarlo senajaksarijat pivlugo, adsinganik senajuksaungilase illipsingnut akkusimaninga itjuarlugo: ivsornaigijaksarivat Nâlekamut.

38 Nelli^{at} taimailiortok adsinganik, naimajomavlugo, avitaumariktuksauvok inôkatiminit.

KAP. XXXI.

Sulijuksâk kairkojauvuk. Sabbath ivlerijaurkojauvok.

1 **NALEKABLO** Mosese okarvigivâ, okarlune:

2 Takkuit, attermigut kairkosimavara Bêsalêele, Hurib erningata Urib erninga, kinguvârênit Judakunit:

3 Ilumertisimavaralo Gûdib Anerninganik, silatunermik, ipaksitsiarnermiglo, ilisimanermiglo, sulijungnarnermiglo sunatuinarmaringnik,

4 Ilisimanartomik sulijungnarkovlugo goldelerivlune, silberelerivlunelo, kakorlerlerivlunelo,

5 Kibluinermiglo alligunik, illivlugillo, kejulerinermiglo, senajungnarkovlugo sunatuinarmaringnik.

6 Takkuillo, tâмна illagivlugo tunikasiutivara Ahâlia, Ahîsamab erninga, kinguvârênit Dânekunit: ômatikullo ilisimajut ilûnatik ômatingit pititsivigisimavakka silatunermik, senajungnarkovlugit tamainik perkojamnik illingnut;

7 Tupermik kigligiutjinektalingmik, kigligiutjinîllo iklervinganik, iksivavingmiglo saimarvigijauvingmik tâpsoma kânganêtuksamik, tupiublo perkutinginik ilûnainik,

8 Sâmiglo perkutinginiglo, nenneroakarvingmiglo ajortokangitomik perkutingit tamaita illagivlugit, tunerguservingmiglo isserluanititsivingmik tippitsiariksaumut,

9 Tunerguservingmiglo tunergutunut ôtaksanut perkutingillo ilûnaita illagivlugit, ubvarvingmiglo ikkogganganiglo,

10 Kivgartortullo annorânginik, annorâniglo ivsornaitunik Aronemut ajokertuijôjomut, annorâniglo erninginut, kivgartûtinik ajokertuijônerme,

11 Orksumiglo mingoarutiksamik, tippitsiariksautiksaniglo naimajominartunik ivsornaitovingingmut; perkojakka illingnut tamaita maliklugit piniartuksauvut.

12 **Nalekablo** Mosese okarvigivâ, okarlunelo:

13 Okarittauk Israêlikunut, okarlutit: Udjertoritse Sabbathekotikka erkagitsiarlugit perkovluse: nelunaikutaungmat uvangalo illipselo akunaptingne kinguvâpsigut; kaujimarkovluse uvangaugama Nâlegak ivsornaititsijok illipsingnik.

14 Taimaimat Sabbath erkagijaksarivase; ivsornaingmat illipsingnut; nelliallônêt sujuijok tâpsominga tokotaujuk-sauvok; nelliallônêt suliakartok tâpsomane kippijaujuksauvok inôkatime akornganit.

15 Uvlut sixit suliviksauvut, uvlulle seveninga Sabbatheo-

vok merngoerservik, ivjornaitok Nâlekamut; nelliallônêt suliakartok uvlorme Sabbateme tokotaudlartuksauvok.

16 Taimaimat Israêlikut Sabbate erkagijaksarivât, kinguvângitigut Sabbate kamagivlugo, angerkatigêngnermut soraijuitomut.

17 Nelunaikutauvok issokangitomot uvangalo Israêlikullo akunaptingne; uvlune sixine Nâlekab kilak nunalo sena-laungmagik, uvlullo seveningane merngoersilaukpok nakoksi-vlunelo.

18 Kakkamelo Sinaimo Mosese okakatigijarêramiuk tunitjivigivâ aglagvîngnik maggungnik kigligiutjinektalîngnik, aglagvîngnik ujarângnik, aglagviomajûngnik Gûdib tikkinganut.

KAP. XXXII.

Nochangoab senajauninganik Gûdiblo ningarninganik.

1 **INUILLO** malugosugamik Mosese atersarnasârmat kakkamit, inuit Aronemut katersorput, okarvigivlugolo: Attê, gûdingoaliortigut sivuniptigut ingergajuksanik; Mosesele imna, angut majuartitivut nunamit Egiptenemit, nelovavut kanoelingamangât.

2 Aroniblo okautivait: Siumiutat goldeojut nuliapse ernipselo panipselo siutinginêttut pêjarsigik, kailugillo uvamnut.

3 Inuillo ilûnatik siumiutat goldeojut pêjarpait siutimingnit, âlugillo Aronemut.

4 Tâpsomalo tiguvait agganginit, nochangoaliorkârdlunelo kovimajomik, senagutemut ilûtsetârpâ; tâpkoalo okarput: Tagga gûdise, Israêle, tikkiutijise nunamit Egiptenemit.

5 Aroniblo takogamiuk, tunerguserviliorpok sângane; Aronelo kaggudlarpok, okarlunelo: Kaupat uvloksiorviksauvok Nâlekamut.

6 Kaungmallo uvlârorput, tunerguserlutiglo tunergutunik ôtaksanik, âtsilutiglo tunergutunik kujalitiksanic; inuillo ingiput nerrijomavlutik imeromavlutiglo, nikovipullo pingoromavlutik.

7 **Nalekablo** Mosese okautivâ: Attê, atersârit; inukotitit tikkiutijatit nunamit Egiptenemit, asserorsarmatta nangminernmingnik:

8 Sangusaraidlarput apkomit apkutaurkojamnit tâpkonunga: kovimajomik nochangoaliorput nangminernmingnut, tuksiarvigivâllo tunerguservigilâllo, okarlutik: Tagga gûdise, Israêle, tikkiutijise nunamit Egiptenemit.

9 Nâlekablo Mosese okautivâ: Inuit tamakkoa takonârsi-mavakka, ahâglo, inôvut tapatojoksôjut.

10 Taimaimat pagvisarniarnanga mâna, ningaumajârnera ônarserkovlugo tâpkonunga, nungulugillo perkovlunga; ig-villo inôkatigêksoangortitsomavagit.

11 Mosesiblo Nâlegak Gûdine kenuvigidlarpâ, okarlunelo: Nâlegak, suna pivlugo ningaumajârniât ônarsivâ inukotingnut, tikkiutijarnut nunamit Egiptenemit pitsartunermut angijomut, aggangnullo sôngodlartunut ?

12 Sôk Egiptenemiut okausekartuksauvât okarlutiglo: Uivênernut anitipait, tokoraromavlugit kakkane, nunablo kânganit nungutsomavlugit ? Keviarlaurit ningaumajârner-nit ilungertortomit, annusingorlaurillo idluitulivekaromaner-mit ômangat piniaromajarnit inukotingnut.

13 Abraha, Isaarlo, Israêlelo, kivgatit, erkaumalaukit, tâpkonunga angermarilauravit illingnik taivlutit, okautilugillo: Kinguvâksase unuksititsomavakka sorlo kilaub uvloria-ngititut, nunalo tamanna okautigijara ilûnane tunijomavara kinguvâksapsingnut, tâpkoalo kingormgutijaksarivât issoka-ngitomot.

14 Nâlegarlo annusingorpok idluinermut piniaromajaminit inukotiminut.

15 **Moseselo** sanguvok atersârlunelo kakkamit, aglagvîglo magguk kigligiutjinektalîk agganginêpuk: aglagvîk iglutut aglagviovuk: aglagviovuk sâgingnelo tunûgingnelo.

16 Aglagvîglo Gûdib senasimavak, aglaillo Gûdib aglaksimavait aglagvîngnut.

17 Josuablo inuit kaggudlartut pervalungningit tussaramigit, Mosese okautivâ: Unatartut kaggudlarningit tussaksauvok tangmârvingme.

18 Tâmnalo okarpok: Sâlakartut kaggudlartut nippingit tussangilakka, sâlagijaujullônêt ogguartut nippingit: tuksiar-tulle kaggudlarningit tussarpakka.

19 **Sunaubvalo**, tangmârvingmut kaglilerame, nochangoak okigêsertullo takovait, Mosesiblo ningaumajârninga ônarsivok, aglagvîglo egipak aggaminit, serkomilugiglo kakkaub atâne.

20 Nochangoarlo senajangat tiguvâ, ikitilugolo ikomamut, serkalilâllo argjangorlugo, imermullo siamartipâ, Israêlikullo tagvangat imertipait.

21 Mosesiblo Arone okautivâ: Inuit tâpkoa kanok piniar-vigivâtît idluinermik taimak angitigijomik passiorangne ?

22 Aronelo okarpok: Nâlekama ningaumajârninga ônar-siniarane: inuit nelungilatit uivêtoksôngmatta.

23 Okautingmanga: Gûdingoaliortigut sivuniptigut inger-gajuksanik: Mosesele imna, angut majuartitivut nunamit Egiptenemit, nellovavut kanoelingamangât.

24 Okautivakkale: Nelliselônêt goldekarpat, pêjarliuk. Kaipâllo uvamnut: ikomamullo egivara, nuttelo, nochangoak sakkerpok.

25 **Mosesiblo** inuit ussingajut takogamigit; (tagva Aronib ussingatilaupait kangusûtiksanginut omigijingita akornane:)

26 Mosesenangerpok tangmârterviub pângane, okarlunelo: Kina Nâlekamut illiovâ? Tâмна uvamnut kaile. Lêviblo kinguvângit ilûnatik katersorput tâpsomunga.

27 Okautivaillo: Imâk okarpok Nâlegak Israêlib Gûdinga: Angutit ilûnatik saviksoalijaulit, tangmârterviublo pângitigut uttertautilutik, attunillo tokorailit katangutiminik, illanâri-jaminiglo, inôkatiminiglo.

28 Lêviblo kinguvângit taimailiorput Mosesib okausinga maliklugo: uvlormelo tâpsomane inuit 3000nêttut tokotauvut.

29 Mosesenokarsimalaungmat: Ivsornaileritse uvlome Nâlekamut, ilûnase attunit ernipsigut, katangutipsigullo; sai mauserluse uvlome pijungnarkovlugo.

30 Kaungmallo Mosesib inuit okarvigivait: Idluitulisi-mavose angijomik; mânalo majoraromavunga Nâlekamut; imakâ ulapkosêjutiksarsinajarpunga ajornise pivlugo.

31 Moseselo Nâlekamut utterpok, okarlunelo: Kappê, inuit ukkoa idluitulisimavut angijomik, nangminermingnullo gûdingoaliiorput goldeojunik.

32 Mânale idluituliningit issumagijungnairomagungne—; pijomangikuvilla, pênga aglarangnit igvit aglaksimajarnit.

33 Nâlekablo Mosesenokautivâ: Nelliata idluitulivigisi-makpanga, tâмна pêromavara aglaramnit.

34 Taimaimat aularit mâna, inuillo tessiorkit inniksamut okautigisimajamnut illingnut: ahâk, Engelekotima sivorliniar-pâtit: kissianele idluitoksôngingit akkiniarutigijomârpakka, uvlok akkiniarnermut neliutikpat.

35 Nâlekablo inuit siorniortipait, nochangoaliolauramik Aronib senajanganik.

KAP. XXXIII.

Mosesib inuit tuksiupait. Gûdib Mosesse okakatigivâ.

1 **NALEKABLO** Mosesse okautivâ: Aularit, tamângat majoarit, igvit inuillo tikkiutititatit nunamit Egiptenemit, nunamut angermarijutigilauktamnut Abrahamut, Isaarmullo, Jakomullo, okarlunga: Kinguvâksarnut tunijomavara.

2 Engelelo tilijomavara sivunipsigut; kemâtitsomavakkalo Kânaaniterit, Amoriterillo, Hetiterillo, Perisiterillo, Heviterillo, Jebusiterillo:

3 Nunamut immumik igupsaujârtullo orksuanik kôlingmut: kissianele akunapsingne majuarkataujomangilanga; tapatojoksôgapse: nungutitserkonanga illipsingnik apkome.

4 **Inuillo** tussaramik okautsinik ukkuninga tussarominaitunik kiksadlarput: nelliallo attisilungilak pinnarnarsautiminik.

5 Nâlegak okarsimalaungmat Mosesemut: Israêlikut okarvigikit: Tappatojoksôvose: tikkikadlaromavunga akorngangnut sikkungilarnerme, nungulutillo: taimaimat pinnarnarsautitit pêrkit illingnit, kaujimarkovlunga kanok piniarvigijaksarimangâpkit.

6 Israêlikullo pinnarnarsautitik pêrpait kakkaub Hôrebib erkâne.

7 Mosesiblo tupek tiguivâ nappartilugolo tangmârterviub sillatâne, atserarlugolo: Tupek kigligiutjinelik. Ilûnatiglo Nâlekamik kenertut anivut tupermut kigligiutjiningmut, tangmârterviub sillatânêtomut.

8 Imaiporlo, Mosesse anijarangat tupermut, inuit ilûnatik nikkoviput nangerlutiglo tupermik pângine Mosesse takosarlugo itersimakârtinago tupermut.

9 Moseselo tupermut iterangat, nuvujak nappajok akkar-pok nappavlunelo tupiub pângane, Nâlekablo Mosesse okakatigivâ.

10 Inuillo ilûnatik nuvujak nappajok tupiub pânganêtok takovât: inuillo ilûnatik nikkoviput tuksiarlutiglo, attunit tupime pânganêdlutik.

11 Nâlekablo Mosesse okakatigivâ kênarmut kênarmut, sorlo inub illanârijane okakatigingmago. Uttilerivorlo tangmârvingmut: kivganele Josua, Nunib erninga, inôsuktok, anilungilak tupermut.

12 **Mosesiblo** Nâlegak okautivâ: Takkuit, okautivarma,

Inuit ukkua majuartikit: kaujitolungilarmale kinamik illa-karkoniarmangâmnga. Okarsimagalloarpotit: Atterkut illitarivagit, saimaneksivotillo ijîngma sângangne.

13 Mâna tagga, saimaneksiguma ijîkpit sângangne uner-tutilaunga apkotingnik, illitarksilerkovlunga illingnik, saimanekserkovlunga ijîkpit sângangne: inôkatigêksuillo ulernairtorkit inukotigigangne.

14 Kiovorlo: Najornima illaginiarpâtit, merngoersertitso-mavagillo.

15 Tâpsomale okautivâ: Najornivit illagingipanga, takpaungautiniaratigut tamângat.

16 Sunakulle kaujijauniarkâ uvanga inukotitillo saimaneksigapta ijîkpit sângangne? Tamattomûnaulungilâk, igvit illagigaptigut? Taimak aptersimaniarpogut, uvanga inukotitillo, inungnit tamainit nunab kânganêtunit.

17 Nâlekablo Mosese okautivâ: Tamannatauk okautigijat piniaromavara: saimaneksigavit ijîngma sângangne, atterkullo ilitarigapkit.

18 Okarporlo: Unertutjivigilaungatôk ânanaunernik.

19 Tâmnalo okarpok: Ajunginera tamât kângertitsomavara kênavit sângagut, sângnelo NâleKab attinga okâlautigijomavara; saimauseromajakkalo saimauseromavakka, nâpkigijomajakkalo nâpkigijomavakka.

20 Okarporlo: Kênara takonârungnangilat, inub takonârungnangimanga inônialunelo.

21 Nâlegarlo okarpok: Takkuit, inniksakarpok senimne, nangertuksauvotillo kairtub kângane:

22 Pijokalârporlo imâk: ânanaunera kângerpat, inniksakartitsomavagit kairtub kongnângane, mattujomavagillo aggamnut kângertilunga:

23 Aggakkalo pêromavakka, tunugalo takojaksarivat: kênarale takonâraksaungilak.

KAP. XXXIV.

Gûdib attinga okâlautauvok. Gûdib Israêlikut angekatigivait.

1 **NALEKABLO** Mosese okarvigivâ: Aglagvîngnik maggunnik ujaraujûngnik ullimarit, sivorlîk adsîgingnik: aglagvigijomavâkkalo okautsinik sivorlîgingnêlauktunik serkomi-lauktângne.

2 Achâgolerillo, uvlâkullo majorarit kakkamut Sinaimut, sângeriarlorlungalo kakkaub kângane.

3 Inungmigle majorakatekartuksaungilatit, inungmiglônêt takuksaujokarniarane kakame ilûnâne; saukallônêt nergjutillônêt nerriniaratik kakkaub tungâne.

4 **Aglagvingniglo** maggungnik sivorlîgiktitut ullimarpok: Moseselo uvlâropok majorarlunelo kakkamut Sinaimut, sorlo Nâlekab perkongmago, aglagvigiporlo maggungnik ujaraujûngnik.

5 Nâlegarlo akkarpok nuvujakut, nangekatigivlugolo tagvane, Nâlekablo attinga okâlautigivâ.

6 Nâlegarlo kângerpok sânganut, okâlavorlo: Nâlegak, Nâlegak, Gûde, nâpkigosuktok saimajorlo, kamangitsertortok nagligosuktoksôjorlo, nelâgôrtoksôjorlo,

7 Naglingnarmik sokosertailitsijok tausendeokattartunut, idluitulinernik tappatonerniglo ajornerniglo issumagijungnainiktok, pidlartailitsingitorle kakialernekaniglitunik; atâtat idluitulininginik pidlarniktok kitorngane, kitorngallo kitorngangine, ernernêt kingorlerêt pingajungit sittamangillo tikkidlugit.

8 Moseselo okkosârpok nunamut, tuksiarlunelo.

9 Okarporlo: Saimaneksiguma ijîkpit sângangne, Nâlegak, Nâlekama illagilitiguttôk; inuit ukkoa tappatojoksôngmatta; idluitulinivullo ajornivullo issumagijungnailaukit, kingormgutijaksautitigullo illingnut.

10 **Okarporlo**: Ahâk, angekatigêngnelioromavunga inukotingnut tamainut, tatamnartulijomavungalo sorlo nunaksoarme ilûnâne inôkatigêksoarnelo nelliane piniartokalauksimanigmat: inuillo ilûnatik najortatit takojuksauvut Nâlekab suliananik: koaksârnarmat suliarijomajara illingne.

11 Perkojakka illingnut uvlome naipertutsiarkit: Ahâk, sivunerne kemâtitsomavakka Amoriterit, Kânaaniterillo, Hetiterillo, Perisiterillo, Heviterillo, Jebusiterillo.

12 Udjertorit, nunab aivigijavit inungit angekatigêngneliokatigivlugit perkonak, nigarniutiksaurkonagit akunapsingne:

13 Tunerguservingille asseroraksarivase, gûdingoangillo serkomivlugit, napârtungillo nakkalugit:

14 Gûdib assianut tuksiartuksaunginavit, Nâlegak, Illungertortomik attelik, Gûdeongmat illungertortok:

15 Nunab inungit angekatigivlugit, gûdingoangillo ajortulikativlugit perkonak, tunerguserlutillo gûdingoanginut, tunergutingillo nerrivlugit perkonak, inatauguvit;

16 Tiguserkonaglo paninginik ernernut; paningit tagva ajortuligunik gûdingoanginut, ernitillo uerisarlugit ajortulikataurkovlugit gûdingoanginut perkonagit.

17 Auktisimajunik gûdingoaliortuksaungilatit.

18 **Uvloksiorvik** sêrnarsautekangitomik kakkôjaktorvik uvloksiorvigijaksarivat. Uvlunik sevenenik kakkôjaktortuksauvotit sêrnarsautekangitunik, sorlo perkolaurapkit, takkiub Abibib neliutisimaningane: takkerine Abibeme anilauravit Egiptenemit.

19 Igliarmik angmaijut ilûnaita perkutigivakka; nergjuti-villo erniarirkârtangit angutaujut tamaita, tuktuvaglônêt saugarlônêt.

20 Siuterkortojuble erniarirkârtanga tauksiutijaksarivat saugârsungmut: tauksiutilungikungnelo kongesêjaraksarivat. Ernivit erniarirkârtangit ilûnaita tauksiutijaksarivatit. Tunergutiksalijaranelo sakkijârtokartuksaungilak sârne.

21 Uvlunik sixinik sulijuksauvotit, uvlulle seveningane merngoersertuksauvotit: nunab poagijartauvingane perutsiallo katersivingane merngoersertuksauvotit.

22 Kakkôjaksallo sivorlerpât katersivingata neliuninga uvloksiorvigijaksarivat, taimaktauk katersiviub jârib nâninganêtub uvloksiorvinga.

23 Pingasuertorlutik jâreme angutikotitit ilûnatik sakki-jârtuksauvut NâleKab Gûdib, Israêlib Gûdingata, sângane.

24 Inôkatigêksuit pingujaromagapkit sângnit, nunavillo kiglingit nerototitsomavlugit; nunangniglo uningartokartuksaungilak majorarsinatilutit sakkijâromavlutit NâleKab Gûdivit sângane pingasuertorlutit jâreme.

25 Tunergusiama aunga tunerguseraksarilungilat sêrnarsautelingmik aipiujakartilugo; tunergullo kângerviksiorviksiut piksakumitârijaksarilungilat uvlârmut.

26 Nunavit paungangita sivorlît sivorlerpângat kaitaksarivat NâleKab Gûdivit iglunganut. Tuktungajoarak, sulle amâmaktok, igajaksarilungilat.

27 Nâlekablo Mosese okautivâ: Okautsit tamakkoa aglakkit: okautsit tamakkoa maliklugit angekatigêngneliorpunga illingnut Israêlikunullo.

28 Tagvanêporlo Nâlegak illagivlugo uvlunik 40nik unnuarniglo 40nik; nerrilungilak imilungilarlônêt. Aglagvîngnullo aglakpait angekatigêngnerub okausertangit, perkajat 10.

29 **Moseselo** atersârmat kakkamit Sinaimit, aglagvîk magguk kigligiutjinektalîk tigumiarlugik, atersârmat kakkamit, Mosese kaujimalungilak kêname aminga keblermat Gûde okakatigisimagamiuk.

30 Aroniblo Israêlikullo ilûnatik Mosesese takungmatsuk, nutte, kênangata aminga keblerpok; erksivullo kaglilerlugo.

31 Mosesible kaigarsugvigivait; Aroniblo illagêktullo anga-jokângita uttervigivât: Mosesiblo okakatigivait.

32 Kingorngagullo Israêlikut ilûnatik tikkipât: tâpsomalo okâlavigivait tamainik Nâlekab okauserijanginik tâpsomunga kakkame Sinaime.

33 Okakatigijungnairkârnagillo Mosesib kênane tâlutserpâ.

34 Mosesese itermat Nâlekab sânganut okakatigijomav-lugo tâlutane pêrpâ anerêarane. Anivok tagva, Israêlikullo okarvigivait perkojaunerijaminik.

35 Israêlikullo Mosesib kênanga ulernairpât, Mosesib kênangata aminga keblermat: Mosesiblo kênane tâlutserivâ iterêarane Gûde okakatigijomavluglo.

KAP. XXXV.

Tunergutit tupersiutit.

1 **MOSESIBLO** illagêt Israêlikut ilûnaita katimatipait, okautivlugillo: Tamadja okautsit, Nâlekab perkojangit, piniaraksase.

2 Uvlut sixit sulivigijaksarivase, uvlulle seveningat ivsornaituksauvok illipsingnut, Sabbate merngoerservik Nâlekamut; nelliata suliakartok tâpsomane tokotaujuksauvok.

3 Ikomamik ikitsijuksaungilase innigijapsingne uvlorme Sabbateme.

4 **Mosesiblo** illagêt Israêlikut ilûnaita okarvigivait, okarlune: Tamadja Nâlekab perkojanga, okarlune:

5 Tigusigitse akunapsingnit tunergutiksamik Nâlekamut: nelliata kunungitomik ômateliub kailiuk tunergut Nâlekamut; golde, silberelo, kakorlerlo,

6 Tungujoktarlo, tungulângajorlo, aupalutsiartorlo, kab-lunâktajatsiarlo, tuktungajullo merkungit,

7 Saukallo angusaluit amingit aupaluktitaumajut, kab-vîllo amingit, kejutsiarsajallo.

8 Orksullo kollinut, tippigiksaullo orksunut mingoarutiksamut, iserluanerutiksamullo tippitsiariktomut,

9 Alliguillo tungujuangajut, alliguillo illijaksat ikiarmut opinartomut, sagvingmiutarmullo.

10 Ilûnatiglo silatujomik ômatelît akunapsingnêtut kaijuksauvut perkojaujullo Nâlekamut senavlugit;

11 Tuperlo matuksangalo illullek, matuksangalo sillallek, seneroangillo, sâtujangillo, seningajuksangillo, nappajungillo, manguvingillo,

12 Iklervik, akkigautîgiglo, iksivaviglo, matuksablo tâlutangit,

13 Sâ, akkigautîgiglo, perkutingillo ilûnaita, kakkôjallo takonâraksat,

14 Nenneroakarviktauk kaumautiksanut, perkutingillo, kollingillo, orksorlo, kollît orksuksangat,

15 Tunerguserviglo iserluanititsivik tippitsiariktomik, akkigautîgiglo, orksorlo mingoarutiksak, tippitsiariksautiksallo naimajominartut, upkoablo tâlutanga tupiub pângane,

16 Tunergutillo ôtaksat tunerguservingat, killapatângalo nuluangojârtok kakorlek, akkigautîgiglo, perkutingillo ilûnaita, ubvarvik ikkoggangalo,

17 Avalullo tâlutangit, nappajungillo, manguvingillo, avalullo pângata tâlutangit,

18 Tupiublo kikkiangit, avalullo kikkiaktangit, aklunângillo,

19 Kivgartortullo annorângit kivgartornermut ivsornaitovingme, annorât ivsornaitut Aronemut, ajokertuijomut, erningitalo annorângit kivgartornermut ajokertuijônerme.

20 **Illagello** Israêlikut ilûnatik anivut Mosesib najorninganit.

21 Tikkipullo, ilûnatik kajungersartaujut ômatimigut, ilûnatiglo kunungititaujut anernermigut, kaitsivullo Nâlekab tunergusiaksanganik illagêktut tupingata suliarijauninganut, kivgartortauninganullo ilûnânut, annorânullo ivsornaitunut.

22 Tikkipullo, angutillo arnallo, ilûnatik kunungitunik ômatelît, kaitsilutiglo aggautimiutanik, siumiutaniglo, ketterdlermingniglo, senneroaniglo, ilûnainik goldeojunik: tunitjijullo ilûnatik tunitjivut goldeojunik Nâlekamut.

23 Angutillo ilûnatik nagvârviojut tungujoktamik tungulângajomiglo, aupalutsiartomiglo, kablunâktajatsiarmiglo, tuktungajullo merkunginik, kabvîllo aminginik, kaipait.

24 Ilûnatik tunitjijut tunergutinik silbereojunik kakorleojuniglo kaitsivut Nâlekab tunergusianganik; ilûnatiglo nagvârviojut kejutsiarsajamik kivgartornerub suliarijauninganut kaipât.

25 Arnallo ilûnatik silatujunik ômatelît illerksaliorput aggamingnut, illerksaliarimajatiglo kaipait, tungujoktarlo, tungulângajorlo, aupalutsiartorlo, kablunâktajatsiarlo.

26 Arnallo ilûnatik ômatimigut aulataujut silatunerme illerksaliorput tuktungajut merkunginit.

27 Angajokâllo kaitsivut alligunik tungujuangajunik, alliguniglo illijaksanik ikiarmut opinartomut, sagvingmiutarmullo;

28 Tauvlukutiniglo, orksumiglo kollît orksuksanganik, orksumiglo mingoarutiksamik, iserluanititsijutiksamiglo tip-pitsiariktomik.

29 Israêlikut kunulugatik kaitsivut tunergutiksanik Nâlekamut, angutit arnallo ilûnatik ômatimigut kunungititaujut kaitsilutik suliarijaujariakartunut sunatuinamaringnut, Nâlekab perkojijutigijanganut Mosesib agganginut.

30 **Mosesiblo** Israêlikut okautivait: Takkuitse, Nâlekab Bêsalêele, Hurib erningata, Urib erninga, kinguvârênit Judakunit, kairkosimavâ attingagut;

31 Ilumersimavâlo Gûdib Anerninganik, silatunermik, ipaksitsiarnermiglo, illisimanermiglo, sulijungnarnermiglo sunatuinamaringnik;

32 Illisimanartuniglo sulijungnarkovlugo, goldelerinermik, silberelerinermiglo, kakorlerlerinermiglo,

33 Alligulerinermiglo illivlugillo, kejulerinermiglo, senajungnarkovlugo sunatuinamaringnik.

34 Omamiutakartipâlo ajokertuijungnarnermik, tâmnalo Ahâlialo, Ahîsamab erninga, kinguvârênit Dânekunit.

35 Tâpkoa ilumerpak silatunermik ômatekut sulijungnar-tilugik sunatuinamaringnik, alligolerijub sulijublo kakiarnangitub, takominarsautiortublo sulianginik, tungujoktamik, tungulângajomiglo, aupalutsiartomiglo, kablunâktajatsiamiglo, annorâksaliortublo sulianganik, illâ, sumiglônêt suliakartut sulianginik, illisimanartuniglo suliakartut sulianginik.

KAP. XXXVI.

Inuit avâgosudlarningit. Tupek atorialîllo suliarijauvut.

1 **SULILERPUT** tagva Bêsalêelelo Ahâlialo angutillo ilûnatik silatujunik ômatelît, Nâlekab ilamertangit silatunermik ipaksitsiarnermiglo kaujutilugit kanok suliarivlugit suliaxsat sunatuinait ivsornaitoviub kiygartortauninganut ilingajut, Nâlekab perkojijutigijangit tamaita maliklugit.

2 Mosesiblo kairkovait Bêsalêele Ahâlialo angutillo ilûnaita silatujunik ômatelît, Nâlekab ômamiutakartitangit

silatunermik, illâ, ilûnaita ômatimigut kajungersartaujut sulijartoromavlutik:

3 Tâpkoalo tunergutit tamaita Israêlikut kaitangit ivsornaitoviub kivgartortauningata suliarijauninganut, tiguvaît Mosesemit, suliarijomavlugit. Sullelo uvlât tamât kunulugatik kaitsivigivât tunergutinik.

4 Angutillo silatujut ilûnatik, suliakartut ivsornaitoviub sulianganik, ilûnatik sulivingmingnit senavingmingnit, kaivut;

5 Moseselo okarvigivât, okarlutik: Inuit âtsivut nâmatuinarlungitunik senajaujariakartunut, Nâlekab senajaurkojanginut.

6 Moseselo perkojivok, kaujjautitaurkovâlo tangmârvikut, okarlune: Angutillônêt arnallônêt tunergutiksaliorniaratik sulle ivsornaitovingmut ilingajunik. Taimaimat inuit kaitsitailititauvut.

7 Ataumajut nâmamaringmatta senajaujariakartunut taimainut, angiharpullo aglât.

8 **Angutillo** ilûnatik silatujunik ômatelît, tupiub senajauningane senakataujut, itsaksaliorput 10nik kablunâktajatsiamit, tungujoktamillo, tungulângajomillo, aupalutsiartomillo: senavait Kerubingoakarlutik pinnarnarsautenik.

9 Itsaksak atausek tallertut 28tut takitigivok, itsaksarlo atausek tallertut sittamatut silliktigivok: itsaksat ilûnatik adsigêktomik ôktûtekarput.

10 Itsaksallo tellimat katipait senilerêktilugit: itsaksallo assingit tellimat katipait senilerêktilugit.

11 Erkearviliorporlo tungujoktamit itsaksaub siningane katiningata siningane, taimaitoliorivorlo itsaksaub assiata siningane, aipangata katiningane.

12 Erkearviliorpok 50nik itsaksarme atauseme, 50niglo erkearviliorpok itsaksaub aipangata katiningata siningane: itsaksak atausek katitauvok assiminut erkearvingnut.

13 Erkeaktauteliorporlo 50nik goldeojunik, itsaksallo katipait aipâ aipaminut erkeaktautenut: taimaglo tupingorpok atausek.

14 Itsaksaliorporlo tuktungajut merkunginit tupiub kaliniksanganik: itsaksat 11 senavait.

15 Itsaksak atausek tallertut 30tut takitigivok; itsaksarlo atausek tallertut sittamatut silliktigivok: itsaksat 11 adsigêktomik ôktûtekarput.

16 Itsaksallo tellimat katipait ingmingnut, itsaksallo sixit ingmingnut.

17 Erkearviliorporlo 50nik itsaksaub siningane katiningane, erkearviliorporlo 50nik itsaksaub katitaksaub aipanganut siningane.

18 Erkeaktauteliorporlo 50nik kakorleojunik tupek kati-taurkovlugo atausingorkovlugo.

19 Tuperlo matuksaliorpâ saukat angusaluit aminginit aupaluktitaumajunit, tâpsomalo kângagut matuksamik kabvît aminginit.

20 **Tuperlo** sâtojaliorpâ kejutsiarsajamit, nappartilugit.

21 Sâtojak tallertut 10tut takitigivok, sâtorjarlo tallertut atausertut abvatullo silliktigivok.

22 Sâtojak atausek mangokarpok maggungnik, adsigêktomik tuglerêklutik: tupiub sâtojangit ilûnaita taimailiorpait.

23 Tuperlo sâtojaliorpâ; sâtojat 20 seneranganut sekernganêtomut:

24 Manguviliorporlo 40nik silbereojunik sâtojat 20 atâne; manguvîgnik maggungnik sâtojab atausiub atâne mangûgingnut maggungnut, manguvîgniglo maggungnik sâtojab assiata atâne mangûgingnut maggungnut.

25 Tupiublo senerangata igluanut, tachamut sângajomut, sâtojaliorpok 20nik,

26 Manguvîgniglo 40nik silbereojunik; manguvîgnik maggungnik sâtojab atausiub atâne, manguvîgniglo maggungnik sâtojab assiata atâne.

27 Tupiublo tukianut kangimut sângajomut sâtojaliorpok sixinik.

28 Sâtojaliorporlo maggungnik tupiub terrekunginut iglugêgnut.

29 Katitauvuglo atâgut, katitauvuglo kollâgut nuklomut atausermut; taimailiorpak terrekungine iglugêgne.

30 Sâtojat 80vut tagva; manguvîngillo 160vut silbereovlutik, manguvîgnik maggungnik sâtojat ilûnatik atâne.

31 Senningajoliorporlo kejutsiarsajamit; tellimanik tupiub senerangata igluata sâtojanginut,

32 Senningajuniglo tellimanik tupiub senerangata iglungata sâtojanginut, senningajuniglo tellimanik tupiub tukiata kangianêtub sâtojanginut.

33 Senningajorlo ketterdlek senavâ kaimerkovlugo sâtojat ketterkangagut.

34 Sâtojallo kallinekartipait goldemik, nuklungillo senningajut inniksangit senavait goldemit, senningajullo kallinekartipait goldemik.

35 **Talutaliorporlo** tungujoktamit, tungulângajomillo, aupalutsiartomillo, kablunâktajatsiamillo: Kerubingoakartilugo pinnarnarsautenik senavâ.

36 Nappajoliorivorlo tamattomunga sittamanik kejut-siarsajamit, kallinekartilugillo goldemik: kikkiangittauk goldeovut, tâpkonungalo auktitsivok manguvingnik sittamanik silbereojunik.

37 Tupiublo pânganut tâlutaliorpok tungujoktamit, tungulângajomillo, aupalutsiartomillo, kablunâktajatsiarmillo, takominarsauteliortaumajomik;

38 Nappajungillo tellimat kikkiaktangit illaliudlugit: ibjarutingillo kallinekartipait goldemik, ikârusingillo goldemik: manguvingille tellimat kakorleovut.

KAP. XXXVII.

Iklervik, iksivavik saimarvigijauvik assingillo senajauvut.

1 **BESALEELELO** iklerviliorpok kejut-siarsajamit: taller-tut maggotut abvatullo takitigivok, tallertullo atausertut abvatullo silliktigivok, tallertullo atausertut abvatullo pokto-tigivok.

2 Iluagullo sillatâgullo kallinekartipâ goldemik illakangit-mik, avaliarutaliorpâlo goldemik avatâgut.

3 Tâpsomungalo kovisivok nuklunik sittamanik goldeojunik, terrekunginêtuksanik sittamane; tagva nuklûk magguk senerangane igluane, nuklûglo magguk senerangane igluane.

4 Akkigauteliorporlo kejut-siarsajamit, kallinekartilugiglo goldemik.

5 Akkigautâglo illivak nuklunut iklerviub senerâging-nêtunut, iklerviub akkigariananut.

6 **Iksivaviglo** saimarvigijauvik senavâ goldemit illakangit-mit: tallertut maggotut abvatullo takitigivok, tallertullo atausertut abvatullo silliktigivok.

7 Kerubeliorporlo maggungnik goldeojûngnik, katjuklugik illuitomit senavak, iksivaviub saimarvigijauviub issûgingne iglugêngne;

8 Kerube atausek makkutsiata issuane, kerubelo atausek tâpkutsiata issuane igluane: iksivaviub saimarvigijauviub issûgingne iglugêngne senavak.

9 Kerubîglo esarkutik issivipait kollâgut, iksivaviglo saimarvigijauvik ulliklugo esarkumingnut, sângautilitik; iksivavingmut saimarvigijauvingmut kerubîk kênâgik sângavuk.

10 **Saliorporlo** kejutsiarsajamit: tallertut maggotut takitigivok, tallertullo atausertut silliktigivlune, tallertullo atausertut abvatullo poktotigilarme.

11 Kallinekartipâlo goldemik illakangitomik, avaliarutaliorpâlo goldemik avatâgut.

12 Pinnarnarsauteliorpâlo atâta avatâgut aggait sillingingititut silliktigijomik, siningalo avaliarutaliorpâ avatâgut.

13 Kovisivorlo tâpsomunga nuklunik sittamanik goldeojunik, nuklullo illivait niulungita sittamat terrekunginut sittamanut.

14 Nuklut sinakjuata atânêput, inniksauvlutik akkigautingnut sâ akkigartaurkovlugo.

15 Akkigauteliorpôrlo kejutsiarsajamit, kallinekartilugiglo goldemik, sâ akkigartaurkovlugo.

16 Perkuteliorpôrlo sâmiutanik goldeojunik illakangitomik, pôgutanginik, alupsautinginiglo, kajutanginiglo, kallutanginiglo kalluviojungnarkovlugo.

17 Nenneroakarviliorpôrlo goldeojomik illakangitomik: katjuksimajomik nenneroakarviliorpok; ikkogganga, akkerungillo, kingmingoangoangillo, paungangoangillo, nuvugulângoangillo tâmnatsainauvut:

18 Akkerkut 6 anivut senerâgingnit, nenneroakarviub akkerungit pingasut senerangata aipânit, nenneroakarviublo akkerungit pingasut seneranganit igluanit.

19 Kingmingoangoaliorpok pingasunik akkerome atauserme, paungangoamiglo, nuvugulângoamiglo; kingmingoangoaniglo pingasunik akkerkub assiane, paungangoamiglo, nuvugulângoamiglo; taimaglo akkerkut 6 nâvlugit anijut nenneroakarvingmit.

20 Nenneroakarvingmelo kingmingoangoakarpok sittamanik, paungangoaniglo nuvugulângoaniglo:

21 Paungangoamiglo akkerûk iglugêk atâne, paungangoamiglo akkerûk iglugêk atâne, paungangoamiglo akkerûk iglugêk atâne, akkerkut sixit anijut tâpsomangat maliklugit.

22 Paungangoangit akkerungillo tâmnatsainauvut: ilûnane goldeovok illakangitok katjuksimajok.

23 Kollingillo sevenit, takkersûtingillo, argjakautingillo, senavait goldemit illakangitomit.

24 Tâмна perkutingillo ilûnaita senavait goldemit illakangitomit talentemit.

25 **Tunerguserviliorpôrlo** isserluanititsivingmik tippitsiariksaumik kejutsiarsajamit: tallertut atausertut takitigivok,

tallertullo atausertut silliktigivok; iktokerikpok; tallertullo maggotut poktotigivok; nakjungillo tâmnatsainauvut.

26 Kallinekartipâlo goldemik illakangitomik, kângalo senerangillo avatâgut nakjungillo: avaliarutaliorpâlo goldemik avatâgut.

27 Nukloliorpâlo maggungnik goldemit avaliarutangata atâgut, terrekûgingne, senerâgingne iglutut, inniksaurkovlugik akkigautîngnut akkigarianganut.

28 Akkigautiliorporlo kejutsiarsajamit, kallinekartilugiglo goldemik.

29 Orksuliorporlo ivsornaitomik mingoarutiksamik, isserluanerutiksamiglo illakangitomik tauvlukutenit mamaktunit, tippitsiariksautelerijub senasôngonina maliklugo.

KAP. XXXVIII.

Tunerguservik tunergutinik ôtaksanik. Ubvarvik. Avaluliorsi-majok. Inuit tunergutingita unurningit.

1 **TUNERGUSERVILIORPORLO** tunergutinik ôtaksanik kejutsiarsajamit; tallertut tellimatut takitigivok, tallertullo tellimatut silliktigivok; iktokerikpok; tallertullo pingasutut poktotigivok.

2 Nakjungillo illivait terrekungine sittamane; nakjungit tâmnatsainauvut: kallinekartipaillo kakorlermik.

3 Tunerguserviublo perkutingit, argjakautit, kallugautillo, pôgutaujat, kapokautillo, aumakautillo senavait; perkutingit ilûnaita senavait kakorlermit.

4 Killapatâliorporlo nulluangojârtomik tunerguservingmut ikomakarvingata atânêtuksamik kerkane.

5 Auktitsivorlo nuklunik sittamanik killapatâb kakorliojub issûgingnut, inniksaurkovlugit akkigautîngnut.

6 Akkigautiliorporlo kejutsiarsajamit, kallinekartilugiglo kakorlermik.

7 Akkigautîglo kaimipak nuklunut tunerguserviub senerâgingnêtnut, akkigarianganut; tunerguservik senavâ sâtojanit illuliotilugo.

8 Ubvarviliorporlo kakorlermit, ikkoggangalo kakorlermit, arnat illagêktut tupingata pângane kivgartortut tachar tûtinginit.

9 **Tupiublo** avatâ avaluliorpâ: senerangane sekerngane avalut tâlutangit kablunâktajatsiangovut, tallertut 100tut.

10 Nappajungit 20ovut, manguvingillo kakorleojut, 20; nappajullo kikkiangit ikârusingillo silbereovut.

11 Sennerangane tachâne tâlutakarpok tallertut 100tut, nappajungillo 20ovut, manguvingillo 20; nappajullo kikkiangit ikârusingillo silbereovut.

12 Seneranganelo kangiane tâlutakarpok tallertut 50tut, nappajungit 10, manguvingillo 10; nappajullo kikkiangit ikârusingillo silbereovut.

13 Tukianelo kitâne tallertut 50tut.

14 Tâlutat itertarviub senianêtut igluane tallertut 15tut iput; nappajungit pingasut, manguvingillo pingasut.

15 Avalullo itertarvingata igluane, ikanelo mânelo, tâlutakarpok tallertut 15tut; nappajungillo pingasut, manguvingillo pingasut.

16 Avalut tâlutangit ilûnatik avatâne kablunâktajatsiangovut.

17 Nappajullo manguvingit kakorleovut; nappajut kikkiangit ikârusingillo silbereovut; ibjarutingitalo kalliningit silbereovut; avalullo nappajungit ikârusertauvut silberemik.

18 Avalullo itertarviata tâlutanga pinnarnarsauteliortaujok senasimavok tungujoktamt, tungulângajomillo, aupalutsiartomillo, kablunâktajatsiamillo: tallertullo 20tut takitigivok, tallertullo tellimatut silliktigivok kongmut, avalut tâlutangit poktokatigivlugit.

19 Nappajungillo sittamauvut, manguvingillo kakorleojut sittamat; kikkiangit silbereovut, ibjarutingillo kalliningit ikârusingillo silbereovut.

20 Tupiublo avalullo avatâne kikkiangit ilûnatik kakorleovut.

21 **Tamadja** tagva katersortaujut tupermut ilingajut, kiglgiutjinektaliub tupinganut, sorlo kititaungmatta Mosesib perkojanga maliklugo, Levikut atorianginut, Itamâb, Aronib ajokertuijub erningata agganginut.

22 Bêsalêliblo, Hurib erningata Urib erninga, kinguvârênit Judakunit, senavait tamaita NâleKab perkojijutigijangit Mosesemut.

23 Aiparivâlo Ahâlia, Ahîsamab erninga, kinguvârênit Dânekunit, alligolerijok, kakiarnangitok sulijok, pinnarnarsauteliortorlo tungujoktame, tungulângajomelo, aupalutsiartomelo, kablunâktajatsiamelo.

24 Golde ilûnane atortaujok suliaksamut ivsornaitoviub senajauningane ilûnâne, golde tunijaujok, talenteovok 29nik,

sêkeleniglo 730nik, ivsornaitoviub sêkelinga maliklugo. (\$750,000.00tut akkitutigijok.)

25 Silberelo, illagênut kititaumajut tunijangit, talenteovok 100nik sêkeleniglo 1775nik, ivsornaitoviub sêkelinga maliklugo: (\$176,035.00.)

26 Inungnut tamainut attunit bekamik, tagva sêkelib abvanganik, ivsornaitoviub sêkelinga maliklugo, nâvlugit kititaugiartortut, 20nik jârekartut kângiutijullo, tagva inuit 603,550.

27 Talentenit 100nit silberemik ivsornaitoviub manguvingit, upkublo manguvingit kovijauvut, manguvit 100 talentenit 100nit, talente atausek manguvingmut atausermut.

28 Sêkelenillo 1775nit kikkialiorpok nappajunut, ibjarutینگillo kallinekartipait, ikâruseliortalunelo.

29 Kakorlerlo tunijaujok talenteovok 70nik, sêkeleniglo 2,400nik.

30 Tagvangallo senavait illagêktut tupingata pângata manguvingit, tunerguserviglo kakorleojok, killapatârlo kakorleojok tâpsoma piksanga, tunerguserviublo perkutingit,

31 Avalullo avatânênut manguvingit, avalullo itertarvingata manguvingit, tupiublo kikkiangit, avalullo avatânênut kikkiangit.

KAP. XXXIX.

Kivgartortut annorângit atoriakartangillo senajauvut âtauvlutiglo Mosesemut, tâpsomalo nâmagivait.

1 **TUNGUJOKTAMILLO**, tungulângajomillo, aupalutsiartomillo annorâliorput kivgartornermut ilingajunik, kivgartornermut ivsornaitovingme, annorâliorpullo ivsornaitunik Aronib piksanginik, sorlo NâleKab Mosese perkongmago.

2 Ikiarlo senavâ goldemit, tungujoktamillo, tungulângajomillo, aupalutsiartomillo, kablunâktajatsiamillo.

3 Goldelo katjukpât saglilugo, killilugolo ilerksangortipât, akkulerêktilugillo tungujoktak, tungulângajorlo, aupalutsiartorlo, kâblunâktajatsiarlo takominarsausertaujut akornganut.

4 Kivilerêkutaualiorpâlo katitaurkovlugo: sinîgikkut iglotut katitauvok.

5 Ikiangatalo tapserutâ tâpsomanêtok tâmnatsainauvok, senajauninga maliklugo; goldemit, tungujoktamillo, tunulângajomillo, aupalutsiartomillo, kablunâktajatsiamillo; sorlo NâleKab Mosese perkongmago.

6 **Alliguniglo** tungujuângajunik senavut avaliarutsilugillo goldemik, aglagvigivlugit, sorlo nakitjut aglagviongmat, Israêlib kitorngangita attinginik.

7 Illivaillo ikiab tuîgingnut, ujaraulerkovlugit erkaumajaujutiksanik Israêlikunut; sorlo Nâlekab Mosese perkongmago.

8 Sagvingmiutaliorporlo illisimanartomik, ikiab senajau-ningatut; goldemit, tungujoktamillo, tungulângajomillo, aupalutsiartomillo, kablunâktajatsiamillo.

9 Iktokerikpok; sagvingmiutak tappitarêktilugo senavât: aggait isangningatut takitigivok, aggaillo isangningatut siliktigivok, tappitarêkporlo.

10 Illijivigivâllo alligunik siaktunik sittamanik senilerêktunik: siaktut sivorlît tamadja, Ruby, Topaz, Karbunkelelo: tâpkoangovut siaktut sivorlît.

11 Siaktullo aipanga, Emeralde, Safirelo, Diamantelo.

12 Siaktullo pingajuat, Ligure, Agatelo, Amitistelo.

13 Siaktullo sittamangat, Berile, Onikselo, Jasperelo: illijauvut avaliarutanut goldeojunut.

14 Allikullo 12ovut Israêlib kitorngangita attingit maliklugit, aglagviovlutik attinginik, nakitjutib aglagvioningatat, attunit attekartutik kinguvârêt maliklugit.

15 Sagvingmiutarmelo kelaumgujaliorput issûgingne, goldemit illakangitomit kepjarsimajomit.

16 Senneroaliorpullo maggungnik goldeojûngnik, nuklûngniglo maggungnik goldeojûngnik; nuklûglo atsungersorpakit sagvingmiutab issûgingnut.

17 Kelaumgujâglo goldeojûk kepjartâk nuvivakit nuklûngnut maggungnut sagvingmiutab issûgingnêtûngnut.

18 Kelaumgujâglo kepjartâk goldeojûk issûgik atsungersorpakit senneroângnut, illivlugiglo ikiab kivilerêkutaújâgingnut, sâgingnut.

19 Nuklolorpullo maggungnik goldeojûngnik illilugiglo sagvingmiutab issûgingnut sinâgingnut, illuanut, ikiarmut sângavlutik.

20 Tâpkoalo assûgingnik maggungnik nuklolorput atsungersorlugiglo ikiab senerâgingnut iglutut, atsungervîk sâkita nellâgingnut, ikiab tapserutingata kollânut.

21 Sagvingmiutarlo kelaksorpât nuklûngmigut ikiab nuklûgingnut kelarutemut tungujoktamut ikiab tapserutingata kollânêrkovlugo, sagvingmiutarlo atsungerudjarkonago ikiarmit; sorlo Nâlekab Mosese perkongmago.

22 **Ikiablo** attigiujanga senavâ pergaimajomit, ilûnât tungujoktamt.

23 Attigiujarlo kerkagut itervikarpok, sorlo sorsuktuksab annorângata itervingatut, itervingalo nuilatârtauvok, allir-konago.

24 Attigiujablo periningane paungangoaliorput tungujoktamt, tungulângajomillo, aupalutsiartomillo, kablunâktajatsiamillo.

25 Sivanearsuliorpullo goldeojunik illakangitomit, sivanearsuillo pitipait paungangoat akornganut attigiujab periningane, avatâgut paungangoat akornganut;

26 Sivanearsuk paungangoarlo, sivanearsuk paungangoarlo, avatâgut attigiujab kivgartûtib periningane; sorlo NâleKab Mosesek perkongmago.

27 Ulliliorpullo kablunâktajatsiamit senasimatsiartomit Aronemut erninginullo,

28 Nesslerugarmiglo kablunâktajatsiamit, sivumiutaniglo kablunâktajatsiamit, karlingniglo kablunâktajatsiamit,

29 Tapserumiglo kablunâktajatsiamit, tungujoktamillo, tungulângajomillo, aupalutsiartomillo, nuilapaujaksajamt; sorlo NâleKab Mosesek perkongmago.

30 **Nesslerugaublo** ivsornaitub sivumiutanga senavât goldeomit illakangitomit, aglagvigivlugolo aglangnik, sorlo nakitjutib aglangititut: IVSORNAITOK NALEKAMUT.

31 Kellaruserpâllo kellarutemik tungujoktamik, nesslerugaub kânganut atsungersortaurkovlugo; sorlo NâleKab Mosesek perkongmago.

32 **Taimak** suliaksat ilûnatik illagêktut tupingane ivsornaitome pijarêrtavut: Israêlikullo piniarput tamainik NâleKab perkotijutigijangit tamaita Mosesemut maliklugit, taimak piniarput.

33 Tuperlo âpât Mosesemut, tupek, perkutingillo, sene-roangit, sâtojangillo, ikârusingillo, nappajungillo, manguvingillo,

34 Mattuksarlo saukat angusaluit aminginit aupaluktitaumajunit, mattuksarlo kabvît aminginit, upkoksablo tachititsijub tâlutangit,

35 Iklervik kiglitiutjinektalik, akkigautîgiglo, iksivaviglo sainarvigijauvik,

36 Sâ perkutingillo tamaita, kakkôjallo takonâraksat,

37 Nenneroakarvik ivsornaitok kollingillo, illâ, kollît atuinaujut perkutingillo ilûnaita, orksorlo kollît piksangit,

38 Tunerguserviglo goldeojok, orksorlo mingoarutiksak, tippitsiariksautiksallo naimajominartut, tâlutarlo tupiub pângata piksanga,

39 Tunerguservik kakorleojok, killapatângalo kakorleojok, akkigautîgik, perkutingillo tamaita, ubvarvik ikkoggangalo,

40 Avalut tâlutangit, nappajungit, manguvingillo, avalullo itertarvingata tâlutangit, aklunângillo, kikkiangillo, perkutillo tamaita kivgartornermut tuperme, illagêktut tupingane,

41 Annorât kivgartûtut kivgartornermut ivsornaitovingme, annorâllo ivsornaitut Aronemut, ajokert ijôjomut, erningitalo annorângit kivgartornermut ajokertuijôneme.

42 Nâlekab perkojijutigijangit Mosesemut tamaita maliklugit, taimak Israêlikut suliaxsat suliarivait.

43 Mosesiblo senajaujut tamaita kemergovait, ahâglo, piniarsimavait sorlo Nâlegak perkojingmat, taimaluatsiak piniarsimavait: Mosesiblo saimauserpait.

KAP. XL.

Tuperterkojauvut. Nuvujab tupek ullikpâ.

1 **NALEKABLO** Mosese okarvigivâ, okarlune:

2 Takkiub sivorlerpâb uvlungita sivorlerpângane tupertertuksauvotit illagêktut tupinganik.

3 Iklerviglo kigligiutjinektalik illijaksarivat takamunga, tachilugolo iklervik tâlutamut.

4 Sâlo itertitaksarivat, âkiksorlugillo âkiksortaujariakartut kângane; nenneroakarviglo itertitaksarivat, kollingillo ikilugit.

5 Tunerguserviglo goldeojok isserluanititsivik iklerviub kigligiutjinektaliub sânganut illijaksarivat, tupiublo pângata tâlutanga âkiksorlugo.

6 Tunerguserviglo tunergutinik ôtaksanik pititaksarivat illagêktut tupingata ivsornaitoviub pângata sânganut, tâlutarlo âkiksorlugo tupiub pângane.

7 Ubvarviglo pititaksarivat illagêktut tupingata tunerguserviublo akorngangnut, imilugolo.

8 Avalullo avatânêttut âkikscraksarivatit, tâlutallo nivingatilugit avalut itertarvinganut.

9 Orksorlo mingoarutiksak tigujaksarivat tuperlo mingoarlugo, ilûnaitalo takkamanêttut, ivsornaititaksarivallo perkutingillo tamaita: ivsornaituksauvorlo.

10 Tunerguserviglo tunergutinik ôtaksanik mingoarak-

sarivat perkutingillo tamaita, tunerguserviglo ivsornaitilugo: tunerguserviojuksauvorlo ivsornainerpâmik.

11 Ubvarviglo ikkoggangalo mingoaraksarivakik ivsornaitilugiglo.

12 Aronelo erningillo tikkititaksarivatit illagêktut tupingata pânganut ubvarlugillo imermut.

13 Aronelo attititaksarivat annorânik ivsornaitunik, mingoarlugolo, ivsornaitilugolo; kivgartorkovlugo uvamnut ajokertuijônerme.

14 Erningillo tikkititaksarivatit annorârtilugillo ullingnik:

15 Mingoaraksarivatillo sorlo atâtangat mingoarangne, kivgartorkovlugit uvamnut ajokertuijônerme: mingoartauningillo ajokertuijungortitaujutiksauvok nâksaungitok kinguvângitigut.

16 Taimailiorpok Mosese: Nâlekab perkojangit tâpsomunga tamaita maliklugit, taimailiorpok.

17 **Jariblo** aipangata takkingita sivorlerpângata uvlungita sivorlerpângane, tupek nappartitauvok.

18 Moseselo tuperterpok, manguvingillo atsungersorpait, sâtojangillo napparlugit, senningajungillo illivlugit nappajungillo napparlugit.

19 Mattuksarlo illullerpâk issipterpâ tupiub kollâgut, mattuksarlo sillallek tâpsoma kânganut illivlugo, sorlo Nâlekab Mosese perkongmago.

20 Kigligiutjinillo tiguvaît pôrlugillo iklervingmut, akkigautiglo illivak iklervingmut, iksivaviglo saimarvigijauvik illivâ iklerviub kânganut:

21 Iklerviglo itertipâ tupermut, upkolo tachititsijok âkik-sorpâ, iklerviglo kigligiutjinektalik tachipâ; sorlo Nâlekab Mosese perkongmago.

22 **Salo** itertipâ illagêktut tupinganut, tupiub seneranganut tachardlermut, upkub sillatânut.

23 Kakkôjallo âkiksorpait kânganut Nâlekab sângane; sorlo Nâlekab Mosese perkongmago.

24 Nenneroakarviglo pitipâ illagêktut tupinganut, sâb akkianut, tupiub seneranganut sekkinerdlermut.

25 Kollillo ikipait Nâlekab sângane; sorlo Nâlekab Mosese perkongmago.

26 Tunerguserviglo goldeojok pitipâ illagêktut tupinganut, upkub sânganut;

27 Kânganelo ikitsivok tippitsiariksautiksanik; sorlo Nâlekab Mosese perkongmago.

28 **Talutarlo** âkikisorpâ tupiub pânganut.

29 Tunerguserviglo tunergutiksanik ôtaksanik illivâ illagêktut tupingata ivsornaitub pângata sivorânut, tunerguserlunelo kângane tunergutemik ôtaksamik, tunergutemiglo nerkiksamik; sorlo Nâlekab Mosesese perkongmago.

30 **Ubvarviglo** pitipâ illagêktut tupingata tunerguserviublo akorngangnut, imilugolo ubvautiksamik.

31 Moseselo Aronelo erningillo agгатик ittigatiglo ubvarpait tagvane:

32 Iterangamik illagêktut tupinganut, najornigangamiglo tunerguservingmik, ubvarput; sorlo Nâlekab Mosesese perkongmago.

33 Avalullo napparpait tupiub tunerguserviublo avatâgut, tâlutarlo âkikisorpâ avalut itertarvinganut. Taimaglo Mosesib suliaksak pijarêrpâ.

34 **Tagva** nuvujab illagêktut tupingat ullikpâ, Nâlekablo ânanauningata tupek illumavâ.

35 Moseselo iterungnangilak illagêktut tupinganut, nuvujab kânganêngmat, Nâlekablo ânanauningata tupek illumangmago.

36 Nuvujjarlo kangatarangat tupiub kânganit, Israêlikut sivumuarput ingerganingine tamât.

37 Nuvujarle kangatalungipat, tagva ingergalungilat uvlok kangatarvinga tikkitsiarivlugo.

38 Nâlekab nuvujanga tupiub kânganêngmat uvlôtilugo, ikomalo kânganêngmat unnuarme, Israêlikut ilûnatik ta-koane, ingerganingat ilûnât nâvlugo.

Printed in Great Britain
by
Billing and Sons, Ltd., Guildford and Esher

